



BIBLIOTECA NAZ.
Vittorio Emanuele III

XXIII

E

25

NAPOLI

11/11/11



PHILOSOPHIA
RECENTIOR

PRÆLECTIONIBUS PUBLICIS
ACCOMMODATA

A Patre

MAXIMO MANGOLD

Soc. Jesu

IN CATHOLICA ET ELECTORA-
LI UNIVERSITATE INGOLSTADIENSI
NUPER PHILOSOPHIÆ, NUNC
SS. THEOL. PROFESSORE.

TOMUS POSTERIOR

COMPLECTENS

PHYSICAM PARTICULAREM.

CUM PRIVILEGIO CÆSAREO

Et

SUPERIORUM FACULTATE.

Monachii, & Ingolstadii

Sumptibus JOANN. FRANC. XAV. CRÆTZ,
Bibliop. Academ. Ingolstadii, & THOMÆ SUMMER,
Bibliop. Augustæ.

M D CC LXIV.





SERENISSIMO

Ac

POTENTISSIMO

PRINCIPI

DOMINO DOMINO

MAXIMILIANO

JOSEPHO

**UTRIUSQUE BAVARIÆ
ET SUPERIORIS PALATINATUS**

DUCI

COMITI PALATINO RHENI

SACRI ROMANI IMPERII

ARCHIDAPIFERO

Et

ELECTORI

LANDGRAVIO LEUCH-

TENBERGENSI &c. &c.

PRINCIPI

Ac

DOMINO CLEMENTISSIMO.



**Facultas R. P. Provincialis S. J. cum
Privilegio Cæsareo.**

Cum DD. Franciscus Xaverius Crätz, & Thomas Summer typis vulgare desiderent librum, cui titulus: *Philosophia Recentior &c.* a P. Maximo Mangold Societatis nostræ Sacerdote idiomatice latino conscriptum, ego Ignatius Rhomberg, ejusdem Societatis per Germaniam Superiorem Præpositus Provincialis, potestate ad id mihi facta ab Adm. R. P. N. Laurentio Ricci universæ Societatis Præposito Generali, eisdem ad primam editionem dicti operis facultatem impertio, simulque communico Privilegium Cæsareum, quo Bibliopolis ac Typographis omnibus interdicitur, ne librum ullum, a nostris conscriptum, citra consensum Superiorum typis edere, vel recudere, aut intra fines S. R. I. inferre præsumant. In cuius rei fidem has eis manu propria subscriptas, & consueto officii mei sigillo munitas dedi.

Landspergæ 24. Aug. 1763.

(L.S.)

Ignatius Rhomberg.

X 3

CONSPECTUS MATERIARUM TOMI POSTERIORIS PHYSICÆ PARTICULARIS Pars Prima.

De Mundo Animato.

Dissertatio Prima.

De Corpore Humano.

Artic. I. Structura Corporis Humani.	Pag. 3.
§. 1. <i>Quæ sint Partes Communes Corporis humani?</i>	4.
2. <i>Quas Partes contineat Regio prima?</i>	7.
3. <i>Quas complectatur secunda Regio?</i>	9.
4. <i>Quas Regio infima?</i>	11.
Artic. II. Nutritio Corporis Humani.	13.
§. 1. <i>De Chylosi, & Hematosi.</i>	ibid.
2. <i>De Circulatione Sanguinis.</i>	16.

Dissertatio Secunda.

De Organis Sensuum, eorumque objectis.

Artic. I. De Organo, & Objecto Auditus.	26.
§. 1. <i>Structura Auris.</i>	ibid.
2. <i>An ad Soni genesis requiratur tremor corporis sonori?</i>	29.
3. <i>An ad Sonum requiratur motus tremulus medii?</i>	31.
4. <i>In quo consistat Sonus?</i>	35.
5. <i>Alia ad Sonum pertinentia?</i>	46.
Artic. II. De Organo, & Objecto Visus.	52.
Sectio I. De Visione in genere.	ibid.
§. 1. <i>Structura Oculi.</i>	ibid.
2. <i>Quomodo fiat Visio?</i>	54.
3. <i>Qua parte Oculi fiat Visio?</i>	59.
Sectio II. De Visione in Specie.	62.
§. 1. <i>Principia Optica.</i>	63.
2. <i>Principia Perspectiva.</i>	71.
3. <i>Principia Catoptrica.</i>	86.
4. <i>Principia Dioptrica.</i>	92.
Sectio III. De Lumine.	99.
§. 1. <i>Sententia Aliorum.</i>	ibid.
2. <i>Sententia Nostra.</i>	101.
	Se-

Sectio IV. De Diaphaneitate Corporum.	117.
§. 1. <i>Prenotanda.</i>	<i>ibid.</i>
2. <i>Prima Sententiae Fundamenta.</i>	121.
3. <i>Ejusdem difficultates.</i>	125.
4. <i>Fundamenta Secunda Sententiae.</i>	131.
5. <i>Istius Difficultates.</i>	134.
6. <i>Quid de Diaphaneitate corporum videatur esse statuendum?</i>	139.
7. <i>Quomodo explicanda videatur Refractio Luminis?</i>	147.
8. <i>Quomodo explicanda Reflexio Luminis?</i>	153.
Sectio V. De Coloribus.	162.
§. 1. <i>In quo consistant Colores?</i>	163.
2. <i>Quam Modificationem Luminis requirant Colores Extremi.</i>	166.
3. <i>Quam Modificationem requirant Colores Medii?</i>	174.
4. <i>An Radii Luminis e corpore lucido egredientes sint diversimode refrangibiles?</i>	176.
5. <i>An Radii ex ipsa natura sua sint diversimode refrangibiles?</i>	186.
6. <i>Undenam proveniat diversa Radiorum refrangibilitas?</i>	189.
7. <i>Origo Colorum permanentium?</i>	200.
8. <i>Alia quaedam Colorum phenomena?</i>	208.
Artic. III. De Organo, & Objecto Gustus.	210.
Artic. IV. De Organo, & Objecto Odoratus.	214.
Artic. V. De Organo, & Objecto Tactus.	219.
§. 1. <i>De Organo Tactus.</i>	<i>ibid.</i>
2. <i>De Calore.</i>	220.
3. <i>De Frigore.</i>	231.
4. <i>De Soliditate Corporum.</i>	238.
5. <i>De Fluiditate Corporum.</i>	248.
6. <i>De aliis Qualitatibus Tactilibus.</i>	254.
Artic. VI. De Sensatione, & Sensibus Internis.	258.
§. 1. <i>De Sensu Communi.</i>	259.
2. <i>De Phantasia.</i>	260.
3. <i>De Memoria.</i>	262.
4. <i>De Intellectu.</i>	265.
5. <i>De Voluntate.</i>	267.
6. <i>Quaestiones variae huc revocanda.</i>	270.

Dissertatio Tertia. De Plantis.

Artic. I. Structura Plantarum.	273.
Artic. II. Origo Plantarum.	275.
§. 1. An Plantæ omnes nascantur ex semine?	ibid.
2. Undenam oriatur ipsum Semen?	277.
Systema Evolutionis.	ibid.
Systema Peripati.	284.
Systema P. Honorati Fabri.	286.
Artic. III. Nutritio Plantarum.	293.

PHYSICÆ PARTICULARIS

Pars Secunda.

De Mundo Elementari.

Dissertatio Prima.

De Elemento Ignis.

Artic. I. Natura Ignis, & Flammæ.	308.
Artic. II. Phænomena Electricitatis.	308.
§. 1. Statuitur Principium generale.	ibid.
2. Applicatio Principii ad Phænomena Electrica in genere.	313.
3. Ad Phænomena Attractionis, & Repulsionis.	317.
4. Ad Phænomena Phosphorescentiæ.	323.
5. Ad Phænomena Succussionis.	328.
Artic. III. Meteora Ignea.	331.
§. 1. De Fulgure, ac Fulmine.	ibid.
2. De Aurora Boreali.	335.
3. De reliquis Meteoris Igneis.	338.

Dissertatio Secunda.

De Elemento Aeris.

Artic. I. Natura, & Altitudo Aeris.	340.
Artic. II. Meteora Aerea, & Emphatica.	343.
§. 1. De Ventis.	ibid.
2. De Iride.	346.
3. De Halone, Paveiis, aliisque.	355.

Dissertatio Tertia.

De Elemento Aquæ.

Artic. I. Natura Aquæ in genere.	360.
Artic. II. Aqua Maris, & Fontium.	361.
§. 1. De Affectionibus Aquæ Marinae.	ibid.
2. De Aestu Maris.	363.
Expenditur Sententia Prima.	365.

Son-

<i>Sententia Secunda.</i>	-	-	375.
<i>Sententia Tertia.</i>	-	-	379.
3. <i>De Origine Fluminum, ac Fontium.</i>	-	-	380.
Artic. III. <i>Meteora Aquea.</i>	-	-	390.

Dissertatio Quarta.

De Elemento Terræ.

Artic. I. <i>De Terra, variisque Fossilibus.</i>	-	-	395.
§. 1. <i>De Terra Elementari, ac Fossili.</i>	-	-	ibid.
2. <i>De Salibus, & Succis Mineralibus.</i>	-	-	398.
3. <i>De Lapidibus.</i>	-	-	402.
4. <i>De Metalis, & Semimetallis.</i>	-	-	403.
5. <i>De Magnete.</i>	-	-	414.
Art. II. <i>De Globo Terraqueo.</i>	-	-	424.
§. 1. <i>De Figura Globi Terraquei.</i>	-	-	ibid.
2. <i>De Origine Montium.</i>	-	-	433.
3. <i>De Terra Motibus.</i>	-	-	435.

PHYSICÆ PARTICULARIS

Pars Tertia.

De Mundo Sidereo.

Dissertatio Prima.

De Mundi Systematibus.

Artic. I. <i>Prænotanda.</i>	-	-	439.
Artic. II. <i>Varia Mundi Systemata.</i>	-	-	444.
§. 1. <i>Systema Ptolemaicum.</i>	-	-	445.
2. <i>Systema Copernicanum.</i>	-	-	446.
3. <i>Systema Tychoenicum.</i>	-	-	453.

Dissertatio Secunda.

De Cœlis.

Art. I. <i>De Cœlo Stellifero.</i>	-	-	463.
§. 1. <i>De Stellis Fixis.</i>	-	-	ibid.
2. <i>De Stellis Novis.</i>	-	-	466.
3. <i>De Cometis.</i>	-	-	469.
Art. II. <i>De Cœlo Planetario.</i>	-	-	482.
§. 1. <i>De Sole.</i>	-	-	ibid.
2. <i>De Maculis Solaribus.</i>	-	-	483.
3. <i>De Luna.</i>	-	-	498.
4. <i>De Motu & Phasibus Lune.</i>	-	-	506.
5. <i>De Mercurio, & Venere.</i>	-	-	506.
6. <i>De Marte, Jove, & Saturno.</i>	-	-	509.
7. <i>De Eclipsibus Planetarum.</i>	-	-	512.
8. <i>De Vi Motrice Astrorum.</i>	-	-	521.
9. <i>De Astrorum in Sublunaria Influenc.</i>	-	-	523.

Pag.	Lin.	Errata.	Corrige.
113.	1.	<u>concipiatur</u>	- <u>excipiatur.</u>
148.	12.	<u>diversa</u>	- <u>diversæ.</u>
215.	36.	<u>hermetico</u>	- <u>hermetice.</u>
216.	22.	<u>amonica</u>	- <u>amoniaco.</u>
302.	1.	<u>poribus</u>	- <u>corporibus.</u>
360.	14.	<u>caloreumve</u>	- <u>coloreumve.</u>
367.	31.	<u>in</u>	- <u>in C.</u>
393.	11.	<u>propiores</u>	- <u>propiores.</u>
422.	39.	<u>vortiosum</u>	- <u>vorticosum.</u>
473.	28.	<u>a Terræ</u>	- <u>a Terra.</u>
476.	16.	<u>appare</u>	- <u>apparere.</u>

Quæ vel relegentis attentionem effugere, vel momenti levioris sunt, Lector ipse benevole corriget.



PHILOSOPHIA RECENTIOR

PRÆLECTIONIBUS PUBLICIS
ACCOMMODATA.

TOMUS POSTERIOR.



Uæ Tomo præcedente pertractata a nobis
in Physica sunt, non nisi in genere cir-
ca corpus, tanquam objectum scientiæ
istius, versabantur. Explicata ibidem
fuere principia, ex quibus corpora, dum
oriuntur, coalescunt, & in quæ, dum pereunt, resolvun-
tur. Declaratæ dein sunt affectiones, attributa, ac pro-
prietates, quas corporibus ex æquo omnibus communes
esse tum ratio, tum experientia docet, ut hinc, quid in
A quovis

quovis corpore attendi præ cæteris debeat, ipso mox in limine Philosophus disceret. Denique, cum per motum omnia ferme, quæ in natura corporea sunt, phænomena eveniant, examinata etiam sunt, quæ motus, acquietis naturam, causas, diversitatemque, atque ortam inde pressionem, hujusque effectus concernunt. Principiis hisce universalibus probe imbuta semel si mens fuerit, securius jam interiora Physices penetralia subit, magisque distinctam corporum notitiam inquirat, quam dabit

PHYSICA PARTICULARIS.

HAud equidem singulas corporum naturalium species expendendas sibi sumit hæc Physicæ pars : istud namque non aliquot mensium, qui studio ejus concedi plerumque solent, sed annorum labor foret; præcipuas tamen illarum attingit ita, ut per data circa eas principia ad cæteras etiam intimius pernoscentas planiorem pandat viam. Corpora porro, quorum contemplatione Physica Particularis occupatur, in tres potissimum classes distinguere possunt. In prima (ANTHROPO- & ZOOLOGIAM nuncupant) sunt ea, quæ Mundum Animatum constituunt; quæ revocari etiam poterunt Vegetabilia, objectum PHYTOLOGIÆ. In classe altera statuuntur Elementa, quæ confiderat STOECHIOLOGIA; cumque in ipsis elementis varia subin appareant corpora, oculo philosophico digna, isti mox jungitur METEOROLOGIA. Classem tertiam efficit Mundus Sidereus, quem explicat COSMOLOGIA & ASTRONOMIA. Tribus partibus isthæc complectemur, *Eo Duce*, cujus Sapientiam, Potestatemque mundus hic universus tot veluti linguis prædicat, quot creaturas spectandas nobis, mirandasque exhibet.



PHY-

PHYSICÆ
PARTICULARIS
PARS PRIMA.
DE MUNDO ANIMATO.

HUc revocari solent, quæ de corpore humano, de brutis, atque etiam de plantis Physica considerat. De Brutis quoniam in Psychologia Dissert. III. actum jam est, eorum vero, quæ hic de corpore humano dicentur, plurima brutis quoque conveniunt, non est, cur de his uberius differamus. Considerabimus itaque corpus humanum, sensuum ipsius organa, horumque objecta, ac postmodum plantas, quamquam istæ, ut videbimus, proprie non sint corpus animatum,

DISSERTATIO I.
DE CORPORE HUMANO.
ARTICULUS I.
STRUCTURA CORPORIS
HUMANI.

Receto Anatomicis more corpus humanum tres in regiones dividimus. Prima Caput, altera Thoracem, tertia Abdomen, seu Ventrem complectitur. Has regiones antequam ingrediamur, videndum prius,

§. I.

QUÆ SINT PARTES COMMUNES CORPORIS HUMANI?

1. **H**As inter primo occurrunt *Ossa*, quæ sunt substantia sicca, dura, solida, & sensus expers, cæteris partibus firmandis, fulciendis, ac muniendis nata. *Ossa* in corpore humano minimum sunt 247. alii ultra 300. numerant. *Membrana*, quæ exceptis dentibus ossa omnia vestit, *Periostium* nuncupatur, estque sensus acutissimi; illa remota secari, atque uri ossa sine doloris sensu possunt. Intra ossium cavitates est *Medula*, substantia unctuosâ, quæ succum ossibus, ne arescant, suppeditat. Tota compages ossium inter se rite junctorum *σκελετον* græcis appellatur, ac denno in tres partes dividitur, scilicet in Caput, Truncum, & Artus.

2. Capitis dimidium superius vocatur *Cranium*; istius pars anterior *Sinciput*, posterior *Occiput* dicitur; partes laterales vero *Tempora*. *Cranium* est receptaculum Cerebri, subtili membrana, quam *Pericranium* vocant, obductum. Forma cranii in homine ad rotunditatem accedit ita tamen, ut antèrius, & posterius plerumque non nihil promineat; si non protuberet, sunt, qui defectum ingenii inde argui posse existiment. *Ossa* cranii inter se junguntur *Suturis*; & siquidem jungantur eo modo, quo duæ ferræ implicatis inter se dentibus conjunguntur, dicuntur *futura vera*; si autem os unum obtegat limbum alterius instar squamarum in piscibus, *futura spuria*, aut squammosæ nuncupantur. Totius capitis pars anterior vocatur *Facies*, ejusque pars supremâ *Frons*.

Alterum capitis dimidium, inferius nempe, dicitur *Maxilla*, una superior ac immobilis, altera inferior ac mobilis. Superior quatuor habet prominentias, unam in naso, duas in malis, & quartam, quæ dentium originem continet. Utriusque maxillæ cavitatibus, quas *Alveolos* vocant, infixi sunt dentes communiter numero 32. nempe 16. in superiore, totidemque in inferiore maxilla. Anteriores quatuor dicuntur *Incisores*, eoquod incidunt

eidant alimenta ; vocantur etiam *Gelasini* , quia ridentibus nobis apparent. Post incisores ex quolibet latere sequuntur duo *Canini* , sic dicti , quia sunt reliquis acutiores , & diffringunt , quod priores scindere non valent. Reliqui vocantur *Molares* , molendis , terendisque cibis destinati , quatuor e dextra , ac totidem e sinistra parte locati. Ex his postremi tardius crescunt , & interdum unus eorum primum anno ætatis trigesimo prodit , propterea dens sapientiæ dictus. Dolor dentium non in ipsis dentibus est , sed in eorum nervulis , venis , & alveolorum membranis.

3. Inter ossa trunci præcipuum est *Spina dorsi* constans 30. *vertebris* , seu ossibus intus cavis , & ita inter se nexis , ut moveri , & verti queant. 24. illarum dicuntur veræ , e quibus ordinarie 7. sunt in collo , 12. in dorso , & 5. in lumbis ; 6. postremæ , quæ sic dictum *Os sacrum* constituunt , dicuntur spurix , eoquod moveri nequeant. Post colli vertebrae in parte anteriore veniunt duo ossa , dicta *Clavicula* , quia instar clavorum scapulas nectunt *Sterno* , sive ossi pectoris , quod est os semicartilagineum , in anteriore thoracis parte situm , & in quod costæ desinunt. *Costæ* autem sunt ossa arcuata , quæ omnes parte sua posteriore insiguntur vertebrae spinæ dorsi ; numerantur ex quolibet latere 12. , quarum 7. , quæ a vertebrae spinæ dorsi ad sternum usque pertingunt , dicuntur veræ , quinque autem spurix , quæ eo usque non protendantur , ne nimirum ventriculum nimis constringant , sed dilatandi se spatium eidem concedant.

4. Ossa artuum sunt brachia & pedes. Brachium dividitur in Humerum , Cubitum , & extremam Manum. *Humerus* est os unicum , magnum & validum , a scapulis protensum usque ad cubitum. *Cubitus* continet ossa duo , quorum crassius longiusque *ulna* dicitur ; alterum isto brevius *radius* appellant. *Manus* extrema complectitur *Carpum* , *Metacarpum* , & *Digitos*. *Carpus* est pars proxima cubito , ubi fit inflexio. *Metacarpus* est pars exterior manus ; interior nuncupatur *Vola*. *Digitus* sunt pars extrema manus , dicunturque Pollex , Index , Medius , Annularis , & Auricularis. Singuli tribus constant ossibus excepto pollice. Pes constat Femore , Tibia & extremo pede. Femur unico sed permagno , Tibia duobus constat ossibus , ferme ut cubitus. Pes extremus dividi-

tur in Tarsum, Metatarfum, & digitos five articulos, ut de manu dictum antea.

5. Duritie ad ossa præ reliquis proxime accedit *Cartilago*, illis tamen mollior est, alba, flexilis, & lubrica. Multiplex est ejus usus, præcipue tamen in vestiendis ossium juncturis, motuque inde facilitando. *Nervus* est corpus albicans, teres, & oblongum ex medulla cerebri egressum, ac abdite descendens in partes reliquas deferendis potissimum spiritibus ad motum & sensationem necessariis destinatum. E cranio decem progrediuntur nervorum paria, ex quibus præ cæteris notandi sunt 1. *Nervi olfactorii*, qui ad nares, 2. *optici*, qui ad oculos pertingunt; 3. *motores oculorum*, qui oculos movent; 4. *gustatorii*, qui furculos mittunt ad linguam, nares, oculos, faciem ac mandibulam. 5. *Acustici*, qui partim in aures, partim in linguam sparguntur. *Fibra* sunt veluti nervuli minores aut filamenta oblonga, gracilia, simul tamen valida, pariter ad motum, imo & contexendas partes alias destinata; ex istis enim contextæ sunt *Membrana*, substantia tenuis, instar telæ expansa, variasque corporis partes ambiens, & continens. *Ligamentum* est, quod vel suspendit partes, ut viscera, vel etiam ossa connectit, estque flexile ac validum, & aliud quidem membranaceum, aliud cartilagineum, aliud nervosum, prout magis cum membrana, cartilagine, vel nervis convenit. *Cara* est pars mollis, humida, rubicunda, ex sanguine progenita, ad partes, quibus apponitur, firmandas, fovendas, & tutandas.

6. *Arteria* est canalis membranaceus oblongus & rotundus, quo sanguis ex corde in alias corporis partes devehitur; illi vero canales, quibus sanguis iterum ad cor revehitur, dicuntur *Vene*. E dextro cordis ventriculo sanguinem in pulmones desert sic dicta *arteria pulmonaria*; e sinistro autem ventriculo eundem in totum corpus dispensat *arteria magna*, quæ etiam *Aorta* dicitur. Inter venas sunt præcipuæ *vena cava*, quæ in dextrum cordis ventriculum, *vena pulmonaria*, quæ trunculo suo in sinistram cordis ventriculum immititur, & *vena porta*, quæ neutra ex parte in truncum desinit, sed utrinque in ramusculos finditur, e quibus superiores potissimum per hepar, inferiores autem per alias abdominis partes diffunduntur. Sunt tamen ex recentioribus Ana-

Artic. I. *Structura Corporis Humani.* 7

tomicis, qui venam portam ex vena cava tanquam trunco suo descendere docent, Arteriæ, non item venæ, micant, seu subfiliunt, venæ pulsatiles propterea nuncupatæ. Alii adhuc canales sunt, qui humorem limpidum, subflavum & non nihil viscosum vehunt, dicunturque vasa *lymphatica*; vasa vero *lactea* vocantur, quæ chylum ab intestinis receptum ad destinatum illi receptaculum deferunt. Ad secernendas quoque materias fluidas serviunt *glandulæ*, quæ sunt substantia mollis, ac spongiosa; istarum numerus in corpore maximus est, varique magnitudo. *Cutis*, etiam *Dermis* dicta ex fibris albicantibus contexta est, habetque arterias, venas, plurimosque poros; quæ huic superinducta est, *Epidermis*, seu *Cuticula* dicitur, estque tenuissima, ac sensus expers.

7. Denique *Musculus* sic dictus, quod muri excoriato non multum abfimilis sit, ex pluribus partibus componitur, ex fibris nimirum, nervis, vena, arteria, vase lymphatico membranæ alicui simul inclusis. *Musculus* plerumque ex parte utraque in aliquam veluti caudam desinit, qua ossi, vel alteri cuidam parti solidiori jungitur. Cauda hæc nuncupatur *Tendo*, constatque substantia albicante, & valida. Ipsi muscoli sunt instrumentum motus localis: hinc cum motus ejusdem etiam membri sint plurimi, ac diversissimi, numerus quoque musculorum ingens, ac figura diversissima est. Plerumque ultra quadringentos in unius hominis corpore numerantur.

§. II.

QUAS PARTES CONTINEAT REGIO PRIMA?

8. | N capite post cranium visuntur duæ membranæ, quæ *Meninges*, aut *Matres*, appellantur. Exterior est membrana crassa, & dura, idcirco *dura mater* nuncupata; interior & mollior *pia mater* dicitur. Illa cerebrum ipsum in duas partes dextram & sinistram, simulque a cerebello dividit, ne nimirum, dum lateri dextro incumbimus, sinistra pars cerebri nimium gravet dextram, & vicissim, aut dum supini cubamus, cerebellum nimis prematur a cerebro. Altera cerebro tenacissimo adhæret, illudque totum fovet, & amplectitur, estque ex subtilissimis fibris contexta. Communis est Medicorum opinio, omnes

ferme capitis dolores a duabus his Meningibus oriri, quarum utraque, & præcipue pia, est sensus peracuti.

9. Remotis hisce membranis occurrit cerebrum, divisum in tres partes, 1. in globum anteriorem, qui proprie cerebrum est, ac constat substantia duplici, altera coloris cinericii, quam *corticalem* appellant, altera coloris albi, quam vocant substantiam *medullarem*. Illa ex innumeris glandulis contexta miros anfractus, & gyros format, qui pia matre ubique involuti tandem in partem medullarem desinunt. Hæc ex infinitis prope modum fibrillis, aut nervorum tubulis composita ad aliam terminatur substantiam candidissimam, quæ *corpus callosum* nuncupatur, ac reliquis partibus cerebri durior est. 2. In globum posteriorem, decuplo ferme minorem, qui *Cerebellum* dicitur, ac in inferiore cranii parte jacet. 3. In partem aliquam oblongam, & utrique globo subjectam, quæ dicitur *Medulla oblongata*, eoquod in modum caudæ oblongata in fundo cranii sita sit; inde per totam spinam dorsi protensa etiam medulla spinalis dicitur.

Atque ex hac medulla oblongata oriuntur decem ista nervorum paria, de quibus Num. 5. Ex medulla vero spinali progerminant nervi reliqui, septem nimirum paria in collo, quorum secundum, tertium, & quartum dant nervum diaphragmatis; primum, quintum, sextum & septimum in brachia effunduntur. Duodecim paria oriuntur in dorso, quæ ad thoracem usque protensa ramos suos in hunc, & vicinos musculos spargunt. Quinque paria in lumbis orta, inde in musculos abdominis, & partes isto contentas, atque etiam pedes excurrunt. Denique sex paria in osse sacro, quæ ad vesicam, partesque ei vicinas extensa cum postremis duobus lumbaribus nervum toto in corpore maximum efficiunt, qui per pedem ad digitos usque protenditur. De organis sensuum, qui in capite sunt, postea dicendum. Porro quantitas cerebri in homine admodum magna est, quatuor, aut quinque non raro librarum: proin duplo majus cerebro bovis, & cerebrum elephantis animalis vastissimi adæquans.

10. Complures etiam in cerebro dantur glandulæ: præcipuæ sunt glandula *pinealis*, & *pituitaria*. Illa nucis pineæ, vel coni figuram refert, unde etiam *conarium* nuncupatur; involvitur portione piæ matris, & in

In homine vix granum tritici adæquat. Ejus usum communius esse putant, ut sordes excrementitias medullæ oblongatæ, aut serum aliquod excipiat, deferatque in aliquem ventriculum, aut infundibulum, quod a pia matre exiens in glandulam pituitariam definit. Hæc cerebri excrementa recipit, & vel in palatum dejicit, vel per alia cranii foramina emittit.

§. III.

QUAS PARTES SECUNDA REGIO COM- PLECTATUR?

11. **T**horacem, intra quem a collo ad diaphragma usque hæc regio extenditur, interius vestit *Pleura*, seu membrana, quæ a spina dorsi egrediens ex utroque latere costas ambit, & usque ad Sterni medium pergens ibi non conjungitur, sed duplicata per medios pulmones redit ad dorsum, ac mutato nomine *Mediastinum* dicitur. Inflammatio hujus membranæ, quæ a sanguine bilioso, & ob venas obstructas stagnante causatur, dicitur *Pleuritis*, estque morbus admodum periculosus. In medio thoracis ex oblonga fistula, quæ *Trachea*, vel *Arteria aspera* nuncupatur, dependent *Pulmones*, quasi duo folles, quibus respiratio potissimum peragitur; constant substantia molliore, ac plurimis vesiculis aeri recipiendo idoneis; habent etiam venas, arterias, ac innumeras fibras, nervulos tamen pauciores: hinc acuti sensus non sunt, ut patet in phtisicis, quibus plus periculi, quam doloris esse solet.

12. Ipsa *Trachea*, præterquam quod respirationi interserviat, est præcipuum organum vocis; componitur autem ex pluribus annulis cartilagineis, iisque communitur, ne unquam aeri per eam transitus negetur. Superior tracheæ pars dicitur *Larynx*, prope fauces sita, & quinque cartilaginibus constans, quarum prima vocatur *scutiformis*, intus cava, foris gibbosa, & in collo non nihil prominens; secunda dicitur *annularis*; tertia & quarta simul junctæ rimulam aliquam efformant, quam *glottidem*, seu *lingulam* vocant; quinta tegit glottidem, ne cibi quid, aut potus laryngem subeat, *epiglottis* propterea appellata. Ubi trachea secundum aliquam suam partem *Æsophago* est contigua, annulos habet in mem-

branam molliorem desinentes, ne nimirum alimentum trajectio difficilior accadat. *Æsophagus*, latinis *Gula*, tracheæ subjacet, estque canalis membranaceus, a faucibus ad ipsum ventriculum protensus, proin via, per quam cibus & potus in stomachum demittitur. Quod si vel modica cibi aut potus portio in tracheam penetret, molesta tussis, & quandoque etiam suffocationis periculum oritur.

13. Inter partes secunda regione contentas princeps est *Cor*, in medio thorace duos inter pulmones situm, inferius tamen in sinistram partem non nihil deflectens. Substantia ejus carnea, & musculosa est: figura instar pyramidis inversæ; longitudo in adultis ordinarij 6, latitudo 4. digitorum. Sunt in eo duo *ventriculi*, dexter & sinister, quos *septum medium* dividit. Dexter latior est, sed brevior; sinister usque ad *cuspidem* cordis extensus angustior quidem, sed longior dextro. Utrique ventriculo supra cordis *basin* respondent duo cartilaginea receptacula, quæ *auriculæ* dicuntur, & receptum e venis sanguinem paulatim in subjectum sibi ventriculum derivant. Cor ipsum duplici motu movetur; unum vocant *Diastoles*, seu dilatationis, quando nimirum sanguis e venis in ventriculum recipitur; alterum appellant motum *Systoles*, seu contractionis, quo sanguis in arterias expellitur. Motus hic geminus etiam auriculis convenit, diverso tamen ordine: dum enim cor dilatatur, illæ constringuntur, & hoc modo sanguinem in ventriculos cordis immittunt; dum vero cor constringitur, illæ ex adveniente e venis sanguine dilatantur. Totum cor membrana quadam cingitur, quæ *Pericardium*, aliis cordis arcula dicitur, quæque in hominibus inferius annexa est diaphragmati.

14. Est autem *Diaphragma*, seu *Septum transversum* illa pars, quæ thoracem a ventre transversim separat. Substantia ejus carnea est, in medio tamen membranacea, ac valde nervosa. Tres habet aperturas, per quas vena cava, aorta, & *æsophagus* transeunt. Et quoniam diaphragma ex plurimis musculis est compositum, servit motui respirationis, & inspirationis. Hoc ipsum etiam est organum risus, qui aliud non est, quam iteratus diaphragmatis subsultus, & tremula succussio per

per nervos & musculos ad buccam usque, & genas propagata, qua etiam pulmones repetitis ictibus ad aerem simili motu explodendum determinantur. Singultus quoque habetur per subitam diaphragmatis depressionem, ob quam aer violenter cum acuto quodam sono in tracheam & pulmones intruditur. Inde etiam provenit Sternutatio, dum nimirum spiritus animales acrioribus particulis excitati ex capite per nervos descendunt, & diaphragmatis fibras contrahunt, illud repente se restituens aerem cum sonitu per nares expellit.

§. 4.

QUAS PARTES COMPLECTATUR REGIO
INFIMA?

15. Diaphragmati immediate subjacet *Ventriculus*, seu *Stomachus* ab œsophago suspensus. Duo habet foramina, superius & amplius, quod cibum excipit, ac *cardia* dicitur; alterum inferius, & angustius, quod dicitur *pylorus*, & alimenta jam digesta in intestina emittit. Stomachus triplici constat tunica, quarum prima est ut membranæ aliæ, altera est carnosæ, ac musculosa, tertia nervosa cum crusta villosa. *Intestina* sunt canalis membranaceus, 24. cubitos, si extendatur, longitudine ferme adæquans; & licet unicus sit, diversa tamen fortitur nomina. Primo quidem tria dicuntur tenuia, & totidem crassa. Inter tenuia id, quod pyloro jungitur, dicitur *duodenum*, alterum *jejunum*, eoquod in sectionibus anatomicis plerumque appareat vacuum; tertium vocatur *ilium*. Ex crassis primum dicitur *cacum*, quia ex una parte exitum non habet; alterum *colon*, in quo potissimum dolores cholici; tertium *rectum*, quia sine circuitu recta pergit. Omnia hæc a *mesenterio* ita colliguntur in orbem, ut spatium haud magnum occupent.

16. Hæc ipsa intestina sacci instar complectitur membrana multo adipe, & glandulis conspersa, quæ *omentum* dicitur, post quod occurrit *peritoneum* membrana tenuis, satis tamen firma & valida, quæ & intestina, & reliquas regionis infimæ partes continet; rupta hæc membrana fit hernia, sique hæc amplior sit, per eam etiam omentum, imò hoc quoque rupto intestina ipsa
cla-

elabuntur. Unicus sæpe motus, aut saltus, si subitus ac vehementior sit, malo isti causando sufficit. Porro chylus, seu succus ex alimentis in ventriculo excoctus, dum per intestina desertur, pars ejus melior a *venis lacteis*, quæ intestinis tenuibus adhærent, excipitur, & per mesenterium sub specie floris albicantis ad commune receptaculum, quod ab inventore suo *Pecquetianum*, aut etiam *cisterna* dicitur, ac prope renes in media lumborum regione situm est, devehitur.

17. Non procul ab intestinis jacet *Pancreas*, opus glandulosum, linguæ caninæ speciem referens. In eo notabilis est ductus (*pancreaticum* vocant) qui orificio sat amplo definit in duodenum, ac subvehit succum sublimpidum, subacidum, ac non nihil salum, qui una cum bile meliorem chyli substantiam a crassiore separet. diluat, fermentet, ac fluiditatem ipsi conciliet. Ventriculi partem dextram superiorem leniter amplectitur *Hepar*, ex minimis lobulis, ac innumeris glandulis contextum. Hujus officium potissimum est biliosum humorem a sanguine secernere, & in annexam fellis vesiculam deijcere, quæ *vesicula fellis* est vasculum membranaeum pyri figuram referens, recipiendæ ex hepate bili, ac suo tempore ad intestina transmittendæ destinatum. Ex parte sinistra ventriculum inter & costas continetur *Lien*, seu *Splen*, pars mollis, facile dilatibilis, 6. plerumque digitos longa, 3. lata, & unum crassa. Usus illius esse censetur, ut liquorem contineat, quo fermentetur sanguis per arterias affusus. In media ventris regione sub hepate, & liene sunt *Renes*, per quos inutile serum a sanguine secernitur; bini sunt, communius quilibet eorum 5. digitos longus, 3. latus, unum & dimidium crassus. Hi per arterias copiosum sanguinem excipiunt, cujus partem sinceriorem in venas emittunt, in glandulis vero deponunt serum inutile, quod per tubulos destillat in *pelvim*, ac deinde per *ureteres* desertur in vesicam. Plura dabunt Anatomici. Hæc sufficient Philosopho, ut mirari desinat alia extra se, cum, ut *Augustinus* loquitur, ipse mirator magnum sit miraculum.

ARTICULUS II.

NUTRITIO CORPORIS HUMANI.

18. **E**st hæc conversio alimenti in substantiam aliti ad restaurandas partes deperditæ. Quando ex alimento non solum partes deperditæ restaurantur, sed illæ secundum omnem suam dimensionem etiam augentur, ut sit in animali, quod ad magnitudinem sibi debitam necdum pervenit, dicitur augmentatio. Hinc est, quod, qui non tantum nutriuntur, sed etiam crescunt, uti adolescentes, majore alimenti quantitate indigeant. Ad nutritionem requiruntur Chylosis, Hæmatosis, & sanguinis per totum corpus animalis dispensatio.

§. I.

DE CHYLOSI, ET HÆMATOSI.

19. **C**hylosis nomine venit illa animalis operatio, quæ ex alimento intus sumpto conficitur chylus. Et primo quidem alimenta ad chylum præparantur in ore per masticationem, & salivam cibo masticato admixtam, quæ est fluidum quoddam dissolvens, utpote ab alimentis acidis, ac salsis proveniens, & a sanguine arterioso in glandulis *paroditis* depositum. Masticatio si negligatur, crudior efficitur chylus, variisque infirmitatibus occasio præbetur. Massa sic masticata per æsophagum in ventriculum demittitur. Descensus hic potissimum adscribendus est motui peristaltico ipsius æsophagi, qui motus alterna fibrarum circularium, sive spiraliū dilatione & contractione absolvitur. In descensu autem istocibus novo succo ex glandulis æsophagi expresso imbitur, atque ad digestionem magis disponitur. Potus quoque eadem via in stomachum defluit: trachea enim, præterquam & æsophagum canalis in collo alius non est, cum stomacho nullibi communicat.

20. In stomacho dum alimentum est, chylosis inchoatur, ad eamque peragendam non solus stomachi motus, nec solus ejusdem calor sufficit, sed plurimum quoque ad illam confert humor gastricus. Motu quidem, quo ventriculus alternis vicibus dilatatur, & constringitur;
item

item illo, quo diaphragma ob respirationem, atque etiam abdomen omne agitur, massa masticata varie impellitur, partes heterogenæ atteruntur, ac dissolvuntur; quia tamen membrana stomachi minus dura, minusque aspera est, quam sint alimenta varia v.g. ossa, cartilagine, motus ille solus digestioni perficiendæ par non est. Calore autem stomachi partes alimenti dilatantur, ut laxatos poros facilius subeat humor acidus, eas magis, magisque dissolvens; quod vero calor solus digestionem absolvere nequeat, patet tum ex eo, quod calor stomachi tantus utique non sit, quantus est ille ignis; & tamen ope hujus in partes adeo exiles alimentum digeri haud potest, in quam exiles etiam ossa dissolvuntur in stomacho animalis; tum etiam ex eo, quod nulla ferme ciborum digestio sit, dum homo feбри calida laborat, etsi tunc homo totus caloris etiam excessum patiatur.

21. Tertium igitur, illudque præcipuum chylosis in stomacho peragendæ instrumentum est humor, ut vocant, *gastricus*, seu succus quidam acidus, & mörificans, qui ex glandulis innumeris, per nerveam stomachi tunicam dispersis, affluens, atque alimenti poros penetrans illud non tantum in partes exilissimas, sed etiam in principia sua chymica dissolvit. Cur autem ipsam stomachi substantiam humor iste non dissolvat, ratio petenda erit tum ex diversa textura particularum humorem istum constituentium, & ex dispositione pororum stomachi tali, ut eos penetrare queat, quin nexum partium violet (Phys. Gener. Num. 40.) tum ex eo, quod alimenta, in stomachum demissa, jam sint imbuta succo, partim ex salivalibus, partim ex ipsius æsophagi glandulis expresso, ut adeo in massam sic præparatam vim suam humor gastricus exercere possit, non item in aliam, quemadmodum experientia multiplex docet, menstrua etiam corrosiva non in omnia eodem modo, & sæpe in aliqua omnino non agere, nisi certa ratione jam antea fuerint præparata.

22. Chylus in stomacho ita formatus transit in intestina tenuia, & primo quidem in duodenum, ubi bilis e sua vesicula, & paulo inferius humor pancreaticus eidem commiscetur, quo fit, ut magis jam dilutus, & accedente motu intestinorum tenuiores adhuc

in

In particulas resolutus, dum in jejunum pergit, maiorem sui partem emittere possit in venas lacteas, ex quibus ulterius defertur in receptaculum Pecquetianum. Chylus itaque in stomacho inchoata in intestinis tenuibus perficitur, & absolvitur. Massa reliqua alimenti ex intestinis tenuibus descendit in intestina crassiora, atque inde e corpore animalis denuo egeritur.

23. Ex natura humoris gastrici explicatur etiam, quid sit *fames*: humor enim ille morficans in defectu alimenti digerendi nervosas stomachi fibras, illas præcipue, quæ circa pylorum sunt posite, quodammodo pungit, ac vellicat. Hæc molesta punctio & vellicatio, per nervos ad cerebrum usque propagata, in anima excitat desiderium cibi, quo in stomachum ingesto dolor ille tollatur, dum nimirum alimentum, crassique illius vapores humoris istius acidæ punctiones impediunt, & succus gastricus in dissolutionem alimenti vim suam exercit. Hinc *fames* describi potest, quod sit dolor ventriculi ex humoris gastrici vellicatione ortus, & excitans in anima desiderium cibi. *Sitis* dicitur ex humore quodam salso, qui faucium, & œsophagi fibras præsertim siccas, & arescentes molestè afficit, atque in anima desiderium potus convenientis excitat: unde liquores nullius omnino saporis, maxime aqua, sitim extinguunt; falsi vero eam vehementius excitant: illi enim salinas particulas diluunt, isti vero copiam salinarum particularum augent. Est igitur sitis dolor faucium, & œsophagi a salinis particulis, & ariditate proveniens, excitansque in anima desiderium potus convenientis.

24. *Hæmatosis* est conversio chyli in sanguinem, atque hoc modo fit. Chylus e receptaculo Pecqueti per canalem satis amplum, spinæ dorsi adhærentem, quem ductum *thoracicum* vocant, sursum ad sinistram axillam ascendit, ubi per tres ramos in venam *susclaviam* incidit; ex hac in venam cavam, inde in dextram cordis auriculam, & ventriculum defertur, atque cum ipso sanguine permixtus denique una, alterave circulatione in sanguinem transit: dum enim cum sanguine ita circulatur, sensim in hepate a bile, in liene a particulis crassioribus, in pancreate ab acido, in renibus a sero superfluo purgatur, ut adeo colorem, aliasque affectiones sanguinis denuo induat. Quod hæmatosis non in hepate, ut cen-

cenfebant antiquiores, perficiatur, vel ex eo patet, quod chylus ex receptaculo Pecquetiano non ad hepar, sed ad cor deferatur.

§. II.

DE CIRCULATIONE SANGUINIS.

25. Sanguis ita præparatus, ut nutriri inde homo possit, in totum corpus debet dispensari, quod fit per ipsius circulationem, quæ aliud non est, quam perpetuus sanguinis ex corde per arterias abeuntis, & per venas in cor redeuntis motus, dum nimirum sanguis, corde per motum systoles compresso, ex dextro ventriculo per arteriam pulmonarem abit in pulmones, ex quibus per venam pulmonarem defertur in finistrum cordis ventriculum, hinc in Aortam, seu arteriam magnam, quæ ipsum in totum corpus dispensat ita, ut sanguis per arterias capillares in carnem, aliasque partes extrusus, relictis ibidem, quæ in nutrimentum cedere debent, particulis denuo venas capillares subeat, ex his in venas ampliores, donec omnis in vena cava confluentis ex hac iterum in dextrum cordis ventriculum effundatur, inde eodem, quo prius, modo iter suum in totum corpus inchoaturus. Atque hunc esse sanguinis per totum corpus circulantis motum, tum ex motu cordis, tum ex structura arteriarum, & venarum, tum ex variis experimentis ostenditur.

26. Et primo quidem motus cordis, ut dictum, duplex est; systoles, seu contractionis, ac diastoles, seu dilatationis. Per primum sanguis ex corde expellitur, per alterum in cor recipitur. Jam ad quemlibet systoles motum aliqua saltem quantitas sanguinis ex corde ejicitur; ponamus, quod minimum est, unicum duntaxat scrupulum ejici: cum ergo intra unum minutum secundum cor saltem semel pulset, intra horam 3600., intra diem unicum 86400. sanguinis scrupuli, sive 300. libræ medicæ expelluntur, ut ducto rite calculo invenies; & tamen certum est, totam sanguinis in corpore humano contenti massam ultra 25. libras non ascendere. Quorsum igitur tanta sanguinis expulsi copia deveniret, nisi iterum reveheretur ad cor? Imo undenam ista sanguinis

nis copia provenire posset in homine etiam voracissimo? Hoc proin assumpto calculo, & supposito, quod homo 15. sanguinis libras contineat, circulatio totius massæ sanguineæ intra 24. horas vigesies absolvetur. At quoniam ad singulos cordis pulsus plus quam unicus sanguinis scrupulus expellitur, multo frequentius intra unum diem hæc sanguinis circulatio peragetur.

27. Secundo. Structura vasorum, quæ sanguini deferendo sunt destinata, talis est, ut arteriæ suis quæque valvulis, iisque talibus sint instructæ, quæ sanguini exitum quidem ex corde in corpus permittant, reditum vero ad cor intercludant; venæ e contrario tales habeant valvulas, quæ sanguini aditum versus cor concedant, reditum in corpus negent, manifesto indicio, arterias eos esse canales, per quos sanguis in corpus emissus nutritioni animalis inserviat; venas vero illos, per quos residuus denuo, unde exiverat, revertatur. Accedunt

28. Tertio Experimenta varia. 1. Si canis vivus secetur, & illius vena cava prope cor filo constringatur, sanguis in corde deficit; si constringatur Aorta, cor intumescit. 2. Si in eodem cane Aortæ truncus juxta cor abscindatur, & ope syringis, aut siphonis in eandem aortam aqua, aut lac immittatur, idem liquor cum sanguine porro fluens brevem intra moram ex corde effluit. 3. In phlebotomia brachium ligatur supra vulnus, & mox venæ supra ligamen concidunt, infra istud intumescunt: sanguini enim per arterias identidem affluenti ligata vena reditus ad cor intercipitur: unde venæ paræ anterior non potest non intumescere; si autem ligetur arteria, illa versus cor intumescet. Si factæ jam vulnere vena infra istud prematur digito, illico sistitur sanguinis fluxus, & quæ sunt plura hujusmodi, ex quibus omnibus apparet, in arteriis sanguinem ex corde versus partes exteriores, in venis vero ab istis ad cor fluxu continuo moveri.

29. Ob. I. Nulla datur in animali causa hujus circulationis; cum nihil in eo sit, quod sanguinem determinet ad motum versus partes exteriores, multo minus ad reditum versus cor. R. N. Ant. Causæ hujus circulationis sunt prima & præcipua motus ipsius cordis, altera motus arteriarum, & venarum, tertia motus respirationis, ac demum ipsa etiam ratio æquilibrîi fluidorum. Motu namque systoles dum cor contrahitur, sanguis in

eo antea contentus expellitur in arterias; in arteriis tum repetitis impulsibus a succedente identidem sanguine causatis, tum motu, ut vocant, peristaltico ipsarum arteriarum ulterius promovetur in ramos arteriarum minores, ac denique in capillares, ex quibus in ipsam carnem, variasque illius cavitates penetrat, & ne redire ad cor eadem via possit, impeditur a valvulis, quæ tum circa exordium arteriarum prope cor, tum etiam in progressu variis in distantiis sunt appositæ. Porro per motum *peristalticum*, seu, ut etiam vocant, *vermicularem* intelligi ut motus aliquis contractionis & dilatationis, quo tunica fibrosa & musculosa arteriarum ob impulsu sanguinis e corde ejecti primo dilatatur, tum vero cessante illo impulsu denuo contrahitur, atque ita contentum in se sanguinem, cum reditum versus cor valvulæ impediunt, versus partes exteriores promovet.

30. Dum autem sanguis in arteriis ita impellitur, etiam ille, qui in venis est; quique, ut postea dicetur, mediate saltem cum sanguine arteriarum communicat; similem impulsu recipit, atque eo urgetur, quo venarum valvulæ ipsi transitum permittunt, nimirum versus cor. Huic impulsui si accedat etiam motus peristalticus venarum, sanguis haud difficulter sursum versus cor promovebitur, id quod ex ratione æquilibrii fluidorum in tubis communicantibus magis adhuc patescit: in his namque si alterutri aliquid novi liquoris affunditur, mox in altero, qui prius ad libellam constiterat, liquor attollitur; sic etiam dum motu systoles aliqua sanguinis portio in arterias expellitur, is, qui in venis est, attollitur, & in cor motu diastoles dilatatum effunditur. Et hoc quidem de sanguine, qui per arterias inferiores descendit. Quod attinet ad sanguinem, qui per Aortæ ramum superiorem ascendit in caput, & inde per venam cavam descendit in cor, hujus quoque motus causa est tum motus cordis, tum motus arteriarum, & venarum, habetque se iste ascensus & descensus ferme ut motus liquidi per siphonem: dum enim sanguis per venam cavam in cor delabatur, sanguis in arteriis nullam inveniens resistantiam modico impulsu moveri sursum, & in ramos capillares venæ cavæ intrusus denuo reverti ad cor poterit.

31. Illum denique motum, quo sanguis e dextro cordis ventriculo in arteriam pulmonariam, & inde per venam pulmonarem in sinistru cordis ventriculum pro-

mo-

movetur, præter superius indicata etiam juvat, & causat motus respirationis: dum enim aer ex pulmonibus expiratur, vesiculæ pulmonum flaccescunt, & sanguis ex arteria pulmonaria libere ingreditur vasa sanguinifera in ipsis pulmonibus contenta; quando autem aere iterum inspirato vesiculæ illæ denuo expanduntur, vasa isthæc sanguine jam plena constringuntur, & sanguis in iis existens in ramos venæ pulmonaris expellitur. Certe, ut observavit Malpighius, in animali adhuc vivente, si secto thorace pulmones jam collapsi immixta fistula iterum inflentur aere, restituitur motus cordis jam pene extinctus, erumpitque e pulmonibus sanguis in sinistram cordis ventriculū. Sic etiam in animalibus, quæ interclusa respiratione suffocantur, dexter cordis ventriculus una cum arteria pulmonari, ipsisque etiam pulmonibus plurimo sanguine turgescit, sinistro autem in ventriculo, ac vena pulmonari nihil ferme sanguinis reperitur. Undenam autem oriatur motus ipsius cordis, inter Auctores non satis convenit. Dependebit is procul dubio ab actione illa necessaria animæ, quæ illa commercium inter corpus suum tuetur (*Psychol. Num. 68.*) Item a spiritibus animalibus, seu succo nervo, qui uti motuum reliquorum omnium, ita etiam hujus instrumentum erit.

32. Dices 1. Si sanguis e sinistro cordis ventriculo in Aortam expelleretur, iste sursum tantum, non vero in partes inferiores posset promoveri: sinister enim ventriculus sursum duntaxat patet; aut certe, si sanguis a partibus extremis per venam cavam tum ascendentem, tum descendentem rediret ad cor, deberet is motu contrario sibi occurrens sisti. R. N. M. Aorta enim, etsi ex ipso corde sursum porrigatur, tamen supra cor uncini instar inflexa est, ejusque pars una sursum in caput, brachia &c. altera deorsum in corpus reliquam protenditur. Eo quoque in loco, quo sanguis a partibus exterioribus redux in vena cava motibus contrariis sibi occurrit, existit pars prominens, quæ in modum aggeris sanguinis tum ascendentis, tum descendentis impulsū infringit, eumque ita leni fluxu declinare cogit in dextram cordis auriculam, & cohærentem isti ventriculū.

33. Dices 2. Arteriæ non communicant cum venis: ergo sanguis ex arteriis non potest transire in ve-

nas. R. Diff. A. Non communicant ita, ut detur conjunctio ubique immediata, C. A. ut ne quidem detur mediata, N. A. Inter aliquas arterias & venas datur conjunctio immediata, latinis *inosculatio*, græcis *anastomosis* dicta, vi cujus ipsi canales arteriarum conjuncti sunt cum canalibus venarum. Inter alias tamen, & ut moderni Anatomici censent, inter plerasque arterias & venas talis inosculatio non intercedit, idque ideo, ut sanguis arteriarum per aperta ubique oscula capillaria egredi in carnem, aliasque corporis partes queat, ac nutritioni earundem partium inservire. Eo tamen non obstante datur sufficiens communicatio venas inter & arterias, mediante nimirum carne, illiusque, utpote substantiæ spongiosæ, meatibus, in quos sanguis ex arteriis egreditur; cumque oscula venarum capillarium eos ipsos in meatus delinant, sanguis, qui in nutritionem, & transpirationem absumptus non est, dum a novo identidem succedente urgetur, in hæc venarum oscula penetrans per istas denuo versus cor propellitur.

34. Ob. II. Inæqualis est capacitas vasorum sanguinem continentium: ergo sanguis in illis circulari non potest. Ant. constat ex observationibus Cl. Helvetii, ex quibus habetur, ventriculum dextrum capaciores esse, quam sinistrum; arteriæ quoque pulmonariæ plures & capaciores sunt, quam sint venæ pulmonares. Cons. probatur ex eo, quod sanguis transire nequeat ex vasis capacioribus in minus capacia: hæc enim non possent capere sanguinem contentum in illis, proin sanguis vel in pulmonibus, vel in sinistro cordis ventriculo deberet exundare. R. C. A. N. C. Ad probationem negatur suppositum, quod omnis omnino sanguis, qui in dextro cordis ventriculo est, per singulos systoles motus expellatur: tantum quippe sanguinis ex eo ad singulos motus ejicitur, quantum eodem tempore recipi potest a ventriculo sinistro, proin non obstante ventriculorum inæqualitate æqualis tamen potest esse sanguinis eodem tempore emissi ex uno, & in altero ventriculo recepti quantitas. Neque etiam obest inæqualitas arteriæ, & venæ pulmonaris: si enim hæc angustior est, quam illa, poterit, ac debet sanguis in vena moveri velocius, quam in arteria, ferme ut in tabis communicantibus inæqualis perimetri, aut in fluvio

Vio inæqualis alvei (Phys. Gen. Num. 544.) atque ita minor capacitas compensabitur per majorem sanguinis decurrentis celeritatem. Addunt aliqui 1. quod aliqua sanguinis in arteriam pulmonarem egressi portio pulmonibus in nutrimentum cedat. 2. Quod sanguis, qui in arteria pulmonari ob calorem vehementem magis expansus est, in transitu per pulmones refrigeratus, atque ideo aliquantulum condensatus, minus jam spatium exigat, proin per venas etiam angustiores libere transire queat.

Sic etiam etsi reliquæ arteriæ angustiores sint venis sibi respondentibus, circulatio sanguinis tamen ordinata esse potest, si sanguis in arteriis celerius moveatur, quam in venis, quemadmodum cursus fluminis ordinatus esse potest, etsi aqua ex ampliore in angustiore alveum decurrens velocius moveri incipiat. Denique nec illud circulationi obesse potest, quod vena cava multo amplius habeat orificium, ex quo sanguis in dextrum cordis ventriculum subit, quam habeat arteria pulmonaris: si enim in hanc majore cum celeritate sanguis expellatur, quam ingrediatur per illam, denuo dabitur compensatio; id autem fieri, ex eo potest intelligi, quod auriculæ cordis illapsus sanguinis ex venis in ventriculos non nihil remorentur, ac proin sanguis tardius illabatur, & celerius emittatur.

35. Ob. III. Si daretur circulatio sanguinis, sanguis in arteriis non differret a sanguine in venis: atqui differt: sanguis enim arteriarum & vivaciorem habet colorem, & magis calet, quam is, qui in venis est. R. N. min. quod detur differentia aliqua essentialis; discrimen illud omne mere accidentale est. Cum enim sanguis arteriarum recens e corde emissus, atque eidem adhuc propior sit, calidior esse debet, quam is, qui in venis est; cum hic ab exterioribus partibus, iisque frigidioribus in venas ingrediatur. Et cum sanguis arteriarum majore adhuc lymphæ subtilioris copia mixtus sit, quæ lymphæ variis in glandulis sensim deponitur; sanguis vero venarum subtili hoc fluido privatus; atque insuper fœcibus in sño per carnem & viscera transitu sit infectus, color quoque sanguinis arteriosi potest esse vivacior, quam sit sanguinis per venas decurrentis.

36. Dices 1. Si idem est sanguis in arteriis, qui in venis, non est ratio, cur in phlebotomia incidatur

vena potius, quam arteria. R. N. A. Ratio hujus varia est. 1. Tunicæ venarum tenuiores sunt, atque etiam magis prominent, quam arteriarum: hinc secari facilius possunt. 2. Vulnus arteriarum ob continuum pulsus difficilius coalescit. 3. Sanguis arteriarum melior, multoque purior est, quam ille venarum; deterior autem emitti debet præ puriore. Quod una potius vena seceatur, quam altera, hujus quidem rei recentiores nullam agnoscunt necessitatem; faciunt illud tamen, ut retineatur praxis antiqua, & aliquid concedatur phantasiæ Phlebotomi, antiqua opinione fors occupati. Secta vena sanguis ab initio vehementius erumpit, quia, vena per vinculum ligata, sanguis in ea copiosius erat collectus, & quasi constipatus. Rotatio baculi, atque etiam tussis serviunt ad concitandos musculos, quibus fluxus sanguinis promovetur. Si brachium duplici in loco ligetur, vena intercepta tamen aliquantum intumescit, quia inter utramque ligaturam plurimæ interjacent venæ minores, quæ in ligatam majorem desinunt: ex his proin affluere sanguis potest, qui venam ligatam expandat.

37. Dices 2. Supposita circulatione sanguinis nulla posset dari revulsio, seu abstractio sanguinis, vi cujus sanguis ex membro aliquo male affecto, faucibus v. g. humore noxio oppressis, in aliam partem derivatur; sanguis enim ob venarum valvulas descendere non posset in locum, in quo facta est venæ sectio. R. In tali casu abstractio sanguinis proprie talis non datur. Id solum fit, ut, dum vena brachii v. g. secatur, vena hæc aliquantum evacuetur; ista autem sic evacuata poterit sanguis, qui in carnis cavitates circa fauces copiosius effusus, & ut loquuntur, extravasatus erat, remeare in venas capillares cum vena secta communicantes; in isto autem reditu, cum etiam sanguis ex arteriis liberius jam possit affluere, alii quoque humores, in carne prius stagnantes, intrudi possunt in venas, atque ita intrusi una cum sanguine reliquo promoveri versus cor, ubi tum propter calorem & motum, tum propter admixta fluida puriora humores isti poterunt denuo depurgari, ac per repetitas circulationes ita perfici, ut nullam amplius in corpore molestiam causent.

38. Dices 3. Si venæ instructæ essent valvulis, quæ fluxum sanguinis versus partes extremas non permittunt, explicat-

explicari non posset experimentum a Cl. Pisone, Medico Italo institutum. Hic venam cephalicam homini aperuit, & emissis aliquot unciiis sanguinis, unam alteramve unciam lactis ope syringis in apertam venam intrusit, quo facto vena etiam infra vulnus intumuit, & frigus lactis per totum brachium ad extremos usque digitos diffusum est. R. N. A. Vena etiam infra vulnus intumuit ideo, quia sanguis ex partibus extremis affluens non potuit lac admodum grave & viscosum illico ea celeritate sursum promovere, qua alias fluxus sanguinis peragi solet; hinc sanguis infra vulnus accumulabatur. Frigus autem in nervos semel diffusum pro hoc casu propagari debuit etiam ad digitos usque.

39. Ob. IV. Si sanguis motu perpetuo circularetur, paroxysmi febriles singulis diebus, & quidem sæpius deberent redire, quoties nimirum massa sanguinis infecta ad cor reverteretur; hoc non fit. R. N. M. & suppositum, quod causa febrium in ipso sanguine resideat. Pro ut innumeræ propemodum Medicorum judicio sunt febrium species, ita etiam causæ, harumque sedes in corpore humano sunt quamplurimæ; quales autem istæ omnes sint, neque Medicis semper, neque Philosophis satis constat; hinc eo ex capite circulatio sanguinis, aliunde sat demonstrata, solide impugnari non potest. In ea conveniunt, certo temporis spatio opus esse, donec sanguis per loca, maligno humore infecta, transiens sat copiosam materiam peccantem contrahat, qua is corruptus paroxysmos reducat; unde pro diversitate hujus temporis febres aliæ sunt quotidianæ, aliæ tertianæ, aut quartanæ. Materia hac peccante cum spissior reddatur sanguis, atque ideo motus ejus retardetur, tremor aliquis, & frigus in corpore consequitur, donec fibræ cordis & arteriarum a crudioris hujus materiæ particulis acrius vellicatæ ad frequentiores vibrationes concitentur, quibus dum calor per corpus augetur, particulæ heterogeneæ a sanguine secernuntur, & cum sudore e corpore expirant; quo facto quies infirmo redit perseveratura tamdiu, donec sufficiente iterum humore febrili sanguis fuerit depravatus. Ita quidem sentiunt plerique. Utrum vere, Medicis discutiendum relinquo.

40. Quando jam sanguis perpetuo circuitu corpus totum, ac singulas illius partes percurrit, partes istæ ex massa sanguinea augentur, & nutriuntur. Sicut au-

tem partes corporis sunt admodum diversæ, ita etiam diversæ sunt substantiæ, ex quibus massa sanguinis componitur. Partes fluidæ corporis reparantur, atque augentur, dum sanguis per vasa corporis diversissima transiens in singulis relinquit liquores homogeneos iis, quorum vel reparanda jactura, vel augenda quantitas; in cerebro v. g. illos, ex quibus spiritus animales, ac succus nervæus constat; in hepate bilem; in glandulis diversissimis fluidum ipsis proprium. Partium solidarum jactura reparatur, dum sanguis ex Aortæ ramulis in carnem, ossa, aliasque partes solidas egressus varias particulas relinquit, quæ cum reliquis partibus connexæ vel mollem augment, vel deperditas resarciunt. Per spiritus porro animales, ac vitales, quos alii succum nerveum appellant, intelligitur substantia subtilissima, summe fluida, ac mobilis, quæ ex sanguine arterioso elaborata in cerebro nervos omnes irriget, atque ad perficiendas tum naturales, tum animales viventis sensitivi functiones deserviat. Distinguunt inter animales & vitales, non, quod substantia differant, sed, quod diversæ sint functiones, ad quas adhibentur. *Animales* vocant, qui serviunt functionibus animalibus, nimirum sensationibus, ac motibus spontaneis; *vitales* dicunt, qui serviunt functionibus naturalibus, aut necessariis, animæ imperio non subjectis, ut sunt motus intestini cordis, pulmonum, arteriarum &c. Quomodo autem spiritus isti functionibus hisce inserviant, inferius dicendi locus erit. Nunc, quoniam de respiratione sæpius jam facta mentio est,

41. Quæres, quid sit Respiratio, & quis ejus usus?

R. Respiratio est ille motus, quo animal alterna thoracis elevatione ac depressione aerem per os atque nares recipit, & iterum egerit. Organa, quibus respiratio perficitur, sunt pulmones, trachea, & diaphragma. Motus in ea duplex intervenit; alter, quo aer per os & nares in tracheam, inde in pulmones irrui; alter, quo egeritur e pulmonibus, ascendensque in tracheam ex ore naribusque erumpit. Prior dicitur respiratio, posterior expiration; ille a contractione musculorum thoracis ac diaphragmatis, hic ab eorum restitutione dependet: dum enim contractis illis musculis eleventur thoracis costæ, ac diaphragma deprimitur, crescit interna pectoris amplitudo, & externus aer per os & nares in tracheam ac pulmones urgetur, sicque pulmones, aere in eorum ve-

ficu-

ficulas ingrediente, intumescunt; quando dein musculi thoracis ac diaphragmatis iterum relaxantur, diaphragma attollitur, pectus deprimitur, & interna thoracis amplitudo redditur angustior: unde pulmonibus a thorace concidente pressis aer ex illis per tracheam, os, & nares denuo expellitur.

Ufus respirationis diversissimus est. 1. Servit illa ad olfactum, dum corpuscula odorifera cum aere inspirata in olfactus organum incurrunt; 2. ad ejicienda per tussim &c. quæ pulmonibus, tracheæ, laryngi, atque naribus molesta adhærent; 3. ad suctionem, & sorbitionem: thorace enim dilatato, depressoque diaphragmate liquores per aerem in os, ac fauces urgentur; 4. ad loquelam, cantum, risum &c. omnes enim ejusmodi functiones extrusione inspirati antea, ac dein a larynge, lingua, dentibus &c. varie modificati aeris peraguntur; 5. ad fluida promovenda, quæ in ventriculo, intestinis, venis lacteis continentur, ad promovendam item transpirationem tam sensibilem, quam insensibilem; 6. ad temperandos calores internos, & sanguinem in pulmonibus refrigerandum; 7. ad promovendam ipsius sanguinis circulationem (Num. 31.) & quoniam a circulatione sanguinis, motuque aliorum, qui variis in vasis sunt, humorum vita animalis dependet, apparet, cur interclusa respiratione diu vivere animal nequeat; neque etiam vivere diu potest in aere nimis raro; quia hic etiam inspiratus non satis inflare potest vesiculas pulmonum, quæ ita inflatæ sanguinem e pulmonibus expellerent: si autem aer sit nimium densus, vesiculæ pulmonum in inspiratione vel rumpuntur, vel non ita in expiratione detumescunt, prout requiritur ad hoc, ut cesset pressio, quam eadem vesiculæ inflatæ exerunt in vasa sanguinifera; durante autem hac pressione sanguis per arteriam pulmonarem affluens vasa isthæc subire non amplius potest, sicque sanguinis circulatio sistitur.



DISSERTATIO II.

DE ORGANIS SENSUUM, E- ORUMQUE OBJECTIS.

Sentire aliud non est, quam mutationem quamdam in organo corporeo factam percipere. Potest autem ea mutatio fieri vel in organo externo, & tunc sensatio dabitur externa; vel in interno, & tunc sensatio interna habebitur. Sermo hic potissimum erit de sensibus externis; pauca tamen addentur etiam de internis. Externi numerantur quinque, Auditus, Visus, Gustus, Odoratus, & Tactus. Ordiamur a primo.

ARTICULUS I.

DE ORGANO. ET OBJECTO AUDITUS.

§. I.

STRUCTURA AURIS.

42. **A**uris in duas partes distinguitur, externam, & internam. Externa, quam *Auriculam* vocant, in animantibus ferme omnibus patet; in muscis tamen, apibus, ac plerisque piscibus nullum ejus vestigium extat, licet auditu non careant; scribunt certe, fuisse, qui pisces tintinnabulo ad prandium convocarit. Auricula hæc in homine immobilis est, in brutis vero versatilis, & ea, quibus longiores natura auriculas dedit, ut sunt, lepores, equi &c., aures eam in partem vertunt, unde sonus allabitur. Eadem auricula nec ossea est, ne frangatur, aut sonum validius reflectat, fors etiam, ne dormientibus molestiam causet; nec tamen plane est carnea, ne mollis nimium, & flaccida sonos hebetet; sed cartilaginea, & figuræ concavæ, ac tortuosæ, quo facilius sonos excipiat, eosque opportune reflectat; hinc est

est, quod, qui auricula carent, confusius audiant, sardastri vero applicata etiam ad auriculam manu, & in concham complicata defectum organi supplere conentur.

43. Auris interna est pars organi auditus intra ipsum usque cranium protensa, cujus initium est *Meatus acusticus*, qui itinere flexuoso ad interiora auris progreditur. Canalis hujus figura, quæ est cylindro-elliptica, & flexus eo spectant, ut radii sonori aptius colligantur, & denuo reflexi in tympano tanquam centro coeant. Meatus acustici superficies interior non pilis tantum, sed plurimis etiam glandulis referta est, e quibus flavus quidam, & amarus succus (cerumen vocant) exsudat, animalculis illuc fors irrepentibus pro visco futurus. Per canalem hunc pervenitur ad *tympanum*, quod est ampla cavitas, militaris instar tympani tenui membrana osseum supra circulum sic obducta, ut membrana hæc pro varietate soni tendi aut laxari possit, ad quod tria vel quatuor concurrunt ossicula; *malleus* nimirum, *incus*, *stapes* (sic ob figuram, quam referunt, punctantur) & *os orbiculare*, quæ omnia tenuissimis fibris non inter se duntaxat, sed etiam cum membrana tympani cohærent, suisque sunt instructa musculis, quorum ope tensio, aut laxatio tympani perficitur.

44. Cavitatem tympani veterum plerique existimant plenam esse aere, ut vocabant, innato, seu tali, qui cum aere exteriori nullam habeat communicationem. Verum anatomici recentiores meatum quemdam detexere, per quem ex ea cavitate liberrimus aeri interiori abitus patet in palatum, & os animalis. Illud interim ex hoc intelligi potest, quomodo sardastri, dum hiante ore voces excipiunt, sonum aliquem possint percipere; aut cur ipsi clausis etiam auribus nostras voces audiamus, aut etiam surdus sonitum chelis percipiat, cujus manubrium dentibus tenet: per dictum nempe meatum sonus ex ore penetrare potest intra tympanum ad ipsum auditus organum; quo etiam pertinet artifex ille, qui surdus licet, organa tamen pneumatica ad omnes numeros exacta construxisse fertur, explorato semper fistularum sono ope sili illis circumligati, & dentibus prehensi. Porro si membrana tympani multa crassitie, aut callo obducatur, sequitur surditas; si vero ita madefiat, ut actio musculorum fiat remissior, illa haud procul aberit. Hoc ipsum tym-

panum lædi etiam poterit, si cerumen in solidiorem sensim massam concresecat.

45. Præcipuam denique auris internæ partem constituent dux spirales cavitates, quas intra ossis petrosi substantiam natura effodit. Prima dicitur *Labyrinthus*, estque antro tympani majus, semicirculos habens osseos excavatos, ac tenui membranula vestitos. Altera vocatur *Cochlea*, labyrintho minor, ac duplici, vel triplici gyro in spiras, cochleæ in morem, contorta; huic subtenfa est tenuis membrana, quæ vel est substantia nervea, vel certe fibrillis nervi acustici intertexta, ut ex Anatomicorum observationibus constat.

46. Atque hæc membrana cochleæ subtenfa dici debet organum auditus: sive enim spectetur substantia, sive situs hujus membranæ, ipsa est aptissima, ut in ea auditionis sensatio eliciatur; substantia namque illius ex fibrillis nerveis, a nervo acustico propagatis, contexta est, ut adeo impressio ibi facta facillime per nervum acusticum communicari possit cerebro; situs vero ipsius talis est, ut vibrationes aeris eousque propagatæ ex multiplici per varios anfractus facta reflexione vehementiores, adeoque ad fibrillas membranæ istius concutiendas, causandumque in ea sonum sint opportunissimæ. Accedit, quod nulla alia pars æque apta assignari queat. Non auricula, aut foramen externum: nam illa etiam resecta, sonus percipitur; & hoc sano & integro multi obsurdescunt. Non membrana tympani: hac enim teste Willisio utrinque perforata canis tamen audit; & surdi etiam audiunt sonitum chelis, cujus manubrium dentibus tenent, licet in iis unusquisque plerumque defectus sit in tympano; nec demum origo tympani est ex substantia cerebri. Non tria illa officula, quæ & nervis, & membranis, proin etiam sensu carent. Nec denique labyrinthus, tum, quia sonus ultra labyrinthum propagatur in cochleam, quæ proin frustra nea esset, si auditio jam fieret in labyrintho; tum etiam, quia labyrinthus caret membrana subtenfa, in quam radii sonori convenienter incidant. Sermo tamen hic est de homine, iisque animalibus, quorum structura aurium cum illa hominis propius convenit: sunt enim animalia, in quibus nec tympanum, nec cochlea reperitur, & tamen audiunt; in iis nimirum natura substituerit aliud organum membranæ cochleæ æquivalens.

§. II.

AN AD SONI GENESIN REQUIRATUR TRE-
MOR CORPORIS SONORI?

47. *S*onorum dicitur corpus, quod percussum soni sensationem in nobis excitat. Ipse sonus, prout spectatur in corpore sonoro, *primitivus*, aut *primarius* nuncupatur; prout spectatur in medio, per quod ad aures usque propagatur, dicitur *derivativus*, aut *secundarius*. Punctum, a quo sonus diffunditur, *centrum soni*; linea vero illa sensibilibiter recta, secundum quam sonus propagari concipitur, *radius sonorus*, seu *phonicus* appellatur. Si sonus a corpore sonoro recta fertur ad aurem, sonus *directus*; si ab obstaculo, in quod impingit, ad aures reflectatur, sonus *reflexus* nuncupabitur.

48. Certa jam experientia docet, sonum *primarium* nunquam haberi sine motu tremulo corporis sonori. Sic 1. tremor chordæ sonantis maxime, si aliquanto crassior sit, & oculis & manibus palpatur; quin etiam regulæ lignæ, supra quam illa extensa fors est, ita communicatur, ut applicato leniter digito tamdiu percipiatur, quamdiu sonus durat. 2. Campanæ majores, dum pulsantur, figuram orbicularem velut in ellipticam mutant, atque ita tremunt, ut manus durante tinnitu applicata tremorem illum quandoque non absque doloris sensu percipiat.

49. Motus autem hic tremulus ad sonum requisitus non tantum afficit totam massam corporis sonori, sed singulas etiam minimas illius partes. Certe guttula mercurii in obvium laminæ chalibæ punctum effusa ad omnem chalybis percussu sonum tremit, & subsilit, etsi unico ferme puncto laminæ superficiem tangat. 2. Si chorda fricetur plectro, quod oleo, aut sebo illitum sit, sonum non edit, editura illico, si adhibeatur plectrum colophoniz exasperatum; quia, licet in primo casu dentur sensibiles motus ac vibrationes ipsius chordæ, seu, ut vocant, vibrationes totales, nullus tamen sit tremor partium minimarum, qualem tamen causat plectrum exasperatum, partes etiam minores vellicans, & perstringens. 3. Id ipsum ostendit experimentum obvium. Si forcipem ignariam una manu teneas, altera

ve-

vero ambo ipsius brachia prius arcte compressa subito remittas, varias quidem totius forcipis vibrationes, nulum tamen sonum advertes; at si vel digito crus alterum serias, mox sonum auribus, & minimarum partium tremorem applicata leniter manu senties, simulque intelliges, sonum a tremore non totius corporis, sed minimarum ipsius partium originem habere, tali nimirum, qui in frequenti rapidaque tensione, vel compressione, & restitutione minimarum partium consistat. Igitur vis sonora potissimum consistit in elasticitate partium rigidarum corporis sonori: hac enim corpus aptum efficitur ad hoc, ut percussione, aut affricu ad ejusmodi tremorem, ac vibrationes partium suarum minimarum concitetur.

50. Atque ex his intelligi jam potest, 1. Cur corpora rigidiora ad edendum sonum magis sint idonea; quia magis apta sunt ad vibrationes suarum partium. Et cum partes corporis rigidioris a compressione, aut tensione velocius plerumque se se restituant, quam partes minus rigidi, patet simul, cur corpora rigidiora plerumque etiam acutius sonent: dum enim velocior est restitutio, crebriores etiam eodem tempore erunt vibrationes, a quarum numero soni acuti rationem pendere postea dicitur. 2. Cur cheles usu attritæ plerumque recentibus præsent: sicut enim asserculi cum tempore sicciore, ita particule ligni rigidiores, proin recipiendo ac reflectendo tremori aptiores evadunt. 3. Cur campanæ ex ære ac stanno simul mixtis consilari soleant: metallum quippe compositum ob diversam particularum figuram rigidioris plexu formatur, atque ita tremori elastico magis idoneum redditur. Mixtura æris & argenti præ cæteris commendatur. 4. Cur tinnitus campanæ, qui per tria non raro minuta prima ab ictu mallei perdurat, admota manu, aut corpore molliore extinguitur; aut cur campana nive, aut gossipio operta obtusum, ob modicam autem fissuram stridulum sonum edat. Admota nimirum manu, corpore molli, aut incumbente eidem nive minutæ particularum vibrationes hebetantur, atque impediuntur, ne similes vibrationes aeri circumfluo communicent; quemadmodum etiam fit in tympano, quod luctus causa panno tectum est. Dum vero rimam passia est campana, extremi fissuræ margines reciproce in se incurrunt, sicque variæ, ac nulla certa lege interpolatæ oriuntur vibrationes

nes auribus ingratissimæ. 5. Cur poculum vitreum opè soni in frustra diffringi queat præcipue, si sit figuræ conoidalis, non nimis crassum, politum, ac probe siccatum: vibrationes enim vitri, ad quas a sono fortius immisso concitatur, fieri haud possunt, quin partes non nihil a se mutuo recedant: aucta igitur vocis intensiōe vibrationes illæ ita demum crescunt, ut particulis magis, magisque distractis vitri totius compages solvatur. Id porro ad optatum experimenti hujus eventum conducet plurimum, si explorato prius vitri sono vox ad unisonam primo temperetur, & ore super os poculi applicato, mutata subito voce a gravi in acutam, octava altius inelametur.

§. III.

AN AD SONUM REQUIRATUR MOTUS TREMULUS MEDII?

51. Quoniam corpus sonans motu tremulo moveri nequit, quin tremorem aliquem communicet etiam medio proxime se ambienti, patet, sonum nunquam dari sine motu aeris, per quem potissimum propagatur. Inde est, quod, si concentus musicus de nocte vehementior fiat in cubiculo angustiore, flamma ac fumus candelarum ad numeros quodammodo subsultare conspiciantur. Pari modo explosis tormentis ad distantiam plurimum etiam milliarium fenestræ, imo & ædificia sæpe succutuntur, ut expertos se testantur Grimaldus, ac Digbæus, quorum hic notasse se ait, in distantia 10. & amplius milliarium trepidasse fenestras navium, queis vehebatur, easque succussiones sensim auctas fuisse, donec emenso aliquo spatio explosiones ipsæ tormentorum audirentur, ac denique perveniretur ad naves acriter inter se dimicantes. Ex quo habetur, obtusam atque aeris succussionem eo etiam propagari, ubi sonus ipse percipi amplius non potest; eoquod vibrationes nimium crassæ, ac lentæ organum satis afficere nequeant. Aut, si credere malis, istas fenestrarum succussiones non tam a motu aeris, quam ipsius aquæ ortas esse, non refragabor.

52. Quod autem aer ad concipiendum motum tremulum aptissimus sit, ex ipsius elasticitate consequitur, atque inde etiam intelligi amplius potest, quod ipse se-

cum

cum vehementius collisus fortiter resonet. Sic pila vitrea aere crassiore vacua dum in pavementum projecta disrumpitur, aer ambiens tota vi in spatium quasi vacuum ex omni parte irruens, atque in se ipsum mutuo impingens fragorem sat notabilem edit. Ex adverso dum vesica fortius inflata disrumpitur, aer in illa antea contentus, & compressus omni vi erumpens, aerique externo allisus vehementius resonat, quemadmodum etiam fit in vesicula piscis pede obtrita. Ventī in cavos quosdam hiatus impactī, varietque contorti, item globi tormentorum per aerem volantes, aut virgulæ oblongæ celerius agitatæ sibilum quemdam edere solent, quia aer tam celeri sui divisioni resistens comprimitur, seque restituens, ac in alium impingens resonat. Per flagellum aurigæ tum sonus efficitur, quando extimns ejusdem flagelli nodus, ac partes huic vicinæ subito sistuntur, suoque tremore aerem intra flagelli spiras contentum concutiant.

53. Denique quod ad perceptionem soni omnino requiratur motus tremulus medii, maxime aeris, isque non qualiscunque, sed proportionatus tremori corporis sonantis, ex sequentibus inferri poterit. 1. Si horologium sonans super pulvillum laneum ponatur, aut e spongia non nihil madida suspendatur sub recipiente, quo plus aeris extrahitur, eo debilior semper, ac denique ferme nullus percipitur sonus; quia aer sub recipiente residuus, nimiumque expansus vibrationes campanulæ sonantis nec recipit, nec vitri lateribus communicat. 2. Tremor aeris causatur a tremore corporis sonantis: igitur ille huic erit proportionatus. Et vero si prope vitrum aqua plenum pulsetur cithara, longe alius motus in aquæ superficie notatur, quam si insilientur tubæ aut cornua; & Galilæus testatur, sæpius se observasse, si vitrum initio gravius, dein fortiore affricu acutius resonet ita, ut tonus octava altior fiat, illico singulas aquæ oscillantis undas dividi, & ex una duas effici. Si jam motus aquæ, aere multo densioris, tremori corporis sonantis se se accommodat, quanto magis tremor aeris respondebit tremulo corporis sonori motui? Accedit id, quod de flamma & fumo ad numeros subsultantibus dictum antea est.

54. Propagationem soni quod concernit, est ea spherica, successiva, & æquabilis; spherica quidem ita, ut diffundatur veluti in orbem a corpore sonoro tanquam centro

to secundum superficies sphaericas, sibi ferme concentricas. Certè campana in loci amplioris medio suspensa auditur in omnem partem. Singuli tamen radii sonori non agunt sphaerice, sed per lineas rectas abeunt, in conos quodammodo dilatandi, ut dicenda de tubis phonicis ostendent. Ex eo autem, quod corpus sonans agat sphaerice, sequitur, sonum decrescere in ratione quadrata inversa distantiarum a corpore sonoro (Phys. Gen. Num. 71.) ita, ut, si intensio soni in centro, seu prope ipsum corpus sonans ponatur esse $\equiv 1.$, in distantia ut 2. futura sit intensio soni $\equiv \frac{1}{4}$, in distantia ut 3. $\equiv \frac{1}{9}$, atque ita ulterius. Interim si sonus ferme secundum unam duntaxat regionem fortius propellatur, ut sit in voce hominis, aut tormento ad certam plagam directo, superficies sphaeræ, in quam sonus diffunditur, neutiquam sunt concentricæ: vox enim hominis, & fragor tormenti ad spatium longius propagatur velut a fronte, quam ex latere, aut a tergo.

55. Successivam esse soni propagationem, vel ex eo habetur, quod fiat per vibrationes medii elasticas, quæ simul omnes eodem momento dari non possunt. Id ipsum patet etiam ex eo, quod tonitruum fulgur, aut tormenti bellici flamma citius oculis, quam fragor ipse auribus percipitur. Intervallum autem temporis inter flammæ ac soni perceptionem labentis in data ab exploso tormento distantia dat celeritatem, qua sonus propagatur. Hæc quanta sit, inter Auctores haud satis convenit. Juxta Eulerum sonus intra unum minutum secundum percurrit 1100. pedes Rhenanos; juxta recentissimos quosdam e Gallis ad minimum 1038. pedes Parisinos. Assumpta igitur hac celeritate, & intervallo inter visum fulgur, & auditum tonitru, vel flammam, & fragorem tormenti notato, poterit aliquo modo determinari distantia tormenti, aut nubis, e qua fulmen, aut globus erupit, cuilibet nimirum minuto secundo attribuendo 1038. pedes Parisinos; sic si interval- lum temporis fuerit 8. minut. sec. erit: $1: 1038 \equiv 8: 8304.$ ped. Paris. Ad quantam porro distantiam sonus propagari valeat, definiri haud potest; cum ejus diffusio non solum ab intensione soni, sed etiam a vento, aeris puritate, densitate &c. dependeat. Id referunt, Gallis Genuam obsidentibus tormentorum fragores auditos fuisse Liburni, urbe 90. milliariibus Italicis distante.

56. Motus demum, quo sonus progreditur, est æquabilis, & neque a vehementia soni, neque ab ejus qualitate dependet, ut adeo sonus seu intensus, seu remissus ille sit, per se æquali temporis intervallo ad datam distantiam diffundatur; quamvis is, qui intensior est, pro longiori duratione ad spatium quoque longius deferatur. Ostendunt id experimenta Academiæ Parisinæ. In distantia 3000. cubitorum diversæ molis tormenta explodi curarunt, & singulorum sonum intra 5. minuta secunda in pendulo numerata ad hunc suum terminum pervenisse notarunt; postea ad intervallum 1500. cubitorum sonos eosdem dimidio tempore pervenisse compertum est. Sic etiam Derhamus testatur, pulsus mallei, & fragorem sclopeti æquali tempore milliaris anglici spatium fuisse emensos; & P. Delanis expertum se ait, quod famosa Echo in villa Simonettana prope Mediolanum vigesies & ultra eandem vocem, semper quidem remissius, sed æquali temporis intervallo reddiderit.

Ratio horum esse videtur, quia, licet in sono intenso moleculæ tum corporis sonori, tum aeris magis atque arctius comprimantur, quam in sono remisso, in quo tam arcte non comprimuntur, tamen restitutio in priorem situm & statum in illis non citius absolvitur, quam in his eo ipso, quod partes magis compressæ in restitutione majus etiam spatium debeant emetiri: unde fit, ut vibrationes in utroque sono sint omnino isochronæ, ferme ut in pendulis fieri diximus *Phyf. Gener. Num. 287.* De sono autem acuto, cur iste non propagetur celerius, quam gravis, ratio est, quia, ut videbimus, sonus acutus habetur per crebriores quidem vibrationes corporis sonori, sed tamen minutiores, aut minus amplas, quam sint in sono gravi; hinc licet vibrationes in sono acuto sint duplo v. g. plures, ac celeriores, tamen etiam sunt duplo minutiores vibrationibus soni gravis, utpote tardioribus, & amplioribus, ut adeo, dum duæ sunt vibrationes minutiores in sono acuto, una sed amplior fiat in sono gravi, utrinque autem ad æquale spatium, ferme sicut æquale spatium emetiuntur vir & parvulus simul ambulantes, si, dum vir unum passum, parvulus conficit passus duos, qui simul unum viri passum adæquent. Hinc jam fluit

§. IV.

IN QUO CONSISTAT SONUS?

57. **Propositio I.** Sonus primitivus consistit in motu tremulo minimarum partium corporis sonori. Prob. Certum inprimis est, ea corpora esse magis sonora, quæ ad concipiendum ejusmodi motum tremulum sunt aptiora; dumque corpora actu sonant, nihil in iis datur nisi tremor aliquis, & motus (id saltem, & nihil aliud in iis dari tum ratio, tum experientia ostendunt) neque etiam ulla est necessitas aliud quid requirendi: ergo cum sonus non consistat in motu totius massæ corporis sonori ex Num. 49. dicendum, quod consistat in motu tremulo minimarum partium corporis sonori.

58. **Propositio II.** Sonus derivativus consistit in motu vibratorio medii, maxime aeris. Prob. Sonus derivativus est, qui per medium propagatur ad organum auditus, & ab animali percipitur: atqui ad organum auditus aliud non propagatur, quam motus vibratorius medii, aeris nimirum, & motus iste vibratorius aeris potest, ac debet ab animali percipi: ergo. Dein absque motu tremulo aeris nulla fit soni perceptio; eo decrescente sonus minuitur, crescente intenditur ex Num. 53. ergo dicendum, in eo solo consistere sonum derivativum, & quidquid ultra requiritur, esse superfluum. Quod autem nulla sit necessitas aliud quid præter motum tremulum seu in corpore sonante, seu in medio admittendi, maxime nullam qualitatem absolutam, patet tum ex eo, quod absque tali qualitate sensatio auditionis optime explicetur, tum ex eo, quod admissa etiam tali qualitate difficultates, quæ hac in materia possent occurrere, non modo non evitentur, sed etiam augeantur.

59. Et quidem auditionis sensatio hoc modo fit. Corporis sonori partes minimæ ad motum tremulum concitatur aeris proxime ambientis moleculas simili motu ac tremore concutiunt; moleculæ aeris ita vibratæ impellunt alias sibi contiguas, hæ proximas, & sic ulterius. Aer ita ad certum tremorem concitatus pari motu tympanum auris, aeremque in eo latentem commovet, qui hac ratione commotus in membranam cochleæ subtenfam, ejusque fibrillas nerveas impingens animam ad impressio-

nis hujus perceptionem, id est, ad eliciendam auditio-
nis sensationem determinat. Hæc de modo, quo ordi-
narie fit auditio. Aliud est de surdis, qui manubrium
chelis v.g. dentibus tenent, item de eo, qui stilum fer-
reum e filo suspensum in hujus extremitate dentibus
prehendit, & obductis auribus stilum ad corpus durum
impingit; quo casu grandioris velut campanæ sonum
percipiet. Tremor nimirum ferri dentibus, atque aer in
ore latenti per filum communicatur, inde per connexas par-
tes, ac meatum illum interiorem ad cochleam traducitur,
atque ibi nerveas membranæ illius fibrillas afficit. Sonus
ejusdem stili ferrei multo erit vehementior, si tremor ip-
sius via ordinaria communicetur auri hoc modo. Utrum-
que stili extremum hinc dextro, illinc sinistro circumllga-
tur digito, & digitis in aures insertis impingens in obicem
durum stilus ferreus campanam mentietur prægrandem.

60. Ad difficultates vero hac in materia explicandas
quod attinet, earum potissima hæc est, quomodo simul di-
versi soni satis distincte percipi possint; hæc autem admissa
etiam qualitate minime complanatur. Certum namque est,
corpus sonorum, dum actu sonat, tremere tremore non
qualicunque, sed proportionato naturæ ipsius soni vel acu-
ti, vel gravis; tremorem huic plane similem, sono nimirum
proportionatum, communicari medio ita, ut non sufficiat
qualiscunque motus aeris, sed sonum quemlibet comitari
debeant vibrationes aeris speciales, eique sono propriæ;
quid commodi ergo afferat qualitas peculiaris? Adhæc ad-
missa qualitate non est ratio, cur sonus sæpe varietur in
medio v. g. intra cryptas subterraneas ita, ut ex acuto
fiat gravis; cur sub recipiente exhausto nullus detur sonus;
cur fistulæ ignariæ in apice montis explosæ sonum edant
exiguum, in vallibus vero fragorem ingentem; cur detur
Echo, & sonus impingens in rupem v. g. reflectatur;
cur nimia soni intensio lædat organum auditus.

ARGUMENTA CONTRARIA.

61. **O**B. I. In hac sententia explicari nequit tanta so-
norum diversitas, quanta in corporibus sonoris
notatur. Prob. Ant. Motus vibratorius partium corporis
sonori semper est idem; aut si diversus esse dicatur, ne-
quit hujus diversitatis assignari ratio. R. N. A. ad prob.
N. utrumque membrum. Duplex in sono distingui potest di-

diversitas. I. alius est *intensus*, seu fortis, alius *tremissus*, seu debilis. Intensus habetur a vibrationibus majoribus, quibus nimirum partes corporis sonori magis comprimuntur, ac proinde etiam magis expanduntur, vel etiam, quando plures partes corporis simul vibrantur. Sonus remissus consistit in vibrationibus minoribus, quibus eadem partes minus comprimuntur, minusque in restitutione expanduntur. Oriuntur autem majores vibrationes ex fortiore, minores ex debiliore percussione, aut frictione corporis sonori, ut experientia testatur in campana, chorda &c. Excitatis semel majoribus vel minoribus vibrationibus in ipso corpore sonoro, pares istis communicantur aeri, & per hunc propagatæ imprimuntur ipsi organo.

II. Sonus alius est *gravis*, alius *acutus*. Hæc diversitas refundi non potest in solas majores, aut minores vibrationes: campana enim fortius percussa, magisque tremens sonum quidem edit intensiorem, at non per se etiam acutiorem. Hinc sonus gravis dicendus est oriri ex tardioribus, acutus ex celerioribus vibrationibus partium corporis sonori ita, ut, quo plures eodem tempore sunt vibrationes partium corporis, eo istud acutius, quo illæ sunt pauciores, eo hoc gravius sonet. Hæc autem vibrationum celeritas dependet a materia, ejusque elasticitate, crassitie, longitudine, ac tensione, ut in exemplo chordæ ad oculum patet, quæ, quo est rigidior, ac tenuior, vel quo est brevior, ac fortius tensa, eo tremit celerius, acutiusque sonat; si eadem chorda evadat longior, aut minus tensa, vel si crassior æqualiter sit tensa, sonum edet graviorem, ut experiri quis in obvio instrumento poterit.

62. Quod si duæ, aut plures chordæ (idein est de aliis corporibus sonoris) vibrationes suarum partium certo ordine ita conficiant, ut vibrationes illæ, quamvis in una acutius sonante plures, in altera gravius sonante pauciores eodem tempore dentur, tamen sæpius simul incipiant, ac simul desinant, dabitur *consonantia soni* gravis & acuti, seu *sonus harmonicus* sensum auditus suaviter afficiens; ut adeo consonantia aliud non sit, quam certus ordo & proportio sonorum, quorum vibrationes dato tempore sæpius simul incipiunt, ac desinunt. Cur autem talis consonantia animo nostro placere debeat, ex principiis etiam metaphysicis egregie ostendit Cl. Eulerus in *Tentamine nove Theoriæ Musicæ* cap. 2. Ea nimirum placent animo, in quibus hic perfectionem aliquam inesse advertit; perfe-

Etio autem confiftit in certo ordine, & hic quidem in eo, quem foni inter fe tenent tum quoad gravitatem & acumen, tum quoad durationem, verbo, quem inter fe tenent quoad numerum vibrationum certo tempore editarum; fi ergo talis ordo detur, eumque animus advertat, non poterit non dari confonantia animo grata. Quoniam vero fieri sæpiſſime poteſt, ut alii ordinem iſtum animadvertant, alii eundem non obſervent, eadem res aliis placere, aliis diſplicere poterit. Utrique autem decipi poſſunt: ordo enim re ipſa inefſe poteſt, quem multi non cognoscunt, & sæpe aliqui ordinem a ſe percipi exiſtimant, ubi nullus eſt: hinc tam diverſa de rebus muſicis judicia.

63. Soni itaque confonantes, ſeu Toni diverſitatem ſuam habent a numero vibrationum, quas dato tempore ſimul abſolvunt: quare ſi vibrationes duarum v. g. chordarum ſint ut 1. ad 1. hoc eſt, ſi quælibet eodem tempore æqualem vibrationum numerum conficiat, tonus earum erit *uniſonus*; ſi vero vibrationes alternatim conveniant ita, ut chorda A vibrationes duas abſolvat, donec chorda B unam, adeoque ſi vibrationes earum inter ſe ſint ut 2. ad 1., conſonabunt in *Oſtava* ſic dicta, quod intra duos illos ſonos, quorum unus acutus, alter gravis, octo toni ordinate decreſcentes, ſi ab acuto initium ſumatur inclusive, diſtinguantur. Si vibrationes unius chordæ ad alterius ſint ut 2. ad 3. erit *Quinta*; ſi ſint ut 3. ad 4. dabitur *Quarta*; ſi ut 4. ad 5. *Tertia major*; ſi ut 5. ad 6. *Tertia minor*; ſi ut 3. ad 5. *Sexta major*; ſi demum ut 5. ad 8. erit *Sexta minor*. Proin ſi chorda A dato tempore ponatur abſolvere vibrationes 120. chorda B eodem tempore abſolvens vibrationes 60. illi conſonabit in *Oſtava*; chorda C abſolvens vibrationes 80. conſonabit in *Quinta*; chorda D abſolvens 90. conſonabit in *Quarta*; chorda E abſolvens 96. dabit *Tertiam majorem*; chorda F abſolvens 100. dat *Tertiam minorem*; chorda G abſolvens 72. dat *Sextam majorem*; chorda H abſolvens vibrationes 75. dabit *Sextam minorem*, ut patebit inveſtiganti rationem, quam dati hic numeri habent ad aſſumptum numerum 120.

Numerus porro vibrationum in chordis, ut ſupra inſinuatum, dependet a longitudine, craſſitie, & vi tendente: Si longitudo, & craſſities ſit eadem, numerus vibrationum erit ut radix quadrata ponderum tendentium: poſitis itaque ponderibus ut 1. & 4. tonus erit ut 1. ad 2. adeo-

adeoque in octava; si pondera sint ut 4. & 9. tonus erit ut 2. ad 3. sive quinta &c. Si chordæ differant sola longitudine, numerus vibrationum erit in ratione inversa longitudinum; si sola crassitie differant, erit in ratione inversa diametrorum; si utraque differant, erit numerus vibrationum in ratione inversa composita longitudinum & diametrorum. Fufius hæc pertractat P. Jos. Falck, & præcipue Cl. Eulerus, atque ante istos folide, ac erudite P. Athanasius Kircherus in sua Musurgia universali.

64. His addi potest 1. Sonum stridulum oriri ex eo, quod corpus sonorum vibrationes edat nulla certa lege, aut ordine interpolatas; sic fieri quandoque potest, ut chorda inæqualis crassitie oscillationes suas non ubique simul absolvat, atque ita sonum asperum causet. 2. Sonum obtusum dari, quando paucae duntaxat partes ad motum vibratorium concitantur vel ex defectu elasticitatis, vel ex defectu debitæ unionis partium. 3. Sonum clarum haberi per vibrationes corpore elastico secundum omnes partes æqualiter tremente excitatas. 4. Cur, si duæ chordæ unisonæ modico a se intervallo distent, percussa una resonet etiam altera, ratio est, quia aeris vibrationes, a chorda excitatæ, impingunt in chordam unisonam, ad recipiendas similes vibrationes aptissimam. Idem fit, si fistula campanæ consona prope istam infletur. Imo licet chordæ non sint unisonæ, modo sibi perfecte consonent vel in octava, vel in quinta, aut alio tono, tamen percussa una vibrabitur etiam altera, ut adeo chorda agitata motum communicare possit alteri, quæ duas, aut tres peragit vibrationes, dum prior semel vibratur. Ex quo infert Cl. Boerhavius, nunquam a nobis unum duntaxat sonum purum audiri, eoquod percussio uno corpore aliquantum etiam contremiscant corpora alia isti consona, ita tamen, ut soni isti secundarii omnes in unicum sonum a nobis haud separabilem confundantur. Cur autem chordæ aliæ non consonæ, licet etiam ipsæ ab aere vibrato impellantur, sonum tamen sensibilem non edant, ratio est, quod earum vibrationes, utpote quæ cum vibrationibus chordæ percussæ non conveniunt, ab his impediuntur, ne integræ absolvi queant.

65. Ob. II. In hac sententia explicari non potest propagatio soni. Prob. Sonus propagatur etiam, ubi nullus datur motus tremulus vel aeris, vel alterius medii: propagatur enim per muros & parietes, per vitra, imo etiam

per aquas; & tamen in his omnibus non apparet, quomodo, & ubi dari queat motus aliquis tremulus. R. N. A. ad prob. denuo N. A. ad rationem additam univerſim dico: aer a corpore ſonoro ad motum tremulum ſemel concitatus vel invenit rimas, & hiatus, per quos aerem alicubi in cubiculo v. g. concludum ad ſimilem concitare tremorem poteſt, vel ipſis etiam corporibus ſeu ſolidis ſeu fluidis parem communicare tremorem poterit. Et de vitro quidem nemo id revocabit in dubium, qui, quanta ſit illius elatiſcitas, perpenderit; quod autem alia etiam corpora vaſtiora, muri v. g. & parietes, ad talem tremorem concitari queant, ex ſequentibus licebit intelligere.

66. Primo. Campana quantumvis magna, teſte Grimaldo, ad minimum acus iſtum tota contremiſcit ita, ut etiam manu notetur particularum tremor. 2. Si quis trabem prælongam leviſſime percutiat, alter clauſis auribus ſonum percipiet, ſi oppoſitam trabis extremitatem dentibus teneat; vel ſi eandem trabem ungue digiti leniter ferias, alius vero alteri extremitati aures applicet, tremorem cum ſonitu diſtincte percipiet. Quin motum tremulum particularum ligni hoc caſu ad oculum oſtendit vas mercurio plenum, ac trabi impoſitum, in quo ad ſingulos trabis iſtus criſpatæ mercurii undulationes apparent. 3. Si cuniculus aliquis ſubterraneus ducatur, ad ſingulos foſſo is iſtus contremiſcit, & ſubſultat tota rupes incumbens, quod oſtendit aqua in vaſe ſupra rupem ſtagnans, ac tali luſorii tympano militari impoſiti. 4. Incedente equitatu militari ingens terræ tractus tremit, & noctu caſtrorum excubiæ, ut motus hoſtilis equitatus notent, obſervant, utrum aleæ tympano impoſitæ tremant, vel effoſſa etiam ſcrobecula aurem terræ propius admovent. 5. Sæpius advertimus, ipſa etiam, quibus innitimur, templi ſcamna tremere, huncque tremorem toti corpori noſtro communicari, dum organi pneumatici fiſtulæ gravioreſ, ac ſcamnis conſonæ inſtantur. Non raro etiam, dum chelis major (Banduram vocant) ad ſonum concitatur, totum cubiouli pavimentum tremens ſibi inſiſtentes non aliter concutit, quam fieri ſubito a frigore ſolet. Denique notandum, muros præcipue denſiores non cuiuſvis ſono pervioſe eſſe, & multa, quæ his in materiis vulgo, quod ad minima attendere non aſſuetum ſola grandia miratur, videntur incredibilia, certiffimis ſummorum etiam Virorum experimentis plane eſſe demonſtrata.

Per

Per aquas sonus propagabitur vel per hoc, quod aer, qui sat copiosus in aquis latet, recipere aliquem ab aere exteriore, si in hoc sonus excitetur, vel, si sonus sub aquis oriatur, huic communicare tremorem possit; aut, quod aliis verosimilius est, per hoc, quod aqua ipsa ejusmodi tremorem licet debiliorem recipiat: hinc, teste Nolito, siue aqua ab aere fuerit purgata, siue non, soni sub ea discrimen modicum est. Illud tamen Urinatorum testimonio ajunt constare, sonum vix ultra 18. ulnas infra aquas percipi.

67. Dices. Sonus propagatur etiam, quando flant venti vehementiores, & contrarii: hoc fieri non posset. Prob. min. Per ventos impediri, ac turbari deberent tremores aeris. 2. Sonus difficiliter propagatur per fumum, aut flammam: hujus nulla esset ratio, si sonus consisteret in motu: motui enim fumus, aut flamma non resistit. 3. Sonus propagatur etiam oblique: nam auris sinistra percipit sonum ex parte dextra allapsam; motus autem propagatur per lineam rectam. 4. Nulla prorsus habetur ratio, cur intensio soni, quo is longius propagatur, eo magis decrescat, & quidem decrescat in ratione quadrata inversa distantiarum: ergo necdum satis explicatur propagatio soni.

R. N. min. ad prob. dist. Ant. deberent impediri, aut turbari hoc sensu, quod ventis contrariis non omnino ad tantum spatium, ad quantum aere tranquillo possent propagari, C. A. quod ne quidem fieri ordinate possent istæ vibrationes aeris, N. A. Motus vibratorius in particulis aeris multo velocior est, quam sit motus translationis, quo ventus aerem ex uno in alium locum pellit; & si quidem Newtono, aliisque credimus, celeritas venti validissimi est ad celeritatem soni ut 1. ad 33. hinc vibrationes illæ celerrimæ communicari aeri possunt, antequam loco pellatur, & si etiam aliquis loco pellitur, succedit mox alius ad recipiendas similes vibrationes æque aptus. Quod si tamen venti sint rapidissimi, & sonus haud admodum sit intensus, sonus impediatur hoc sensu, quod ad tantum spatium percipi nequeat, ad quantum perciperetur aere tranquillo; quia nimirum ipse aer jam vibratus eo, quo ventus spirat, abripitur.

Ad 2. N. min. Rationem additam Dist. fumus, aut flamma non obstant motui qualicunque, Conc. motui vibratorio, Nego. Per fumum, qui constat innumeris parti-

culis heterogeneis non elasticis, sejunguntur partes aeris, ut adeo istæ tremorem suum non ita possint communicare aliis; per flammam quoque aer nimis extenuatur, proin ad concipiendum tremorem minus aptus efficitur. Ad 3. Dist. 2. membr. Motus propagatur per lineam rectam ita tamen, ut frequentissime etiam reflectatur, Conc. ut hoc non fiat, Nego 2. m. Sonus a parte dextra allapsus incidit sæpe in aurem sinistram per reflexionem, dum tremor aeris variis ab obstaculis diversimode reflectitur, quæ reflexio aperta etiam in planitie, si alii desint obices, fieri potest a solo, cui insistit corpus sonorum; plerumque tamen in talibus circumstantiis sonum non percipiunt ii, qui una ex aure surdi sunt, nisi alteram adhuc sanam loquenti obvertant. Ad 4. N. A. Ratio, cur intensio decrescat, est, quia, quò longius sonus propagatur, eo plures particulæ a jam vibratis sunt impellendæ; hinc semper crescit resistentia, & quidem pro amplitudine superficierum sphericarum, in quas sonus diffunditur: istæ cum crescant in ratione quadrata distantiarum, eadem etiam in ratione, sed modo inverso, se habebit intensio soni.

68. Ob. III. Non potest explicari concursus plurium sonorum in eodem aeris puncto. Prob. Sint plures Musici, per circulum dispositi, qui simul qua voce, qua instrumentis diversissimis consonent. In hoc casu distincte, & sine confusione concurrunt omnes isti soni in eodem instanti temporis, atque in eodem aeris puncto, nimirum in centro hujus circuli: atqui hoc in ista sententia fieri haud potest; cum una eademque aeris particula in eodem instanti tot tamque diversas vibrationes recipere nequeat. Hæc est potissima, si non unica, quæ hac in materia occurrere potest, difficultas, at talis, quæ Patronos qualitatis æque, ac nos, imo magis premat: nam eosdem aeris tremores ex Num. 53. & 60. admittere debent, quos admittimus nos; & præterea nulla omnino in concursu plurium sonorum dari posset turbatio, si sonus esset qualitas, nec determinatum aeris tremorem requireret, & tamen experientia docet, in tali concursu aliquam saltem oriri confusionem. R. N. A. ad prob. nego suppositum, quod soni isti omnes simul in eodem instanti indivisibili ad eandem partem aeris, vel ad aurem appellant: si enim ponatur, quod sonus intra unum minutum secundum conficiat 1100. pedes Rhena-

nos, .

nos, his in digitos ac lineas duntaxat divisus intra unicum minutum secundum poterunt ad minimum 110000. vibrationes sonoræ per idem punctum successive propagari ita, ut cuilibet respondeat aliud diversum instans.

69. Si contra hoc excipias: ubicunque auris intra circulum illum constituatur, diversos illos sonos ubique simul percipit: ergo etiam tremores illi simul in eadem particula aeris deberent dari. R. Dist. A. videmur nobis simul percipere illos sonos, C. A. re ipsa simul percipimus, N. A. Licet vibrationes illæ tantum sint successive, quia tamen nimia est earum sibi succedentium celeritas, non successive, sed quasi simultaneæ nobis apparent, sicuti multa alia nobis videntur fieri simul, quæ re vera sunt successive, eoquod instans aliquod sensibile in innumera alia minora divisibile sit. Contingit hoc in titione celerrime in orbem rotato, quæ rotatio licet successiva sit, & ignis quolibet instanti in unica tantum circuli parte existat, circulus tamen totus apparet igneus, quia impressiones in oculo factæ tanta celeritate sibi succedunt, ut altera adveniente necdum omnino evanuerit prior. Hinc si ponamus circulum a titione rotato intra unum minutum secundum absolvi, totamque circuli sic descripti peripheriam constare 600. lineis, quolibet instanti singulæ lineæ ardere videntur, etsi 599. non ardeant, si titionis flamma unam lineam implere ponatur: intra unum itaque minutum secundum hoc casu 599. vicibus decipiemur. Quod vero aliqui licet diversi tremores aeris mutuo sese non turbent, aut confundant, ex eo etiam intelligi posse existimant, quod dum plures lapilli projiciuntur in aquam, a singulis tanquam centris propagentur circuli, qui etiam, dum se intersecant, mutuo se non turbant. Quodsi duo radii sonori a regionibus e diametro oppositis in sensibili aliqua aeris particula sibi occurrant, poterunt reciproce mutare impressiones, sicut duo globuli elastici in intermedium directe incurrentes mutatis celeritatibus reflectuntur. Atque hæc est responsio communior ad difficultatem hic propositam.

70. Alii cum Cl. Majrano, ac Nolletto respondent: N. A. ad prob. N. min. ad istius prob. Dist. A. una eademque particula aeris non potest in eodem instanti recipere tot diversas vibrationes in tota sua massa, Om. A. in diversis partibus suæ massæ, N. A. Ponunt isti Auctores I. exiguum etiam aeris particulam sensibilem constare plu-

pluribus moleculis; 2. has moleculas esse diversæ magnitudinis, & figuræ: cum enim sint congeries subtiliorum partium, quæ diversissimis ex causis conjunguntur, ac iterum separantur, magnitudine in infinitum ferme differunt. 3. Imo etiam de moleculis primigeniis putant, non esse rationem dicendi, eas omnes magnitudine esse prorsus æquales. Quodsi autem diversa est magnitudo, ac figura, diversa quoque erit elasticitas, sicut spiræ ex eadem etiam lamina chalybea confectæ diversam habent elasticitatem, si aliæ aliis sint majores, aut crassiores. Ubique igitur ponatur corpus sonorum, semper aderunt moleculæ aeris elasticitate eadem præditæ, qua pollent partes ipsius corporis sonori, adeoque aptissimæ ad hujus vibrationes recipiendas, & propagandas, ut adeo diversa corpora sonora sonum suum quemcunque per eandem quidem aeris massam, seu partem sensibilem, sed per diversas illius massæ partes insensibiles propagare valeant sine notabili tremorum confusione. Licet autem corpus sonorum tremorem aliquem communicet omnibus aeris circumflui moleculis, quia tamen illæ moleculæ, quæ quoad elasticitatem magis conveniunt cum elasticitate corporis sonori, fortius vibrantur, quemadmodum patere potest in duabus chordis unisonis, de quibus Num. 64. illarum vibrationes prævalentes aliarum minus fortes quasi oppriment, & moleculæ ita vibratæ tremorem sibi communicatum in alias sibi similes propagabunt. Ita isti; qua veri specie, aliorum judicium esto. Videri potest Eulerus in Theoria lucis, ubi hanc Nolleti opinionem acriter impugnatur.

71. Ob. IV. Non potest explicari perceptio soni. Prob. Sonus auditur; motus vero non auditur. R. N. A. ad prob. Dist. 2. membr. Non quilibet motus auditur, Conc. nullus motus, etiam vibratorius causans debitam impressionem in organo auditus, N. 2. m. Audire est percipere impressionem in organo auditus factam; hæc impressio cum fiat per motum, auditio erit perceptio, seu sensatio motus in organo auditus causati; & sonus erit hic ipse motus hanc impressionem efficiens. Inferes: Ergo auditus revera esset tactus. R. Dist. ill. esset tactus ille communis, & crassior, qui nomine sensus tactus intelligi solet, nego, esset, si ita loqui placeat, species aliqua tactus subtilioris, cujus organum sit sola membrana cochleæ, non vero manus, aut alia pars corporis,

eoquod in his non detur debita dispositio, conc. illatum. Videbimus omnes quinque sensus aliquam tactus speciem esse, eoquod sensatio omnis dependeat ab impressione in organo sensus causata; manent tamen quinque sensus distincti tum, quia distincta sunt eorum organa & objecta, tum, quia specialis semper ac determinatus motus requiritur ad debitam in cujuslibet sensus organo causandam impressionem. Si quæras, qua ratione possimus discernere, ex qua distantia, & quam ex parte sonus adveniat, si auditio aliud non sit, quam perceptio impressionis in ipsa, aure factæ, respondeo, quam parum in lumine distantia objecti lucidi uno oculo deprehenditur, tam parum in sono directo discerni potest distantia corporis sonori; interim ex intensione, aut remissione soni, item ab experientia, qua habemus, alias, dum similem percepimus sonum, corpus sonorum hanc, aut illam a nobis habuisse distantiam, de hac iudicium aliquod, at neutiquam certum, ferre licebit. Sic etiam in illa parte corpus sonorum existere credimus, ex qua fortius alterutra feritur auris; quamquam in hoc quoque fallamur sæpissime ob sonum in aures fortissime reflexum.

72. Ob. V. Non potest explicari perceptio soni diversi. Prob. Tympanum auris semper eodem modo est tensum: ergo per illud propagari non possunt diversi soni; sicut tympanum militare, quamdiu eodem modo est tensum, eundem semper reddit sonum. R. N. A. ad prob. Om. A. potest enim anima membranam tympani pro diversitate soni diversimode tendere, ut dictum N. 43. N. Cons. Paritas cum tympano militari nulla est: membrana enim tympani militaris bacillo percussa, & secundum minimas suas partes tremens ipsa primum debet efficere vibrationes, ad competentem sibi sonum requisitas; hinc quamdiu est æqualiter tensa, æquales semper erunt tremores partium minimarum, proin etiam æquales vibrationes aeri communicatæ. At vero tympanum auris non efficit illas vibrationes, sed a particulis aereis, jam certa ratione, ac celeritate vibratis, commota proportionatas aeris tremori vibrationes recipit, & aeri interno communicat, quo mediante vibrationes illæ diversæ propagantur ad membranam cochleæ.

Alii conformiter iis, quæ Num. 70. sunt indicata, negant suppositum, quod diversi soni recipiantur in eadem parte auris: ajunt enim, dari in tympano auris, ac membra-

brana cochleæ diverſas fibras, quæ pro diverſa longitudi-
ne, craſſitie, ac tenſione ſua diverſam habeant elaficitatem,
ac proin aliquas ab his tantum vibrationibus, alias ab aliis,
ſingulas a ſibi proportionatis moveri, ac tremefieri, quod
denuo deducunt ex eo, quod in duabus chordis uniſonis
evenit, dum nimirum una percuffa reſonat etiam altera,
ſilentibus reliquis. Hinc reddere etiam volunt rationem,
cur aliqui ſurdaſtri certos quosdam ſonos præ aliis diſtin-
ctius percipiant; læſis nimirum quibusdam fibrillis mem-
branæ cochleæ aut tympani eos adhuc ſonos percipient,
qui magis quadrant fibrillis adhuc ſanis, aut ſaltem minus
vitiatis. Denique advertendum, poſſe nos quandoque ple-
no etiam in concentu quemlibet ſonum præ alio ſeorſim
diſcernere, ſi nimirum attentionem noſtram omnem in
hunc ferme ſolum convertamus: ſenſatio enim non fit ex
qualicunque affectione organi, ſed adefſe etiam debet ad-
vertentia animæ: ſi ergo hæc ad unum præ reliquis ſit in-
tenta, illum etiam præ aliis percipiet; maxime, ſi etiam
membranam tympani ita tendat anima, ut admittendo, &
propagando determinato alicui ſono magis ſit propor-
tionata.

§. V.

ALIA AD SONUM PERTINENTIA.

79. **I**Nter hæc primo memorandus venit *ſonus reflexus*;
dum nimirum aeris particulæ certo modo jam vibra-
tæ incurrunt in obicem, qui ipſarum reſtitutioni magis ob-
ſiſtat, iſtæ fortius in partem oppoſitam ſe ſe reſtituunt,
& particulas ſibi contiguas eo iterum modo vibrant, quo
id fecere partes ipſius corporis ſonori: unde ſonus mutata
directione refleſtitur, & quidem ſub eodem angulo, ſub
quo inciderat in obicem, quemadmodum ex iis, quæ de
motu ex percuffione, deque motu reflexo in Phyſica ge-
nerali ſunt oſtenſa, intelligi poteſt. Quodſi ſonus refle-
xus, ſilente jam directo, diſtincte ad aures redeat, *Echo*
dicitur, ad cujus geneſin duo potiſſimum requiruntur.

Primum eſt *Obex*, qui directam ſoni viam impediat,
corpus nimirum aliquanto denſius, quod radios phonicos
non tranſmittat, qualia ſunt muri, rupes, ſylvæ implexæ,
aqua in puteis &c. ſimul non nimis molle, ne motus tre-
mulus aeris hebetetur; neque nimis rugoſum, & aſperum,
ne

ne radii sonori dispergantur. Alterum est *debita distantia* corporis sonantis aut loquentis ab obice reflectente: si enim obex sit nimium vicinus, vox quidem reflectetur, sed ob existentem adhuc in organo sonum directum, aut ob nimiam festinationem, qua sonus reflexus directum excipit, ille ab hoc distingui non poterit. Tanta igitur distantia requiritur, ut sonus directus plene fuerit perceptus ab organo, antequam allabatur reflexus. Inde est, quod Echo plerumque ultimas duntaxat syllabas reddat, cum ultimæ soni directi priores soni reflexi elidant. Quod si Echo unicam non nisi syllabam reddat, dicitur *monosyllaba*, si duas, *dissyllaba* &c. Si eandem syllabam semel tantum repetat, erit *monophona*, si sæpius, *polyphona*. Syllabarum, quas Echo repetat, numerus dependet a distantia loquentis ab obice. Ad monosyllabam plerumque requirunt distantiam 100. circiter pedum.

74. Atque hinc patet I. Si radius phonicus in obiectum reflectens incidat perpendiculariter, fore, ut vox emissa in se ipsam redeat: sit enim in Fig. 1. Tab. I. obex reflectens *m n*; punctum phonicum, e quo vox egreditur, sit *A*; radius phonicus *A C* incurrens in punctum *C*, quod vocant *centrum phonocampticum*, ob æqualitatem anguli incidentiæ & reflexionis revertetur in *A*. II. Quomodo datis puncto phonico, ac phonocamptico, situque obicis reflectentis determinari queat directio soni reflexi. Sit in eadem Figura 1. obex *m n*, punctum phonicum *B*, phonocampticum *C*; fiat angulus *n C D* æqualis angulo *m C B*, linea *C D* erit directio soni reflexi. Quod si ducatur recta *B m E* ad obicem normalis, fiatque *m E* æqualis *B m*, punctum *E* dabit locum, ex quo egressa esse censebitur vox in puncto *C* reflexa. Unde apparet, cur quandoque a loquente nulla percipiat Echo, cum tamen altius haud procul distans illam percipiat; si nimirum radii phonici sub tali angulo incurrant in obicem, ut iidem sub æquali angulo reflexi non ad loquentem, sed ad alium pone adstantem redeant. III. Cur, si fuerint duo muri *B C*, & *C D* (Fig. 2. Tab. I.) ad angulum rectum commissi in *C*, intensa admodum Echo percipiat ab homine ita posito in *A*, ut coni sonori axis *A C* angulum rectum bisariam secet: radii enim phonici sub angulo semirecto incurrentes in murum *B C*, ab hoc sub eodem angulo reflectentur in *C D*, atque hinc repercussi in *A* (idem est de radiis incurrentibus

bus in D C, atque inde reflexis in B C) vocem ex C in se reflexam haud parum intendent. Ex aliis quoque radiis sub alio angulo incidentibus non pauci ob muri asperitatem simili ratione mutuo reflexi redibunt in A. Vivacior adhuc erit Echo, si radii phonici ex A incurrant in obicem circularem E C F, cujus centrum sit in A; eoquod tunc omnes radii in se ipsos reflexi eodem tempore concurrant in A, ut ex natura circuli patet. IV. Cur quandoque eadem vox bis, terve, aut sæpius adhuc repetatur; quia nimirum obstacula vel sunt ita disposita, ut unum altero sit remotius, atque ita unum post alterum vocem reddat, ut plerumque fit in regionibus montosis; vel quia sunt inter se opposita ita, ut sibi mutuo remittant vocem, quo modo formatur Echo villæ Simonettanzæ, de qua Num. 56.

75. Patet præterea, quid sit, & quando detur *resonantia*. Est nimirum hæc quoque sonus reflexus, sed tam cito allapsus ad aures, ut a sono directo distingui nequeat, daturque tunc, quando loquens, aut corpus sonorum ab obice non multum distat; quo casu sonus etiam apparet intensior, concurrente nimirum directo, & reflexo. Hinc est, quod vox pro concione dicentis appareat debilior, quando parietes templi peristromatis sunt vestiti, quia ab his, utpote mollibus, minor est reflexio, quam foret a parietibus nudis. Sic etiam ingens hominum multitudo plurimum vocis absorbet non solum ideo, quia per eos impeditur reflexio a scamnis, pavimento &c. causanda, sed etiam, quod aer tot respirationibus ac evaporationibus infectus minus sit idoneus vibrationibus sonoris, quemadmodum etiam decidentibus copiose nivibus debilior esse sonus solet, quia tunc non modica datur partium aeris sejunctio. Plurima, eaque sane miranda de sono reflexo habent Kircherus noster, atque etiam Schottus, qui Auctores, cum ferme ubique ad manus sint, ea, quæ compendium hoc nostrum non admittit, abunde supplebunt.

76. Post soni reflexionem memoranda venit illius collectio, & intensio per *tubas phonicas*, seu, ut etiam vocant, *stentoreas*. Inventum illæ sunt laudati Kircheri ratione Germani; ad majorem eas perfectionem adduxit Morlandus Eques Anglus, a quo etiam tubi Anglicani dicuntur. Construi solent ex materia rigidior, qualis sunt laminæ metallicæ intus rite lævigatæ. Forma varia est, plerumque conica. Ratio autem soni per eas intensi consistit

istit potissimum in aliqua vocis coarctatione, & repetita a parietibus elasticis reflexione: cum enim aer ab ore loquentis vibratus non possit se, uti alias, in omnem partem diffundere, impingens in latera tubi ab iisdem versus medium tubi undique repercutitur, atque ita vibrationes tremulæ aeris in tubo contenti necessario augentur adeo, ut is versus tubi aperturam, ubi minor est resistentia, fortius se se restituens sonum intendat, atque ad amplius spatium deferat. Cur autem vox humana per ejusmodi tubas sonum suum naturalem plerumque deperdat, ratio est, quia aer vibratus, & in latera elastica impingens aliquid participat de tremore partium ipsius tubæ, quo fit, ut vibrationes aeris ab ipso loquente primum causatæ aliquantum immutentur. Ex eodem capite habetur ratio, cur sonus etiam remissus in cavernis subterraneis immutetur, atque etiam in intensum non raro sonum excrescat.

77. Huc præter alia innumera, de quibus idem Kircherus, pertinet quoque famosa illa fabrica extra urbis Syracusanæ mœnia a Dionysio Siciliæ Tyranno constructa, quæ a fine operis, carcer, a forma vero, quam habet, auris Dionysii appellatur: est enim ad naturæ exemplar e vivo saxo in formam auris excisa, quæ cochleato ductu in angustum canalem desinens cubiculo speluncæ imposito insinuatur, ut scilicet omnis submurmuratio captivorum, qui inferius in ergastulo detinebantur, per cochleatum canalem diffusa, & multiplici reflexione aucta a præfecto carceris distincte perciperetur. Hodie obturato superius orificio, inquit Kircherus, voces immurmuratæ in mirificam Echum degenerant ita, ut submissa vox clamorem, excreatio tonitru, complosio manuum tormenti fragorem referat. Ichnographiam specus idem Kircherus Phonurgiæ L. I. Sect. 4. exhibet. Hinc etiam patet ratio tubarum acusticarum, quæ nimirum auri applicatæ sonum colligunt, & per repetitas reflexiones etiam intendunt.

78. Tertium hnc pertinens est sonus *fistularum*, qui oritur ex mutua collisione aeris in iis contenti: aer enim per rimulam, seu os fistulæ a tibia inspiratus, mox in aciem declivis fenestellæ incidens ita frangitur, ut pars quidem foras erumpat, pars vero per tubi cavitatem spirali ductu descendens in aerem intus latentem impingat, ubi alterna collisione vibratus tum per aper-

ta fistulæ foramina, tum per inferius orificium motu tremulo elabitur. Soni varietas in fistulis potissimum dependet a longitudine ipsarum, quæ per foramina orbicularia, in fistularum latere posita, fieri quodammodo major aut minor potest. Egregie rem hanc pertractat Cl. Eulerus in Tentamine Novæ Theoriæ Musicæ Cap. x. §. 28. & seqq.

79. Quantum est *Vox humana*, ad quam, cum maxima sit vocum diversitas, plura concurrere manifestum est. Inter ista 1. sunt pulmones, qui nunc majorem, nunc minorem aeris copiam subministrant. 2. Trachea, & quæ ei annexa sunt, larynx, glottis, & epiglottis, de quibus Num. 12. 3. Palatum instar fornicis arcuatum, lingua, dentes, labia, quæ serviunt ad aerem, e gutture erumpentem, diversa ratione modificandum. Nempe dum aer e pulmonibus per trachæ cartilagine spirali cursu emittitur, in tremula glottidis labra incurrens simili tremore crispatur; tum etiam per rimæ ovalis angustias erumpens ad se ipsum, & epiglottidem alliditur: unde sonus vocalis oriri debet; hic dein pro diversa in gutture, palato, lingua, dentibus ac labiis modificatione in voces articulatas formatus per os erumpit, id quod P. Honoratus Fabri per omnes alphabeti literas ingeniose ostendit. Sic e. g. vocalis *A* per aerem gutture atque oropatulo emissum; consonans *M* vero ab eodem ad labia subito compressa alliso reliquis facilius exprimuntur, ut observare est in infantibus. *E* ore non nihil depresso, & lingua palato admota, ut ovium balatus; *O* gutture aperto per aerem ab oris concavitate repercussum profertur; *I* lingua demissa per angustam dentium fissuram exprimitur, sicut ventus per januæ rimam illapsus sibilat; *U* commissis dentibus, & affixa proxime palato lingua, sed contractis & exporrectis labiis ita, ut modicum foramen relinquatur. De his legi etiam poterit P. Kircheri Anatomie Organi soni, & vocis humanæ.

80. Modulationem vocum humanarum partim trachæ, partim glottidis opera effici putant: cum enim rimæ ovalis labra nervacea sint, adeoque tendi ac remitti queant, ad instar chordæ nunc magis nunc minus tensæ gravius aut acutius sonare poterunt. Ipsa vero trachea fistulam imitatur, hoc cum discrimine, quod, dum fistula longior de se gravius sonet, trachea, quo longior efficitur, eo acutiorem sonum producat, cujus ratio est, quod,
dum

dum trachea sursum adducitur, non modo contractis cartilaginum annulis canalis angustior, sed iisdem longius distractis etiam planior evadat, minusque resistat aeris motui, qui celerius erumpens crebrius vibratur, proin etiam acutius sonat. Inde est, quod dum gravi sono canimus, caput, mentum, ac guttur deprimere soleamus; qui autem sono acuto modulantur, fauces ac caput erigant, & plerumque tereti, ac gracili collo sint.

81. Ex his quoque habetur 1. cur pueri ac fæminæ voce utantur acutiore; quia sicut cætera vasa, sic etiam tracheam habent angustiores, ejusque tunicam læviorem. 2. Cur puberes vocem mutant; quia tunc vasa omnia dilatantur. 3. Cur a somno vox gravior, & asperior; quia in somno pituita ex capite stillans, ac fauces obsidens laryngis musculos laxat, & tremorem organi vocalis impedit. 4. Unde oriatur rauco, nempe vel a pituita viscosiore fauces, laryngem, aut tracheam occupante, vel ab aura frigida in æstu præcipue captata, vel ab igne intenso, quo fauces nimium exsiccantur, & trachea exasperatur. Bombus, ac stridor, quem nonnulla insecta edunt, non ab ore illorum formatur, sed a tremulo motu membranulæ, sub alis eorum latentis, uti in gryllis, aut in ipso ventre existentis, ut in cicadis, aut etiam a celerissima agitatione alarum subtilissimarum, uti in muscis, culicibus &c.

82. Quæres adhuc, num etiam aliqua soni vis sit in corpus, & animum hominis? R. De corpore referunt, per sonum maxime depelli lethargum illum, quem Tarentulæ, venenatæ araneæ, morsus inducit: ex hoc enim hominem non nisi sono musico excitari posse affirmant, dum per hunc ad motum aliquem, seu saltum concitatur, saltu sudorem, & cum isto venenum ejicit. Necesse autem est, ut pro diversa hominis indole diversa etiam adhibeatur musica; quia pro diversitate humorum in nobis dominantium alii aliter ab eodem sono afficiuntur, ipsique humores aliter in hoc, aliter in alio homine commoventur. Vis nimirum veneni hujus in eo potissimum est, ut morfu infusum spissiores reddat sanguinem, aliosque humores, atque obstructis nervulorum meatibus fluxum spirituum impediat. Quodsi jam tremore musico fibræ ac musculi perculsi agitantur, ac vellicantur, motus aliquis toti corpori, proin etiam brachiis, pedibusque communicatur, quo, liberius jam meante sanguine ac spiritibus, homo

ad insolitam agitationem quasi compulsus incalescit, fundat, apertis poris venenum ejicit. Stridor quoque ille, quem lima ferrum radens causat, non paucis dentium quamdam succussionem causat, atque salivam copiose exprimit. Si vero per sonos modulatos varie concitantur spiritus, varios quoque affectus animi inde nasci posse, palam est, eosque pro diversitate temperamenti, quosque gaudet, oppido diversos, ut experimento facile parabili ingeniose ostendit P. Kircherus Phonurgiæ L. II. Sect. I. Cap. I. Experim. 3. Et quoniam vis haud modica ad mores corrumpendos inest Musicæ, Lacedæmonii molliores cantus gravi pœna mulctarunt, ac Plato, & Tullius e Republica ablegari jusserunt sonos fractos, ac musicam enervem, ut scribit P. Honoratus Fabri.

ARTICULUS II.

DE ORGANO, & OBJECTO VISUS.

Quoniam plura, eaque scitu dignissima hoc articulo pertractanda veniunt, juvat ea tum ordinis, tum memoriæ juvandæ gratia peculiares in sectiones distinguere, quarum prima de visione in genere, altera de eadem in specie, tertia de lumine, quarta de diaphaneitate, quinta de coloribus disseremus.

SECTIO I.

DE VISIONE IN GENERE.

§. I.

STRUCTURA OCULI.

83. AD exteriorem oculi structuram pertinent *Palpebra*, geminæ velut oculorum januæ, facillime mobiles, maxime superior. Arcent illæ pulverem, fumum, vapores, aliaque oculis noxia, componunturque ex molli & tenera cuticula, tenui cartilagine, & duobus musculis, quorum altero elevantur, altero deprimuntur. Illarum margini utrinque inserti sunt pili, quos *Cilia* vocant, arcendis & ipsi noxiis destinati. *Supercilia* sunt pili illi in frontis origine arcuato situ constituti, qui avertunt sudorem fron-

frontis, & alias sordes in oculos prolapsuras derivant ad extremos oculi angulos, seu *Canthos*, ut vocant. Canthus interior est major exteriore, daturque in eo *Glandula lacrymalis*, foramini lacrymali superincumbens. Est hæc multis foraminibus pertusa, continetque lacrymas, ne jugiter fluant, ut fit, si ea aut corrodatur, aut indurascatur, vel dolore aut humore aliquo acri constringatur. Oculo in diversa movendo serviunt muscoli 6. Primus dicitur *superbus*; quia oculos attollit; alter *humilis*, quia eos deprimit; tertius oculos versus nasum adducit, ut fit, dum bibimus, unde *bibitorius* vocatur; quartus oculum ad aures convertit, ut fieri in indignatione solet, dictus propterea *indignatorius*; reliqui duo, per quos oculi oblique moventur, ac circumaguntur, dici solent *pathetici*, ac *circumactores*.

84. Interiorem oculi structuram conficiunt tres humores, totidemque tunicae, præter membranam illam exteriorem, quæ *adnata*, aut etiam *adharrens* dicitur, eoquod istius ope oculus tum orbitæ suæ, tum ossibus adhæreat. Est ea exquisiti sensus, multisque constat venis & arteriis, ut in quibusdam exterius etiam videre est. Inter reliquas tunicas, quæ oculum (Fig. 3. Tab. I.) constituunt, prima est admodum densa, a dura matre originem trahens. Pars illius posterior *b h g c* dicitur *Sclerotis*, seu *dura*; pars anterior *b a c* vocatur *Cornea* ob similitudinem cum lamina cornea, cujus in morem diaphana lumen intra oculum admittit. Altera tenuior, a pia matre procedens, sclerotidi proxima in posteriore oculi parte dicitur *Chorois*, in parte vero anteriore *d e* nuncupatur *Uvea*, in cujus medio est foramen *r s*, quod *Pupilla* dicitur, potestque ope fibrarum ei adhærentium dilatari, aut constringi, prout major, vel minor lucis copia oculos perstringit, id quod experiri quivis poterit, si e tenebris in lumem copiosius egressus speculo oculos suos exploret: videbit enim pupillas ab initio admodum amplas sensim contrahi, ac coarctari. Contrarium videbit, qui objectum valde illuminatum aliquamdiu intuitus, dein averso vultu in loco minus illustrato speculum consulat. Pupillam ambit fimbria circularis, quæ ob varios colores *Iris* appellatur, estque in diversis hominibus coloris sæpe admodum diversi. Tunica tertia, eaque subtilissima, ex ipsius nervi optici *X* substantia prodiens *n i o* dicitur *Retina*, eoquod ex innumeris fibrillis nerveis ad instar retis contexta sit.

Cingit hæc posteriorem duntaxat oculi partem, & adnectitur tenuissimis quibusdam fibris *n o*, quæ *Processus ciliares* nuncupantur.

85. Præter tres tunicas tres etiam sunt humores, radiis debite refringendis nati. Primam oculi partem *d r s e* implet humor *aqueus*, pellucidus, & aquæ in modum fluidus. Post hunc visitur *crystallinus m m*, qui pellucidus quidem, at aliquantum solidus est ita tamen, ut ope processuum ciliarium, quibus cingitur, aut planior, aut convexior reddi possit; formæ est utrinque, sed inæqualiter convexæ. Reliquam oculi cavitatem occupat humor vitreus densior quidem, aqueo, sed crystallino rarior; formæ est concavo-convexæ, ut in figura citata apparet. Uterque oculus nervum suum opticum intra cranium extendit, qui nervi originem suam ex cerebro ducunt, & impressionibus in oculo factis ad cerebrum propagandis deserviunt. Ita autem e cerebro prodeunt, ut primo distincti, & ab invicem separati, postea in unum veluti nervum saltem plerumque coeant, donec iterum a se mutuo digressi ad suum quisque oculum tendat.

§. II.

QUOMODO FIAT VISIO?

86. PRævie notanda hic sunt 1. Objecta illuminata ex singulis punctis quaquaversum emittunt radios plures a se divergentes: potest enim objectum quodcunque, candela v. g. accensa in medio posita, ex variis circum locis videri. 2. *Radius opticus* dicitur quivis luminis radius ex aliquo objecti puncto egrediens, & per pupillam ac humores ad retinam penetrans. Tales in Fig. 4. Tab. I. sunt radii *a o r*, *a e r*, *a m r* &c. 3. *Axis oculi* est linea recta a puncto radiante ad retinam per pupillæ, humoris crystallini, ac ipsius oculi centrum ducta, uti hic *b o i*. 4. *Conus opticus* dicitur ille quasi fasciculus radiorum, qui formatur a radiis omnibus ex aliquo objecti puncto *b* diffusis, ac pupillam ingredientibus, qualis est *e b m*, cujus vertex in *b*, basis in pupilla *e m*. Huic opponitur alius conus, qui ex radiis pupillam jam ingressis, & ob refractionem, ab humoribus causatam, in unum retinæ punctum collectis componitur, ut *e i m*, cujus vertex est *i*, basis *e m*. Radius conici optici medius

vocatur *Axis opticus*. 5. Ex utroque hoc cono simul iuncto nascitur *Peniculus opticus* *b e i m*; dicitur penicillus, quod imaginem objecti, ex quo provenit, in retina quasi depingat: tot igitur sunt penicilli optici, quot puncta in objecto ab oculo discernuntur. Radius inter cæteros medius dicitur *Axis penicilli*. 6. *Angulus opticus* est is, quem duo axes penicilli in puncto, in quo decussantur, efficiunt. 7. *Horopter* est linea recta *b g* (Fig. 6. Tab. I.) transiens per punctum, in quo axes utriusque oculi concurrunt, & simul parallela ad lineam *A B*, quæ per centra oculorum ducta esse concipitur.

87. His notatis considerandum sequens experimentum opticum. In cubiculo omni ex parte clauso, ac obscurato relinquitur exiguum foramen in valvis apertum, per quod aditus pateat lumini; foramini aptatur lens vitrea, convexa, & radii ab objecto exteriori sufficienter illuminato per lentem transmissi in certa distantia excipiuntur charta candida, situ parallelo lenti obversa. Hac in charta elegantissima ipsius objecti imago nativis velut coloribus depingetur. Ubi observandum 1. Ut distincta sit objecti imago, radii e singulis objecti punctis egressi, & per lentem refracti debent in totidem distinctis punctis chartæ oppositæ simul conjungi ita, ut fiant penicilli optici: si enim ante, vel post chartam hæc radiorum unio fiat, imago erit confusa. 2. Imago objecti situ inverso in charta depingitur ita, ut objecti pars superior locum in imagine teneat inferiorem, dextra sinistram, & vicissim. 3. Servata eadem lente vitrea quo vicinius fuerit objectum, eo magis a lente removeri debet charta; contra vero eo minus hæc ab illa distare debet, quo objectum fuerit a lente remotius. Nam quo magis vicinum est objectum, eo magis a se divergunt radii a singulis objecti punctis egressi, proin etiam tardius post refractionem conjunguntur; quo autem remotius est objectum, eo minus divergentes radii ad lentem perveniunt, atque ideo post refractionem citius uniuntur. 4. Servata eadem objecti distantia quo convexior fuerit lens, eo isti vicinior, quo vero illa planior, eo remotior ab ea debet esse charta. Ratio est, quia, quo convexior est lens, eo citius ob majorem refractionem datur unio radiorum, eo tardius vero hæc datur, quo illa fuerit planior, ut Sect. sequ. §. 4. ostendetur.

88. Hinc jam apparet, quomodo fiat visio. Radii nimirum e singulis objecti punctis per pupillam in oculum

ingressi, atque in humoribus refracti, ac mediante hac refractione collecti impressionem in aliquo retinæ puncto faciunt, sicque objecti imaginem in eadem quasi depingunt, non, quod anima hanc velut imaginem intuens, objectum videat; sed, dum impressiones has a singulis objecti radiis factas percipit, visionis sensationem elicit, id quod priori experimento declaratur. Oculi (Fig. 4.) interior cavitas est veluti cubiculum, seu camera obscura, in quam per solum pupillæ foramen *e m* radii ingrediuntur. Humor crystallinus *s s* lentis convexæ vicem subit, per quem, ac simul per humorem aqueum & vitreum debito modo refracti radii uniuntur in *n i r* &c. Retina idem quodammodo præstat, quod charta lenti obversa: in hac enim radii collecti imaginem objecti efformant, situ tamen inverso, quia radii in pupilla decussantur ita, ut *a* pertingat in *r*, *c* vero in *n*, *b* autem, quia in oculum & humores perpendiculariter incidit, sine ulla refractione recta transeat in *i*. Id ipsum ulterius declarat oculus artificialis ad instar cameræ obscuræ constructus, uti etiam oculus bovinus, e quo posteriores membranæ ita detrahuntur, ut ipsius humores per relictam circa eos retinam pelluceant: in hac enim, si oculus statuatur in foramine cubiuli obscuri, imagines objectorum per pupillam irradiantium distinctæ apparent.

89 Oculus porro artificialis hac ratione construi poterit. Assumitur lens vitrea convexa, quæ sit portio minoris sphaeræ, ut radios luminis in distantia a se modica colligat in focum. Hac lente instruitur tubus aliquis e charta crassiore, aut ligno confectus, ac inferendus tubo alteri ampliori, in quo moveri minor ille una cum lente sua possit. Amplioris tubi extremitati alteri adaptatur charta alba oleo prius rite saturata, aut vitrum planum, arena ex una tantum parte rasum & exasperatum. Atque ne nimia luminis copia simul ingredi oculum hunc possit, ante lentem convexam ponitur septum aliquod, aut diaphragma papyraceum, per cuius foramen, non nimis amplum, lumen ex objectis veniens intromittitur, & distincta omnino objecti imago in charta oleo tincta, aut vitro raso depingetur. Oculum ejusmodi artificialem exhibet Figura 5. Tab. I. in qua lens vitrea est, *a c*; tubulus, cui hæc inferitur, *b d*; tubus amplior *m n o r*; charta, aut planum vitreum, in quo objecti imago depingitur, *s t*. Idem ipse oculus artificialis erit, si loco tubi amplioris affu-

assumatur integra aliqua sphaera, intus cava, uti hic *f g i h*, in qua tubulus lente instructus, ac charta, seu planum vitreum eodem modo applicantur, ut prius in tubo ampliore. Mobilis autem sit tubulus minor, ut pro diversa objecti ab oculo distantia vel propius ad *s t*, tanquam retinam, admoveri, vel ab hac removeri amplius queat lens convexa.

Hinc quoque patet structura camerae obscurae, quae eadem omnino est cum oculo artificiali, nisi quod in ea adhiberi soleat lens vitrea talis, quae sit portio sphaerae aliquanto amplioris, ut majorem objecti partem capiat, & ampliorem illius imaginem depingat. Si quis imaginem, quae semper inversa repraesentatur, alio in situ sibi depingi cupiat, in interiore cavitate camerae constituat ad angulum semirectum speculum planum *i n*; in superiore autem parte ejusdem camerae, facta apertura non nihil ampliore *e x*, applicet chartam oleo tinctam aut planum vitreum ex una parte rasum, sicque objecti imago a speculo in planum vitreum reflexa apparebit quasi jacens situ camerae obscurae parallelo. Illud denique tum in oculo artificiali, tum in camera obscura observandum, quaerendum pro utroque esse objectum lumine solis probe illustratum, alioquin imago depicta haud satis clara, & distincta erit. Curandum quoque, ut interiora tum oculi, tum camerae latera nigris sint coloribus obducta, ne nimirum radii quidam a lateribus reflexi imaginem in charta depingendam absorbeant. Distincta adhuc magis erit imago objecti, si ipsa camera, aut oculus in loco obicurato constituentur.

90. Veterum non nulli putabant, visionem fieri per radios ex oculo in objectum emissos; sed eorum rationes nullae sunt, & opinio certo falsa: quod enim aliqua animalia etiam de nocte videant, ratio est, quia corneam habent maxime diaphanam, pupillam valde amplam, ac retinam tenerrimam; hinc ipsis modicum lumen sufficit, quod in tenebris licet densis nunquam deest. 2. Oculi idem objectum diutius intuentes fatigantur, quia nimis diuturna & semper aequalis tensio nervorum plus fatigat, quam tensio variata, ut etiam in manu pedibusque advertimus. 3. Aliqui apertis licet oculis quandoque nihil vident, vel ex defectu spirituum, ut in deliquio, vel quod mens vehementer alio sit distracta. 4. Objectum pupillae proximum distincte non videmus, eoquod radii nimium divergentes non satis uniantur ante impulsam in retinam.

Distantiam, in qua objectum distincte videri incipit, plerumque volunt esse 9. aut 8. digitorum, siquidem oculus rite fuerit constitutus.

91. Dices 1. Si imago objecti in oculo depingitur inversa, non est ratio, cur objectum tamen videamus erectum. R. N. A. Objectum, & quælibet ejus pars videtur eo in loco, in quem radius ex oculo recta reductus. pertingeret; hinc cum radius inferiorem retinæ partem afficiens tendat sursum ad verticem turris v. g. qui vero partem superiorem afficit, deorsum ad basin, turris inverso licet situ in oculo depicta tamen videtur erecta. Et ratio est, quia anima sentit, quam in parte impressio fiat, simulque constanti ab experientia habet, objecta, hoc modo retinam afficientia, esse erecta, alio modo illapsa, esse inversa. Neque paritas hic est cum camera obscura, in qua objecta videmus inversa: ibi enim datur visio objecti reflexa, & imago in chartis depicta respectu nostræ visionis se habet per modum objecti, quod cum re ipsa inversum ibi sit, erectum utique videri non debet.

92. Dices 2. Si tunc tantum daretur visio distincta objecti, quando radii ex eodem puncto egressi post refractionem in retinam incidunt in unum punctum collecti, idem oculus nunquam posset distincte videre objecta nunc magis, nunc minus distantia: hoc est contra experientiam: dantur enim homines, qui æque vident remota, ac propinqua. Prob. M. Ex Num. 87. radii ex objecto remotiore cæteris paribus colliguntur citius, ex propinquiore tardius: ergo nunquam in retinam simul inciderent in unum punctum collecti, sed vel jam ante retinam, vel post illam colligerentur. R. N. M. ad prob. C. A. Dist. Cons. Nisi humor crystallinus ope processuum ciliarium posset nunc planior, nunc globosior effici, C. C. si posset, N. C.

Si eadem semper foret figura humoris crystallini, distincte videremus ea duntaxat objecta, quæ huic figuræ proportionatam habent ab oculo distantiam, ut ostendit ratio in objectionem allata, & experientia, quam habent sic dicti Presbytæ, ac Myopes. At quia, oculi de se, ac ordinarie ita sunt comparati, ut humor crystallinus ope processuum ciliarium nunc planior, nunc convexior reddi possit, hi tales vident æque distincte tam, quæ remota, quam, quæ propinqua oculis sunt: dum enim crystallinum reddunt planiorem, radii ex objecto remotiore venientes tar-

tardius colliguntur; dum illum magis convexum reddunt, radii, ex propinquiore objecto magis divergentes, hic & nunc colliguntur citius ita, ut in utroque casu unio radiorum semper fiat in retina. Et qui ita sunt a natura comparati, vocantur oculis valentes.

Qui objecta remotiora distinctius vident, quam propinqua, vocantur *Presbyta*. Habent nimirum isti crystallinum nimis complanatum; hinc, quia radii ab objectis vicinis emissi, nimiumque divergentes non satis refringuntur, citius ad retinam perveniunt, antequam colligantur. Malo huic mederi possunt perspicilla convexa: horum enim ope radii plus æquo divergentes jam ante ingressum in oculum magis conjunguntur, ut dein per humores denuo refracti uniri denique possint in retina. *Myopes* autem dicuntur illi, qui objecta propinqua, non item remota vident distincte; quia nimirum crystallinus ipsis est justo convexior, nec aliam in figuram redigi potest: hinc radii objectorum, quæ remotiora sunt, utpote minus divergentes ob nimiam refractionem uniuntur, antequam pertingant ad retinam, nisi per adhibita perspicilla concava adhuc ante oculum aliquanto plus distrahantur, ut sic magis divaricati in ipsa primum retina colligantur. Quoniam vero crystallinus magis identidem, magisque ipso ætatis vitio complanatur, *Myopes* suo tempore evadere in *Presbytas* poterunt, & illorum oculi cæteris paribus præferendi sunt oculis *Presbytarum*. *Strabonismus* oriri videtur vel ab inordinata structura oculi ita, ut cornea & pupilla non respondeant directe axi oculi, ac mediæ parti retinæ; vel ab obliquo situ crystallini, quia objecta lateraliter vident distinctius, quam quæ recta in oculum incurrunt.

§. III.

QUA PARTE OCULI FIAT VISIO?

93. **P**ROPOSITIO. Visio fit in retina. Primo enim visio non fit in ullo ex tribus humoribus, qui nimis diaphani species non sistant, nec ullis constant nervis, ac fibrillis, quarum ope impressio recepta propagari ad cerebrum posset. Imo in Actis Trivultiensium refertur, fuisse Sacerdotem, qui extracto humore crystallino, ac lente vitrea in istius locum substituta tamen viderit. 2. Non fit in con-

conjunção utriusque nervi optici, quia ista conjunctio neque in omnibus datur, & fit extra oculos post choroideam, & sclerotidem, quousque radii optici non pertingunt. 3. Neque fit in aliis tunicis a retina distinctis. Non in Cornea, utpote summe diaphana, nervulis ac fibrillis carente; & dum nascitur cataracta pupillam tegens, nulla datur visio, integra licet cornea. Non in Uvea; nam & hæc species per pupillam intromittit ad interiora oculi. Non in Sclerotide; eousque enim species non pertingunt. Nec in Choroide; quia chorois non ab ipsa cerebri substantia propagatur, proin apta non est ad communicandas cerebro impressiones in se factas. Igitur visus organum, quod primus docuit Scheinerus, erit Retina, utpote quæ & recipit species, a radiis luminosis facile impellitur, & cum contexta sit ex innumeris fibrillis nervi optici, cujus propago, & expansio est, impressiones in se factas ad cerebrum usque propagare potest, ac debet.

94. Ob. I. Nisi in conjunção nervi optici dicatur fieri visio, idem objectum utroque oculo visum deberet apparere duplex: hoc non fit: ergo. Prob. M. Duplex in ambobus oculis datur imago objecti: ergo ipsum etiam objectum videri debet duplex. R. N. M. ad prob. Dist. A. Ita tamen, ut in utroque oculo a quovis objecti puncto feriantur retinæ fibrillæ proportionales, C. A. ut hoc non fiat, N. A. & Cons. Licet hic dentur duo coni optici, ambo tamen terminantur in idem objecti punctum, in eoque concurrunt, ac simul a quolibet objecti puncto feriuntur retinæ fibrillæ proportionales, seu tales, quæ utrinque æqualiter distant ab axe oculi. Hoc autem dum fit, mens constanti experientia edocta, unum tunc esse objectum, in quo uterque axis concurrat, & a quo feriuntur fibrillæ proportionales, etiam judicat unum duntaxat esse, etsi in utroque oculo ejusdem imago existat. Quodsi hæc axium oculi in idem punctum directio, & concursus tollatur, objectum apparebit duplex, ut fit, si oculorum alteruter vel digito, vel epoto largius vino ob tumultuantes in capite spiritus a situ suo detorqueatur. Similiter si digitum erectum teneas inter oculum & objectum, atque utrumque axem in digitum, contortis non nihil oculis, dirigas, duplex videbitur objectum; quodsi eosdem axes in objectum figas, duplex apparebit digitus. Sic etiam si duæ candellæ post chartam perforatam in distantia trium circiter

pedum collocentur, & oculus uterque per hoc foramen dirigatur in candelas, foramen duplex conspicietur.

Nempe objecta, quæ in horoptere posita sunt, simplicia, extra vel intra horopterem sita, apparent geminata. Sit in Fig. 6. Tab. I. objectum *d* situm in horoptere *h g*, in quod uterque oculus dirigatur ita, ut axes optici *d c*, & *d o* in objecto *d* concurrant. Quoniam hoc casu radii ab objecto emissi utrumque oculum eodem prorsus modo, & in eodem loco afficiunt, objectum non nisi unum & simplex videbitur. Si jam in oculos ita constitutos simul incurrat objectum *b* positum in horoptere, radii *b r*, & *b m* ferient retinæ partes proportionales *m* & *r*, æqualiter utrinque distantes ab axe optico: proin etiam istud objectum apparebit simplex; idem est de objecto *g*. At si fuerit objectum *f* intra horopterem consistens, radii hujus *f s*, *f e* neutiquam afficient partes retinæ proportionales; cum unus incidat in partem *e* axi optico *d c* propinquiorem, alter in partem *s* ab axe *d o* remotiorem: proin objectum *f* geminatum apparebit. Quod ipsum fiet, si objectum ultra, vel extra horopterem fuerit constitutum.

95. Ob. II. Si ad altitudinem oculi in pariete situ horizontali affigantur tres orbiculi papyracei coloris v. g. rubei, aliquantum inter se distantes, & tunc, clauso uno oculo, altero autem in primum orbiculum fixe directo paulatim recedatur, in certa distantia disparebit orbiculus medius, apparentibus duobus extremis; in majore vero distantia apparebit iterum medius disparente extremo. Jam hujus ratio nulla est, si visio dicatur fieri in retina, est autem, si fieri dicatur in choroide; quia scilicet chorois habet hiatum notabilem, per quem transit nervus opticus: atque in hiatum istum ubi incidunt radii, nulla dabitur objecti visio. R. Ratio hujus phænomeni est, quod nervus opticus ea parte, qua prodiens ex choroide incipit in retinam dilatari, habeat crassiolem aliquem nodulum, nondum satis expansum; hinc in isto fieri non potest impressio ad visionem distinctam sufficiens: ubi ergo radii a medio, aut extremo orbiculo provenientes in illum nodulum inciderint, disparebit primo medius, tum hoc redeunte extremus. Quodque in hoc experimento fieri diximus, id re vera semper in omni visione objecti paulo amplioris accidit; non tamen advertimus, quia altero oculo hanc ipsam objecti partem cernimus, quæ in altero quasi absorbetur.

Dices.

Dices. Species objecti saltem multæ trajiciuntur per retinam, perveniuntque usque ad choroidem, in qua utpote opaca, & denfiore sistuntur: ergo visio fit in choroide. R. N. Conf. Chorois, ut dictum, non est substantia nervea; hinc licet a radiis, per retinam penetrantibus, impressiones aliquas recipiat, eas tamen ad cerebrum propagare nequit.

96. Ob. III. Si visio fieret in retina, aut quacunque alia tunica posteriore oculi, objecta omnia deberent apparere distorta. Prob. Figura retinæ est concava: ergo sicut in speculis concavis, ita etiam in retina debebunt objecta apparere distorta. R. N. M. Ad prob. C. A. N. C. Disparitas retinam inter & specula concava est, quod in his objectum videatur per radios reflexos, in oculo autem visio fiat per radios in ipsa retina receptos: hinc sicut radii in speculo concavo ordinatissime recipiuntur, & solum distorte ad aliquam distantiam reflectuntur, sic etiam in retina concava ordinatissime recipiuntur radii, atque impressiones suas, in quibus consistit imago objecti, in eadem ordinate prorsus efficiunt, quemadmodum etiam fit in camera obscura, in qua lenti convexæ opponitur obex concavus illi concentricus: in hoc enim obice multo ordinatior est imago objecti per lentem transmissi, quam in obice plano; quia nimirum obex concavus ubique æqualiter distat a lente, atque ideo ordinatior in illo est radiorum unio, quam in obice plano. Porro illa lux, quæ quandoque ex oculis felium, bubonum, atque etiam canum promicare videtur, non a choroidem, sed potissimum ab iride provenit, quod inde desumitur, quia in oculis felium apparet quidem lumen aliquod, sed simul in medio luminis nigra quædam macula, quæ a choroide illarum, utpote cærulea, provenire non potest, sed provenit a pupilla, ex qua radii nulli reflectuntur.

SECTIO II.

DE VISIONE IN SPECIE.

POTest radius ab objecto in oculum incidere vel directe, vel reflexe, vel refracte: hinc alia visio est directa, quam proprie considerat *Optica*, alia reflexa, quam *Catoptrica*, alia demum refracta, quam *Dioptrica* contemplatur.

De

De his nunc aliqua. Neque indignum erit Philosopho pauca saltem *Perspectivæ* elementa nosse.

§. I.

PRINCIPIA OPTICÆ.

97. **A**liqua duntaxat hic recenserebimus, quæ tum lucem ipsam, tum umbram, dein magnitudinem, figuram, distantiam, ac motum objecti visi concernunt. Uberrime ista pertractat noster P. Dechales, ex quo ferme hauserunt sua, quos de Optica post ipsum scripsisse novimus. Addidit tamen Wolfius Demonstrationes Geometricas, quibus consulto se abstinuisse profitetur P. Dechales, eoquod Optica rem non abstractam, & a sensibus remotam, sed his plane palpandam consideret. Ea porro notanda hic præcæteris est lucis proprietas, quod non propagetur nisi per lineas rectas adeo, ut radii luminis omnes tanquam rectilinei considerari queant. Id certe ostendit experientia in radio solari per exiguum foramen in conclave obscurum immisso, & ratio Sectione sequenti adducenda.

98. **Principium I.** Id solum directe potest per visum conspici, ex quo sublato omni obice linea recta in oculi pupillam duci potest. Nam radii ex objecto egressi propagantur secundum lineas rectas, nec via alia, nisi per pupillam ingredi in oculum queunt: igitur illi duntaxat intrare oculum, debitamque in eo impressionem efficere possunt, qui ex objecto linea recta oculi pupillam subeunt. Hinc est, quod oculus positus in *o* (Fig 7. Tab. I.) per foramen *e i* non nisi spatium *a b* simul intueri possit; si vero oculus esset in *m*, per idem foramen spatium *c d* priore multo majus simul conspiceret, quia nimirum ab omnibus spatii hujus punctis lineæ rectæ duci in pupillam possunt. Vicissim si loco foraminis *e i* huic æquale corpus opacum interponeretur, hoc in primo casu interciperet visionem spatii *a b*, in altero spatii *c d*. Unde etiam si loco oculi in *o* positum esset corpus lucidum, illud per foramen *e i* illuminaret plani obversi partem *a b*; si idem corpus lucidum statueretur in *m*, illuminaret partem ampliore *c d*. Et quidem si unicum luminosi punctum per foramen radiet, figura luminis, plano ipsi foramini parallelo excepta, similiserit figuræ foraminis; cum enim punctum luminosum radiet in singula puncta perimetri for-

foraminis, radii extremi vel conum, si foramen sit rotundum, vel pyramidem, si sit triangulare, efficient; basis autem conī est circulus, uti foramen rotundum, basis vero pyramidis est triangulum, quale tunc fuerit foramen: quare cum in plano parallele opposito depingatur basis fasciculi luminosi, figura in plano depicta respondebit figuræ foraminis. Quodsi tamen lumen immittatur copiosius, & distantia plani a foramine major fuerit, figura sensim accedet ad figuram ipsius corporis lucidi.

99. Principium II. Si sphaera lucida $a b$ (Fig. 8. Tab. I.) aliam sphaeram opacam $d e$ illuminet, radii extremi illuminantes sphaeram utramque tangunt. Cum enim rectæ $b d$, & $a e$ utriusque corporis peripheriam conjungentes jam totæ extra circulum cadant, & lumen non nisi per lineas rectas propagetur, radius nullus, qui vel supra tangentem $b d$, vel infra illam $a e$ propagatur, a corpore lucido pertingere ad corpus opacum poterit: igitur sphaera opaca illuminari non potest, nisi a radiis inter utramque tangentem $b d$, & $a e$, qui simul sunt radii extremi, contentis. Inde fluunt sequentia.

100. Coroll. 1. Si sphaera illuminans æqualis sit sphaeræ opacæ illuminandæ, dimidia pars lucidæ illuminabit dimidiam partem opacæ. Patet in eadem Fig. 8. Radii enim extremi illuminantes utramque sphaeram tangunt; & quidem, si sphaeræ sint æquales, in iis punctis utrinque tangunt, in quæ excurrit utriusque sphaeræ diameter $a b$, & $e d$: igitur radii inter a & b sphaeræ lucidæ contenti, seu hemisphaerium $b m a$, illuminabunt ea sphaeræ opacæ puncta, quæ sunt inter e & d , proin hemisphaerium $d n e$.

Coroll. 2. Si sphaera lucida $a b$ (Fig. 9. Tab. I.) fuerit major, quam sphaera opaca $d e$, pars minor, quam dimidia, sphaeræ lucidæ illuminabit opacæ partem dimidia majorem. Cum enim radii extremi illuminantes utramque sphaeram tangant, ductis his tangentibus $r o$, $s o$, ac recta $C o$ per utriusque sphaeræ centra transeunte, rectæ hæ omnes concurrent denique in o ; si dein ex utriusque sphaeræ centro ad puncta contactus ducantur radii, in triangulis inde enatis anguli ad r , & s , item ad i , & t erunt recti (Præcogn. N. 67.) igitur angulus $r C o$ erit minor recto (Ibid. N. 60.) idem est de angulo $s C o$: proin totus angulus $r C s$ minor erit duobus rectis, adeoque sphaeræ lucidæ pars illuminans $r f s$ minor erit hemi-

sphaeræ

sphærio. Ob easdem rationes anguli *i c o* & *t c o* simul sumpti minores sunt duobus rectis: ergo sphæræ pars illuminata *i g t* major est hemisphærio: igitur sphæræ lucidæ pars dimidia minor illuminat opacæ partem dimidia majorem. Quare cum sol tanquam sphæra illuminans sit multo major, quam sit terra, aut luna, semper plus quam dimidia lunæ, aut terræ pars a sole illuminatur.

Coroll. 3. Si sphæra lucida *d e* (Fig. 9.) minor fuerit, quam sit sphæra opaca *a b*, sphæræ lucidæ pars major, quam dimidia, illuminat partem opacæ dimidia minorem. Fluit ex Coroll. præced. His ipsis ex principiis ostendi haud difficulter poterit, 1. quod, quo propior est sphæra opaca minor sphæræ lucidæ majori, eo minor hujus pars illuminet partem eo majorem sphæræ opacæ, ac vicissim. Hinc sol in hyeme, utpote perigeus, majorem terræ partem illuminat, quam in æstate, licet in hyeme minor solis pars illuminet, quam in æstate, quando sol est apogeus. 2. Quod sphæræ cujuscunque pars minor videatur ab oculo eidem propinquo, quam a remotiore.

101. Principium III. Quodlibet corpus opacum projicit umbram in directum cum radiis, a quibus illuminatur, id est, in partem luci oppositam: cum enim corpus opacum radios luminis intercipiat, & hi per lineam non nisi rectam propagentur, ad ea intervalla, quæ cum radiis in directum jacent, post tergum corporis radii nulli pertingunt: hæc igitur intervalla carebunt lumine, proin in iis umbra erit. Et quidem si corpus opacum a pluribus illuminetur lucidis, tot erunt umbræ, quot sunt illuminantia, minus tamen obscuræ, quam forent ab uno lucido; quia cujuslibet corporis illuminantis radii, aliqui saltem, ab opaco intercipiuntur. Si tamen nimis multa sint lucida, fieri potest, ut umbra non sit admodum sensibilis. Umbra porro, quam projicit corpus *b c* (Fig. 10. Tab. I.) perpendiculariter insistens horizonti *a m*, dicitur *recta*; ea vero, quam projicit corpus *e d*, horizonti parallelum, & parieti *b c* perpendiculariter infixum, umbra *versa* nuncupatur. Dum crescit altitudo lucidi *S*, crescit umbra versa, recta autem minuitur; si vero altitudo lucidi *S* decrescat, simul decrescit umbra versa, augetur umbra recta, ut ex notione umbræ, ac citata figura patet.

102. Ex iis, quæ præcedentibus tribus corollariis sunt indicata, fluunt sequentia. I. Si sphaera illuminans fuerit æqualis sphaeræ opacæ, umbra, quam hæc projicit, erit cylindrica. Apparet id in Fig. 8. ubi radii extremi illuminantes utramque sphaeram ita tangunt, ut cujuslibet sphaeræ diameter ab , & ed ad radios istos sit perpendicularis: cum igitur diametri sint æquales, radii isti extremi erunt inter se paralleli; cumque idem sit de aliis sphaeram undique tangentibus, spatium inter radios illuminantes post tergum sphaeræ interceptum erit cylindricum.

II. Quodsi sphaera illuminans fuerit major, quam sit opaca, umbra hujus erit conica, ut videre est in Fig. 9., si corpus illuminans ponatur esse ab , opacum vero ed : umbra enim ibi erit spatium interceptum radiis extremis io , & to . Et quidem umbra hæc eo erit major, & longior, quo magis remotum fuerit corpus illuminans ab opaco; eoque majores erunt umbræ hujus circuli, quo minus illi a corpore opaco recedunt. Unde apparet, cur eclipses lunares tunc maximæ cæteris paribus sint, quando sol est apogeus, luna perigea.

III. Si denique sphaera illuminans fuerit minor, quam sit opaca, umbra hujus erit calathiformis, seu instar coni truncati, uti denuo ostendit Figura 9. siquidem corpus illuminans sit ed , opacum vero ab ; quia radii extremi illuminantes identidem magis a se invicem divergunt, quo longius a corpore opaco recedunt, proin spatium interceptum, ac lumine orbatum identidem sit amplius.

103. Problema I. Dantur semidiametri sphaerarum lucidæ ba (Fig. 9.) & opacæ ed , una cum earum a se distantia Cc ; quæritur coni umbrosi longitudo co . Ducatur recta ui æqualis Cc distantiae sphaerarum, & eidem parallela. Hoc facto Cu erit æqualis ci semidiametro sphaeræ minoris, proin ur erit differentia inter utriusque sphaeræ semidiametrum. Cum jam triangula riu , & rCo sint similia, ut ex affectionibus parallelarum (Præcognit. N. 57. & 70.) facile ostenditur, erit $ru:ui = rC:Co$. Si jam ex Co subtrahatur ui , five Cc distantia sphaerarum, manebit co longitudo coni umbrosi. Sic si semidiameter sphaeræ minoris sit $= 2$. majoris $= 5$. distantia sphaerarum $= 12$. differentia semidiametrorum $= 3$. erit $3:12 = 5:20$. & $20 = 12 = 8$. Vel cum in eadem Fig. 9. ducta recta ui etiam tri-

angula $ru i$, ac ico similia sint, erit etiam $ru : ui$
 $= ic : co$. Sive ut differentia semidiametrorum ad di-
 stantiam utriusque sphaerae, ita semidiameter sphaerae
 minoris ad longitudinem coni umbrosi, nimirum hic $3 :$
 $12 = 2 : 8$.

Probl. II. Datur altitudo corporis opaci bc (Fig. 10.
 Tab. I.) horizonti ad perpendicularum insistentis, & alti-
 tudo corporis luminosi S , solis v. g. supra horizontem ele-
 vati; quaeritur longitudo umbræ in plano horizontali am .
 Cum extremus radius Sba cum plano horizontali am &
 corpore opaco verticali bc efficiat triangulum rectangu-
 lum $ac b$, in hoc autem ex hypothesi notus sit angulus ad
 a , nimirum altitudo solis supra horizontem, notus etiam
 erit angulus ad b , utpote complementum prioris ad angu-
 lum rectum; præterea datur crus unum, nimirum altitu-
 do corporis opaci bc , secundum regulas Trigonometriæ
 fiat: ut Radius ad crus datum bc , ita tangens anguli b
 cruri dato adjacentis ad ac crus quaesitum. Si igitur an-
 gulus a ponatur esse 35. graduum, angulus b erit 55.;
 crus datum bc , seu altitudo corporis opaci sit 200. pedum,
 juxta datam operandi methodum invenietur crus ac seu
 longitudo umbræ quamproxime 291. pedum.

Probl. III. Datur altitudo corporis opaci bc , & lon-
 gitudo umbræ ac ; quaeritur altitudo solis supra horizon-
 tem existentis. Juxta easdem Trigonometriæ leges fiat: ut
 longitudo umbræ ac ad altitudinem corporis opaci bc ,
 ita sinus totus ad tangentem altitudinis solis supra hori-
 zontem, quemadmodum patebit in priore exemplo, si assu-
 matur altitudo corporis opaci 200. pedum, longitudo um-
 bræ 291, & per Logarithmos investigentur tangens angu-
 li a : prodibit namque Logarithmus tangentis, cui proxime
 respondeant 35. gradus anguli, qui metitur altitudinem
 solis. Hinc etiam patet, quod, si altitudo solis supra hori-
 zontem fuerit 45. graduum, longitudo umbræ æqualis
 sit futura altitudini corporis opaci.

Probl. IV. Mediante umbra in planum horizontale
 projecta metiri altitudinem objecti cujuscunque opaci,
 turris v. g. verticaliter horizonti insistentis. Sit in Fig. 11.
 Tab. I. corpus opacum em , quod a lucido S illuminatum
 umbram projiciat in a . Ut altitudo corporis opaci invenia-
 tur, baculus aliquis bc notæ altitudinis perpendiculariter
 ad horizontem ita figatur in terra, ut terminus umbræ a
 baculo projectæ incidat in a terminum umbræ, quam

projicit corpus opacum em ; hic ipse terminus notetur alio baculo defixo in a , & ope funis, aut catenæ mensuretur tota longitudo umbræ am ; quo facto erunt duo triangula, eaque ob æqualitatem angulorum similia, nimirum eam , bac : cum ergo in triangulis similibus latera homologa sint proportionalia (Præcogn. N. 70.) erit: $ac : am = cb : me$: quæraturn proin proportio umbræ a baculo projectæ ad umbram projectam a corpore opaco, & ea inventa ostendet, quoties nota baculi altitudo contineatur in altitudine corporis opaci. Sit ac ad am ut 1. ad 3. erit etiam altitudo baculi bc ad altitudinem corporis opaci em ut 1. ad 3. sique ponatur altitudo baculi 10. pedum, erit illa corporis opaci pedum 30. Ex eadem Figura 11. facile intelligitur, quod umbra recta ad altitudinem corporis opaci semper sit, uti est cosinus altitudinis luminosi ad ejusdem sinum.

104. Principium IV. Quæ sub majori angulo optico videntur *de se* apparent majora: dum enim sub majori angulo videntur, imago eorum in retina majus implet spatium; ea autem, quorum imago majus ibi spatium occupat, abstrahendo a variis, quæ in dijudicanda magnitudine apparente objecti intervenire possunt, apparent majora. Dixi: *de se*: si enim objecta vicina sint, magnitudinem eorum ipso visu non æstimamus ex angulis, sub quibus videntur, sed aliunde de eorundem magnitudine edocti, ea, quæ sub minori angulo apparent, judicamus, magis esse remota. Sub hac ipsa limitatione teneri etiam potest sequens principium: ea, quæ sub æquali angulo videntur, apparent æqualia. In Scenographia tamen, ut videbimus, principium hoc integre subsistit.

105. Ex his porro sequitur 1. Idem objectum in vicina apparet majus, quam e longinquo: angulus enim opticus, quem extremi radii ab objecto in oculum emissi formant, identidem decrescit, dum objectum longius ab oculo removetur. 2. Si oculus inter columnas, aut arbores ex utroque latere inter se parallelas, ac in longius spatium porrectas constituatur, parallelæ versus plagam oculo oppositam convergere videntur; quia sensim minuitur angulus, sub quo spatium inter parallelas interceptum in oculos incidit. Et si tanta fuerit longitudo spatii a parallelis comprehensi, ut angulus opticus evadat quodammodo insensibilis, parallelæ in illo puncto coire videbuntur, in quo terminatur visio. Ex quo ipso

ipso patet, cur, si oculus fuerit plano horizontali sublimior, partes remotiores videantur quasi assurgere; depressi autem, si planum fuerit sublimius oculo, ut observare est in ambulacro, cujus pavementum quodammodo ascendere, tabulatum vero, quo longius ab oculo recedit, eo magis descendere videtur. 3. Subtensa A B (Fig. 12. Tab. I.) in omnibus punctis *c*, *d*, *e*, in arcu illo, cujus subtensa ponitur, existentibus, de se apparet semper æqualis: anguli enim ad *c*, *d*, & *e* omnes sunt æquales (Præcogn. N. 69.) ubi autem anguli optici sunt æquales, etiam objectum de se semper apparet æquale. Hinc optima Theatrorum figura censerī potest segmentum circuli, in quo subtensa actoribus, arcus spectatoribus locum præbet. 4. Hoc non obstante objecta, quæ oblique videntur, cæteris paribus apparent minora, ut patet in Fig. 13. Tab. I. Si enim objectum *b c* oculo in *a* directe sit obversum, angulus opticus erit *b a c*; si idem, vel æquale objectum *e c* oblique respiciat oculum, angulus opticus erit *e a c*, minor utique, quam sit prior.

106. Ex iisdem circa figuram objecti visi deducitur 1. Si linea, aut superficies, aut solidum oculo in directum jaceat, prima apparet ut punctum, altera ut linea, tertium ut superficies. Si sphaera e longinquo aspiciatur, uti circulus aut discus apparebit; quia nimirum convexitas in tantam distantiam haud amplius discerni potest. Inde etiam est, quod corpora angulosa, ac polygona in majore distantia videantur esse rotunda sic Planetæ, licet superficie sint scabra, magnisque prominentiis aspera, sphaerici tamen apparent, aut potius instar disci, quin eorum convexitas advertatur. Quod si quadratum aut rectangulum uno tantum latere oculodirecte objiciatur, in majore distantia trapezium videbitur; quia puncta linearum, quæ quadratum aut rectangulum terminant, identidem minus a se distare videbuntur, quo magis ab oculo remota sunt. 2. Si oculus ad centrum alicujus circuli, aut alterius figuræ regularis ita designatur, ut axis opticus ad planum, cui circulus inscriptus est, sit perpendicularis, veram circuli figuram videbit; at si oculus ita in circulum dirigatur, ut axis opticus sit ad planum obliquus, circulus videbitur oblongus. Ratio primi ex eo habetur, quod hoc modo nulla detur inæqualitas angulorum, sub quibus singulæ circuli partes in oculum incidunt; in altero autem casu non omnes

circuli diametri sub eodem angulo in oculum incident ; hinc etiam non omnes apparent esse æquales ; si non omnes diametri apparent esse æquales, vera circuli figura non apparebit.

107. Principium V. Ea, quorum imagines, in oculo sunt sibi propinquæ, in linea oculo transversim opposita etiam inter se propinqua apparent : illa enim, quæ re ipsa propinqua sunt, ita in oculos incident, ut eorum imagines in eo sibi sint propinquæ, id quod ex camera obscura satis patet : quodsi igitur oculus pari modo afficiatur a duobus objectis, ista sibi propinqua videbuntur, etsi fors multum a se distent. Unde fieri potest, ut duæ turres nobis ex eodem templo surgere videantur, licet in dissitis etiam pagis existant ; quia nimirum earum tum ab oculo, tum a se invicem distantiam hand satis discernimus. Interim tamen etiam distantiam objectorum ab oculo variis ex indiciis solemus colligere. 1. Ex magnitudine apparente comparata cum vera magnitudine, antea nobis nota ; hinc dum ciconiam in aere hærentem instar columbæ videmus, eam valde sublimem volitare inferimus. 2. Ex confusa vel distincta nobis apparente rerum specie, qua minores etiam objecti partes vel minus, vel magis clare discernimus : cum enim partium istarum anguli optici identidem fiant minores, quo magis objectum ab oculo removetur, quarundam anguli evadere omnino possunt insensibiles, ut adeo partes illæ distingui amplius nequeant : quando igitur distinguere illas non possumus, objectum magno a nobis intervallo distare censemus. Inde etiam est, quod, quæ videmus in nebula, remotiora esse judicemus. 3. Ex vivacitate luminis, ab objecto reflexi, quæ minor est a remotiore, major a propinquo. 4. Ex interpositione aliorum corporum, quæ visu percipimus : tunc enim res propinquas esse judicamus, quando inter illas & oculum non interjacet corpus visibile. 5. Etiam ex magnitudine anguli, quem axes optici in certo puncto concurrentes formant ; sit autem hic concursus a motu utriusque oculi nobis sensibili : unde ex ipsius magnitudine de distantis objectorum propinquiorum assuecimus judicare adeo, ut illas uno duntaxat oculo haud ita facile dignoscamus.

108. Circa motum objecti visi notanda sequentia. 1. Objectum quacunque celeritate motum quiescere videtur, si ratio spatii intra unum minutum secundum ab objecto per-

percurſi ad diſtantiã ab oculo fuerit omnino imperceptibilis: tali enim caſu etiam angulus opticus, ſub quo videntur termini ſpatii percurſi omnino inſenſibilis eſt; ſi autem hic eſt inſenſibilis, nullus adverti motus po- teſt. Nam non advertitur motus, niſi aut objecti ima- go ex una parte retinæ tranſeat in aliam immoto oculo, aut oculus ipſe, ut motum corporis ſequatur, mo- veri debeat. Quodſi jam apparens magnitudo ſpatii a corpore certo tempore percurſi ſit inſenſibilis, imago illa in eadem parte retinæ videbitur perſiſtere. Sic luna videtur quieſcere, licet poſt aliquod tempus illam loco ſuo motam eſſe advertamus. 2. Si oculus recta progrediatur, maxime dum motum ſuum non advertit homo, fors navi leniter decurrente vectus, & in uno objecto remotiore attentius figatur, cætera, quæ inter oculum & objectum iſtud ſita ſunt, in partem oppoſitam moveri videbuntur: oculo enim ita progrediente ima- gines eorum, quæ intermedia ſunt, ex una parte retinæ in aliam continuo tranſeunt, non ſecus, ac ſi re ipſa move- rentur. Hinc etiam eſt, quod luna in nubibus moveri nobis videatur; oculis nimirum nubium viſarum motum tacite ſequentibus lumen lunæ alias identidem oculi par- tes ferit. 3. Si duo objecta inæqualiter ab oculo diſtan- tia æquali velocitate moveantur, illud, quod remotius eſt, videtur moveri tardius: ſi enim æquali velocitate mo- ventur, eodem tempore æqualia percurrunt ſpatia; linea autem exprimens ſpatium a remotiore percurſum ſub mi- nori angulo optico videtur, quam illa, quæ exprimit ſpatium percurſum a propinquiore: proin etiam ſpatium a remotiore percurſum apparebit minus: ſi ſpatium per- curſum apparet ininus, motus apparet tardior. Si vero duorum corporum diſtantiæ ſint ut celeritates in orbitis circularibus circa oculum ſpectatoris, æqualis utriusque videtur eſſe velocitas.

§. II.

PRINCIPIA PERSPECTIVÆ.

109. **P**ERSPECTIVA eſt ars delineandi in tabula objectum quodlibet, quale illud radii, per planum pellu- cidum ab objecto in oculum emiſſi, in plano iſto ad da- tam diſtantiã & altitudinem oculo exhibent. Duæ ni- mirum ſunt partes præcipuæ artis pictoriæ; una, ut ſin-

gulæ partes picturæ per easdem lineas principales radiant in oculum, per quas radiarent ipsamet objecta: sic enim a pictura produceretur in oculo imago similis ei, quam causeret objectum ipsum. Altera est, ut colores a pictura subministrati eodem modo oculum afficiant, quo afficerent colores objectorum. Pars prima huc pertinet, dum perspectiva docet, invenire singula puncta tabulæ, in qua imago est pingenda, exacte respondentia singulis punctis ipsius objecti, prout hæc in oculum radiarent, si objectum ipsum in dato situ per tabulam quamdam diaphanam aspiceretur. In exemplo. Sit in Fig. 14. Tab. II. planum horizontale FG , cui ad perpendicularum insistat tabula pellucida DE ; oculus spectatoris in O dirigatur in triangulum ABC plano horizontali inscriptum; videbit is triangulum istud per radios AO , BO , CO . Quodsi ponamus radios hosce, dum per tabulam diaphanam transeunt, aliqua sui vestigia relinquere in abc , etiam in tabula pellucida idem efformabitur triangulum, atque ita, ut remoto etiam triangulo altero eadem in oculo danda sit visio, quæ dabatur antea, dum per tabulam diaphanam aspiciebatur ipsum triangulum ABC plano horizontali inscriptum: puncta igitur abc ea hic sunt, quæ per artem perspectivam sunt investiganda.

· · · · · **XIO.** Methodum mechanicam puncta isthæc invenienti, & objectum datum delineandi exhibet Figura 15. Tab. II. Paratur quadratum AB ex quatuor regulis; in eo tenduntur fila tam verticalia, quam horizontalia, quæ quadratum AB in quocunque quadrata minora, sive areolas distinguant. Ad hujus quadrati pedem in D annectitur dioptra C , seu lamina perforata in C , atque ita firmatur, ut semper immota persistat. Quadratum hoc sua dioptra instructum sic constituatur, ut ex dioptra perspicere objecta delineanda possint, habeaturque tela aut charta in similes areolas prius divisa, quales habet quadratum pellucidum. Oculus per dioptram C dirigatur in objectum delineandum, observeturque, in quibus areolis singulæ objecti partes appareant; illæ dein in correspondentibus areolis chartæ aut telæ signentur, & habebitur situs, & habitudo objecti in charta delineandi. Alii filorum loco adhibent vitrum, in quo singulas objecti partes, prout illæ per dioptram apparent, adumbrant, easque dein in chartam transferunt. Alia methodus est illa, in qua assumuntur
duæ

duæ tabulæ, una inferior, aut ad dextram posita, in qua notantur objectorum imagines, altera superior aut ad sinistram, eaque diaphana, cui subicitur objectum delineandum. Tabulis ita positis per instrumentum ad id paratum ita moventur duæ cuspides, ut quem locum cuspidis superior in tabella diaphana obtinet, eundem aut similem in sua tabella notet cuspidis inferior, atque ita in tabula inferiore ductus omnes apparebunt, qui delineandi objecti imaginem repræsentent. Instrumenti hujus formam & usum describit P. Scheinerus in libro, quem inscripsit *Pantographice*, seu ars delineandi res quaslibet per parallelogrammum lineare.

III. Ut nunc ipsius Perspectivæ fundamenta intelligi queant, præmittendæ sunt notiones aliquæ probe notandæ. Defin. 1. *Pyramis optica* (Fig. 14. Tab. II.) est $A B C O$, formata a radiis, qui e singulis trianguli punctis pertingunt ad oculum in O . Basis proin pyramidis opticae est ipsum objectum visibile $A B C$; vertex vero est in oculo O . 2. *Radii optici* sunt, quibus terminatur pyramis optica, uti hic $A O$, $B O$, $C O$. 3. *Tabula*, seu *Planum perspectivum* est superficies plana $D E$ inter oculum O , & objectum visibile $A B C$ ad horizontem perpendiculariter erecta, & radios opticos secans in $a b c$, in qua nimirum ipsius objecti apparentia exhibetur. 4. *Planum geometricum* est planum $F G$ horisonti parallelum, cui planum perspectivum, nisi contrarium moneatur, perpendiculariter insistit, & in quo objectum delineandum v. g. triangulum $A B C$ secundum omnes suas dimensiones, prout est in se, depictum esse concipitur. Vocatur etiam *planum objectivum*, & a plano perspectivo potissimum differt ex eo, quod in objectivo figura quæcunque delineanda secundum omnes suas dimensiones exprimitur, in perspectivo autem non servantur omnes ejus dimensiones, prout sunt in se. 5. *Planum horizontale* est planum horisonti parallelum, & per oculos transiens, indicatum hic per lineam $O L$, quod planum perspectivum $D E$ ad angulos rectos secat. 6. *Planum verticale* dicitur, quod ad geometricum $F G$ perpendiculare per oculum O transit, & planum perspectivum $D E$ ad angulos rectos secat.

Defin. 7. *Linea terra*, seu *fundamentalis* est communis sectio plani perspectivi & geometrici, ut in Fig. 16. Tab. II. est linea $r v$. 8. *Punctum principale*, seu punctum visus, aut oculi est illud punctum tabulæ $D E$, in quod cadit recta ab oculo perpendiculariter ducta ad tabulam,

videlicet punctum S , posito, quod oculus existat in O .
 9. *Linea horizontalis* est linea horizonti parallela, per punctum principale S transiens, proinde etiam parallela lineæ terræ, hic linea $n m$. 10. *Linea distantia* est ea, quæ metitur distantiam oculi a tabula perspectiva, nimirum linea $S O$ a puncto principali ad oculum ducta. 11. *Punctum distantia* est punctum in linea horizontali, quod tanto intervallo a puncto visus distat, quanto ab eodem distat oculus. Tale in citata Fig. 16. est punctum n aut m , si nimirum $S m$, aut $S n$ ponatur esse æqualis lineæ $S O$. 12. *Linea principalis* est recta $S t$ ducta per punctum principale, & perpendicularis ad lineam horizontalem, adeoque est intersectio plani verticalis, & perspectivi. 13. *Altitudo oculi* est recta $O L$ ex oculo ad planum Geometricum $G F$ perpendiculariter ducta. 14. *Linea objectiva* est linea quæcunque in ipso objecto, cujus repræsentatio quæritur in tabula perspectiva, talis est in Fig. 14. linea $C A$, aut $C B$. 15. *Representatio*, apparentia, seu projectio est illud punctum tabulæ, in quo radius opticus secatur planum perspectivum. Sic in eadem Fig. 14. apparentia puncti est punctum a , per quod transit radius $A O$, apparentia lineæ est linea $a b$ formata in plano perspectivo ab omnibus radiis opticis, qui a linea objecti ipsius $A B$ per idem planum ad oculum transeunt.

Defin. 16 *Ichnographia geometrica* est descriptio figuræ planæ in plano geometrico, cui tanquam basi corpus innititur, sive est descriptio sectionum alicujus corporis cum plano geometrico, cui insistit, prout illæ in se sunt, adeoque est veluti basis cujuscunque corporis plano geometrico insistentis, servatis omnibus ejus dimensionibus, ut si cubus plano geometrico insistat, ejus ichnographia seu basis est quadratum $A B C D$ (Fig. 19. Tab. II.) Si cylindrus recta insistat, basis erit circulus $A C E G$ (Fig. 24. Tab. II.) & sic de figuris aliis. 17. *Ichnographia projecta*, seu *perspectiva* est repræsentatio ichnographiæ in tabula, seu plano perspectivo, quæ sit per sectiones radiorum ab ichnographia geometrica in oculum emissorum. Sic in Fig. 14. triangulum $A B C$ plano geometrico inscriptum est ichnographia geometrica prismatis v. g. verticaliter plano huic insistentis, aut pyramidis; triangulum vero $a b c$ in plano perspectivo formatum a radiis opticis est ichnographia perspectiva basis ejusdem prismatis plano geometrico in dato loco verticaliter insistentis. 18. *See-*

anographia est representatio corporis alicujus certam etiam altitudinem, ac crassitiem habentis in plano perspective facta. His rite notatis præcipua Ichnographiæ projectæ, ac Scenographiæ fundamenta haud difficulter intelligi poterunt.

112. Principium fundamentale I. Lineæ rectæ ob jectivæ apparentia in plano perspective est etiam linea recta. Cum enim a singulis punctis lineæ ob jectivæ C B (Fig. 14. Tab. II.) in oculum O radii illabantur, tota hæc linea in oculum radiat per triangulum B O C: cum ergo in plano perspective *c b* apparentia illius rectæ ob jectivæ C B aliud non sit, quam intersectio communis tabulæ & trianguli optici B O C, etiam apparentia *c b* erit linea recta: hinc datis duobus punctis *c, b*, quæ sunt apparentia punctorum C, B, datur etiam apparen tia totius lineæ *c b*. Item data apparentia *a b c* verticum angulorum Figuræ ob jectivæ A B C, datur quoque apparentia totius figuræ, seu trianguli ob jectivi, nec opus alio est, nisi ut puncta apparentiæ jungantur rectis.

113. Principium fundamentale II. Altitudo puncti apparentis in tabula est ad altitudinem oculi, ut est distantia puncti ob jectivi a tabula ad complexum ex hac ipsa distantia, & distantia oculi: unde in eadem Fig. 14. altitudo puncti *c*, mensuranda per lineam *c m*, est ad *l O* altitudinem oculi, uti est C *m* distantia puncti ob jectivi C ad C *n* complexum ex distantia ob jectivi a tabula, & distantia oculi ab eadem tabula: triangula enim O *n* C, & *c m* C sunt similia, proin latera homologa sunt proportionalia. Hinc jam resolves sequentia.

114. Probl. I. Puncti ob jectivi A (Fig. 17. Tab. II.) apparentiam *a* invenire. Ex dato puncto A ducatur perpendicularis A *t* ad lineam terræ R V; ex linea terræ abscindatur *t d* æqualis A *t*, quod sit, si apertura circini capiatur spatium A *t*, & ex *t* tanquam centro ducatur arcus A *d*; per punctum principale S ducatur linea horizontalis *m n*, & S O sit æqualis distantia oculi a plano perspective. Ex puncto *t* ducatur recta *t S* ad punctum principale S; & ex puncto *d* alia recta ad punctum distantia oculi O. Intersectio utriusque hujus lineæ dabit apparentiam quæsitam *a*. Atque ex hoc problemate habetur ichnographia perspectiva cujuslibet figuræ planæ rectilineæ.

115. Probl. II. Invenire apparentiam trianguli A B C (Fig. 18. Tab. II.) cujus basis B C parallela est lineæ ter-

terræ R V. 1. Juxta datam oculi altitudinem ducatur linea horizontalis $m n$ parallela lineæ terræ. 2. Punctum principale oculo directe oppositum figatur in S. 3. Ab hoc in linea horizontali notetur distantia oculi in O. 4. A singulis angulis trianguli A B C erigantur perpendiculares ad lineam terræ, nempe C i, A t, B r. 5. Perpendiculares istæ transferantur in lineam terræ ex opposito puncti distantie O. sive, ut in priore problemate dictum, in linea terræ abscindantur partes istis perpendicularibus æquales $r h$, $t d$, & $i e$. 6. Ex punctis r , t , i ducantur rectæ ad punctum principale S, videlicet $i S$, $t S$, $r S$. 7. Ex punctis d , e , h ducantur ad punctum distantie O aliæ rectæ $d O$, $e O$, $h O$; & juxta problema primum puncta intersectionum a , b , c ostendent apparentiam angulorum, aut verticum totius trianguli A B C. Puncta isthæc per lineas rectas inter se jungantur, & habebitur triangulum $a b c$, quod est apparentia trianguli objectivi A B C.

Eadem methodus servatur, si non basis C B, sed trianguli vertex A oculo obvertatur; neque alio opus tunc est, quam ut situs trianguli in plano geometrico immutetur, & quemadmodum antea basis, ita nunc vertex A obvertatur lineæ terræ seu fundamentali R V. Perinde etiam est, siue basis trianguli objectivi fuerit ad lineam fundamentalem parallela, siue obliqua: data enim operandi methodus eodem prorsus modo procedit. Nec demum refert, si situs oculi fuerit datus obliquus ad punctum principale: si enim punctum principale assumpto situ oculi obliquo fuerit x (Fig. 18.) punctum vero distantie sit z , id unum observandum erit, ut lineæ ex r , t , i , prius ductæ ad S, nunc ducantur ad x , & lineæ ex d , e , h , antea ductæ ad O, hoc casu ducantur ad z , & dabitur apparentia ejusdem trianguli objectivi, qualem requirit situs oculi obliquus.

116. Probl. III. Invenire apparentiam quadrati A B C D (Fig. 19. Tab. II.) directe visi, cujus unum latus A B est in ipsa linea terræ R V. 1. Eodem, ut prius, modo ducatur linea horizontalis $m n$. 2. Punctum principale S in eadem linea figatur ita, ut perpendicularis ex illo ad lineam terræ bifariam secet latus A B, proin etiam totum quadratum; quia ponitur visio directa. 3. Figatur punctum distantie O. 4. Perpendiculares A C, & B D transferantur in lineam terræ ex A in r ,
ex

ex B in *a*. 5. Ducantur ad punctum principale S rectæ A S, & B S; ad punctum vero distantie O ducantur rectæ a O, & e O. Interfectiones *c* & *d* dabunt apparentias puncti C, & D; proin habebitur *a b c d* apparentia totius quadrati objectivi. Compendii causa in quadrato, cujus latus unum est in ipsa linea fundamentali, assumi potest duplex punctum distantie, nimirum in O, & *z*; & ductis ad punctum principale S rectis A S, B S, illico duci possunt rectæ A O, & B z. Interfectiones *c* & *d* erunt eædem, quæ fuerant prius. Hæc tamen methodus brevior procedit duntaxat in quadratis; methodus vero prior adhibetur etiam in parallelogrammis, & trapeziis, sive visio fuerit obliqua, sive directa: si enim hæc obliqua fuerit, alio iterum opus non est, quam ut punctum principale pro data obliquitate figatur ita, ut perpendicularis ex hoc puncto ad lineam terræ cadat extra latus quadrati, aut saltem illud bifariam non secet. Cætera se habent eo modo, quo in visione directa. Quod si quadratum a linea terræ distaret, in lineam terræ transferendæ etiam essent distantie A & B, quemadmodum in problemate II. factum circa triangulum a linea terræ remotum.

117. Probl. IV. Exhibere apparentiam quadrati A B C D (Fig. 20. Tab. II.) cujus diagonalis A C ad lineam terræ perpendicularis est. Duplici modo hoc fieri potest; vel juxta methodum universalem hucusque indicatam ducantur ad lineam terræ perpendiculares B r, C A, D i, eæque, ut in problemate II., transferantur in lineam terræ, nimirum B r in *a*, A C in *e*, D i pariter in *e*, & ductis lineis alias consuetis interfectiones *d*, *c*, *b* dabunt apparentiam quadrati objectivi. Vel compendii ergo servare poterit methodus brevior. Supposita linea horizontali, puncto principali, & puncto distantie, quæ iisdem semper characteribus notata in figuris sunt, linea diagonalis A C ex utraque parte transferatur in lineam terræ hinc ex A in *h*, illinc in *e*. 2. Ductis parallelis D i, & B r, & rectis ad punctum principale S, in linea horizontali figitur geminum punctum distantie O & *z*. 3. Ad utrumque hoc punctum ducuntur rectæ ex *e* & *a* in O, ex *h* & *a* in *z*. Et interfectionum puncta denuo dabunt apparentiam quadrati quæsitam.

118. Probl. V. Exhibere apparentiam quadrati A B C D (Fig. 21. Tab. II.) cui aliud quadratum E F G H

inſcriptum eſt, dum latus AB quadrati majoris in linea terræ exiſtit, Diagonalis vero EF quadrati minoris ad eandem lineam eſt perpendicularis. 1. Ex puncto principali S notetur utrinque in linea horizontali geminum punctum diſtantiæ oculi O & z . 2. Ex A & B ad punctum principale ducantur rectæ AS , & BS . 3. Ex iisdem punctis A & B ad puncta diſtantiæ ducantur rectæ AO , Bz ; puncta interſectionum c & d dabunt Ac dB apparentiam quadrati objectivi majoris. 4. Quadrati inſcripti diagonalis EF transferatur in lineam terræ, quod fiet, ſi latus FG producat, uſque dum lineæ terræ occurrat in i . 5. Ex i , A , & E ducantur rectæ verſus punctum diſtantiæ O , & interſectiones g , f , h cum puncto communi E oſtendent apparentiam quadrati inſcripti EF GH . Si obliqua fuerit viſio, mutandum pro data obliquitate erit punctum principale, & huic accommodanda puncta diſtantiæ, ut dictum N . 115.

119. Probl. VI. Pavimentum $ABCD$ (Fig. 22. Tab. II.) lapidibus quadratis, directe poſitis, ſtratum in tabula exhibere. 1. Pavimenti latus AB transferatur in lineam terræ, atque in tot partes æquales dividatur, quot ſunt lapides quadrati in una ſerie v. g. 6. 2. Ex ſingulis diviſionum punctis ducantur rectæ ad punctum principale S . 3. Ex A ducatur recta ad punctum diſtantiæ O , ex B vero ad punctum diſtantiæ z . Et inprimis illa ſectionis puncta, quæ ſunt in c & d , dabunt magnitudinem apparentem pavimenti, ſi ex illis ducatur recta cd . Si dein per ſingula puncta interſectionum linearum utrinque ſibi reſpondentium ducantur a latere Ac ad latus Bd rectæ parallelæ ad AB , habebitur debita diviſio lapidum, atque ita tota apparentia pavimenti quæſita. Eodem prorſus modo exhibetur pavimentum ex quadratis lapidibus directe poſitis cum limbo aliquo, quemadmodum ex datis hic principiis, & inſpectione Figuræ 23. Tab. II. abſque ulteriore declaratione poteſt intelligi.

120. Probl. VII. Circuli apparentiam exhibere in Fig. 42. Tab. II. 1. Circulo circumſcribitur quadratum, cujus latera adæquent diametrum circuli A E . 2. Ducantur diagonales quadrati t 1 , & l 4 ; item diametri circuli A E , C G , ad angulos rectos ſe ſe interſecantes. 3. Ex d in quadrato objectivo ducatur recta ad f , ex b ad h , utraque parallela diametro C G . 4. Ducantur aliæ duæ rectæ una ex b per punctum d continuanda uſque

ad

ad lineam terræ in 2. altera ex h per punctum f , usque dum in 3. occurrat lineæ terræ. 5. Ad punctum principale S ducantur rectæ $4 S$, & $1 S$; ex iisdem punctis 1 , & 4 ducantur rectæ ad puncta distantiae O & z ; & puncta intersectionum i & k ostendent, qualis sit apparens magnitudo circuli circumscripti. 6. Ex punctis 2 & 3 ducantur rectæ ad punctum principale S , & puncta, in quibus hæc lineæ interfecant lineas ad puncta distantiae ductas, erunt quasi fundamentalia apparentiæ circuli, quæ ut facilius habeatur, per punctum, in quo lineæ $1 O$, & $4 z$ secant lineam $S E$, ducatur apparentis circuli diameter $c g$; & singula hæc puncta intersectionum connectantur per arcus spatiis proportionatos, habebiturque tota apparentia circuli $a b c d E f g h$.

121. Probl. VIII. Exhibere figuram polygonam, v. g. Hexagonum (Fig. 25. Tab. II.) 1. Ducta horizontali $m n$. & punctis principali S , ac distantiae O notatis, ex singulis polygoni angulis erigantur perpendiculares ad lineam terræ hic in $a b c$. 2. Perpendiculares istæ transferantur in lineam terræ, linea $c 6$ in punctum lineæ terræ 6 , linea $c 5$ in punctum 5 , atque ita de reliquis. 3. Ex punctis a, b, c , in quibus lineæ perpendiculares insistant lineæ terræ, ducantur rectæ ad punctum principale S . 4. Ex illis vero punctis, in quibus perpendiculares translatæ occurrunt lineæ terræ, quæque iisdem, quibus anguli respondentes, notata sunt numeris, ducantur aliæ rectæ versus punctum distantiae O . Puncta intersectionum ostendent angulos singulis lineis respondentes, qui anguli si per rectas inter se jungantur, dabitur tota apparentia Hexagoni. Eodem modo exhibentur polygonia alia. Quodsi polygonum habeat limbum latiore, parallelis terminatum, sive si polygono majori inscriptum sit aliud minus, hujus minoris quoque apparentia dabitur, si ex singulis ipsius angulis primo erigantur perpendiculares ad lineam terræ; istæ dein transferantur more solito in lineam terræ, & cætera eodem modo peragantur, quo factum est in polygono ampliore. Quoniam autem ex multitudine linearum, quæ in Ichnographia perspectiva ducendæ non raro sunt, facile confusio aliqua oriri potest, possunt ad punctum principale, itemque ad puncta distantiae alligari fila tenuia, & ad puncta divisionum lineæ terræ extendi, quorum

rum communis interfectio cujuslibet puncti apparentiam dabit eo modo, quo illam dant interfectiones linearum.

122. Atque hæc sunt præcipua Ichnographiæ perspective problemata: cum enim ichnographia suppeditet bases ac fundamenta corporum perspective exhibendorum, bases autem corporum plerumque sint vel triangula, vel quadrata, aut parallelogramma, vel polygona, vel circuli, necesse est prius nosse apparentiam basis, cui perspective imponendum corpus est, antequam ipsius corporis delineatio inchoetur. Jactis his fundamentis ars perspectiva ulterius progreditur, & in Scenographia etiam docet corporis ipsius, basi suæ insistentis, apparentiam exhibere.

123. Principium Scenographiæ pro inquirenda debita altitudine corporum basi perspectivæ insistentium hoc est. Duæ lineæ, in eodem puncto lineæ horizontalis concurrentes, in verticalibus abscindunt apparentias linearum æqualium. Declaratur in Fig. 26. Tab. III. Sint duæ lineæ $f e$, & $g e$ in lineæ horizontalis puncto e concurrentes. Ex f sit erecta verticalis $f g$. Hujus jam, vel huic æqualis lineæ, puncto h perspective insistentis apparentia erit verticalis $h l$. Unde patet, quomodo super puncto d , aut c in tabula dato erigenda sit altitudo perspectiva conveniens altitudini objectivæ $f g$. In linea terræ erigatur perpendicularis $f g$ datæ altitudini objectivæ æqualis. 2. Ex f , & g ducantur rectæ ad lineæ horizontalis punctum aliquod e . 3. Ex puncto d in tabula dato ducatur recta $d h$ parallela lineæ terræ. 4. Ex puncto h erigatur perpendicularis $h l$, & ista erit altitudo scenographica assignatæ lineæ objectivæ $f g$ insistentis puncto d .

124. Aliud principium investigandi altitudines perspective in Fig. 27. Tab. III. suppeditat P. Dechaies. Linea omnis, parallela lineæ terræ, & radiis divisa in partes æquales, est mensura omnium altitudinum in ea erigendarum; imo etiam omnium linearum in plano verticali, per eam ducto, existentium. Supponitur nimirum hic pavementum perspective divisum in quadrata æqualia, quale est pavementum $a i b$, in quo proin ductæ sunt plures lineæ parallelæ ad lineam terræ $R V$, quæ proportionem perspective divisæ jam sint in plures partes minores juxta Probl. VI. N. 119. Hinc sicut linea terræ potest esse mensura omnium linearum objectivarum, ita

ita etiam quælibet ipsi æquidistans est mensura omnium linearum tum verticalium, tum inclinatarum, quæ in plano per ipsam ducto sunt describendæ. Sit v. g. linea terræ ex *a* in *b* divisa in 14. partes, quæ vices obeant 14. pedum; sitque in *b* erigenda columna 9. pedum. Assumantur in linea *a b* novem intervalla, & spatium interceptum ex *b* erigatur in *d*; ex puncto *h* æqualis esse debeat altitudo columnæ; ut autem hæc proportionem perspectivam servet, in linea *h h* denuo assumantur novem intervalla, & ex *h* transferantur in *l* ac *t*. Pariter in linea *e e* sit perspective erigenda columna prior æqualis. In illa ipsa linea assumantur novem intervalla; spatium interceptum dabit altitudinem perspectivam columnæ *e f*; & ita deinceps. Principium hoc universale est, & in praxi teste P. Dechaies omnino sufficiens.

125. Probl. IX. Cujuslibet corporis solidi Scenographiam exhibere. 1. Per ichnographiam perspectivam investigatur basis solidi juxta methodum in aliquo ex præcedentibus problemate datam. 2. Juxta principium fundamentale Scenographiæ de investiganda altitudine perspectiva ex singulis punctis erigantur altitudines scenographiæ; lineæ sic erectæ jungantur inter se, & scenographia solidi erit absoluta, nec quidquam nisi temperies umbræ deficiet. Problema hoc universale est, & declaratur amplius per casus particulares.

126. Probl. X. Exhibere scenographiam prismatis triangularis (Fig. 28. Tab. III.) cujus acies *t c* obvertatur oculo. 1. Cum basis prismatis triangularis sit triangulum, ex Probl. II. N. 115. investigetur ichnographia trianguli, quod datæ prismatis basi respondens verticem obvertat oculo. 2. Basi perspectiva semel constituta, data altitudo objectiva prismatis *f g* perpendiculariter imponatur lineæ terræ *R V*. 3. Ex punctis *f* & *g* ducantur rectæ ad lineæ horizontalis punctum quaecunque *e* (Num. 123.) 4. Ut altitudo scenographica inveniat, ex punctis *c* & *b* ducantur ad *e f* rectæ, ad lineam terræ parallelæ. 5. Ex punctis *h* & *x* erigantur perpendiculares, eritque linea *h l* altitudo perspectiva aciei prismatis, *x v* altitudo utriusque lateris. Hinc si lineæ istæ *h l* ex puncto *c*, & *x v* ex punctis *a* & *b* perpendiculariter erigantur, & superius in *i*, *t*, *d* jungantur rectis, erit scenographia prismatis triangularis. Eadem

servatur methodus, si prisma non aciem, sed latus obvertat oculo, nec observandum aliud, nisi ut ichnographia perspectiva trianguli modo inverso instituitur, & altitudo scenographica major respondebit lateribus, minor vero aciei prismatis.

127. Probl. XI. Exhibere scenographiam cubi. Si cubus ita aspiciatur, ut unum latus directe obvertat oculo, exemplum problematis hujus habetur in Fig. 26. Tab. III. Nimirum quadratum tanquam basis cubi juxta Probl. III. N. 116. transfertur in tabulam perspectivam ita, ut unum ipsius latus sit parallelum lineæ terræ. 2. Data altitudo objectiva cubi fg perpendiculariter imponitur eidem lineæ terræ, ductisque ad punctum e rectis ef , & eg investigatur altitudo scenographica utriusque lateris; ac quoniam hic cubi latus ab est in ipsa lineæ terræ, erit altitudo scenographica lateris anterioris æqualis lineæ fg . Ducta dein parallela dh , & perpendiculari hl erit hæc altitudo perspectiva lateris posterioris. Si jam lineæ istæ super angulis respondentibus perpendiculariter erigantur, & per rectas invicem conjungantur, habebitur scenographia cubi quæsitæ.

Quodsi vero cubus ex angulo lineæ terræ insistenti aspiciatur, exemplum problematis dat Fig. 29. Tab. III. Namque etiam hic ichnographia perspectiva quadrati juxta Probl. IV. instituitur. Vera altitudo objectiva fg perpendiculariter imponitur lineæ terræ, & ductis ad punctum e rectis inquiritur cujuslibet lateris altitudo scenographica. Invenietur altitudo lateris oculo directe oppositi ai æqualis fg ; laterum bx & dk altitudo æqualis hl , ac demum lateris posterioris ct altitudo æqualis pq . His in debito loco constitutis, & per lineas rectas conjunctis dabitur scenographia cubi. Simili methodo exhibetur scenographia cubi intus cavi, cujus basis esset quadratum superius Probl. V. N. 118. perspective descriptum. Utriusque nimirum quadrati altitudines scenographicæ more consueto indagatæ respondentibus sibi angulis imponuntur, & per rectas inter se conjunctæ dabunt scenographiam quæsitam.

128. Probl. XII. Cylindrum scenographice repræsentare. Basis cylindri est circulus: hinc 1. quæraturchnographia perspectiva circuli, ut in Probl. VII. N. 120. factum 2. Pro punctis a, b, c, d &c. quærantur altitudines scenographicæ, & punctis sibi respondentibus per-

perpendiculariter imponantur. 3. Supremi linearum termini curvis proportionatis jungantur, & erit scenographia cylindri. Huc etiam pertinet scenographia Coni, cujus basis pariter est circulus. Ista ut perficiatur, ex centro circuli apparentis quærat^r altitudo conⁱ, atque ex eodem centro erigatur. Ex punctis circuli ducantur rectæ ad supremum altitudinis perspectivæ terminum, & habebitur conus quæsitus. Neque dissimilis est scenographia pyramidis, sive illa super basi sua consistat, sive imponenda sit prismati, aut cubo. Si suæ innitatur basi, prius instituat^r ichnographia trianguli, aut quadrati, prout nimirum pyramis trium vel quatuor laterum est. Ex centro trianguli, aut quadrati perspectivi erigatur recta, & ex singulis utriusque baseos angulis rectæ aliæ ad inventam altitudinem scenographicam ducantur versus lineam mediam e centro assurgentem, & habebitur scenographia pyramidis suæ basi insistentis. Si prismati aut cubo imponenda pyramis est, prius perficiatur scenographia prismatis, aut cubi, atque huic dein imponatur pyramis eo modo, quo illam triangulo, aut quadrato imponendam esse prius diximus. Id ipsum fit, si data pyramis sit 5. aut 6. angulorum; pro basi nimirum assumendum tunc est pentagonum, aut hexagonum. Hæc Problemata ostendunt scenographiam alicujus corporis simplicis. Addamus unum alterumve de corpore ex pluribus composito.

129. Probl. XIII. Crucem duplicem, ex septem cubis veluti compositam scenographice exhibere. Sit in Fig. 30. Tab. III. punctum principale S. Distantia oculi sit v. g. dupla lineæ S O. Linea terræ R V; horizontalis m n. His positⁱs 1. per problemata præcedentia delineetur basis datae crucis; nempe si per Probl. III. N. 116. quærat^r ichnographia perspectiva quadrati, cujus unum latus ab , æquale altitudini objectivæ crucis delineandæ, divisum sit in tres partes æquales, proin quadratum totum in novem quadrata minora, invenietur apparentia quadrati $abcd$. Neglectis dein quatuor illis quadratis minoribus, quæ sunt in quatuor angulis, habebitur basis perspectiva crucis delineandæ. 2. Ad latus figuræ supra lineam terræ erigatur perpendicularis fg æqualis lateri ab , & in tres partes æquales divisa, eoquod in data cruce tres sint elevationes, eæque inter se æquales. 3. Ex singulis divisionum punctis $f, 1, 2, g$, ducantur rectæ ad lineam

F 2

hori-

horizontalis punctum aliquod e , & sic habebitur mensura, per quam omnes linearum, crucem componentium, altitudines poterunt inveniri. Usus autem istius mensuræ hic est.

Ut media crucis pars habeatur, investigandæ sunt lineæ $k r$, & $k s$. Dabitur utraque linea, si ex gemino puncto k , cui nimirum pars media crucis insistit, ducantur duæ lineæ versus lineam $f e$, parallelæ ad lineam terræ; ex punctis sectionum h , l erigantur perpendiculares $h i$, & $l i$; prima erit mensura seu altitudo lineæ $k r$, altera $l i$ dabit altitudinem lineæ $k s$; ex punctis $k k$, quibus comprehenditur basis perspectiva partis mediæ, erigantur perpendiculares ad r , & s , & pars hæc media erit scenographice constituta, si puncta altitudinum, & inferiora basis, ea saltem, quæ oculo patent, lineis rectis invicem jungantur. Partes transversæ crucis eadem ratione investigantur: ductis enim ex punctis $p p$, quæ sunt veluti basis utriusque partis transversæ, lineis parallelis versus $f e$, & inde erectis perpendicularibus, habetur denuo mensura altitudinis, in qua linea $h 2$ dat altitudinem linearum $p q$; $l 2$ vero altitudinem linearum $p t$; pars dimidia ostendit etiam crassitiem proportionatam. Dein ut partis ipsi oculo obversæ scenographia habeatur, cum hujus anguli $z z$ punctis $x x$ in linea terræ respondeant, opus haud erit ducere parallelam, sed ex puncto f capiatur mensura usque in 2 , & transferatur ex punctis x in z ; dimidia ipsius pars denuo dabit crassitiem. Denique ut partis ab oculo ferme penitus aversæ u altitudo inveniat, ex puncto posteriore o ducatur parallela $o y$, & perpendicularis ex puncto intersectionis usque ad lineam $2 e$ erecta hujus quoque partis altitudinem ostendet. Id in delineatione advertendum, ne lineæ illorum laterum, quæ oculo in ipsa cruce solida non patent, integræ exprimantur; possunt tamen duci lineæ cæcæ, ut structura scenographica magis sit perspicua.

130. Probl. XIV. Cubum ex omni latere perspicuum scenographice exhibere Fig. 31. Tab. III. Sit hic punctum principale S ; distantia oculi denuo fit v. g. dupla lineæ $S O$; pro hac distantia, & situ oculi obliquo fiat ichnographia perspectiva quadrati, ut habeatur basis cubi. Latus quadrati $a b$ oculo obversum pro mensura altitudinum scenographicarum perpendiculariter imponatur lineæ
ter.

terræ in *f*. In eo abscindatur *f i*, & *g 2*, quanta nimirum ponitur esse crassities trabis, ex qua confectus est cubus; inde ex *f*, *1*, *2*, *g* ducantur rectæ in *e*; ut dein debita omnium laterum altitudo inveniatur, ducantur parallelæ *d h*, *x l*, *c k*; ex punctis sectionum perpendiculariter eriganur lineæ *h i*, *l i*, *k i*, quæ una cum lineâ *f g* erunt altitudo perspectiva omnium laterum ad cubi descriptionem requisitorum. Sic lineâ *f g* dabit altitudinem laterum *a u*, *b u*; spatium *f i*. ostendit crassitiem trabis *s z*, & superioris isti respondentis *t q*; spatium in eadem lineâ interceptum a numeris *1*, *2*, ostendit intervallum *s t*, sicque prima cubi facies erit absoluta. Lineâ *h i* dat altitudinem interioris faciei *r q*; lineâ *l i* erit altitudo lateris *x o*; demum lineâ *k i* altitudo lateris postremi *c o*. Habitis semel istis lateribus, & intervallis per numeros *1*, *2*, in qualibet lineâ indicatis, si puncta omnia per lineas rectas connectantur, prodibit denique scenographia cubi quæsitâ. Attendendum tamen etiam hic, ne illico lineæ omnes ducantur integræ, sed ratio habeatur ad intervalla, & intersecctiones laterum.

131. Præcipuum artificium perspectivæ apparet in scælis designando illarum horizontem, maxime si cochlearum ductus, aut spiras imitentur scælæ. Majus adhuc est in proportionem staturæ humanæ pro diversis distantiiis, ac relate ad diversas ætates determinanda. Maximum in exhibendo ædificio ad leges Architectonicas constructo, aut delineanda scenographia munimenti regularis, quæ nemo satis apte exhibebit, nisi proportionem columnarum probe noverit, ac Architecturæ militaris peritus sit. Rarissimi autem sunt, qui juxta artis regulas in tholis templorum sive planis, sive curvis pingere norunt, aut scenas in theatris ita statuere, ut pro data altitudine oculi omnia concinna appareant. In templis quidem oculus constitutus est in loco, quem frequentissimus accedit populus; in theatris autem in illo loco, quem princeps spectator occupat. At ampliora hæc sunt, quam ut ea compendii ratio admittat. Legi possunt Cl. Marolois, Noster Fr. Bozzo, P. Dechaies, P. Falck, aut Illustr. Wolfius. Pauca tamen, quæ indicata hic sunt, juverit saltem audivisse, ne cui de arte perspectiva loquenti fors accadat id, quod olim accidisse narrant homini cætera non indocto. Is rogatus ab aliquo, an non nosset artificem perspectivæ peritum, respondit, nosse se quidem hominem, qui perspectiva

(tubos nimirum opticos designabat) venalia circumferret; num vero artem ea etiam conficiendi calleret, sibi quidem non constare.

132. Sub finem addi potest principium ad umbram scenographice determinandam. Si data sit apparentia corporis opaci, & luminosi per radios divergentes radiantis v. g. candelæ accensæ, apparentia umbræ hoc modo invenitur. 1. A luminoso, quod instar puncti consideratur, demittitur perpendicularis ad tabulam, id est, quæritur apparentia puncti, in quod cadit perpendicularis ex medio luminis in planum geometricum ducta. 2. A singulis angulis corporis, seu punctis sublimibus, pariter demittuntur perpendiculares ad planum, id quod in scenographia corporis factum jam est. 3. Puncta in quæ incidunt hæ perpendiculares, connectuntur lineis rectis cum puncto, in quod cadit perpendiculum ex luminoso demissum, in plagam luminoso oppositam continuandis. 4. Denique per puncta sublimia ex centro luminosi ducantur rectæ, quibus priores intersecantur; & puncta intersectionum dabunt terminos umbræ. Exemplum dat Figura 28. Tab. III. in qua projicienda sit umbra prismatis. Luminosum consistat in k ; hinc demittatur perpendicularis ks ; ex hoc puncto perpendiculi juxta angulos c & b ducantur rectæ so , sr ; demum a puncto luminosi ducantur aliæ rectæ per sublimia prismatis puncta, seu angulos t , d ; & intersectiones in o , & r ostendent terminum umbræ inter $cbor$ comprehensæ.

§. III.

PRINCIPIA CATOPTRICÆ.

133. **I**sta concernunt visionem reflexam, quæ potissimum fit ope speculorum. Horum aliud est planum, aliud concavum, aliud convexum pro ratione superficie, qua quodvis terminatur. Ex concavis & convexis aliud denuo est sphæricum, aliud parabolicum, aliud cylindricum, aliud conicum &c. prout nimirum superficies vel est sphærica, vel parabolica &c. De his antequam pauca adducamus,

Prænotandæ sunt I. definitiones aliquæ. 1. *Visio reflexa* est, quæ habetur per radios a speculo reflexos. 2. *Radius incidens* (Fig. 32. Tab. III.) est radius AO ex puncto lucido A in speculum illapsus; *reflexus* vero idem

Idem ex O in B resiliens. Punctum O vocatur *punctum incidentiæ*, & *reflexionis*. 3. *Cathetus incidentiæ* in speculo plano est linea A F ex A ad speculum perpendicularis; in sphærico est linea A C ab eodem A ad centrum speculi ducta. *Cathetus reflexionis* est B H, vel B C. 4. *Cathetus obliquationis* in speculo plano est L O ex puncto O ad perpendiculum erecta; in sphærico O C ex puncto eodem ad centrum demissa. 5. *Angulus A O F incidentiæ*, B O H *angulus reflexionis* dicitur. 6. *Angulus inclinationis* radii incidentis est A O L; radii reflexi vero B O L. 7. *Axis* speculi sphærici dicitur linea C O per centrum speculi transiens. 8. *Focus* est punctum illud, in quo radii frequentiores concurrunt.

Prænotanda II. axiomata quædam, quæ pro talibus a nobis tuto assumi possunt. 1. Angulus incidentiæ est æqualis angulo reflexionis. 2. Angulus inclinationis inter radium incidentem, & cathetum obliquationis interceptus est æqualis angulo inclinationis inter cathetum eundem, & radium reflexum comprehenso.

134. Theorema I. In speculis planis objecti punctum quodvis videtur ibi, ubi recta ex puncto illo ad speculum perpendiculariter ducta secatur a radio in oculum reflexo, sive, in concursu catheti incidentiæ F L, & radii reflexi E C (Fig. 33. Tab. III.) Declaratur. Baculum F L speculo plano A B perpendiculariter impone; videbis ejus imaginem post speculum in eadem cum baculo linea recta L M; igitur punctum F videtur in M, seu in concursu Catheti incidentiæ cum linea reflexionis, idem est de punctis aliis.

135. Igitur I. objectum tanto post speculum intervallo apparet, quanto est positum ante speculum, ut patet aspicienti puncta F & M. (Fig. 33.) II. Objectum F, quod radiat versus partem sinistram C, in dextra videtur, & vice versa: nam aspicitur per lineam E M, & non per lineam F N. III. Objecto ad speculum accedenti obviam procedit ejus imago post speculum depicta: minuta enim catheto F L minuitur quoque ei æqualis L M; hinc in speculo horizontaliter collocato objectum decidens videbitur sursum ascendere. IV. Si speculum inclinet, inclinabitur etiam objectum; & si illud cum plano horizontali angulum semirectum effecerit, objectum vertice apparebit post speculum horizontale, & vicissim. V. Objectum verticale, prope speculum horizontale positum,

fitum, post illud videtur inversum. Ut autem determinari facile possit locus, in quo post speculum apparebit objectum, oculo ubicunque v. g. in E posito, ex aliquo termino objecti F ducatur perpendicularis ad speculum, producatque ita, ut ML sit æquale FL ; dein ex loco oculi ducatur recta ad M , & apparebit, in quo loco, & situ videndum objectum sit.

136. Probl. I. Altitudinem AB (Fig. 34. Tab. III.) ad quam accedi potest, ope speculi plani mn invenire. Resol. Speculo horizontaliter posito, ab hoc recede tandem, dum videas in speculo verticem v. g. Arboris A ; sit hoc in puncto P . Tum metire 1. altitudinem oculi $OP = 6$. pedum v. g.; 2. distantiam PC , seu tuam a puncto reflexionis $C = 4$. ped. 3. distantiam CB , seu arboris ab eodem puncto reflexionis $= 16$. ped. & erit CP : $PO = CB$: BA altitudinem quæsitam $= 24$. ped. Nam triangula OPC , & ABC sunt similia, proin latera homologa habent proportionalia.

137 Theor. II. Si duo specula jungantur sub angulo acuto, oculus intra angulum constitutus, si simul computetur visio directa, objectum toties videbit, quoties angulus, quem efficiunt specula, sub integro circulo, seu 360. gradibus continetur. Ratio est, quia toties cathetus incidentiæ cum radio reflexo concurrit, ut demonstrari facile, atque etiam ostendi in figura poterit. Si igitur I. angulus speculorum fuerit $= 45$. grad. objectum videbitur octies: nam $360:45 = 8$. II. Cum, quando specula sibi parallele opponuntur, concursus catheti incidentiæ cum radio reflexo contingant ferme infiniti, sequitur, objectum inter hæc specula positum infinities fere multiplicandum. Declaratur in Fig. 35. Tab. IV. Sint specula AB , DC , objectum F . Oculus G obversus speculo DC videbit objectum 1. in L per radium FkG ; 2. in N per radium $FqPG$; 3. in K per radium $FbaRG$. &c.

138. Probl. II. Cistulam catoptricam construere, in quam insipienti objecta intus collocata appareant mire multiplicata, & per vasta etiam spatia diffusa. Resol. 1. Fac ex ligno cistulam polygonam 6. v. g. laterum æqualium, & verticaliter erectorum, relicto in latere quovis foramine non adeo amplo. 2. Latera intus vesti speculis, & ad foramen abraide stannum cum mercurio, ut per vitrum introspicere queas. 3. In fundo ad perpendi-

cul-

culum erige unam vel duas, quæ militem referunt, incunculas. 4. Superiorem cistulæ partem papyro oleo inuncta tege. Per foramen inspicies integros veluti exercitus in armis stare videbis.

139. Theor. III. In speculis convexis sphaericis objecti imago videtur. 1. erecta; 2. minor, quam sit objectum; 3. si aliquanto major fuerit angulus incidentiæ, intra speculi superficiem, & centrum ejusdem; Declaratur in Fig. 36. Tab. IV. Objectum B A emittat radios A E, B F in speculum M N; hi reflexi in L & K si producantur intra speculum, cum cathetis incidentiæ A C, B C concurrent in a, b; adeoque imago objecti apparebit in a b erecta, minor, quam A B, & intra speculi superficiem M N, ejusque centrum C. Quo magis autem objectum A B a speculo fuerit remotum, eo minor fiet ejus imago post speculum; quia, quo major est objecti a speculo distantia, eo inprimis minor evadit angulus cathetorum incidentiæ A C B; dein etiam radii reflexi eo propius ad centrum cum cathetis incidentiæ concurrunt. Hinc est, cur imago solis in sphaera deaurata magnitudinem stellæ non excedere videatur.

140. Theor. IV. Quo minor fuerit speculi semidiameter, &, quod hinc sequitur, major ejus convexitas, eo plura simul objecta, sed simul etiam eo minora repræsentat. Declaratur primum in Fig. 37. Tab. IV. Speculi plani B C campus definitur per radios extremos F B, G C; speculi vero convexi B M C per radios O B K, O E H, qui adhuc in oculum O reflectuntur: ergo posterioris campus major est, quam prioris, proinde etiam plura objecta reddet spectanda. Alterum ex eo patet, quod, quo minor est sphaeræ radius, eo magis illa a planitie recedat, in qua justa imaginum magnitudo exhibetur.

141 Theor. V. Radii, qui cum axe speculi sphaerici concavi incidunt paralleli, ita reflectuntur, ut qui axi sunt vicini, cum eodem in dimidia circiter semidiametri parte concurrant. Ostenditur in Fig. 38. Tab. IV. Incident radii H D, A B, G E paralleli in speculum M N; A B, quia per centrum C transiens ad speculum perpendicularis est, redibit in se; reliqui concurrent in F, eritque B F ferme dimidia pars B C. Nam cum angulus E C F sit æqualis tam angulo C E G alterno (Præcog. N. 57.) quam angulo C E F (Ex Num. 133.

Axiom. 2.) in triangulo Ifoſcelico $C F E$ latus $C F$ erit \equiv lateri $F E$; ſeu, quia ob angulos, ut ob viciniam radiorum ad axin ponitur, valde acutos $C F \nmid F E$ ferme eſt $\equiv E C$; ipſum $E C$ vero $\equiv C B$, erit $E B$ proxime dimidia pars ſemidiametri $C B$.

Igitur I. ſi radii magis diſtent ab axe, uti in Fig. cit. radius $O M$, focus horum erit in x , ſeu minori a ſuperficie ſpeculi, majore autem a centro diſtantia. II. Uti radii parallele incidentes ex ſpeculo reflectuntur in focum, ſic radii ex foco in ſpeculum emiſſi ita reflectuntur, ut ſint inter ſe paralleli. III. Cum in foco plures radii concurrant, ex principiis de calore, inferius dandis, ibi quoque calor datur, neceſſe eſt, niſi radii directi omni prorsus ſenſibili calore careant, uti ſunt illi ex corpore lunari ad terram reflexi.

142. Probl. III. Ope ſpeculorum concavorum ſphæricorum, quæ etiam cauſtica, ſeu uſtoria vocant, ſtupam v.g. accendere per ignem, qui ab ea 50. aut plures adhuc pedes diſtat. Reſol. Sint in Fig. 39. Tab. IV. ſpectula $P Q$, & $A B$, quorum ſemidiameter $\equiv 6$. ped.; hæc ita colloca, ut axes eorum in una eademque linea $L C$ congruant; ignis, carbo ignitus v. g. in f diſtantia a ſuperficie $P Q$ 3. circiter pedum, accendet ſtupam in x , quæ pari intervallo a ſuperficie ſpeculi $A B$ remota ſit.

Cum autem ſpectula parabolica omnes prorsus radios, quantumcunque ab axe diſtantes, huic tamen parallelos, in unico puncto colligant, patet ea ad hunc effectum ſphæricis præſtare. At neque hæc, neque illa apta fuerunt, quæ Archimedes Romanorum claſſem combureret, quæ ad Syracuſas Marcello Duce expugnandas advolaverat: quis enim ſpeculum parabit, cujus focus ad tantam diſtantiam exporrigatur? A commenti tamen nota Archimedem vindicare poteſt Cl. Bouffon, qui ope ſpeculorum planorum debito ſitu collocatorum ad diſtantiam 200. pedum combuſſit lignum; ad diſtantiam vero 140. ped. ſtannum liquefecit.

143. Theor. VI. Si objectum ponatur in centro ſpeculi ſphærici, omnes radii per reflexionem redeunt ad objectum. Declaratur in Fig. 40. Tab. IV. Radii puncti C in centro exiſtentis, quia perpendiculariter incident, eadem via redeunt; qui ab extremitatibus veniunt, $B D$, $B E$, $B F$ &c. reflectuntur ad A , & viciliſim: er-

go.

go. Igitur imago $A B$ æqualis magnitudinis cum objecto in libero aere depingetur, sed inversa; cum radii ex B reflectantur in A , & vice versa. Quodsi eam videre velis, alio opus haud erit, quam ut speculum non nihil inclines; tunc radii reflexi non amplius redibunt in objectum, sed in loco paulo altiore sistent ejus imaginem. Hinc objecto per cistulam ante illud positam tecto, illud rudibus, qui aliquanto adhuc spatio inde remoti dum e. g. rosam prehensuros se autumant, inanem denique auram se captasse deprehendent.

144. Theor. VII. Imago objecti intra centrum, & focum existentis post reflexionem apparebit 1. extra centrum, 2. inversa, 3. major objecto. Declaratur in Fig. 41. Tab. IV. Radii puncti b , radiantis in axe, concurrent iterum cum eodem axe in B ; & radii puncti alterius cujusvis extra axem e. gr. a cum catheto incidentiæ $C E$ producta sursum concurrent extra centrum ex. gr. in A : ergo oculo ultra concursum constituto exhibebunt imaginem $A B$ extra Centrum C , inversam, & majorem $a b$. Ex eadem Figura manifestum est, quod, si objectum $A B$ ponatur extra centrum C , illud intra centrum & focum inversum, & minus sit repræsentandum.

145. Theor. VIII. Si objectum constituatur intra focum, & speculum, imago ejus videbitur post speculum, erecta quidem, sed major objecto. Declaratur in Fig. 36. Tab. IV. Producantur catheti incidentiæ $C a A$, $C b B$, concurrent ii cum radiis reflexis $H F$, $G E$ post speculum productis in A & B : ergo imaginem sistent $A B$ post speculum erectam, & majorem $a b$. Si objectum minus distet a foco, concursus dictorum radiorum in majori post speculum distantia sit, &, quod sequitur, per radios magis divergentes major adhuc objecti imago apparebit. Hinc fluit

146. Theor. IX. Objectum in ipso speculi foco constitutum post speculum videtur distinctum, erectum, & majus, crescente pro distantia oculi a speculo magnitudine ita tamen, ut eo minor semper objecti pars conspiciendam se præbeat. Ostendit id manifesta experientia, quam præter alia quædam in Optica, & Dioptrica antehac perperam exposita detexit R. P. Mathematicus Academiæ hujatis, & quisque alius, cui speculum concavum ad manus est, deprehendere poterit. Ratio est, quod distincte etiam videre possumus objectum per radios

dios ex quovis objecti puncto parallele in oculum incidentes, ut vel ex eo patet, quod objectum in foco lentis convexæ positum per hanc distincte cernatur. Ruit ergo, quod in operibus præstantissimorum etiam Mathematicorum passim legitur, Theorema oppositum; ruunt quoque demonstrationes, quibus, objectum in foco videri non posse, contendunt eo nixi supposito, quod objectum per reflexionem videri nequeat, nisi radii reflexi cum catheto incidentiæ concurrant.

147. Theor. X. In speculo cylindrico verticaliter erecto objecta apparent longa quidem, sed parum lata; & vicissim, si speculum fuerit horizontale. Declaratur. Speculum ejusmodi secundum longitudinem repræsentat speculum planum, secundum latitudinem convexum: ergo longitudo objecti iuxta, latitudo vero iuxta minor apparebit. Si situs verticalis in horizontalem mutatus fuerit, contrarium fieri debere, ex primum dictis liquet.

148. Theor. XI. In speculo conico ad perpendicularem erecto objecta videntur longa, & simul minus lata ita, ut latitudo ad verticem usque continuo magis, magisque decrescat. Ratio est eadem, quæ prioris: nam specula hæc secundum longitudinem planis, secundum latitudinem vero convexis æquivalent, iisque talibus, quorum diametri a basi ad verticem continuo decrescunt. Per specula utraque imagines objectorum non nisi deformatas exhiberi, ex eo clarum est, quod per istam longitudinis, & latitudinis difformitatem iuxta partium proportio tollatur, nisi pictor ipse eam partium omnium in imagine proportionem posuerit, ut dein per ipsum speculum debita singularum longitudo, ac latitudo exhiberi queat, ut fit in imaginibus, quas anamorphiticas dicunt.

§. IV.

PRINCIPIA DIOPTRICÆ.

149. **D**ioptrica dicitur scientia visibilium, quatenus ea videntur per radios refractos, seu tales, qui a recta, quam cæpere, via propter medii variationem deflectunt. Duo præcipue consideranda veniunt, x. objectum scientiæ hujus, quod est luminis refraction, seu ejusdem per medium aliquod diaphanum transeuntis

æcepto tramite deviatio. Hæc ope vitrorum potissimum fit, quorum alia plana, alia concava, alia convexa, quæ etiam lentes appellantur, quod aliquam cum lenticula similitudinem habent; iterum alia convexo-concava, seu Menisci, prout nimirum eorum superficies sunt vel planæ, vel concavæ &c. 2. Instrumenta, quibus Dioptrica utitur. Nos ut simul brevitati studeamus, simul Tyronum captui nos accommodemus, demonstrationibus Geometricis consulto abstinemus, & ea tantum de ambobus asseremus, quæ & faciliora, & magis necessaria visa sunt. Præmittendæ iterum sunt definitiones aliquæ, & axiomata.

150. Definitio 1. *Radius incidens* (Fig. - 42. Tab. IV.) est linea A B; *refractus* B F, qui declinat a linea B G, secundum quam radius incidens alias propagaretur. Punctum B dicitur *punctum incidentiæ*. 2. *Cathetus*, seu *axis inclinationis* est linea C B D, vocatur etiam *perpendicularum*. Cathetus incidentiæ est A E, refractionis F H. 3. *Angulus inclinationis* dicitur angulus A B C; *refractus* F B D; *refractionis* F B G; *incidentiæ* A B E. 4. *Sinus anguli inclinationis* est linea A I, vel E B; *anguli refracti* D F, vel B H. 5. *Axis vitri sphaerici* est linea per sphaeræ centrum transiens. 6. *Focus verus* dicitur punctum, in quo radii facta per vitrum convexum refractione concurrunt; *virtualis vero*, in quo concurrerent radii, si per concavum vitrum refracti ducerentur retro; vocatur etiam *punctum dispersus*.

Axioma I. Radius perpendicularis nullam patitur refractionem. II. Radii oblique incidentes ex medio rariore in densius refringuntur ad perpendicularum ita, ut sinus anguli inclinationis ad sinum anguli refracti in eodem medio rationem habeat constanter eandem, in vitro quidem ut 3. ad 2.; in aqua ut 4. ad 3. Loquor autem hic de lumine abstrahendo a diversa radiorum ejus refrangibilitate, de qua hic Sect. V. III. Radii ex medio densiore in rarius oblique incidentes refringuntur a perpendicularo ita, ut ratio inter sinus sit inversa prioris, in vitro ut 2. ad 3. &c. Proinde radii incidentes & refracti, sive ex medio densiore in rarius, sive ex hoc in illud pergant, eandem semper viam tenent, ut in Fig. 42. radius A B ex rariore incidens in densius tendit per viam B F, & vicissim radius F B ex densiore in

rarius pergit per viam B A. IV. Objectum per refractionem ibi videtur, ubi, fi radii refracti retroducerentur, concurrunt.

151. Theor. I. Oculus in medio rariore exiftens videt objectum. in denfiore pofitum, fuperficie planæ propius, quam eft. Declaratur in Fig. 43. Tab. IV. Sit punctum radians C; ejus radii C E, C F in medii rarioris fuperficiem A B incidentes a perpendicularo recedent per viam E M, & F N; & fi ducantur retro, concurrunt in O: ergo, cum oculus objectum per hos radios videat, illud in O, loco fuperficie propiore videbit. Si punctum radians O exiftat in rariore, & oculus in denfiore medio, hic illud a plana fuperficie magis remotum videbit in C, ubi radii refracti G F, H E concurrunt.

152. Theor. II. Radii, qui ex rariore medio in denfius convexum, e. g. ex aere in vitrum, cum axe paralleli incidunt, ita refringuntur, ut viciniore axi in parte femidiametri convexitatis fere tripla, remotiores vero ab eo citius concurrant in focum. Declaratur in Fig. 44. Tab. IV. Sit radius D E vicinior axi B C A, alter remotior F G; uterque, fi incidat in fuperficiem G H, refringetur verfus perpendicularum ita, ut finus anguli inclinationis E A fit ad finum anguli refracti C A ut 3. ad 2. ergo ille cum axe concurret in A, hic in *m*: atqui B A eft fere tripla pars femidiametri; B *m* minor, ut mechanice ope circini deprehendes. Igitur etiam vitra convexa erunt cauftica, & collectis in foco radiis ignem excitabunt.

153. Theor. III. Radii, qui ex medio rariore in denfius concavum, e. g. ex aere in vitrum, cum axe paralleli incidunt, ita refringuntur, ut retroducti cum eodem concurrerent in focum virtuale in tripla fere femidiametri concavitatis a fuperficie refringente distantia. Declaratur in Fig. 45. Tab. IV. Cum radius N A incidens in medium denfius ita ad perpendicularum refringatur, ut finus anguli inclinationis O A fit ad finum anguli refracti C O ut 3. ad 2., radius refractus A G retroductus cum axe concurret in O: fed B O eft fere tripla femidiametri C B distantia, ut applicato circino videbis. Igitur quemadmodum radius axi parallelus incidens 1. in fuperficiem convexam cum axe concurret in tripla distantia femidiametri; 2. incidens in plano convexam concurret in distantia diametri; 3. incidens in utrinque
æqua-

æqualiter convexam concurrit in distantia semidiametri; ita etiam si idem radius incidat in superficiem plano-concavam, erit focus virtualis in distantia diametri a vitro; si vero in utrinque æqualiter concavam, idem focus erit in distantia semidiametri. Unde si radii in vitrum plano-concavum incidant sub ea inclinatione cum axi, ut convenirent in foco vitri virtuali, e vitro plano-concavo exhibunt paralleli.

154. Probl. Vitri convexi focum mechanice invenire. Resol. Applica vitrum foramini ad fenestram cubiculi obscuri relicto, tum ab eo chartam tamdiu remove, dum imago objecti alicujus per vitrum immissi appareat distincta; distantia chartæ a vitro erit distantia foci. Vel 2. si lens fuerit valde convexa, in cubiculo etiam illuminato vitrum manu altera fenestris obverte, altera chartam ab eo tamdiu remove, dum fenestrarum orbes in ea distincte repræsentatos videas; distantia vitri a charta denuo dabit quæsitum focum. Id tamen adverte, objectum tanto intervallo a lente debere esse remotum, ut radii ex eo in lentem incidentes haberi possint pro quasi parallelis.

155. Theor. IV. Si objectum in foco, vel intra vitrum convexum & ejus focum positum per idem transparens videatur, illud apparebit erectum, distinctum, tantoque majus in primo casu, quo remotior a vitro erit oculus; in secundo autem casu, quo propius foco objectum existit; si vero objectum sit remotum, illud oculo ultra concursum radiorum posito, apparebit minus, & inversum. Demonstrantur omnia experientia, & confirmantur analogia, quam vitra habent cum speculis concavis.

156. Telescopium definitur instrumentum, quo objecta remota & majora, & magis distincta videmus. Fit hoc ope duorum, aut plurium etiam vitrorum. Duo autem vitra in omnibus telescopiis dioptricis præcipue attendenda; illud, quod in tubi extremitate anteriore objecto videndo obvertitur, & objectivum vocatur; alterum, quod in extremitate altera oculo admoveatur, & oculare dicitur. Telescopium aliud est Batavicum, cujus vitrum objectivum est convexum, oculare concavum; aliud Astronomicum, cujus vitrum utrumque est convexum; iterum aliud terrestre, quod quatuor vitris convexis constat. Denique etiam datur Telescopium Ca-

tadioptricum, quod ex duobus speculis, uno concavo, altero plano, & lente oculari convexa componitur.

157. Theor. V. Si Telescopium Batavicum (Fig. 46. Tab. IV.) ita sit dispositum, ut vitri ocularis xx ab objectivo VV distantia sit tanta, quanta est longitudo foci ejusdem vitri objectivi, dempta tamen distantia foci virtualis in vitro oculari, objectum remotius exhibebit distinctum, majus & erectum. Declaratur. 1. Cum radii a puncto c (idem est de quovis alio objecti puncto) egressi in lentem objectivam VV , atque inde in vitrum oculare xx , post refractionem in n , & t pergant paralleli (ex Num. 153.) visio objecti habebitur distincta (ex N. 146.) 2. Cum objecti punctum A videatur per radium sA , & punctum B per radium rB , proin quodlibet in suo loco, objectum apparet erectum. 3. Et quoniam objectum totum videtur jam sub angulo ras , majore utique, quam sit angulus AdB , idem objectum apparebit majus. Ex hoc ipso Theoremate sequitur methodus inveniendi focum virtualem vitri concavi; nempe tubum tamdiu diducito, dum objecti imago appareat distincta; tum metire distantiam utriusque vitri a se invicem, eamque subtrahere a distantia foci vitri objectivi, residuum dabit distantiam foci virtualis in vitro oculari. Sic si distantia foci in vitro objectivo sit 1. pedis, seu 12. digitorum; distantia vitrorum in tubo \equiv 10. dig. erit distantia foci virtualis \equiv 2. dig. Cæterum Telescopia hæc forent omnino præstantia, nisi ex eo, quod radii pro majore foci a vitro objectivo distantia magis continuo divergant, atque ideo non nisi ex paucis objecti punctis in pupillam imitti possint, exiguum quoque campum uno obtutu spectandum exhiberent.

158. Theor. VI. Telescopium astronomicum, si vitrum objectivum sphaeræ majoris ab oculari sphaeræ minoris tantum distet, quanta est distantia foci utriusque simul sumpti, objectum repræsentabit distinctum, majus, & inversum. Declaratur in Fig. 47. Tab. V. Radii t ex puncto objecti infimo; radii s ex puncto ejus medio; radii r ex puncto supremo emanantes simul omnes in lentem objectivam VV incidunt; post hanc singuli radiorum fasciculi facta decussatione circa x in singulos focos coeunt in a ; inde in lentem ocularem vv ingressi post refractionem ab ea parallele egredientur, & tales etiam in oculum, si post lentem hanc politus sit, illapsi imaginem obje-

objecti quidem distinctam, & sub angulo majori, sed simul inversam exhibebunt. Cum perinde sit, siue stellam inversam aspicias, siue erectam, Telescopium hoc usibus Astronomicis apprime deservit. Quodsi tamen eo ad terrestria contemplanda uti velis, post lentem alteram pone tertiam *nn* in distantia summæ foci utriusque; & post hanc denique in eadem distantia quartam *oo*; sic radii ex lente *vv* parallele progressi ad lentem *nn*; post eam in focum collecti, & jam ante decussati in *d* imaginem erectam depingent in *ef*; unde demum per lentem quartam *oo* ad situm parallelum restituti oculo objectum sistent inversum, quod eo ipso erectum videbitur, ut patet ex dictis de visione in genere N. gr.

159. Telescopii catadioptrici, si specula fuerint exacta, effectus erit multo major, quam dioptrici ejusdem longitudinis. Obtinetur autem hoc modo. In speculum concavum *A* (Fig. 48. Tab. V.) quod in fundo tubi collocatur, radii ex objecto parallele incidentes, & inde reflexi, antequam in focum coeant. in speculo minori *b*, oblique ad angulum semirectum posito, excipiuntur; ex quo iterum reflexi in lentem ocularem *c*, in distantia utriusque foci positam, & hic refracti oculum denique paralleli subeunt atque objectum repræsentant inversum. Aliud etiam parari solet geminis instructum lentibus ocularibus præter speculum minus concavum objectivo directe oppositum, quæ objectum in situ erecto repræsentatur, vocaturque illud Gregorianum, & oculo directe applicari potest. Structura illius in explicatione poterit indicari. Id universum de Telescopiis adhuc notandum, 1. lentis ocularis ab objectiva distantiam pro varietate utentium variam esse debere: nam Myopes, quibus humor crystallinus convexior est, ut radios magis divergentes oculo excipiant, eandem propius illi admoveant oportet; contrarium est Presbytis faciendum ex ratione contraria. 2. In Telescopiis dioptriciis vitro objectivo, ut ordinata magis sit refractione radiorum, simulque nimia eorundem copia excludatur, apponitur diaphragma, seu circulus ex papyro nigra; quæ autem hujus apertura optima fuerit, tentando reperitur.

160. Microscopium est instrumentum dioptricum, per quod objecta minuta aucta simul, & distincta videntur. Aliud est simplex, quod una lente; aliud compositum

fitum, quod duabus, aut pluribus constat; aliud denique solare vocant, quod ad objectum illustrandum solis lumine, ope speculi in objectum reflexo, utitur. De his & eruditissime & copiose scripserunt P. Dechales, Reaumurius, Röselius, & inprimis Backerus. Pauca animadvertere juvat.

161. Theor. VII. Objectum minutum in foco lentis convexæ positum oculus ex altera parte lenti admotus videt distinctum, erectum, & eo ferme majus, quo major fuerit lentis convexitas, seu, quo minoris illa fuerit sphaeræ segmentum: nam quodlibet objecti punctum videtur per radios parallelos, & in loco, in quo est, ipsumque objectum sub majori angulo, quam videretur remota lente convexa. In ea autem ratione augetur hic objecti diameter, quam rationem habet distantia foci a centro lenticulæ ad illud intervallum, ad quod objectum aliquod nudo oculo apparere distinctum solet. Intervallum hoc communius assumitur esse 8. vel 9. digitorum. Si igitur distantia foci fuerit \equiv 1. diameter apparens objecti ad veram erit ut 8. ad 1. Cumque intervallum pro distincta objecti visione assumptum respectu oculi valentis idem semper, ac constans sit, apparet, quo minor fuerit distantia foci a lenticula, eo majorem fore rationem diametri apparentis ad diametrum objecti veram. Quodsi focus lentis etiam ultra 9. digitos exporrigatur, tamen objectum apparet aliquanto majus, quia sub majori angulo apparet.

162. Theor. VIII. Microscopium ex duabus lentibus compositum repræsentat objectum distinctum, inversum, & auctum per se in ea ratione, in qua est distantia foci lentis objectivæ ad distantiam foci lentis ocularis: quo magis enim lenticula objectiva admovetur objecto, eo serius radii per illam transmissi in focus concurrunt, ac proin etiam eo magis augebitur angulus, sub quo videtur objectum. Quoniam vero attendenda hic etiam est ratio, quam habet distantia foci a lenticula ad intervallum, ad quod objectum nudo oculo videtur distinctum, ratio augmenti adhuc major erit, quam illa distantia foci lentis objectivæ ad distantiam foci lentis ocularis. Cur objectum hoc casu appareat distinctum, & inversum, ratio habetur ex N. 158.

163. Cæteris tamen objecti apparentiam augendi virtute antecellit microscopium solare, quod plurimum

com-

commune habet cum laterna magica: nam sicut in hac ope speculi concavi post lampadem accensam positi, vel etiam ope globi virtrei aqua repleti, & ante lampadem constituti, radii luminis ad magis illuminandum objectum in prominentem, suisque lentibus instructum tubum parallele emittuntur, per quos dein objectum in opposito pariete depingitur; sic etiam in microscopio solari radii solis ope speculi plani, extra cubiculum obscuratum positi reflectuntur in tubum microscopii, intra cubiculum existentis; qui dein radii per lentem primam in tubum ingressi, atque in focus collecti, objectum prope lenticulam minimam positum vivacissime illuminant, quo modo istud in adverso pariete depingitur ita auctum, ut, siquidem exactum sit microscopium, ad distantiam 8. aut 10. pedum pilus crassitiem brachii adæquet. Inter objecta, quæ non sine maxima voluptate spectantur, præ primis numeranda videtur crySTALLISATIO salium, de qua, aliisque plura Backerus, & alii.

SECTIO III.

DE LUMINE.

Lux *primitiva* dicitur, quæ datur in ipso corpore lucido seu tali, quod ex natura sua lumen emittit, qualia corpora sunt flamma, ac omnia corpora ignita, maxime Sol. Lux *derivativa* nuncupatur, quæ per medium propagata visus organum afficit, & corpora reddit conspicua; atque hæc proprie vocatur *Lumen*. Quæritur, quæ utriusque sit natura.

§. I.

SENTENTIÆ ALIORUM.

164. **P**Ropositio I. Lumen non est accidens, aut qualitas absoluta, a corpore lucido producta, & propagata per medium diaphanum, ut volebat Peripatus. Neque enim ulla est necessitas qualitatis distinctæ, neque ea etiam admissa est ratio, cur qualitas, cujus natura foret, posse compenetrari cum corporibus, propagetur duntaxat per corpora diaphana, non item per opaca; cur reflectatur etiam a diaphanis v. g. aqua, vitro &c.

tur refringatur, cogaturque ad perpendicularum, vel ab illo detorqueatur. Certe sola propagatio, reflexio, & refraſtio luminis ostendunt, ipsum non qualitatem, sed corpus, seu materiam esse.

165. Propositio II. Lumen non consistit in effluvio substantiali particularum ignearum, a corpore lucido emissarum, ut vult Gassendus, & Newtonus. Nam 1. candela de nocte ardens ex edito loco illuminat spatium sphaericum, cujus diameter unius saltem milliaris germanici est: igitur ex modicissima ceræ particula unico minuto secundo deberent diffundi tot milliones igniculorum sensibilium, quot puncta sensibilia spatium hoc tam amplum complectitur. Hoc autem cui aut perceptibile, aut etiam possibile videatur maxime, si eadem candela sæpius extinguatur, moxque iterum accendatur? 2. Quod si etiam ea ponatur esse particularum a corpore lucido emissarum subtilitas, ac raritas, quam isthæc opinio requireret, quis capiet illam luminis propagati celeritatem, qua juxta calculum Muschenbroeckii (Elem. Phys. c. 28.) intra unum minutum secundum emetiatur spatium plusquam 90000000. pedum? Aut si tanta sit radii, ac fasciculi luminosi celeritas, quantæ demum erunt illius vires, quæ sunt proportionatæ massæ ac celeritati, aut juxta multos massæ, ac quadrato celeritatis? 3. Cur sublato corpore lucido non saltem per aliquod tempus in cubiculo antea illuminato remanet lumen, quemadmodum manet odor diutius sublato etiam corpore odorifero, si sicut odor, ita etiam lumen habeatur per effluviū corpusculorum? 4. Cur, si corpus lucidum in eodem loco diutius persistat, non hoc ipso jam intensius identidem evadit lumen, quemadmodum id denuo fit in odore? Nonne enim corpus lucidum nova identidem corpuscula ignea emittit?

166. Dices. Qui diutius solem, aut corpus aliud intensius illuminatum aspexit, averſis etiam oculis videbit lumen quoddam splendidius: ergo sublato corpore lucido remanet lumen. 2. Lumen calefacit, & accendit, saltem si radii per vitra, aut specula caustica colligantur in focum: ergo lumen est materia ignea. R. C. A. N. Cons. Ratio hujus est, quia, dum intensior est aspectus lucidi, aut corporis illuminati, retina fortius concitatur: hinc sicuti in chorda vehementius vibrata, sic etiam in fibrillis retinæ, sublato corpore lucido, perseverare ad
huc

huc possunt vibrationes aliquæ, per quas anima ad visionem priori similem determinatur. Eadem ratio est, cur, qui orbiculos fenestrarum fixiori obtutu aspexerat, averso postmodum vultu eosdem videre sibi quandoque videatur. Ad 2. C. A. Dist. Cons. Ergo lumen est materia ignea, ex ipso corpore lucido recens emissa, N. C. Est materia ignea, per omnia universi spatia copiosissime diffusa, C. Cons. Dictum in *Physica Generali Dissert. Secunda*, Art. II. N. 47. materiam luminis quoad substantiam nil differre a materia ignis; at ex eo inferri non potest, quod materia hæc tunc primum e corpore lucido emittatur, dum illud incipit lucere: materiam enim hanc ubique existere, etiam ubi nullum adesse videtur corpus lucidum, tum experimenta electrica, tum alia per decursum partim jam indicata, partim adhuc afferenda mihi quidem satis ostendunt.

167. *Propositio III.* Lumen non consistit in solo nisu, sive conatu circumambientis fluidi ad recedendum a centro corporis lucidi, ut volebat Carthesius. Per hunc enim nisum explicari nequit reflexio luminis, cum & experientia, & ratio ostendant, corpus etiam elasticum superficiei elasticæ applicatum non reflecti, quantumvis valide eam superficiem premat, ac nisum versus illam exerat vehementem. Præterea solus conatus ad tremulum motum concipiendum non sufficit in aere ad audendum sonum: ergo a pari.

§. II.

SENTENTIA NOSTRA.

168. *Propositio I.* Lux primitiva consistit in concitato, ac celerrimo motu vibratorio partium minimarum corporis lucidi. Probatur. In eo rite constituitur lux primitiva, quod cum ipsa luce semper conjunctum est, a quo lux ipsa ita dependet, ut illo posito habeatur lux, eo sublato lux quoque pereat, & quod est omnino proportionatum ad causanda lucis phænomena: Atqui hoc est concitatus, ac celerrimus motus vibratorius partium minimarum corporis lucidi: ergo. Minor probatur. 1. Nullum, de quo haberi experientia potest, est corpus lucidum, cujus partes subtilissimæ motu concitatissimo non agitentur; patet id profecto in flamma, carbone accenso,

aut ferro candente, in quibus vehemens partium motus ipsis etiam oculis est conspicuus, & colligitur etiam ex illa ebullitione, quæ in aqua exoritur, dum ignita illi corpora immerguntur: igitur lucem, quantum experientia constat, semper comitatur motus. 2. Corpora plurima mox lucere incipiunt, ut primum subtiliores eorum partes concitatum, celerrimumque motum concipiunt, sive dein is a calore, attritione, percussione, frictione, sive alia a causa fit excitatus. Sic Adamas omnis, atque frustra Sacchari mutuo affricta lumen copiosum spargunt; baculus quoque ligneus probe siccatus accedente frictione lucidas undique virgas emittit. Id ipsum ostendit dorsum felis, aut equi collum adversa manu in loco tenebricoso affrictum. Ubi autem motus iste cessat, etiam corpora lucere desinunt: flamma enim extinguitur, dum inflammatum corpus comprimitur; lux in carbone perit, dum aquæ immergitur, baculus, aut tubus electricus cessante affrictu lucem amittit: patet itaque, quantum a motu lux ipsa dependeat. 3. Quod vero hujusmodi motus proportionatus omnino sit ad efficienda lucis phænomena, ex mox dicendis apparebit. Atque hinc inferri utique jure poterit, Solis quoque corporis lucidissimi partes continuo, eoque concitatissimo motu agitari, eoquod motus iste omni corpori ignito, quale etiam Sol est, communis sit, etsi nemo facile genuinam motus hujus originem vel in sole, vel in alio quocunque corpore ignito diludice adeo sit ostensurus, ut intellectus noster plane sibi satisfactum credat.

169. Propositio II. Lux derivativa, seu lumen consistit in celerrimo ac vibratorio motu, & pressione rectilinea materiæ æthereæ, quæ a partibus corporis lucidi versus oculum impulsæ retinam vivacissime afficiat. Lumen namque vel est substantia quædam a corpore lucido emissa, vel qualitas, vel nifus, ac conatus materiæ fluidæ ad recedendum a centro, vel denique motus aliqujus materiæ aptæ ad efficiendas eas impressiones in organo, quas visionis sensatio consequatur; cum ergo ex primis tribus nullum dici queat, dicendum, quod sit motus materiæ cujusdam subtilissimæ, isque 1. *celerrimus*, eoquod juxta multorum calculos lumen sexcentis millies velocius propagetur, quam sonus; 2. *rectilineus*: si enim duo foramina in cubiculo obscuro directe sibi opposita statuantur, & uni admoveatur candela, hujus lumen
per

per foramen alterum exibat lucidæ ad instar lineæ, non illuminatis cæteris cubiculi partibus; 3. *vibratorius*; quia per motum alium haberi tam convenienter nequit isthæc celeritas, ac rectitudo radiorum luminis propagati.

170. Propositio hæc plurimum illustratur maxima illa, quæ sonum inter & lumen datur, analogia: nam 1. sicut tremor corporis sonori concutit aerem, hic ita vibratus afficit organum auditus; ita rapidissimus corporis lucidi motus impellit materiam ætheream, quæ ita impulsæ impressionem in retina efficit, quam percipiens anima visionem elicit. 2. Sicut sonus, ita & lumen decrescit in ratione quadrata inversa distantiarum. 3. Sicut plures soni simul concurrentes se se non perturbant, ita nec plures radii luminis. 4. Sicut sonus ab obice reflectitur, sic etiam lumen. 5. Sicut diversitas sonorum a diversitate vibrationum, motuumque in organo auditus, sic omnia, quæ ad colores pertinent, explicantur per solam diversitatem motuum a substantia æthereæ retinæ impressorum. 6. Sicut sonus intensior minorem absorbet, ac nimium vehemens organum lædit, ita lumen solis quasi obruit lumen candelæ, nimisque copiosum vitiat oculos &c. Nempe sicut ad hoc, ut objecta etiam remotiora percipi auditu possent, providit DEus de tali medio, quod latius diffusum accedente motu debito auditionis sensationem causare posset, id quod jam vix ullus negaverit; sic etiam oculo, ut objecta remotissima videri, atque ex iis Conditoris potentia, ac sapientia possent agnosci, providisse censendus est de tali medio, quod ubique diffusum accedente motu debito ad visionis sensationem concurreret. Aliud est de Olfactu v. g. ad quem, cum ad exigua se se spatia porrigat, effluvia sufficiunt; at vero ad visum, qui ad sidera usque protenditur, haud video, num ulla sufficere effluvia possent.

171. Ob. I. In hac sententia explicari nequit ortus luminis. Prob. Multa corpora lucere incipiunt absque ullo partium suarum motu, ut patet in Phosphoris compluribus. R. N. A. Idem cum proportionem est ortus luminis, qui est soni; sicut enim partes corporis sonori ad motum tremulum concitatæ ambientem aerem simili tremore concutiunt, ita dum subtiliores corporis lucidi partes motu concitatissimo agitantur, vicinas sibi materie subtilis particulas undique vibrant; vibratio hæc ad alias,

aliasque particulas propagatur, ab his ad oculum, & ipsam denique retinam, in quam impulsæ particulæ debitam in ea impressionem efficiunt; cessantibus dein vibrationibus particularum materiæ subtilis sensatio lucis, ac visio pariter cessat. Hinc ad prob. N. A. Phosphori, seu illa corpora, quæ lumen quoddam non aliunde acceptum, sed ex se ipsis quasi effundunt, id sine motu non præstant. Sunt autem Phosphori alii naturales, qui non primum industria hominum parari debent, alii artificiales, qui per artem parantur.

172. Sic 1. ligna quædam putrida per tenebras lumen aliquod spargunt; quia fermentatio, partium ruptio, aut potius corruptio, qualis in putredine datur, sine motu partium minimarum perfici non potest. In recipiente exhausto minus lucent, quia deest aer, qui corruptionem hand parum promovet. 2. In cicindelis, lampyridibus, aliisque animalculis noctu lucentibus notatur liquor aliquis ventre conclusus, cujus motum reciprocum oculis etiam microscopio armatis observari posse testatur Sturmius; eo motu concitari materia ætherea, & oculus, dum abest lux solis vivacior, ab illa affici sat commode potest. Idem est de ostreis Anconitanis, quæ comestæ, aut contrectatæ dentibus, ac manui tenue lumen aspergunt; aut de scarrabæis quibusdam Americanis, ex quibus expressus humor corpus, quod illo inungitur, non nihil lucidum efficit. Viscosus nimirum in his datur humor, multo æthere permixtus, qui in eo intestina fermentatione agitato causare lumen poterit. 3. Aqua marina remis pulsata, imo & linteamina in mari lota, ac postea vehementius quassata de nocte lucent, coelo etiam nubibus obfecto, ut proin lux illa a reflexione provenire nequeat. Dicendum igitur, sales marinos vehementius ejectos motum aliquem communicare ætheri, sicque lumen causare, quod ex eo fit verosimilius, quia teste P. Regnault minus observari luminis solet in illis Oceani partibus, in quibus minor est aquæ salis copia. Sunt, qui lumen per ampliorem maris tractum observari quandoque solitum adscribant insectis quibusdam lampyridum instar lucentibus.

173. Phosphori artificiales varii sunt. In multis copiosos latere igniculos, tum ex eorum confectione, tum etiam ex eo liquet, quod extra aquam relictæ materiam igni concipiendo aptam accendant. Alii sunt tubuli vi-

trei

trei, extracto aere hermetice clausi, inclusa iisdem, si lube, modica portione Mercurii; isti dum fricantur, aut dum portio Mercurii in iis agitur, pariter lucem aliquam spargunt. Extracto nimirum aere materia æthereæ vel frictione, vel succussione mercurii liberius agitari, ac tremulo motu concitata hunc ipsum particulis exterioribus communicare potest. In Barometris vero phosphorescentibus, dum succutiuntur, per motum mercurii materia subtilis in superiori tubuli parte existens per poros vitri expellitur, inque exteriorem impacta motum eidem communicare debet. Quod lapis Bononiensis probe calcinatus, ac soli tantisper expositus, si in locum obscurum reponatur, aliquamdiu luceat, ratio erit, vel quia particulæ æthereæ a radiis solaribus in lapidis poros ingenti numero intrusæ igniculos alios in lapide latentes ad motum concitant, vel quia per ipsam calcinationem structura lapidis ita immutata est, ut partes ipsius subtiliores facilius tremere; sicque motu suo materiam ætheream concitare, ac tenue quoddam lumen efficere possint. Cæterum qualiscunque hic assumatur de luce sententia, motus aliquis, aut nifus, proin etiam causa illius dari debet, quæ quamvis adeo perspecta non sit, eam tamen dari, satis certum est.

174. Ob. II. Non potest explicari propagatio luminis. Prob. Lumen propagatur in instanti: stella enim eo momento, quo oritur, etiam cernitur: atqui hoc in motu est impossibile, utpote qui supponit plura instantia. R. N. A. ad prob. Dist. M. propagatur in instanti prorsus indivisibili, N. M. in instanti sensibili, Om. M. Instantans sensibile prope infinita complectitur instantia minora, & celeritas motus vibratorii potest esse tanta, ut propagatio illius per spatium etiam ingens sensui appareat momentanea, id quod aliquo modo patere potest in globulis elasticis continua serie juxta se positis, quorum dum impellitur primus, mox repellitur ultimus, ut proin nulla sit paritas inter motum vibrationis, & motum translationis.

Quanta autem sit celeritas, qua lumen propagatur, haud sane constat. Equidem Roemerus, & cum ipso Anglorum aliqui emerfiones satellitum Jovis in perigeo aliquot minutis citius, quam in apogeo se observasse testantur, & ex eo institutis rite calculis volunt inferre, lumen non nisi intra 7. aut 8. minuta prima a sole ad

terram usque pertingere. Alii tamen, & inter eos etiam Cassinus, qui antea cum Rœmero senserat, mutata mente existimant, calculum istum, & illud, cui innititur, fundamentum haud adeo firmum esse eo maxime ex capite, quod non detur debita proportio inter emerfiones remotiorum etiam Jovis satellitum. Assumpta nihilominus ea celeritate, qua lumen intra octo minuta prima a sole ad terram pertingat, sequitur, lumen intra unum minutum secundum ultra 38377. milliaria germanica conficere; ut adeo saltem sexcenties millies velocius propagetur, quam sonus.

175. Dices 1. Fieri non potest, ut minima candelæ flamma totum ætherem in omnem sphaeram diffusum impellat, atque ad motum concitet; undenam enim tam modicæ flammæ tanta vis? R. Nego suppositum, quod flamma debeat ipsa immediate impellere totum ætherem; multo minus debet illum propellere motu translative. Flamma impellit illam ætheris superficiem, quæ ipsam proximè ambit; hæc ita impulsæ alteram sibi contiguam, ista tertiam, & sic deinceps. Ex quo ipso potest intelligi ratio, sub qua decrescit intensio luminis; decrescit nimirum ea proportionem, qua crescunt superficies sphaericæ ætheris, corpus lucidum tanquam centrum ambientis, prout de sono dictum Num. 67. Hinc etiam habetur ratio, cur, qui Myopes sunt, ad lumen etiam debilius legere characteres queant, quos ad idem lumen Presbytæ haud satis possent discernere: cum enim Myopes objectum propius admoveere oculo debeant, lumen a charta reflexum in tam modica distantia adhuc satis efficax erit, quod in majore distantia, ad quam removeere objectum Presbytæ debent, jam valde est debilitatum.

176. Dices 2. Flamma candelæ exiguæ ne quidem habet motum sensibilem, saltem in omnem partem; ergo non habet sufficientem vim etiam ad primam tantum ætheris superficiem sphaericam impellendam. Antecedens ex eo videtur constare, quod calor talis candelæ admoto inferius vel ad latera digito vix sentiat. 2. Neque carbones igniti sensibilem habent motum; alias pulvisculos cinerum sibi incumbentium excuterent. R. Diff. A. flamma candelæ non habet in omnem partem motum sensibilem translationis, proprium calori, Tr. A. vibrationis, qui proprius est lumini, N. A. Licet calor flam-
mæ

mæ hujusmodi in longius spatium non propagetur deorsum, aut ad latera, potest tamen lumen ab ipsa in omnem partem etiam longius propagari; quia in alio motu lumen, in alio calor consistit, hic in agitatione perturbata igniculorum, illud in motu duntaxat vibratorio: hinc cum igniculi fortius duntaxat agitentur in materia ipsius flammæ, & in ea, quæ identidem ex flamma sursum pellitur, calor supra flammam erit intensior, quam ad latera, aut infra illam; vibrationes autem illæ, quæ lumen efficiunt, ætheri circumambienti ubique possunt communicari, debilius quidem infra flammam, quia ibi adhuc sunt satis crassæ particulæ olei, aut ceræ, fortius in medio, ubi eadem particulæ jam magis sunt solutæ, maxime autem circa apicem flammæ, ubi igniculi jam liberiores tum in partes heterogeneas, tum in ambientem ætherem motu reciproco efficacius agunt. Adde, quod sensus Visus multo sit subtilior, quam Tactus. Ad 2. redit eadem ferme responsio. Cum sensibile dicamus, quidquid sensus alicujus organum afficere, atque ita animam ad perceptionem factæ in organo impressionis determinare potest, patet carbones ignitos hoc sensu habere sensibilem motum vibrationis, cum hic organum visus afficiat, etsi oculus discernere utique non possit vibrationes illas celerrimas ac subtilissimas, quæ particulæ igneæ in carbone concitantur, sicut iidem carbones habent sensibilem motum translationis seu agitationem igniculorum, quæ in calore manu percipitur, quamvis etiam hanc agitationem oculus non discernat. Cum autem perturbatus ille igniculorum motus pulvisculos cinereos amovere non possit, multo minus amovebit illos motus vibratorius, quemadmodum etiam motus vibratorius aeris, in quo sonus consistit, sensibilem motum translationis ordinarie non causat in iis, in quæ impingit.

177. Dices 3. Si candela ardens reponatur sub laterna vitreis instructa parietibus, flamma illius apparet major, & in longius spatium conspici potest, quam si arderet in aere libero: hoc in sententia nostra fieri non posset: motus enim a candelæ flamma causatus per ipsa vitri latera deberet non nihil debilitari. R. N. min. Si vitrum, per quod tralucet flamma, sit convexum, ex Num. 155. facile potest intelligi, cur flamma appareat major, propter refractionem nimirum, quam patiuntur radii in transitu per vitrum. Si autem vitrum sit planum, præ-

præcipue si sit melioris notæ probe diaphanum, magnitudo apparens ipsius flammæ non multum augetur, hæc ipsa plus augetur, si vitrum sit subobscurum, quia tunc inordinata est refractio, & multiplex per particulas heterogeneas reflexio. Nihilominus in utroque casu flamma hæc procul spectantibus videtur multo major, quia ipsa latera lucernæ tum ea, quæ ante, tum, quæ post & circa flammam sunt, vivacissime illuminata unum quodammodo cum ipsa flamma corpus lucidum efficiunt. Et hæc ipsa est ratio, cur in longius spatium candela sic ardens conspiciatur, non, quod lumen flammæ in aere libero non sit magis efficax, quam conclusæ sub laterna, sed quod angulus opticus, sub quo flamma libera in distantia majore videri deberet, sit nimium exilis, angulus autem, sub quo complexum ex flamma, & lateribus lucernæ vivacissime illuminatis conspicitur, in majore etiam distantia tamen adhuc maneat sat notabilis.

178. Ob. III. Non potest explicari directio luminis. Prob. Lumen a corpore lucido in orbem propagatur per lineas rectas, a puncto radiante velut centro ad superficiem sphaeræ ductas: hoc explicari non potest. R. N. A. ad prob. N. min. Inprimis propagatio luminis est tantum ad sensum rectilinea: plus enim ab experientia non probatur. Dein id ipsum, quod de lumine hic opponitur, explicare omnes debent in propagatione soni, quæ pariter ad sensum rectilinea est. Ratio hujus propagationis desumi debet tum ex impulsibus a corpore lucido causatis, tum a summa celeritate motus vibratorii, tum etiam a circumambientibus undique radiis æquali vi impulsis. Et impulsus quidem fiunt a corpore lucido tanquam centro versus peripheriam, qui unice in rectum tendunt. Celeritas est maxima; quo velocior autem est motus, eo minus a recta declinat, minusque ad latera se diffundit, quamvis lenta motio facile divergat, seque expandat, quod in ipso etiam motu translationis advertimus. Sic, ut observat P. Castell, globus sclopeto excussus vexillum ferreum turris vertici impositum sine ulla ipsius concussione transfodit, & unico velociori ictu caput papaveris amputatur caudice penitus immoto. Denique licet concipi nequeat, quomodo pro singulis radiis luminosis dari possint singulæ lineæ rectæ globulorum ætheris ita se se contingentium, ut omnes valeant
cen-

centraliter percuti, quia tamen singuli luminis radii sunt inter alios æqualium virium radios medii, non poterunt a via recta, juxta quam primo impelluntur, deflectere. Cur autem radius in cubiculum obscurum eo, quo Num. 169. dictum est, modo immissus a recta non declinet, ratio potissimum ex celeritate pulsuum desumenda erit. Falsum quoque est, quod radius sonorus per ejusmodi foramen immissus in omnem partem diffundatur: quod enim sonus in cubiculo hoc ubique audiatur, ratio est, quia sonus etiam per asseres, parietes, aliaque corpora solida propagatur, & licet per hæc non propagaretur, tamen sonus per foramen immissus ob multiplicem reflexionem pervenire ad aures deberet.

179. Dices 1. Quando globulus aliquis æthereus impellitur, & comprimitur versus axem suum, simul etiam in polis suis extenditur: ergo etiam globulos polis suis proximos impellet, & comprimet, hi iterum alios, & sic pressio in omnem partem propagabitur, ut ex dictis Phys. Generalis Dissert. II. Art. V. §. 7. potest intelligi. R. Dist. cons. Ergo etiam globulos polis suis proximos impellet, & comprimet tanta vi, quanta ipse impulsus alios in directum positos impellit, & comprimit, N. C. vi multo minore, C. C. Globulus iste impellitur, & in directum positos impellit ea vi, qua vibrantur partes ipsius corporis lucidi; globuli vero laterales solum impelluntur ob expansionem eorum, qui recta impelluntur; expansio autem versus quemlibet polum non est tanta, quantus est impulsus, & compressio directe positorum versus axem suum; hinc licet ætherei globuli in cubiculo obscuro, vel nocturno etiam tempore impellantur versus oculum, impulsus tamen ille minus efficax est, quam ut sufficiat ad oculum debito modo afficiendum, etsi fors sufficiat iis animalibus, quæ teneriore retina, & pupilla ampliore prædita sunt.

180. Dices 2. Aer, & aqua non possunt recta moveri in longius spatium, quin brevi ad latera diffuant, ut patet in natatu piscium, & volatu avium: ergo neque aer recta moveri diu poterit. R. Trans. A. quia si de motu vibratorio loquatur, falsum illud de aere esse, patet ex sono, N. Cons. Disparitas est, quia ibi datur motus translationis, quo corpus aliquod in tali medio ex uno loco deferitur in alium; hic vero datur motus vibratorius. Cæterum corpuscula illa heterogenea, quibus atmos-

sphæ-

sphæra nostra referta semper est, ob refractiones innumeras in ipsis factas impediunt quidem, ne propagatio luminis sit perfectissime rectilinea, sinunt tamen illam esse sensibilibiter rectam. Quodsi corpuscula heterogenea nimis copiosa, nimiumque densa forent, omnem luci transitum negarent, ut apparet in nubibus quandoque valde tetris, ac nigris; diem tamen istæ nobis eripere non possunt, quia lumen varie refractum, & reflexum ad nos pertingit. Ventus quoque, qui in motu translato aëris consistit, nihil obesse potest motui vibratorio, & celerrimo subtilissimi ætheris, qui per poros aëris ubique diffusus, eosque liberrime permeans non eo ipso loco suo movetur, dum movetur aer.

181. Ob. IV. Non potest explicari propagatio luminis tam ordinata, quam ordinatam illam esse experientia ostendit. Prob. Per quodlibet aëris punctum eodem instanti transeunt radii innumeri, ac diversissimi, & quidem sine perturbatione notabili: hoc in nostra sententia foret impossibile. Major constat ex eo, quod oculus pro diverso situ ex eodem puncto aëris videre possit integrum vix non hemisphærium stellis constitum. Minor probatur. Radii luminis juxta nos essent certæ vibrationes materiæ subtilis: atqui innumeræ, æque diversissimæ vibrationes non possunt in eodem instanti propagari per idem punctum aëris: tanta enim motuum diversitas deberet asserre meram confusionem. Difficultatem huic non multum ab similem vidimus in materia de sono N. 68. hinc in isto retorqueri argumentum manifesto potest. R. N. A. ad prob. D. M. Per quodlibet aëris punctum sensibile, & in eodem instanti sensibili transeunt radii innumeri, ac diversissimi, C. M. Per quodlibet punctum minimum, & in eodem instanti minimo, N. M.

Tria hic potissimum sunt observanda. 1. Instans sensibile, ut alias dictum, dividi posse in multa millia instantium insensibilium: hinc eadem particula ætheris in eodem instanti sensibili recipere potest impressiones innumeras, ac diversissimas. 2. Eandem particulam ætheris non posse quidem motu locali moveri simul ad diversas plagas, posse tamen simul recipere diversas impressiones, ac vibrationes, easque particulis sibi proximis secundum propriam cujuslibet directionem ulterius communicare, per quas diversæ partes retinæ afficiantur sine notabili confusione; & quoniam in quolibet sensibili puncto aëris

in-

Innumeræ sunt particulæ ætheris, & radii singuli seorsum sumpti non agunt sphærice, opus haud est, ut singulis his particulis nimis multæ communicentur impressiones diversæ. 3. Ad visionem ordinatam non esse necessarium, ut radius e corporis visibilis puncto egrediens sine omni prorsus interruptione etiam insensibili in retinam agat, ut patet in radio sonoro, atque etiam in circulo illo, qui titione celeriter rotato apparet: hinc licet in concursu plurium, ac diversorum radiorum per instans insensibile daretur aliqua interruptio, visio tamen propterea non fieret perturbata. His simul sumptis mitigari aliquantum hæc difficultas poterit, quam nemo facile omnem illico complanaverit, siue lumen dicat esse qualitatem, siue effluvium, seu quidcunque demum.

182. Dices 1. Ut visio sit ordinata, a quolibet objecti puncto aliqui saltem radii pupillam ingredi debent: hoc fieri non potest: pupilla enim angustior est, quam ut simul admittere possit tot radios, quot puncta sunt in objecto. R. Om. M. N. min. & suppositum, quod pupillam ingredi debeant tot radii distincti, quot sunt puncta in objecto distincta, eoquod unus, idemque globulus materiæ ætheræ in pupilla existens transmittere in fundum oculi possit impressiones a punctis pluribus provenientes: cum enim ab uno globulo lineæ duci possint ad omnia puncta, objecti, globulus ille relationem habet ad puncta objecti plurima. Nempe radii ex objecto toto emissi versus oculum efficiunt conum, aut pyramidem quamdam luminosam, cujus basis est in superficie objecti, apex in pupilla: cum ergo globuli, qui sunt in apice, relationem habeant ad omnes illos, qui in basi existunt, poterunt etiam ab omnibus istis impressiones recipere, atque ad fundum oculi transmittere.

183. Dices 2. Omnes radii pupillam ingressi ibidem decussari debent: ergo visio tamen ordinata esse non potest. R. Dist. Conf. Nisi post decussationem radius quilibet secundum directionem suam ulterius pergeret ad retinam, C. C. si pergat, N. C. In pupilla quidem decussantur radii, atque hoc sensu inter se confunduntur; at facta decussatione pergunt ea directione, quæ respondet primo impulsui, ac refractioni ab humoribus oculi causatæ. Et quamvis penicilli optici re ipsa non simul pertingerent ad retinam in uno eodemque instanti minimo, ad sensum tamen simul videbitur totum objectum, ut

de-

denuo apparet in memorato circulo igneo. Denique licet objectum etiam majus simul videamus distincte ita, ut illud ab aliis discernere possimus, tamen non videmus ita distincte, ut partes ipsius minores uno obtutu ab invicem discernamus, quemadmodum patet inspicienti librum apertum, cujus tamen ratio non est decussatio radiorum in pupilla, sed, quod radii, qui majorem angulum cum axe oculi efficiunt, atque ita in extremas humoris crystallini partes incidunt, non ita coeant in focum, sicut illi, qui sub minore angulo cum axe oculi magis directe incidunt; tum etiam, quod ipsa retina in eo spatio, quod axem oculi propius ambit, magis sit disposita ad impressiones luminis recipiendas, quam in partibus ab eodem axe remioribus.

184. Ob. V. Non potest explicari, per quid, & quomodo habeatur intensio luminis. R. Sicut soni, ita & luminis intensio habetur per hoc, quod vel plures particulae in determinato spatio, vel fortius vibrentur; remissio autem ut soni, ita luminis oritur ex eo, quod vel pauciores particulae in determinato spatio, vel debilius vibrentur. Ratio est, quia sic vel magis vel minus fortiter impellitur visus organum, proin vividior, vel minus vivida sensatio elicitur. Hinc est, quod, dum radii colliguntur in focum, valde intensum in eo cernatur lumen, quia nimirum plurium radiorum impulsus per refractionem diriguntur versus idem punctum, atque ita, in uno, eoque angustiore spatio conveniunt, sicque particulas ætheris ibi existentes fortius impellunt. Si quæras, quodnam corpus lucidum producat lumen intensius? R. Cæteris paribus illud, quod est majus altero: major enim flamma, vel plures minores in unam conjunctæ, lucent intensius; quia major flamma fortius impellit ætherem, vel etiam plures illius particulas in determinato spatio. Si duæ candelæ non conjunctæ imponantur mensæ, magis illuminabunt eas mensæ partes, ad quas utriusque lumen pertingit; quælibet tamen umbram aliquam projicit, quia potissimæ partes mensæ dupliciter illuminatæ faciunt, ut eæ partes, quas ob interpositum cereum, aut candelabrum alterutra candela non illuminat, appareant obscuriores. Si in cubiculi alias obscuri planum immittatur lumen per duo foramina ita, ut post aliquod spatium disci radiosi mutuo se interfecent, & uterque discus in spatio aliquantulum a puncto intersectionis

nis remoto concipiatur charta, erit commune segmentum, seu spatium ab utroque disco illuminatum extrema sui parte utriusque non nihil obscurius, quæ obscuritas dispareret, quando lumen per unicum tantum foramen immititur. Scilicet spatium minus illuminatum, si comparatur cum spatio magis illuminato, apparet obscurum: hinc extremitates illæ, quæ commune segmentum utriusque terminant, cum sint ab uno tantum disco illuminatæ, & proximæ spatio a duobus discis illuminato, apparent minus lucidæ; quodsi removeatur, vel impediatur discorum unus, omnia erunt æqualiter illuminata, nec amplius apparebit prior obscuritas.

185. Ob. VI. Non datur materia illa ætherea ubique diffusa, in cuius motu vibratorio lumen reponimus: ergo sententia nostra falso laborat supposito. Prob. Ant. Neque in spatiis cœlestibus, quæ sunt supra regiones aeris, neque in ipso aere talis materia dari potest. Non in spatiis cœlestibus; alias motus astrorum deberent impediri, ac retardari: materia enim isthæc undique diffusa deberet removeri, quia impenetrabilis; huic autem remotioni resistens motum astrorum non secus, quam aqua, & aer motum corporum in se retardaret. Sed neque in aere nostro dari hæc materia potest; non in poris: isti enim tam ampli non sunt, ut molecule materiæ subtilis in eos se possint recipere; aut si tam ampli sunt, aer erit corpus rarius, quam sit ipsa materia subtilis. Nec materia isthæc inter ipsas aeris moleculas, seu in spatiis inter illas interceptis potest contineri: cum enim sit fluidum specificè levius, ab aere sursum pelli deberet. R. 1. Dari materiam fluidam, omni aere subtiliorem, eamque dari in ipso aere, si quis negat, negare etiam debet elementum ignis, & ea, quæ de igne, & calore nunc ferme recepta ab omnibus sunt; de electricitate nihil vel verosimile dici poterit; principium gravitatis, ac elasticitatis ne quidem esse extrinsecum posset &c.

186. R. 2. Igitur lumen neque est qualitas, neque effluvium, neque motus aut nisus qualiscunque: quid ergo demum erit? Non qualitas: qualitas enim materialis, siqua existeret, existere non posset nisi in subiecto materiali: ubicunque igitur daretur hæc qualitas, dari etiam deberet materia. Cum ergo lumen per omnia universi spatia a sole, & astris diffusum ubique detur, in spatiis hisce omnibus ubique dabitur etiam qualitas, sed qua-

litas in subjecto, in materia: ergo etiam ubique dabitur materia. Qualis jam isthæc materia? an fluida, an solida? rara, an densa? quantumcunque fluidam, raram, ac subtilem illam statuerint, aliud non erit, quam, quod nos ætherem, aut materiam subtilem nominamus.

Sed neque effluvium aliquod esse lumen poterit: ut enim nihil dicam 1. de celeritate illa plane incomprehensibili, qua particulæ molis modicissimæ a satellitibus Jovis, aut Saturni post emersionem illorum deberent ad nos motu translatoivo reflecti; neque 2. de atmosphæra quorundam planetarum, per quam velocissima hæc reflexio hebetari, si non impediri deberet; nec 3. de concursu plurium radiorum, in quo explicando, si radii omnes motu translatoivo propagentur, difficultas de se maxima sit inextricabilis; 4. nihil de eo, utrum non per tot sæcula substantia corporis lucidi multum imminui, atque ita vis etiam attractiva, quam hi Newtoniani statuunt, decrescere, sicque motus planetarum immutari debuerint, de qua imminutione corporis lucidi legi meretur Cl. Eulerus in Nova Theoria Lucis c. 1. §. 17. Nihil denique de iis, quæ supra N. 165. contra hanc sententiam sunt indicata, sola illa difficultas, quæ ex motu astrorum hic petitur, hanc de effluvio opinionem æque, aut magis, ac nostram premit: ubicunque enim datur lumen, dari etiam debet istud effluvium: cum ergo lumen per universa cæli spatia ubique detur, per quæ nimirum Planetæ moveri deberent, per eadem spatia etiam dabitur effluvium materiæ, & quidem materiæ non ubique in æquilibrio constitutæ, sed celeritate incredibili ab omni corpore lucido versus cujuslibet peripheriam in omnem partem motu translatoivo propulsæ, ut adeo Planetæ non tantum in materia undique diffusa moveri, sed etiam contra torrentes ejusmodi materiæ motum suum continuare deberent. Quodsi igitur materia ubique in æquilibrio consistens retardare debeat astrorum cursus, quid faciet materia motu ipsis astris contrario eorundem cursui obnitens?

187. Neque dicant, effluvia illa esse rarissima, proin non fore, ut per ea multum retardetur motus astrorum: quantumcunque enim rara illa fuerint, sunt tamen materia impenetrabilis, & motu vehementissimo impingunt in corpora siderea, & quidem directione istorum motui sæpe contraria: liquid ergo valet argumentum hic pro-

positum, non tantum removeri debet ista materia, sed etiam motus illius vel fisti, vel alio averti. Dein quomodo materia ista est rarissima? An hoc modo, quod moleculæ illius, licet sibi ubique sint immediate contiguæ, innumeris tamen sint instructæ porulis? At hoc modo rarissima etiam poterit esse ea, quam nos statuiamus, materia ætherea. An vero hoc modo, quod moleculæ non solum contiguæ sibi non sint, sed innumera, eaque satis ampla intercipient spatia prorsus vacua? Hoc autem qui vel fieri, vel supponi possit, ego quidem non capio: 1. enim deberent spatia ista certa lege, ac constanti ordine se se semper excipere, ut constanter ordinata detur visio; undenam autem constans hic ordo spatiorum? 2. Cum effluvia ista inde ab origine mundi sint, fuerintque continua, cur non spatia isthæc a succedente identidem materia sunt vel repleta penitus, vel saltem angustiora reddita? Aut si non repleta sunt a materia succedente, quorsum devenit materia ante aliquot sæcula jam emissæ? Ad fontem utique suum non redierit: nam quæ causa hujus reditus? 3. Si spatia ab omni materia luminis prorsus vacua sunt, ut volunt, satis ampla, quomodo radii per vitrum causticum haud adeo magnum tamen colligi possunt in focus valde intensum? 4. Si ponerentur etiam ejusmodi spatia penitus vacua, materia tamen luminosa singulis saltem instantibus sensibilibus in ea a corporibus lucidis deberet emitti: igitur singulis instantibus sensibilibus a corpore aliquo fidereo, ut motum suum possit continuare, deberet non tantum removeri, sed etiam a sui motus directione detorqueri: itaque densitatis defectum compensaret superanda motus contrarii resistentia &c.

Ex quibus intelligi posse arbitror, ex ea difficultate, quæ circa motus astrorum hac in materia oritur, peti non posse rationem solidam admittendi potius effluvia Newtoniana, plurimis aliis exceptionibus obnoxia, quam materiam ætheream, cujus existentiam rationes innumera videntur evincere. Et quid, si verum sit, quod observasse se testatur Cl. Eulerus (quemadmodum legere est in *Oblectamenti Physicis Berolinis Parte, seu Membro IV. N. 6. pag. 313.*) videlicet quod observationibus astronomicis, per tria retro sæcula institutis, rite inter se collatis deprehenderit, orbitas Planetarum ob hanc ipsam, ut putat, materiæ luminosæ resistentiam identidem

evaluisse minores ita, ut Planetæ omnes propius continuo, propiusque ad solem accedant, & cum contractas eas propter orbitas suas intra brevius temporis spatium percurrant, annos nunc numeremus prioribus breviores. Videri possunt Euleri Opuscula Varii Argumenti Op. IV. De Perturbatione Motus Planetarum a resistētia Ætheris orta. Sed ut ad ipsum argumentum redeamus.

188. R. 3. N. A. ad prob. iterum N. A. Et, quidem quod attinet primum membrum de motu siderum, cur is sensibilibiter non retardetur, ratio desumenda erit potissimum ex eo, quod materia isthæc sit rarissima, subtilissima, ac fluidissima, ubique in æquilibrio constituta, ad nullum certum locum sive ex se, sive per actionem alterius principii extrinseci determinata, proin uti ad motum, ita etiam ad locum quemcunque omnino indifferens. Ex raritate sequitur, quod massa illius sub determinato volumine rationem habeat exiguam ad massam corporis siderei. Ex subtilitate, quod multum illius materiæ poros etiam corporis possit penetrare. Ex fluiditate, quod sit facillime mobilis. Ex indifferentia ad omnem locum, quod motui non resistat, nisi propter solam suam impenetrabilitatem. Certe quas de resistētia mediorum habemus, experientiæ omnes sunt de talibus mediis, quæ per actionem gravitatis ad determinatum locum continuo urgentur, ut adeo, dum loco movendum est tale medium, ut sit in motu corporis solidi per hoc medium, semper superanda etiam sit actio illius principii, qua ad suum centrum urgetur. Tale quid in materia ætherea non datur. Præterea videmus, quod corpora etiam ad certum locum determinata, & in medio pariter ad certum locum tendente, facillime ad motum concitentur, si directio motus nullo modo, aut non nisi modicissime contraria sit directioni gravitatis; sic globus 200. librarum e fune pendulus per arcum saltem modicum elevari potest ea vi, quæ requiritur ad directe elevandum & sustendendum pondus dimidiæ libræ, etsi in elevatione globi illius jam superanda etiam sit actio gravitatis tum in globum, tum in medium.

189. De altero membro dictum jam est, certum esse, quod in aere nostro detur materia ipso aere longe subtilior: hinc sive per poros, sive per spatia a moleculis aeris intercepta diffusam illam dicamus, perinde

de est, datur tamen. Verum potest illa esse tum in poris, tum in spatiis intermediis: etsi enim molecularum materiam subtilis dicantur esse multo minores, quam sint molecularum aerem, possunt tamen illae relate ad has multo plures habere poros, adeoque esse rariores, quam sint molecularum aerem, quae poros habent ampliores. In spatiis vero intermediis intercipi possunt molecularum materiam subtilis, quia qualiscunque statuatur figura molecularum aerem, esse tamen debet talis, quae fluiditati aeris proportionata sit: igitur molecularum aeris nunquam ita se immediate ex omni parte contingent, ut non relinquant aliqua vacua, a materia subtili occupanda. Si, ut plerique volunt, molecularum aeris sunt quasi filamenta quaedam varie inter se contorta, in istis latere potest plurimum materiam aetheream, quin extrudatur: extrudi enim non potest, nisi filamenta ista arctius comprimantur; huic autem sui compressioni propter ipsam rigiditatem, & nexum partium vehementer resistunt. Non igitur timendum, ne materia ista sursum trudatur ab aere, qui omnem suam vim nitendi deorsum huic ipsi materiam debet, nec plus deorsum premit, quam exigit actio hujus materiam, partes aeris solidas deorsum impellentis, & simul in poros ejusdem ubique se insinuantis.

SECTIO IV.

DE DIAPHANEITATE CORPORUM.

Materia satis intricata haec est, eaque talis, de qua si verosimilia afferantur, contenti esse debebimus. Videamus, quid communius dicant, quidque verosimilius dici posse videatur.

§. I.

PRÆNOTANDA.

190. **N**ot. I. Alias jam dictum, triplicem esse viam, qua lumen propagatur, directam, reflexam, & refractam. De refractione luminis experientia docet, quod, dum lumen ex uno medio in aliud diversae densitatis, v. g. ex aere in vitrum, aut aquam, vel vicissim ex his in aerem, oblique progreditur, illud plerumque

refringatur. Hoc tamen non semper fit: nam si lumen oblique transeat ex oleo olivarum in boracem, aut vicissim, nulla fit refraction, licet densitas olei olivarum ad boracem sit ut 6. ad 11. Sic etiam etsi vitriolum Gedanense, & Alumen sint ejusdem densitatis, tamen si lumen ex hoc in illud oblique transeat, refringitur ad perpendicularum. Eadem ab experientia habetur, quod quando lumen ex medio rariore oblique transit in densius, refraction ordinarie fiat ad perpendicularum, a perpendicularo autem, si ex densiore pergat in rarius. Sed neque hoc semper fit: radius enim ex aqua transiens in Terebinthinam refringitur ad perpendicularum, etsi aquæ densitas sit major, quam Therebinthinæ, nimirum ut 8. ad 7. Præterea quo major est mediorum diversitas, & radiorum incidentium obliquitas, eo etiam major solet esse refraction. Denique constans est ratio sinus anguli inclinationis ad sinum anguli refracti in transitu luminis ex aere in aquam, aut vitrum, & vicissim; nimirum dum lumen ex aere oblique transit in aquam, est ea ratio ut 4. ad 3. Dum vero ex aqua transit in aerem, est ut 3. ad 4. Et dum ex aere transit in vitrum, est ut 3. ad 2. Dum ex vitro transit in aerem, ut 2. ad 3. Hinc apparet, cur directio radii non mutetur, dum is per medium densius terminatum duabus superficiebus parallelis transit; quia quantum in ingressu versus perpendicularum declinat, tantum in egressu in medium rarius ab eodem perpendicularo desleat.

191. Not. 2. De reflexione luminis docet experientia, quod radius in politam superficiem corporis opaci incidens reflectatur ita, ut angulus reflexionis semper sit æqualis angulo incidentiæ. Et hujusmodi reflexio fit etiam a corporibus diaphanis ita, ut refraction semper conjuncta sit cum aliqua reflexione. Sic si vitrum etiam tenue obvertatur soli, semper aliqui radii in oppositam chartam reflectentur: imo etiam aer, corpus maxime diaphanum, interdum lumen reflectit, & ut postea dicetur, quandoque majore in copia, quam corpora alia minus diaphana.

192. Not. 3. Corpus opacum diximus illud, quod lumen transmittere nequit; diaphanum, quod lumen transmittit: igitur diaphaneitas est illa dispositio corporis, qua hoc aptum redditur ad lumen transmittendum. Cum jam lumen in motu vibratorio materiæ subtilis consistat, non

poterit illud per corpora diaphana aliter propagari, nisi pariter per motum vibratorium. Motus autem vibratorius triplici duntaxat modo per corpora diaphana propagari potest. 1. Si motus vibratorius propagetur per solam materiam subtilem, in corporum poris existentem. 2. Si propagetur per solam materiam propriam istorum corporum. 3. Si propagetur partim per materiam propriam, partim per subtilem in poris existentem. Quod propagatio luminis non fiat per solam materiam propriam corporis diaphani, sat certum esse videtur: cum enim in omnium corporum poris ingens sit copia materiæ subtilis, hæcque ad recipiendum motum vibratorium luminis aptissima, vibrationes materiæ propriæ communicatæ non possunt non etiam communicari materiæ subtili tum in extima corporis superficie, tum in poris interioribus esistenti.

Quare propagatio luminis per corpora diaphana fieri debet vel primo, vel tertio modo ita, ut motus vibratorius communicetur vel soli materiæ subtili in poris corporum, quæ diaphana sunt, esistenti, vel simul materiæ subtili in poris esistenti, & materiæ propriæ ad substantiam corporis pertinenti. Hinc est, quod duplex possimum circa diaphaneitatem corporum sententia nunc inter Philosophos agitur; prima hanc corporum dispositionem repetit a poris corporum inter se ut plurimum perfecte communicantibus ita, ut secundum omnem directionem detur series pororum rectilinea; altera dispositionem illam repetit a textura partium elasticarum homogenearum, quæ ita inter se sunt connexæ, ut quemlibet motum, & quamcunque vibrationem recipere, & communicare possint.

193. Utraque sententia ut rite expendatur, de prima certum omnibus esse potest, corpora omnia solida ac liquida, opaca ac diaphana poros habere innumeros, eosque vel sola materia subtili, vel etiam aere, aut aqua repletos. 2. Poros materia subtili occupatos non tantum in partibus corporum interioribus, sed etiam in extima superficie dari, adeoque materiam subtilem exteriorem posse vibrationes suas, si quas habet, communicare cum interna. Quoniam vero hæc corporibus omnibus communia sunt, patet, hæc ad diaphaneitatem non sufficere; alias corpora omnia deberent esse diaphana. 3. Veram esse hanc propositionem conditionatam: si pori ali-

cujus corporis communicant inter se, & rectilineas series secundum omnem directionem constituunt, poterit motus vibratorius, & rectilineus etiam soli materiæ subtili in extrema superficie communicatus per totum corpus propagari secundum omnem directionem. 4. Veram quoque esse hanc propositionem conditionatam: si pori aliqujus corporis vel non communicant inter se, vel series rectilineas non constituunt, non poterit motus vibratorius, & rectilineus soli materiæ subtili in extrema superficie communicatus, & soli huic materiæ communicabilis, propagari per totum corpus. In eadem sententia dubium est 1. An omnia corpora diaphana habeant poros continuos, & serie rectilinea secundum omnem directionem dispositos. 2. An vibrationes materiæ subtilis non etiam debito modo possint communicari particulis materiæ ad substantiam corporis diaphani pertinentis. 3. An his etiam suppositis lumen per corpora diaphana propagari possit eo modo, quo illud propagari videmus, nimirum sæpe cum aliqua refractione, eaque pro diversitate mediorum diversa, & semper cum aliqua reflexione.

194. De altera sententia certum esse potest 1. veram esse hanc propositionem conditionatam: si corpus aliquod elasticitate, & quidem vibrationibus materiæ subtilis proportionata sit præditum, partesque habeat homogeneas, & ita inter se connexas, ut quancunque vibrationem materiæ subtilis recipere, & secundum omnem directionem ulterius propagare possit, tunc poterit motus vibratorius rectilineus extremæ superficiæ communicari, & per totum corpus propagari secundum omnem directionem. 2. Veram quoque esse hanc propositionem: Si corpus vel omni elasticitate careat, vel non habeat sufficienter proportionatam vibrationibus materiæ subtilis, vel non habeat partes quoad elasticitatem homogeneas, aut non debito modo inter se connexas, non poterit motus vibratorius & rectilineus extremæ superficiæ communicari, vel saltem non poterit propagari per totum corpus. De eadem sententia dubium est 1. An omnia corpora diaphana sint elastica, & quidem elasticitate materiæ subtili proportionata? 2. An omnia habeant partes homogeneas. 3. An debito ordine inter se connexas. 4. An lumen non possit nisi unico modo per corpora diaphana propagari, & an debeat semper per omnes

nes illius partes materia tam propria, quam aliena constantes propagari. 5. An his etiam suppositis possit propagari eo modo, quo illud propagari experientia docet.

§. II.

PRIMÆ SENTENTIÆ FUNDAMENTA.

195. **PRIMUM.** Primigeniæ corporum omnium particulæ sunt opacæ: cum enim sint solidissimæ, ac proin poris careant, neque ulla materia luminosa poterit per illas transmitti, neque ipsæ etiam ad motum vibratorium luminis proprium concitari poterunt. Aliud est de particulis non primigeniis, sed jam in moleculas quasdam compactis, de quibus valde probabile est, quod habet Newtonus, minimas videlicet ejusmodi moleculas omnium ferme corporum esse aliquo modo pellucas, id quod a nemine, qui microscopio utatur, in dubium revocari posse, Gravesandius existimat. Jam vero si primigeniæ particulæ sunt opacæ, quia poris carent, moleculæ ex his compositæ, & alia corpora sensibilia diaphana erunt per hoc, quod poris inter particulas primigenias interceptis, & eo modo dispositis prædita sint, prout eæ rectilinea luminis propagatio exigit: quare cum lumen per sensibillum corporum poros propagari non possit, nisi ipsorum pori in directum sint positi, & inter se perfecte communicent, illa tantum corpora censenda erunt esse diaphana, quorum pori inter se perfecte communicant, situmque rectilineum obtinent secundum omnem directionem.

196. **SECUNDUM.** In auro, ut cum Newtono plerique docent, plures dantur pori, quam partes solidæ: cum ergo crySTALLUS octies saltem superetur a gravitate specifica auri, ad minimum octies plus pororum dabitur in crySTALLO, quam partium solidarum; in aqua autem, quæ ferme vigesies levior est auro, vigesies plus pororum dabitur, quam materiæ solidæ. Denique cum aer sit ferme millecuplo levior aqua, etiam millecuplo plus pororum erit in aere, quam in aqua; proin in eodem aere ferme vigesies millies plus pororum dabitur, quam substantiæ solidæ, ac propriæ. His suppositis sic institutū argumentum potest: ex una parte in corporibus, quæ diaphana sunt, certum est dari poros innumeros, atque

incomparabiliter plures, quam sint partes eorundem corporum solidæ; ex altera parte licet poruli isti sint omnino exilissimi adeo, ut ne microscopiis quidem detegi possint, tamen si cum tenuissimis substantiæ solidæ particulis comparentur, sunt his multo ampliores ita quidem, ut aut numerus pororum, aut pori cujuslibet amplitudo in crystallo sit octies, in aqua vigesies major, quam pars crystallo, aut aquæ solida porum ambiens: ergo non adeo difficulter intelligi poterit, quomodo pori, & meatus isti secundum omnem directionem in linea physice recta perfecte inter se communicent, quin series hæc physice rectilinea a partibus solidis interrumpatur.

197. Tertium. Continuum & rectilineam pororum seriem in corporibus diaphanis dari, valde verosimile est, & phænomena diaphaneitatis cum ejusmodi serie pororum perbene congruunt: ergo dicendum, diaphaneitatem re ipsa consistere in continua, & rectilinea pororum serie. Primum membrum ex Num. præcedente colligitur; alterum declaratur per varia, quæ de diaphaneitate occurrunt, phænomena.

I. Laminæ tenuissimæ omnium ferme corporum, ipsius etiam auri, sunt aliquantum diaphanæ; quia in lamina adeo tenui pori facile inter se communicare, & secundum lineam physice rectam possunt esse dispositi; facilius certe id capi posse videtur, quam, quod laminæ hujusmodi particulæ polleant elasticitate, qua caret ipsum corpus ex laminis hisce compositum, quæque sit proportionata elasticitati, & vibrationibus materiæ subtilis.

II. Quo tenuior, magisque polita est vitri lamina, eo magis est diaphana; quia pori in tam modico spatio magis recti, minusque interrupti sunt; eo autem minus diaphanum est vitrum, quo est crassius, & si vitro vitrum opponatur, non nihil opacum redditur, quia, ut ait Gassendus, cum vitrum constet alternis ex corpusculis, porulisque insensibilibus, multi quidem poruli recti in omnem partem patent ad aliquam usque distantiam, si tamen vitrum crassius est, aliqui etiam poruli a corpusculis quasi obturantur, ex quo tandem vitrum speciem quamdam opacitatis induit.

III. Vitrum striatum, vel crassiore arena tritum diaphaneitatem suam maximam partem amittit, sive, multo minus pellucidum est: cum enim superficies talis vitri sit admodum scabra, & inæqualis, radii plurimi disperguntur

tur, & absque ordine reflectuntur; qui vero transeunt, ob inæqualem incidentiam diversas patiuntur refractiones, ut adeo radii non nisi confusi ex omnibus objecti punctis ad oculum possint pertingere, inepti ad ordinatam objecti imaginem in eo depingendam. Quod si scabra superficies imbuatur aqua, majorem denuo diaphaneitatem acquirit vitrum; quia per aquam iterum complanatur superficies, quo facto radii non amplius ita inordinate reflectuntur, & refringuntur. Hinc etiam vitrum ejusmodi si rite poliatur, maximam acquirit diaphaneitatem, quia nimirum etiam per polituram inæqualis superficies tollitur, propter quam ex inæquali incidentia radiorum prius inordinatissima erat eorum reflexio, & refractionis.

IV. Vitrum, crystallus, aliaque corpora diaphana, si minutissime conterantur, opacum pulverem relinquunt; quia, cum pulveris corpuscula irregularis ferme omnia sint figuræ, & inæqualis magnitudinis, nulloque ordine inter se disposita, non ita sibi mutuo respondent, ut interjecta spatiola series rectilineas constituent. Et cum inter isthæc corpuscula plurimum aeris, tanquam medii omnino diverfi, intercipiatur, reflexiones, & refractiones erunt innumeræ, atque inordinatissimæ, ut adeo propagatio luminis rectilinea esse non possit. Eadem est ratio, cur liquores diaphani in spumam agitati diaphaneitatem perdant, tum, quia ordo rectilineus pororum agitatione turbatur, tum & potissimum, quia intra bullulas spumæ plurimum aeris concluditur, sicque multiplicantur superficies reflectentes, & refringentes, ut adeo parum luminis penetrare per spumam queat.

V. Adamas, & alia quædam corpora diaphana, per ignem, & calcinationem amittunt diaphaneitatem, quia pori adamantis, dum aliquanto tempore in carbonibus ignitis jacuit, plurimis implentur halitibus, adeoque communicatio eorum rectilinea plurimum impeditur, atque ipsa etiam materia subtilis in poris latens calore vehementissimo ad motum perturbatum concitata ad recipiendas, & propagandas vibrationes rectilineas minus apta efficitur. Per calcinationem vero nexus plurimarum partium omnino solvitur, pori aliena materia obstruuntur, ac varie distorquentur.

VI. Lumen per vitrum tam trajectum, quam ab eo repercussum, & charta candida exceptum, innumeris pro-

propemodum & exilissimis umbellis, aut nigricantibus punctuatis inspersum apparet teste Gassendo; quia nimirum porulos vitri, per quos lumen transmittitur, ambiunt partes solidæ, quæ lumini transitum negant: hinc lumen trajectum umbellis inspersum videtur. Et quia lumen a porulis non reflectitur, etiam lumen repercussum maculas aliquas exhibebit. Declarat id Auctor exemplo tellæ, quæ habens foraminula alternis intercepta filorum particulis radios in foraminula incidentes transmittit, alios vero, qui in filorum particulas incidunt, reverbant.

VII. Charta plurimum obtinet diaphaneitatis, si aqua vel oleo imbuatur, tum, quia per aquam, & oleum scabrities, quæ in chartæ superficie datur, tollitur, tum, quia liquida isthæc, dum a charta imbibuntur, poros istius dilatant, ut adeo particulæ aquæ aut olei in poris illis receptæ perfectius inter se se communicare, earumque poruli mutuo sibi respondere possint.

VIII. Atramentum, sanguis, lac &c. non sunt diaphana, quia fluidis his varia sunt permixta corpuscula heterogenea, quæ rectilineum pororum ordinem interceptiunt. Hinc serum lactis & sanguinis, sublatis nimirum corpusculis heterogeneis, sunt diaphana. Sic etiam si aquæ admisceatur vinum rubrum, aut massa terrea eidem injiciatur, ob eandem rationem diaphaneitate sua exiit. Sal vero aquæ diaphaneitatem non tollit, quia poruli particularum salinarum, quæ in aqua facta solutione disperguntur, cum porulis aquæ exactius respondent. Dissolvitur sal in corpuscula, inquit Gassendus, quæ nihilo sunt corpusculis aqueis majora; hæc porulorum seriem sensibilibiter non perturbant.

IX. Aqua in vaporem extennata aliquam opacitatem induit, quia pori aquæ extenuatæ & aeris, qui in bullulis vaporum magna copia interceptitur, non omnino rectilineæ sibi respondent, & propter interceptum aerem diversæ reflexiones, & refractiones fieri debent.

X. Aliqui liquores diaphani inter se permixti, & vehementius agitati complexum opacum constituunt, uti aqua & terebinthina; alii vero seorsim diaphani, etsi permisceantur, & agitentur, etiam conjuncti diaphaneitatem retinent. Sunt nimirum aliqui, quorum poruli mutuo sibi non respondent; alii vero, in quibus mutua hæc & rectilinea pororum communicatio datur
hinc

hinc illi, dum permiscetur, opacum, isti diaphanum complexum efficiunt. Ita Patroni primæ sententiæ.

§. III.

PRIMÆ SENTENTIÆ DIFFICULTATES.

198. **P**rima. Si diaphaneitas haberetur per poros continuos, & rectilineos, nullum dari posset corpus plene diaphanum: per partes enim solidas propagari lumen non posset: Atqui datur. Nam 1. crySTALLUS, aut vitrum, si soli opponatur, plane totum lumine perfusum apparet, nec ullæ in iis observantur partes solidæ, ac opacæ. 2. Deberent objecta, dum trans vitrum, aut crySTALLUM conspiciuntur, apparere interrupta, & quodammodo composita ex partibus illuminatis, & obscuris; quia vitri, aut crySTALLI partes solidæ quamplurimis radiis transitum intercluderent. 3. Deberet intensio luminis per vitrum transmissi multo magis decrescere, quam eam decrescere experientia doceat: vitrum enim multo pauciores habet poros, quam aer, & radii plurimi non tantum a partibus solidis extimæ superficiei, sed etiam a pluribus hinc inde prominentiis porulorum, qui non possunt esse mathematicè rectilinei, in transitu luminis reflecterentur. Respondent. C. M. N. min. Est quidem unum corpus magis diaphanum altero, illud nimirum, quod vel plures, vel ampliores pororum canaliculos rectilineos, vel aptius dispositos habet, quam alterum; nullum tamen est perfecte diaphanum, quod omnes fatentur, & de vitro quidem colligi abunde potest ex Num. præced. Phænom. VI.

199. Ad minoris probationem primam respondent: C. A. N. C. Vitrum, etsi partes in eo plurimæ sint luminis penitus imperviæ, tamen totum apparere potest, ac debet lumine perfusum, quin ullæ observentur partes opacæ, idque tum ex natura vitri, ac luminis, tum ex natura sensus nostri necessario consequitur. Oculi nostri ea, quæ sub angulo omnino insensibili incurrunt, discernere nequeunt. Si jam poruli, qui certo dantur in vitro, & crySTALLO, sunt tam exigui, ut propter hanc suam exilitatem ne microscopio quidem observari, atque a partibus solidis discerni possint, quia nimirum angulum opticum efficiunt omnino insensibilem, quomodo par-

particulæ solidæ, quæ relate ad póros sunt & pauciores, & minores, discerni poterunt? Dein si poruli sunt incomparabiliter plures, & ampliores, quam sint particulæ solidæ, copia & vivacitas luminis, per poros propagati, paucitatem umbellarum plane insensibilium, utpote quæ a partibus solidis plane insensibilibus causari deberent, penitus absorbet, ferme ut fit, si reticulum quoddam sericum ex tenuissimis filis contextum soli obvertatur, cujus fila tenuissima oculi etiam perspicacis aciem effugiunt, idque etiam ideo, quia impressio a radiis admodum vivacibus & confertis in retina oculi facta circa se aliquantum diffunditur, atque etiam diutius perseverat, ut proin impressiones a singulis radiis per vitri poros transmissis sint sibi quam maxime contiguæ, sicque impressiones debiliores a particulis solidis causatas plane absorbeant. Denique si vitrum lumini debiliori obvertatur, ut cum dies est obscurior, partes illius solidæ & opacæ satis adverti possunt.

200. Hinc sequitur responsio ad probationem secundam. N. M. Globuli luminosi in retinam incurrentes non tantum commovent partem retinæ, diametro globuli respondentem, sed impressio a quovis globulo facta non nihil amplior, aut latior est, quam sit diameter ipsius globuli: hinc impressiones a radiis luminosis, iisque copiosissimis factæ sunt sibi contiguæ, ut adeo nulla notari interruptio debeat, ut patet in reticulo illo serico, uti etiam in prato viridi, flavis, aut albis floribus confito, quod eminus aspicienti totum apparet flavum, aut candidum. Inde etiam est, cur, dum lunam aliquot diebus ante, vel post novilunium aspicimus, margo disci lunaris illuminatus videatur esse segmentum circuli majoris, quam cernatur reliquum corpus lunæ luce admodum debili tunc perfusum; quia nimirum impressio a radiis marginis illuminati hoc ipso, quod sit fortior, etiam aliquanto latior est, quam impressiones factæ a radiis debilioribus, quos reliquum lunæ corpus ad oculum reflectit. Ad probationem tertiam denuo N. M. Licet enim in vitro sint pori pauciores, quam in aere, tot tamen sunt, ut impressiones in retina factæ sint sibi proxime contiguæ, & particulæ materiæ subtilis eadem vehementia vibrari poterunt in poris vitri, qua vibrantur in poris aeris, a qua vehementia potissimum dependet intensio luminis. Quod aliquæ reflexiones fieri, atque

que ita intensio luminis aliquantum decrefcere debeat, certum omnibus eft, & ex citato Phænôm. VI. N. 197. patet.

201. Secunda. Si diaphaneitas haberetur per poros continuos, & rectilineos, deberet in corporibus diaphanis dari multitudo pororum prorsus imperceptibilis, ac tanta, ut ne locus quidem supereffet materiæ solidæ ad substantiam corporis pertinenti. Probatur. Radii luminis secundum omnes directiones per corpora pellucida transire possunt: ergo corpora hæc in lineis rectis quaquaversum deberent esse perforata ita, ut in iis nulla linea recta concipi possit, quæ in hujusmodi meatu rectilineo non sit posita; hoc autem non modo imperceptibile, sed & impossibile jure censetur. ita Eulerus. 2. In globo vitreo, qui totus apparet diaphanus, circa centrum nulla ferme materia vitri, sed merissimi pori deberent dari. Prob. Darentur pori per totum globum rectilinei: ergo in partibus centrum ambientibus necessario tot darentur pori, quot dantur in partibus superficiæ sphericæ; quia alias non possent omnes esse rectilinei. 3. In fluidis certe pori rectilinei esse non possunt. Hæc namque constant particulis sphericis: atqui particule sphericæ non possunt ita disponi, ut interjecta spatiola communicent inter se, simulque rectilineas series secundum omnem directionem constituent, quod ex ipsa figura globosa patet. Respondent. N. A. Non plures hæc sententia requirit poros, quam quot ab omnibus modo Philosophis solent, & spectando principia de raritate, ac densitate corporum etiam debent admitti, ut ex N. 196. intelligi potest.

202. Hinc ad prob. primam, C. A. N. C. Cum nullum corpus sit perfecte diaphanum, nullum debet habere tot meatus rectilineos, quot in ipso lineæ rectæ intellectu concipi possunt, sed tantum tot meatus rectilineos habere debet, quot lineæ, si sensu discerni possent, in eo nobis apparerent rectæ; tot autem meatus rectilinei non erunt imperceptibiles iis, qui attentius perpenderint, quam ingens in corporibus detur pororum numerus, quam incomprehensibilis item non pororum modo, sed & particularum poros separantium exilitas, ob quam fieri utique poterit, ut radius a via recta sensibilibiter non deflectat. Hinc etiam non est paritas cum corpore, quod ex partibus crassioribus, & sensibilibus est compositum, uti sponsia: ibi enim partes crassiores
viam

viam rectam etiam sensibilibiter obstruunt. Dein si etiam aurum corpus omnium densissimum tot abundat poris, ut per eos ex omni parte effluvia magnetica, & mercurialia transeant, cur in corporibus multo rarioribus pori etiam communicantes inter se, & saltem quoad sensum in omnem partem rectilinee dispositi esse non possint?

203. Ad probationem secundam Dist. M. deberent in tali globo circa centrum dari merissimi pori, si omnes pori a tota peripheria usque ad ipsum centrum forent mathematice rectilinei, C. M. si solum physice, & sensibilibiter sint rectilinei. N. M. &c. Globus hujusmodi tam circa centrum, quam juxta peripheriam ubique æqualiter porosus est; & si pori sint solum physice rectilinei, spectando exilitatem pororum, & particularum solidarum, capi poterit, quomodo pori, qui circa centrum sunt, undique excipiant alios illuc a peripheria porrectos: series enim istæ interrumpi hinc inde deberent a particula aliqua solida; hæc cum non sit sensibilis, seriem istam sensibilibiter non turbat. Ad probationem tertiam N. M. Ad ulteriorem prob. D. M. Constant particulis sphaericis, quæ tamen ipsæ innumeris etiam porulis instructæ sunt, C. M. quæ sint perfecte solidæ, nullisque instructæ poris, N. M. & D. min. non possunt ita disponi, si particule sphaericæ simul essent perfecte solidæ, Tr. min. si & ipsæ suos habeant porulos, N. min. Præterea fluida habent particulas admodum tenues, & facillime mobiles, ut adeo motui, & impulsui materiæ subtilis facile viam cedant: inde fors est, quod fluida, quæ particulis heterogeneis referta non sunt, ferme semper sint diaphana.

204. Tertia. Etsi etiam daretur tanta pororum copia, iique omnes essent continui, & rectilinei, tamen in iis non posset constitui diaphaneitas corporum. Prob. Etsi aer tranquilluss posset servare poros rectilineos, tamen per motum & ventos necessario turbanda esset continua hæc, & rectilinea pororum series. 2. Etiam in marmore albo dantur pori rectilinei: imagines enim in eo depictæ etiam in interiora marmoris situ recto penetrant, & tamen marmor non est diaphanum. 3. Ligna quoque omnia habent fibras, & canaliculos in longum rectè dispositos, neque tamen lumen transmittunt. Respondent. N. A. Ad prob. 1. N. A. Rectitudo sensibilis pororum in aere commoto, & aqua fluente conservari potest prop-

propterea, quod ſtatim ſuccedant pori alii, lineam ſenſibiliter rectam denuo continuantes. Dein ſi etiam una alterave vibratio luminofa per ventos impediretur, defectus tamen eſſet inſenſibilis propter nimiam velocitatem, qua iſtæ vibrationes ſe ſe excipiunt. Et vero, propagationem luminis per ventos vehementiſſimos aliquantulum impediri, deduci poſſe videtur ex eo, quod aere vehementius a ventis commoto objecta per tubos opticos minus clare dignoſcantur. Ad prob. 2. D. A. marmor candidum habet poros rectos ad aliquam diſtantiā, Om. A. ad diſtantiā majorem, & ita inter ſe communicantes, prout ad propagationem luminis requiritur, N. A. Pori illi, per quos imago penetrat ad interiora, potius de novo videntur aperiri a coloribus, qui eo ſe non inſnuant, niſi adhibito calore, & liquoribus corroſivis. Ad prob. 3. D. A. Ita tamen, ut fibræ illæ innumeris etiam filamentis tranſverſis ſat craſſis, variisque corpusculis heterogeneis, ut ex combuſtione ligni patet, ſint interruptæ, C. A. ut hoc non ſit, N. A.

205. Quarta. Si diaphaneitas conſiſteret in poris continuis, & rectilineis, nulla inprimis dari poſſet refractio luminis; nec 2. eſſet ratio ulla, cur nunc potius a perpendicularo, nunc ad perpendicularum refringatur; nec 3. poſſet dari reflexio luminis etiam a corporibus diaphanis cauſata, & quidem eo modo, quo illam dari experientia docet. Membrum 1. prob. Radii luminis quomodocunque incidentes ubique & ſecundum omnem directionem invenirent poros rectilineos: ergo ſemper poſſent, ac deberent recta pergere, nec unquam refringi. Unde patet etiam 2. membrum: qualecunque enim ſit medium, modo diaphanum, habet poros ſecundum omnem directionem rectilineos: ergo non eſt ratio, cur lumen ex uno tranſiens in aliud medium nunc ad perpendicularum accedat, nunc ab eo recedat; cum utrobique pergere poſſit linea recta. Membrum tertium probatur quærendo, quænam ſit ratio reflexionis in corpore diaphano?

Ad hoc Argumentum in hac materia ſane præcipuum communior reſponſio eſt: N. A. quoad omnia tria membra. Ad 1. dicunt, radium s C (Fig. 49. Tab. V.) dum oblique incidit in medium diverſæ rationis A B, refringi ideo, quia incurrit in latera pororum circa C exiſtentium, adeoque a via ſua recta detorquetur. Verum hæc ratio plane non ſufficit. Nam 1. Si medium A B eſſet ejusdem

rationis cum priore, incurfus radii mC , vel sC in C esset omnino idem, & in similia pororum latera; cur autem tunc non refringitur? 2. Si radius ideo refringitur in prima superficie, quia in latus pori incurrit, etiam in ipso vitro deberet semper a recta deflectere, quia saltem in multa pororum latera poterit impingere. 3. Si incurfus in latera esset ratio refractionis, hæc semper deberet dari, quoties lumen ex uno medio in aliud diversæ rationis oblique incidit, quod tamen falsum esse N. 190. diximus. 4. Si incurfus in latera pororum est ratio refractionis ad perpendicularum, dum radius ex aere oblique transit in vitrum, idem radius ex vitro transiens in aerem, & in latera pororum aeris incurrens pariter refringi deberet ad perpendicularum, quod repugnat experientiæ. Dicere autem, poros aeris, etsi ex omni parte sint communicantes, & rectilinei, ita semper esse dispositos, ut per incursum in eorum latera refractione debeat fieri a perpendicularo, est supponere non solum id, de quo quæritur, sed tale quid, quod nullo ne probabili quidem fundamento nititur. Ut proin ad 2. membrum hujus objectionis sufficiens responsio ex incurfu luminis in latera pororum peti non possit.

206. Ad membrum tertium, cur lumen etiam a corpore diaphano reflectatur, responsio communior est, id ideo fieri, quia, dum pars luminis transit per poros vitri v. g., pars alia impingens in partes vitri solidas ab his reflectitur. Verum hoc si est, tunc corpus diaphanum habens plures partes solidas deberet etiam plus luminis, & aliud habens pauciores partes solidas deberet minus luminis reflectere: hoc est contra experientiam manifestam, ut pluribus ostendit Newtonus, & Gravesandius. Sic 1. si inter duas laminas vitreas intercipiatur aer, & inter alias duas aqua, priores majorem radiorum copiam reflectunt, quam posteriores. 2. Si assumatur vitrum, cujus crassities est duorum v. g. digitorum, & simul aliæ duæ laminæ ejusdem vitri, quæ simul junctæ duos digitos crassitie adæquent, hæc laminæ plus luminis reflectunt, quam priores, quia inter eas intercipitur aer. 3. Si Trigonum rectangulare (Fig. 50. Tab. V.) ita obvertatur radio sC , ut is per superficiem fb transiens in alteram ab incidat in C sub angulo semirecto, ab hac in aerem egrediens totus reflectetur in m . 4. Radius per vitrum recipiens, ab aere crassiore evacuatum, transiens in

in

in transitu suo ex vitro in aerem subtiliorem internum ex toto reflectitur, si oblique incidat; si vero facies interior vitri madefiat aqua, aut oleo, aut melle diaphano, radius alias reflectendus penetrat per hos liquores: evidens itaque est, quod non eo major semper sit reflexio luminis, quo plures sunt partes solidæ superficiei reflectentis. Proin suppositis etiam poris continuis, & rectilineis refractione, & reflexio luminis fieri certo non potest propter incursum in latera pororum, aut partes solidas corporis diaphani.

§. IV.

SECUNDÆ SENTENTIÆ FUNDAMENTA.

207. **H**Æc sententia, ut dictum, ad corpus diaphanum requirit 1. ut ipsius particulæ tum materia propria, tum aliena, subtili nimirum, constantes sint elasticæ. 2. Ut in elasticitate sint homogeneæ saltem ita, ut sensibilibus in illa non differant. 3. Ut sint inter se debito modo connexæ, prout nimirum ad propagationem rectilineam motus vibratorii requiritur. Illud igitur corpus erit opacum, cujus partes pleræque vel elasticitate carent, ut motum vibratorium recipere nequeant; vel si quam habent, habent sensibilibus diversam; vel si etiam pleræque partes polleant elasticitate sensibilibus homogenea, non tamen sunt debito modo inter se connexæ, ut vibrationes suas aliis partibus in serie rectilinea communicare possint. Fundamenta sententiæ hæc sunt.

208. Primum. Positis his tribus habetur diaphaneitas, & vel unico eorum deficiente non habetur: ergo dicendum, quod in iis re ipsa consistat diaphaneitas corporum. Membrum primum probatur declarando modum, quo lumen iis positum propagetur a Sole v. g. versus terram, & per varia corpora diaphana. Quando vibrationes materiæ subtilis a spatiis cœlestibus ad aerem nostrum pertingunt, extremas illius particulas, sive materia propria, sive aliena, & subtili consent, aliquantum comprimunt; hæc compressio transfertur ad interiores, quæ eam ulterius communicant per atmosphæram aeream. Quodsi dein hoc lumen ad vitrum, aquam, aliudve corpus diaphanum pertingat, eodem modo, quo prius de aere dictum, extimam horum corporum superficiem comprimet, quæ compressio mox ad alias superficies interiores secundum lineam re-

etiam propagatur, donec ex illis aeri iterum, & materiæ subtili communicata ad oculum usque, & retinam perveniat. Probatur etiam 2. membrum. Si deficit elasticitas, vibrationes materiæ luminosæ neque extimæ superficiei, multo minus interioribus communicari, proin neque per corpus propagari poterunt. 2. Si particulæ in elasticitate non sint homogeneæ, continuo mutatur medium, & ob hanc medii diversitatem continuæ erunt refractiones, & cum nunquam detur refractione sine reflexione, continuæ quoque erunt reflexiones; ut adeo radii per reflexiones semper imminuti non possint ad alteram corporis superficiem pertingere. 3. Si particulæ in elasticitate etiam homogeneæ non sint debito modo inter se connexæ, vibrationes unius, extimæ nimirum superficiei, particulis communicatæ vel non poterunt communicari reliquis, vel saltem non secundum omnem directionem, aut non secundum directionem rectilineam, si hæc cum prioribus debita ratione non cohæreant.

209. Secundum. Sonus propagatur per media elastica: ergo cum tanta sonum inter, & lumen detur analogia, hujus etiam propagatio præcipue repetenda erit ab elasticitate.

210. Tertium. Phænomena diaphaneitatis cum hac sententia optime congruunt, id quod declaratur per varia phænomena superius N. 197. posita. I. Laminæ tenuissimæ corporum etiam opacorum sunt aliquantum diaphanæ; quia per tenuem adeo laminam, licet non omnes omnino particulæ sint in elasticitate homogeneæ, poterunt vibrationes luminosæ adhuc sat efficaciter propagari. Quoniam autem in ipsa superficie, sive prima lamina possunt dari particulæ diversæ rationis, quarum aliæ sunt aliis minus elasticæ, adeoque minus aptæ ad vibrationes recipiendas, & propagandas, & cum similes etiam particulæ possint dari in lamina secunda, tertia, & sequentibus, non ubique sibi corresponsdebunt particulæ ejusdem rationis: proin radii non poterunt ubique libere pergere, ut adeo ex meris lamellis subdiaphanis oriatur denique corpus opacum. Eadem ferme ratione explicatur, cur vitrum, quo est crassius, eo minus sit diaphanum. De vitro striato, aut crassiore arena trito eodem modo rem explicat hæc sententia, quo prior N. 197. quemadmodum etiam id, quod tale vitrum aqua imbutum, aut rite politum diaphaneitatem denuo acquirit.

II. Si vitrum aut alia corpora diaphana in pulverem minutissimum conterantur, redduntur opaca; quia in tota congerie ex his pulvisculis plurimæ dantur cavitates, & intercedunt particulæ diversæ rationis v.g. aeræ: quare, cum in tali casu propter mediorum inæqualitatem fiant innumeræ refractiones, & reflexiones, lumen semper imminuitur, nec per corpus transmittitur. Eadem est ratio de nive, ac liquoribus in spumam agitatis.

III. Quod Adamas &c. per ignem, & calcinationem diaphaneitatem amittant, ratio est, quia vehementissimo igne mutatur textura partium, & particulæ heterogeneæ ingrediuntur: unde dabitur medium diversum, & hoc ipso continua refractio, & reflexio. Plumbum vero, si vehementi igne urgeatur, fit aliquo modo diaphanum; neque mirum videri potest, quod aliqua corpora per ignem amittant, alia acquirant diaphaneitatem: nam aliunde constat, quod pro dispositionum, & corporum diversitate ignis, & calor diversos effectus ponant, dum alia reddit dura, alia mollia &c.

IV. Charta fit diaphana, si aqua aut oleo imbuatur; quia aqua, & oleum minus differunt in densitate, proin etiam in elasticitate a particulis chartæ, quam aer, quo pori prius erant repleti, sive, quia minor datur medii diversitas.

V. Atramentum, sanguis, lac &c. non sunt diaphana, quia nimirum vel deest debita elasticitas, vel in his liquoribus non dantur partes quoad densitatem homogeneæ, sed admixta sunt corpuscula heterogenea, ut in plerisque ad oculum patet. Eadem est ratio de aqua vino rubro permixta. Sal autem non tollit diaphaneitatem aquæ, quia densitas, & elasticitas salis maxime congruit cum densitate, & elasticitate aquæ.

VI. Corpora quædam rarissima, ut vapores, fumus, nubes &c. sunt opaca, alia vero, ut aer, sunt diaphana, quia illa particulis diversæ rationis, aut minus elasticis, hæc vero partibus homogeneis, & maxime elasticis constant.

VII. Aliqui liquores inter se permixti complexum opacum constituunt, alii diaphaneitatem suam retinent. Illi nimirum tales sunt, qui vel diversæ sunt elasticitatis, vel dum permiscantur, particulæ quoad elasticitatem homogeneæ non semper debito modo sibi correspondent. Isti vero, qui & quoad elasticitatem sunt ho-

mogenei, & quorum particulae homogeneae etiam confusae sibi debito modo respondent.

§. V.

SENTENTIAE SECUNDAE DIFFICULTATES.

211. **P**rima. Valde incertum est, utrum omnia corpora diaphana sint elastica elasticitate ad propagationem luminis requisita. Certe de elasticitate aquae, aliorumque fluidorum dubium adhuc inter Auctores non modicum est; aurum vero, plumbum, & hujusmodi, elasticitatem suam alias notabiliter haud produnt, & tamen laminae eorum tenuissimae sunt diaphanae; adeoque ea elasticitate, quae vibrationibus luminosis congruat, donatae esse deberent. Magis adhuc incertum est, utrum omnia corpora diaphana determinate sint praedita elasticitate tali, quae sit proportionata elasticitati materiae subtilis; deberent autem tali esse praedita ita, ut vibrationes tum materiae subtilis, quae in corpore diaphano existens utique etiam vibratur, atque ita ad propagationem luminis concurrat, tum illius materiae, quae ad substantiam corporis diaphani pertinet, aequali celeritate peragantur; hoc enim ni fieret, si particulae corporis diaphani, aeris v. g. tardius se se restituerent, quam vibrentur, & restituantur particulae materiae subtilis in poris aereis contentae, confusissima foret propagatio luminis. Quo fundamento autem supponitur, elasticitatem corporum diaphanorum esse talem, ut eadem celeritate particulae ipsorum vibratae se se restituant, qua se restituant particulae materiae subtilis, cum omnes, qui materiam subtilem dicunt esse elasticam, illam doceant esse summe quodammodo rigidam, & pollere elasticitate tanta, quantum corpora alia ne a longe quidem habeant. Id vero si est, restitutiones materiae subtilis multo erunt celeriores, quam eae, quibus restituantur particulae aeris, vitri, aquae &c.

212. Secunda. Aequè incertum est, utrum in omnibus, quae diaphana sunt, dentur semper particulae quoad elasticitatem homogeneae, in aliis vero, quae diaphana non sunt, heterogeneae. Certe, ut eruditus quidam Recentior factò experimento deprehendit, si 14. diversa fluida, qualia sunt aqua, spiritus rosarum, vini rectificatissimus, melissae, salviae, cochleariae, fragorum, juniperi &c. inter se se commisceantur, complexum manet dia-

diaphanum; si vero duo tantum aqua, & terebinthina simul misceantur, complexum erit opacum. Quo jam fundamento dicetur, particulas quatuordecim istorum fluidorum esse quoad elasticitatem homogeneas, aquæ vero, & terebinthinæ esse heterogeneas? Dein vel tantum particulae sensibiles, vel etiam insensibiles in corpore diaphano debent esse quoad elasticitatem homogeneas? Si tantum sensibiles, valde incertum est, an non in auro purgatissimo particulae sensibiles omnes quoad elasticitatem sint homogeneae; potior saltem ratio non est id dicendi de vitro v. g. crystallo &c. quam de auro, plumbo; quia etiam illa æque sunt mixta ex elementis, sicuti hæc. Si autem etiam partes insensibiles debent esse quoad elasticitatem homogeneas, quale fundamentum habetur id potius asserendi, de aqua v. g. quam de auro; cum certum sit, in aqua plurima latere corpuscula heterogenea, maxime aerea, ut ostendunt bullulae sub recipiente copiose admodum ascendentes.

213. Tertia. Si partes etiam insensibiles in corpore diaphano debent quoad elasticitatem esse homogeneas, valde incertum est, utrum in tali corpore partes ejusmodi homogeneas sint, aut etiam esse possint ita inter se connexæ, ut ubique, & quidem secundum omnem directionem rectilineæ sibi respondeant particulae quoad elasticitatem homogeneas: cum enim certum sit, corpora diaphana pleraque esse rarissima, certum quoque erit, incomparabiliter majorem in iis esse pororum copiam, quam particularum solidarum; & cum pori illi vacui non sint, sed innumeris particulis heterogeneis, maxime in aere, repleti, & insuper hæc pororum amplitudo sit multo major, quam sit partium eos ambientium magnitudo, quomodo verosimile erit, quod cuilibet particulae aereæ ex omni latere, & secundum omnem directionem immediate contigua, quin & debito modo connexa sit alia iterum particula aerea, idque rectilineæ per omnem aeris regionem? Hæc sunt, quibus ipsa sententiæ hujus supposita impugnari posse videntur. Quid ad ea respondeatur, postea indicabitur.

214. Quarta. Si etiam supposita isthæc subsisterent, tamen phænomena diaphaneitatis non explicantur. Et inprimis non explicatur refractio luminis in medio densiore ad perpendicularum, a perpendicularo autem in medio rariore. Ideo enim radius *m C* (Fig. 49. Tab. V.) ex aere obli-

que incidens in vitrum AB refringitur ad perpendicularum fg ; quia in vitro minus elastico invenit aliquam resistentiam, adeoque particulam C , in quam incurrit, comprimit versus perpendicularum g ; & quia simul pergere vult secundum priorem suam directionem Co , eandem particulam etiam secundum hanc directionem comprimet: hinc jam dabitur motus compositus, & radius per diagonalem Cn perget versus perpendicularum. Vicissim dum radius C ex vitro oblique incidit in aerem AB magis elasticum, refractione fit a perpendicularo ideo, quia radius iste aerem imprimis comprimit versus perpendicularum fg , & dein etiam secundum priorem suam directionem Ce conatur pergere; cum jam singulares aeris particulae sint ad motum faciliores, tota aeris ambientis, & aliquantum continui superficies facillime cedit. Hoc facto particula ad perpendicularum compressa, magisque cedens a reliqua aeris minus cedentis superficie ad regressum versus vitrum determinatur; ex eo autem, quod se iterum versus vitrum restituat, dabitur motus compositus ex perpendiculari sursum versus f , & obliquo deorsum versus e , adeoque debeat a perpendicularo recedere. Sed neutra hæc explicatio videtur esse omnino sufficiens.

215. Et quidem de refractione ad perpendicularum r . Sit, quod eadem particula vitri, in quam oblique incidit radius mC , comprimatur secundum duplicem directionem, perpendiculararem nimirum, & obliquam ipsius radii incidentis, quomodo ex hoc sequitur refractione ad perpendicularum? Nunquid enim radius idem ex vitro oblique incidens in aquam eodem prorsus modo comprimet particulam aquæ, in quam incurrit? & tamen tunc non datur refractione ad perpendicularum. Nunquid si radius ex crystallo transeat in vitrum, eadem ipsa particula vitri secundum duplicem illam directionem comprimetur, & tamen ibi datur refractione a perpendicularo. Imo an non semper gemina hæc compressio in his principiis dari deberet, quaecunque sit medium, in quod radius oblique incurrit? Major porro, aut minor resistentia medii in negotio isto parum conferre posse videtur: ex ea enim tantum sequeretur, quod compressio secundum directionem perpendiculararem vel facilius, vel difficilius fiat, non vero, quod nullo modo fiat. Igitur in omni propagatione luminis, sive illud per idem, aut simile, aut diversum medium pergat, semper superiores medii lamellæ a radiis lumi-

luminosis vibratæ lamellas inferiores sibi proximas comprimerent secundum geminam illam directionem, proin radii toto tempore sui transitus identidem refringerentur ad perpendicularum. 2. Partes vitri elasticæ, qua vi comprimuntur a vibrationibus aeris luminosis, eadem vi se restituunt, non secus, ac partes aeris compressæ se se restituunt: quare ergo hic in vitro, non item in altero casu datur motus compositus, per quem radii potius ad perpendicularum, quam a perpendicularo refringantur, præcipue talis. ut quo minor est angulus incidentiæ, eo major sit refractione ad perpendicularum, cum nulla prorsus sit ratio, cur particula vitri fortius comprimatur secundum directionem perpendicularem, quo minor est hic angulus, quam comprimeretur, si angulus esset major: in utroque enim casu eadem est vibratio radii, & eadem resistentia medii, quia eadem istius densitas, & elasticitas. Imo ex legibus percussionis indirectæ habetur, quod eo minor deberet esse compressio perpendicularis, quo minor est angulus incidentiæ. *Phys. Gener. Diss. IV. Art. III. §. 3. N. 271.*

216. De refractione autem a perpendicularo minus adhuc subsistere videtur data explicatio. Nam 1.º intelligi haud satis potest, quomodo ob vibrationes vitri tota aeris ambientis superficies facillime cedat: vel enim facilius cedit ita, ut revera moveatur localiter, vel solum, ut facilius vibretur elasticæ? Non primum; alioquin nullum fluidum, uti aer & æther, posset ad motum vibratorium concitari, quin simul ad aliquam distantiam moveatur localiter, quod tamen non dicunt. Et si prima, ac vitro proxima superficies aeris tam facile cedit, secunda quoque ac tertia superficies eadem facilitate ad tantillam distantiam cedent motu locali; quomodo autem tunc habebitur vibratio? vel quomodo a reliqua aeris minus cedentis superficie determinabitur illa prima ad regressum? Neque secundum dici potest: si enim facilius vibratur aer, etiam facilius per eundem propagabitur lumen; hoc autem si est, deberet spectando leges motus refracti lumen potius ad perpendicularum accedere; neque esset ratio, cur aer tantum luminis reflectat, ut mox dicetur. 2. Si propter vibrationes vitri tota aeris ambientis superficies cedit, tunc etiam superficies aeris inferiores propter vibrationes superiorum semper deberent loco moveri, adeoque in aere perpetua dari refractione a perpendicularo. 3. Refra-

Etio a perpendiculari non tantum fit in aere, sed etiam in aqua, imo etiam in vitro: nam si lumen ex crystallo transeat in vitrum, ex hoc in aquam, ex ista in aerem, successive semper magis refringitur a perpendiculari teste P. Regnault; quo casu tamen nemo facile dixerit, quod prima, & crystallo proxima superficies vitri, & vitro proxima superficies ambientis aquæ tota aliquantum cedat: si enim aqua esset conclusa vase, cujus capacitatem exacte impleret, quorsum cederet?

217. Sed neque reflexio luminis plene explicari posse videtur. Nam lumen ex aere incidens in vitrum aliqua sui parte reflectitur; & simul, dum ex vitro transit in aerem, iterum & quidem magis reflectitur, quam si ex vitro transiret in aquam. Imo si in trigonum (Fig. 50. Tab. V.) eo modo, quo dictum est N. 206. incidat, aut si oblique incidat in vas recipiens evacuatum, ex toto reflectitur. Jam a vitro reflectitur ideo, quia medium magis densum, & minus elasticum, scilicet vitrum, est aliquo modo ineptum, vel certe minus aptum ad vibrationes recipiendas; proin aliqua pars luminis reflecti debet, quemadmodum reflecteretur totum, si medium esset prorsus ineptum ad eas vibrationes recipiendas. Verum si medium est adhuc aptum ad recipiendas illas vibrationes, possent illæ utique propagari cœpta prius via, sed nimirum ita, ut essent debiliores in vitro, quam fuerint in aere, nec esset ratio, cur reflecterentur; vel si propterea deberet dari reflexio, quia difficilius communicarentur vibrationes medio minus elastico, deberet ob eandem rationem etiam dari refractione a perpendiculari ex legibus motus refracti.

At hoc omisso si vitrum & aqua aliquid luminis reflectunt ideo, quia sunt minus elastica, proin minus apta ad vibrationes luminosas, quam sit aer, cur etiam aer, & quidem plus luminis reflectit, quam vitrum & aqua, cum hic sit magis elasticus, adeoque magis aptus ad vibrationes luminosas? Et quidem cur reflectitur lumen totum, si incidat in trigonum illud sub angulo minore, quam sit semirectus, aut in aerem sub recipiente rarissimum, proin etiam compressionis capacissimum? Si iterum dicant, id ideo fieri, quod tota aeris superficies facilius cedat, proin etiam fortius ad reditum determinata lumen omne reflectat, difficultas oritur ex dictis Numero præcedente, atque etiam ex eo, quod saltem illi

illi radii, & illæ vibrationes, quæ non aeri, sed materiæ subtili in aere copiosius latente immediate communicantur, deberent ulterius propagari, adeoque non totum lumen reflecti. Si autem velint, quod tantum facilius elastice vibretur aer, hoc ipso absque tali reflexione deberet lumen ex vitro in aerem transiens facilius posse pergere.

§. VI.

QUID DE DIAPHANEITATE CORPORUM VIDEATUR ESSE STATUENDUM?

218. **Q**uivis ex indicatis hic sententiis per me sibi feligat eam, quam verisimiliorem esse censuerit. Ego quidem sic existimo: quoniam spectando naturam corporum multo certius est, quod in corporibus diaphanis pori dentur plane innumeri, quam quod omnia corpora diaphana ea polleant elasticitate, quæ vibrationibus materiæ luminosæ sit satis proportionata; cumque eodem jure supponi possit, dari in istis corporibus continuam & rectilineam pororum seriem, quo jure supponitur, particulas quoad elasticitatem homogeneas secundum omnem directionem in serie rectilinea ita inter se esse connexas, ut vibrationem quamcunque invicem communicare valeant; cum denique phænomena diaphaneitatis, maxime refractionis & reflexio luminis, assumpta etiam debita partium homogenearum elasticitate non explicentur facilius, quam assumpta rectitudine continua pororum, verosimilior censi potest hypothesis, quæ diaphaneitatem corporum in continua, & rectilinea pororum serie constituit, quam altera, quæ eandem a partium homogenearum elasticitate, & debita istarum connexione repetit.

219. Primum membrum quod concernit, cum spectando principia de densitate ac raritate corporum omnibus certum esse debeat, quo rariora sunt corpora, eo majore pororum copia aut amplitudine eadem esse prædita; cumque corpora, quæ diaphana esse deprehenduntur, sint plerumque ex eorum numero, quæ rariora sunt, de numero plane incomparabili pororum dubium esse nullum potest. Quod autem de elasticitate corporum diaphanorum, ma-

xime si illa debeat esse proportionata elasticitati materię subtilis, non æque certo constet, pariter extra controversiam est, ut ex N. 211. intelligi potest, atque ii etiam, qui hanc elasticitatem defendunt, haud gravate fatentur, dum rationem, ob quam hanc elasticitatis homogeneitatem adstruant, eam ferme unicam dare soleant, quod hac elasticitate assumpta phænomena lucis omnia rite explicantur, quæ tamen arguendi ratio mihi nunquam videri poterit esse admodum potens.

Membrum secundi veritas colligi poterit tum ex Num. 196. tum ex N. 202. Profecto si multo plures in corporibus diaphanis dantur pori, quam particulę solidę, sique pororum amplitudo est incomparabiliter major, quam partium eos ambientium magnitudo, si denique partes istę solidę, quibus rectilinea pororum series obstrui posset, sunt exilissimę, non video, cur pori isti non in omnem partem possint constituere series physice rectilineas; imo non video, quomodo in tanta paucitate particularum materię, in tanta amplitudine pororum, & non raro etiam in tanta copia materię heterogeneę inter poros contentę fieri possit, ut particulę quoad elasticitatem homogeneę secundum omnem directionem series rectilineas constituent ita, ut una particula ex omni parte connexa sit alteri quoad elasticitatem homogeneę. De membro tertio quamquam mihi plane evidens sit, nec refractionem, nec reflexionem luminis per incursum in latera pororum, & partes solidas corporis diaphani explicari posse, videbimus tamen, an non horum quoque phænomenum ratio saltem æque conveniens reddi possit, quam sit illa, quæ ab aliis N. 214. & 217. fuit assignata.

220. Interim ad fundamenta adversę sententię N. 207. & seqq. indicata, & ad primum quidem responderi potest 1. Om. A. N. C. Dixi alias, argumentum hoc non esse convincens: posito hoc principio explicari potest effectus; de nullo alio principio constat: ergo hoc principium est causa istius effectus. Sed quoniam hic versamur inter hypotheses, responderi potest 2. Nego 1. & 2. membrum Antec. Primi membri falsitas patet ex refractione, & reflexione luminis; secundum vero membrum falsum est, quia, quamvis tria isthęc simul omnia deficerent, modo in corpore daretur continua, & rectilinea pororum series, jam haberetur corpus diaphanum, seu tale, per quod lumen, seu motus vibratorius, &

re-

rectilineus materiæ subtilis propagari posset. Cætera quoque phænomena, maxime si ad conjecturas descendamus, nescio, an non felicius explicentur per poros rectilineos, quam in sententia adversa.

221. Ad alterum fundamentum ex paritate cum sono petatum, equidem maxima sonum inter & lumen analogia est; at non propterea analogia hæc esse debet in omnibus. Certe si aer, in cujus motu vibratorio sonus constituitur, tam copiose lateret in corporibus, per quæ sonus propagatur; sique pori corporum particulis aeris essent ubique pervii, ac respectu aeris tam ampli, quam ampli respectu materiæ subtilis sunt pori corporum diaphanorum, iique innumeri, nemo, credo, facile assereret, sonum non tantum per rimas v. g. muri, sed per ipsius etiam muri succussionem aliquam propagari. Mirum ergo videri non debet, quod alia sit propagatio luminis, quam soni: cum enim ipsa materia luminosa, scilicet subtilis, in corpore diaphano majore in copia adsit, quam sit materia corporis propria; cum pori corporis diaphani sint innumeri, illique respectu materiæ subtilis admodum ampli, poterit ac debet materia subtilis extra corpus ad motum vibratorium concitata ad similem motum concitare materiam in corpore diaphano existentem; quodsi dein pori isti rectilineæ inter se se communicent, motus vibratorius & rectilineus materiæ subtilis, id est, lumen per totum corpus propagabitur, etsi particulæ materiæ propriæ ipsius corporis ad talem motum vel non concitentur, vel omnino concitari nequeant.

222. Ad tertium de phænomenis, nemo non videt, Adversariis aut eandem, quam nos assumimus, explicationem in plerisque esse adhibendam, aut ad varias conjecturas esse recurrendum, quemadmodum id faciunt in primo mox phænomeno de laminis tenuissimis corporum alias opacorum, dum dicunt, posse in prima lamina talis corporis dari particulas diversæ rationis, id ipsum fieri posse in lamina sequenti, & reliquis. Quo autem fundamento hæc conjectura nitatur, ex Num. 211. intelligitur. Majore fors cum veri specie dicitur, poros, qui in tali lamina certo dantur, ad tantillam distantiam, ad quantam talis laminæ crassities extenditur, facilius posse inter se se rectilineæ communicare, quæ dein communicatio rectilinea eo magis ab ipsius corporis partibus inter-

cipiatur, quo densius istud corpus est, ut adeo plures ejusmodi laminæ simul junctæ corpus denique opacum efficiant. Idque etiam eo magis, quod corpora opaca plerumque sint etiam densiora, in quibus pori pauciores, quam in corporibus diaphanis, & minor copia materiæ luminosæ intra poros existentis; vel quod partes solidæ corporis opaci sint respectu pororum multo crassiores, quam eædem sint in diaphanis. Item quod alia quædam constent diversissimis filamentis nullo ordine inter se implexis, quibus rectilinea pororum series denuo abrumptur, aut variis particulis heterogeneis sint referta, quibus aut pori obstruantur, aut diversissimæ refractiones, & reflexiones causentur.

223. De tertio phænomeno, quod aliqua corpora per ignem vel amittant, vel acquirant elasticitatem vibrationibus materiæ subtilis proportionatam, mirum utique non paucis, & jure videbitur, præcipue si elasticitas dicatur esse vis intrinseca; minus forte mirum videbitur, quod per actionem ignis fiat mutatio texturæ, & nova pororum dispositio, ac intrusio copiosioris materiæ subtilis, quam mutationem, ac pororum dispositionem ipsi etiam Adversarii tali casu debent admittere. Equidem dura, aut mollia, ac etiam fluida per ignem varia reddi corpora, in comperto est; at neque actio, qua dura, neque ea, qua fluida redduntur, servire potest ad hoc, ut plumbum v. g. vix ulla elasticitate præditum, dum liquefit, fiat etiam elasticum. De quarto, quod oleum, & aqua a charta minus differant in densitate, quam aer, verum est; an autem propterea magis cum charta conveniunt in elasticitate? Æqualis vel similior densitas non semper indicium est æqualis elasticitatis, ut ex innumeris patet. De quinto, & septimo, quod salis elasticitas ab elasticitate aquæ diversa non sit; item quod ii liquores, qui permixti manent diaphani, in elasticitate conveniant, illi vero, qui per commixtionem complexum opacum efficiunt, in eadem differant, quid, nisi mera conjectura est? Audiamus nunc, quid ad difficultates sententiæ suæ S. superiore oppositas Auctores isti respondeant.

224. I. Est satis certum, aquam, aliaque corpora diaphana esse elastica. Prob. Sonus propagatur per aquam, & omnia alia corpora diaphana: ergo. R. D. A. Est satis certum, corpora hæc esse elastica aliqua elasticitate, Tr. A.; quia hoc de fluidis plane certum non est. Est

fatis certum, ea esse elastica elasticitate tali, quæ sit proportionata ad recipiendas, & ulterius propagandas vibrationes luminosas materiæ subtilis, N. A. Ad prob. D. A. ita, ut certum sit, sonum propagari per vibrationes ipsius aquæ, aliorumque fluidorum, N. A. ut hoc certum non sit, C. A. Quod sonus propagetur per vibrationes molecularum ipsius aquæ, aliorumque fluidorum, putant equidem Philosophi non pauci; attamen certum hoc neutiquam est. Si in aqua tanta esset copia aeris, quanta in ea est copia materiæ subtilis, sique aer in poris aquæ tam libere posset ad vibrationes concitari, quam libere potest materia subtilis, omnes, credo, dicerent, sonum propagari per aquam ita, ut solus aer in poris aquæ existens ad vibrationes sonoras concitetur: cum ergo & de copia materiæ subtilis in aqua existentis, & de poris aquæ innumeris certo constet, quid opus, ut dicamus, lumen per aquam propagari per vibrationes non solum materiæ subtilis, sed etiam particularum ipsius aquæ, de quibus non constat, utrum ad vibrationes luminosas sufficienter concitari queant.

Nam transmissio etiam, quod sonus per vibrationes ipsius aquæ propagetur, nondum tamen sequitur, aquam ea esse elasticitate præditam, quæ sit proportionata vibrationibus luminosis: sonus enim propagatur etiam per muros, per asseres admodum densos, per fluida etiam colorata, quæ tamen diaphana non sunt, proinde ad propagandas vibrationes luminis inepta: igitur ex propagatione soni per diversa corpora inferri haud potest, corpora isthæc pollere elasticitate vibrationibus luminosis proportionata, ut particulæ quoad elasticitatem homogeneæ secundum omnem directionem inter se communicent. Dicere autem, in corporibus hisce opacis, etsi apta illa sint ad vibrationes luminis recipiendas, dari corpuscula heterogenea innumera diversæ elasticitatis, quæ vibrationum istarum propagationem intercipient, conjectura est; imo etiam in aqua admodum pellucida dari corpuscula terrea, mineralia, sulphurea, salina &c. quæ utique non ejusdem cum aqua sunt elasticitatis, plus quam certum est: si ergo hæc non impediunt propagationem luminis, cur eandem in aliis, ad propagandum sonum magis aptis, impediunt?

225. II. Non est opus, ut corpora diaphana prædita sint elasticitate, quæ sit proportionata elasticitati materiæ sub-

subtilis : quæ enim hujus ratio ? Et utique vibrationes aeris possunt tamen esse uniformes vibrationibus ætheris ; cum possint esse uniformes vibrationibus corporis lucidi : proin lumen & per aerem , & per ætherem eadem celeritate poterit propagari. R. N. A. Ratio indicata jam est , quia alias mera deberet fieri vibrationum confusio : cum enim in hac sententia lumen propagari debeat non per solius aeris vibrationes , sed simul etiam per vibrationes ætheris in aere existentis , si elasticitas aeris est longe minor , quam illa ætheris , moleculæ aeris , etsi simul cum æthereis vibrentur , seu impellantur , tamen vibrationes suas non simul cum istis absolvent , quia corpora minus elastica tensa , aut compressa tardius restituuntur , quam quæ sunt magis rigida , & magis elastica ; si autem vibrationes ætheris absolvantur citius , quam vibrationes aeris , necessario sequitur confusio vibrationum.

Ad ulteriorem discursum N. A. Rationem additam Dist. Vibrationes aeris possunt esse uniformes vibrationibus corporis lucidi , si particulæ aeræ vibratæ eadem celeritate restituantur , qua restituuntur particulæ corporis lucidi , & materiæ subtilis vibratæ , C A. si hoc non fiat , N. A. Illud hic etiam adverti potest , in hac sententia , in qua lumen etiam per vibrationes ipsius aeris propagari dicitur , nimium quantum augeri illam difficultatem alias jam insinuatam de concursu plurium sonorum , aut radiorum in eodem puncto sensibili aeris : cum enim in ejusmodi puncto aeris possint simul concurrere & soni & radii colorati diversissimi , idem sensibile punctum aeris deberet simul recipere , & propagare non solum vibrationes sonis diversissimis , sed etiam vibrationes diversissimis colorum radiis proportionatas. Si unica harum difficultatum capui nostro sufficienter explicari non potest , quid opus , ut ambæ jungantur simul ?

226. III. Quam incertum est , utrum in casu , quo quatuordecim illa fluida simul mixta tamen mansere diaphana , omnia isthæc fluida sint quoad elasticitatem homogenea , tam incertum est , utrum omnia sic permixta servant continuam & rectilineam pororum seriem : ergo ex hoc capite præferenda non est sententia nostra. R. x. Om. A. N. C. Certum tamen est , quod in omnibus istis fluidis , sive seorsim , sive simul spectatis , dentur pori innumeri , & non est certum , quod illa fluida
sunt-

simpliciter sint elastica elasticitate satis proportionata vibrationibus luminosis; hinc primum saltem suppositum nostræ sententiæ est certum, adversæ vero omnino incertum. R. 2. N. A. quod sit æque incertum: cum enim fluida ista seorsim sumpta sint diaphana, & quæ de pororum in illis copia, ac amplitudine dicta hucusque sunt, sint omnino certa, quæ vero de elasticitate eorum ab Adversariis supponuntur, omnino sint dubia, multo probabilius est, fluida ista seorsim sumpta esse diaphana per continuam, & rectilineam pororum seriem, quam per dubiam adeo eorum elasticitatem: igitur etiam probabilius erit, quod ea permixta maneant diaphana per rectitudinem pororum, quam per homogeneitatem in elasticitate. Et vero, si fluida isthæc quoad densitatem non multum differant, etiam non multum different quoad numerum & amplitudinem pororum: si igitur perfecte inter se commisceantur, cur molecule innumeris poris instructæ non possint in tali complexo eodem modo sibi correspondere, quo modo sibi respondebant antea molecule cujuslibet fluidi seorsim sumpti?

227. Verum hoc si est, cur, dum aqua & oleum, aqua & terebinthina inter se miscentur, complexum oritur quasi opacum, cum tamen fluida isthæc seorsim sint diaphana? R. 1. eodem jure supponi posse, quod pori olei & terebinthinæ non satis exacte respondeant poris aquæ, quo jure supponitur, utriusque istius fluidi elasticitatem haud satis respondere elasticitati aquæ. R. 2. Cum aliunde constet, non omnia fluida æquali facilitate inter se misceri posse, & de oleosis quidem omnibus certum sit, ea non nisi difficillime commisceri cum aqua propter eam, quam oleosa habent, viscositatem, aut, ut aliis placet, superficiem nimis lubricam, dici hic debet 1.; oleum ac terebinthinam, quæ pariter est substantia oleosa ac bituminosa, vehementi etiam agitatione non posse dividi in tam exiguas particulas, in quam exiguas dividitur aqua, adeoque fluida isthæc nunquam perfecte inter se commisceri, sed inter globulos oleosos majores implicitos teneri globulos aquæ minores, aut vicissim. 2. Per ipsam agitationem, qua fluida isthæc inter se miscentur, simul plurimum aeris massæ huic commisceri, ut satis ostendunt bullulæ, quæ in extima etiam superficie cernuntur.

Ex his autem sequitur 1., inter molecule quoad

K

magni-

magnitudinem adeo inæquales fieri poffe, ac debere, ut continua ac rectilinea pororum ſeries non ubique exacte fervetur. 2. Cum in fluidis iſtis etiam ſeorſim ſumptis inæquales ſint reſractiones, in globulis olei majoribus continuæ, ac irregulares, æque ob magnitudinem globulorum ſatis ſenſibiles dabuntur reſractiones; hinc prorſus inordinata, nec rectilinea erit propagatio luminis. 3. Ob admixtum aerem valde copioſum denuo erunt reſractiones aliæ, & præcipue reflexiones copioſiſſimæ, adeoque his omnibus ſimul concurrentibus maſſa hæc apparebit opaca, quamdiu ita permixtæ manent fluidorum particulæ, ut ex dicendis de reſractione, & reflexione magis intelligi poterit. Si hæc non ſufficiant, cum verſemur intra hypotheſes, fatebimur denuo, etiam nos hic conjecturis agere, ſed talibus, quæ æque firmis nitantur fundamentis, ac illæ Adverſariorum. Primum tamen fundamentum de copia pororum manebit ſemper certius, quam illud de elæſticitate proportionata vibrationibus luminofis.

228. Quæret forte aliquis, utrum etiam æther, ſeu materia ſubtilis ſit diaphana? & ſiquidem ſit, utrum per poros rectilineos, an per elæſticitatem homogeneam? R. Niſi quis nodum in ſcirpo quærat, haud difficulter agnoſcet, materiam ſubtilem in eo ſenſu, quo Philoſophia omnis formam diaphani ſumit, non poſſe dici diaphanam: non enim dicimus lumen eſſe diaphanum, aut lumen eſſe pervium lumini. Diaphaneitas eſt affectio, quæ non ipſi lumini, ſed corporibus, per quæ lumen tranſire poſteſt, competit: cum ergo materia ſubtilis motu vibratorio rectilinee impulſa ſit ipſum lumen, non niſi improprie dices, illam eſſe diaphanam. Si aliud non quæras, quam, utrum per materiam ſubtilem jam rectilinee vibratam poſſit ex alia directione tranſire alius adhuc radius, ſenſus erit, utrum plures radii luminis ita concurrere in aliqua ſenſibili portione materiæ ſubtilis poſſint, ut poſt concurſum ſecundum priorem directionem pergant ulterius, quod utique fieri poſſe ex materia de lumine ſuperius examinata patet. Sed hoc non eſt eſſe diaphanum, nec aliud dicit, quam, quod eadem ſenſibilis portio materiæ ſubtilis poſſit ſimul recipere, & communicare vibrationes ſecundum diverſas directiones, quod in quacunque demum ſententia certum eſt.

§. VII.

*QUOMODO EXPLICANDA ESSE VIDEATUR
REFRACTIO LUMINIS?*

229. **E**T si forte refraçtio, & reflexio luminis non posset convenientius explicari in hac, quam in adversa sententia, cum tamen supposita hujus in ipsa corporum natura fundata certiora sint, quam sententiæ adversæ, nostra hæc adhuc verisimilior judicari poterit. Et illud quidem, ut dixi, mihi evidens est, per incursum in latera pororum, & particulas solidas solius corporis diaphani phænomena hæc explicari non posse, ut vel ex Num. 205. & 206 intelligi potest. Alia igitur via erit indaganda; quod ut fiat, relegi hic debebunt, quæ in Physica Generali Diff. IV. Art. VI. §. 2. præcipue N. 297. dicta sunt, ubi in Fig. 32. Tab. II. explicati sunt termini hic usurpandi, & pro motu refracto principium generale datum est hoc: causa mobile ad refringendum motum suum determinans est diversa resistentia mediorum; adeoque si mobile minorem inveniat resistentiam secundum illam directionem, quæ magis recedit a perpendiculo, dabitur refraçtio motus a perpendiculo, si vero minorem inveniat resistentiam secundum directionem accedentem ad perpendiculum, dabitur refraçtio motus ad perpendiculum; si resistentia utrinque sit æqualis, nulla erit refraçtio. Atque hæc principia ab omnibus recepta sunt, dum sermo est de motu translato corpore per diversa media.

230. Jam vero, etsi lumen non consistat in motu translato, sed in vibratorio materiæ subtilis, cur tamen non eadem principia locum habere possint, ac debeant in refractione illius motus, per quem habetur lumen, ita, ut ratio, cur lumen hoc vel illo modo refringatur, sit diversa facilitas, qua motus vibratorius facilius secundum hanc, quam illam directionem communicetur, ac propagetur, proin, si pulsus ac motus vibratorius facilius communicetur, ac propagetur secundum illam directionem, quæ magis divergit a perpendiculo, detur refraçtio luminis a perpendiculo; si vero facilius communicetur, ac propagetur secundum eam directionem, quæ propius accedit ad perpendiculum, detur refraçtio

luminis ad perpendicularum; si eadem facilitas utrinque sit æqualis, etiam nulla detur refractionis luminis. Certe hoc dum asseritur, nihil inprimis dicitur, quod cum aliis principiis philosophicis non optime cohæreat; imo servatur uniformitas principiorum, dum refractionis luminis ex iisdem fontibus derivatur, ex quibus refractionis aliorum corporum in motu existentium; & denique ipsa ratio ostendit, motum quemcunque eo debere continuari, quorsum ipsius continuatio fieri facilius potest. Ut adeo legitima videri possit hæc argumentatio: causa diversæ refractionis in motu translatoivo est diversa facilitas continuandi motum translativum: ergo etiam causa diversa refractionis in motu vibratorio est diversa facilitas continuandi motum vibratorium. Si igitur ostendatur, quod pulsus ac motus vibratorius materiæ luminosæ eo cæteris paribus facilius plerumque communicetur materiæ subtili, quo densius est medium, in quo illa ad motum hunc est concitanda; eo vero difficilius, quo medium hoc est rarius, data etiam erit ratio, cur radius in medium densius oblique incidens ordinarie refringatur ad perpendicularum, a perpendicularo autem, si incidat in medium rarius.

231. Hoc autem ostendi posse videtur ex iis principiis, quæ alias admitti a plerisque solent. Ex dicendis de electricitate N. 441. patebit 1., materiam electricam, seu illam, per quam phænomena electricitatis eveniunt, esse eandem cum materia luminis, utrinque nimirum materiam subtilem; seu ætherem. 2. Ut phænomena electricitatis possint accidere materiam istam ad motum esse concitandam, qua ad motum concitata aliqua quasi atmosphæra circa corpus electricum, aut electrificatum formetur. 3. In atmosphæra illa electrica continuos esse itus, & reditus. sive oscillationes materiæ subtilis tum versus peripheriam atmosphærae, tum versus corpus electrificatum. 4. Hanc atmosphæram in aere, etsi corpus vehementius electrificetur, ad spatium haud adeo magnum extendi. 5. Electricitatem communicari corporibus per hoc, quod materia subtilis corporis electrici in motu jam constituta illam materiam subtilem, quæ est in poris corporis electrificandi, impellat, atque ad similem suo motum vibratorium concitet. 6. Electricitatem ordinarie multo facilius communicari iis corporibus, quæ sunt densiora, quam iis, quæ sunt rariora; & quidem ita, ut vis hæc electrica in corpore densiore ad distantiam valde magnam intra tempus brevissimum propagetur.

232. Ex his jam, me quidem judice, ſequitur hæc propoſitio: pulſus ac motus vibratorius ordinarie facilius communicatur materiæ ſubtili exiſtenti in poris corporis denſioris, quam exiſtenti in poris corporis rarioris. Nam. 1. viſ electrica ordinarie facilius communicatur corporibus, quæ ſunt denſiora, quam iis, quæ ſunt rariora; vim autem electricam communicare, aliud non eſt, quam impellere, & ad motum vibratorium concitare materiam ſubtilem in corporis electriciſandi poris exiſtente: ergo, ſi viſ electrica ordinarie facilius communicatur corporibus denſioribus, ordinarie facilius impellitur, & ad motum vibratorium concitatur materia ſubtilis in corpore denſiore, quam in rariore exiſtens. 2. Formari atmophæram electricam circa corpus electricum, aut electricatum, aliud non eſt, quam quod materia ſubtilis in corpore electrico, aut electricato exiſtens, jamque ad motum vibratorium concitata ad ſimilem motum concitet illam materiam ſubtilem, quæ in aere corpus electricum aut electricatum ambiente exiſtit: ergo atmophæra electrica eo prorsus modo formatur, quo modo viſ electrica communicatur corpori electricando, nimirum impellendo, & ad motum vibratorium concitando materiam ſubtilem in poris tum aeris, tum corporis electriciſandi exiſtente. Jam vero atmophæra in aere, etſi corpus electricum etiam vehementius fricetur, ad ſpatium tamen haud adeo magnum extenditur, viſ vero electrica per corpus aliquod denſius, ſilum v. g. metallicum, intra momentum quaſi ad ſpatium ingens extenditur, & propagatur, etſi frictio corporis electrici non admodum vehemens ſit: ſi igitur formari atmophæram electricam, & vim electricam communicari aliud non eſt, quam materiam ſubtilem ibi in poris aeris, hic in poris corporis electriciſandi exiſtente impellere, & ad motum vibratorium concitare, manifeſtum denuo eſt, facilius impelli, & ad motum vibratorium concitari materiam ſubtilem exiſtente in corpore denſiore, quam in rariore, quale vel maxime eſt aer. His præmiſſis ſit

233. Propoſitio I. Lumen ex medio aliquo in aliud etiam diverſæ rationis perpendiculariter incidens non refringitur. Oſtendit id experientia, & ſecundum data mox principia fieri omnino debet: ſit enim in Fig. 49. Tab. V. radius fC ex aere perpendiculariter incidens

in vitrum $A B$ medium densius, aut vicissim. Ut radius sic incidens patiatur refractionem, deberet a perpendicularo $C g$ declinare vel versus e , vel versus n : sed non est ratio, cur versus alterutram partem declinet: nam inprimis pori secundum omnem directionem sunt physice rectilinei, eodemque modo ex utraque parte dispositi; dein pulsus, & motus vibratorius materię subtilis intra poros existentis non facilius versus unam, quam alteram partem communicatur, & propagatur, quia utrinque est eadem medii densitas: ergo nihil est, cur motus iste versus alterutram partem declinet: ergo radius perget secundum primam directionem, nec ullam patietur refractionem.

234. Propositio II. Lumen, ex medio rariore oblique incidens in medium densius, ordinarie refringitur ad perpendicularum. Sit in Fig. 51. Tab. V. Radius $s C$ ex aere oblique incidens in vitrum $A B$; dum radius luminis, seu motus vibratorius secundum directionem obliquam $s C$ propagatur usque ad superficiem vitri, globulus materię subtilis C utrique medio adhuc quasi communis facilius impellitur, & vibratur secundum partem sui hemisphęrii $t r u x$, quam secundum partem $t m o x$: ex dictis enim habetur, pulsus, ac motum vibratorium facilius communicari materię subtili in poris corporis densioris existentis, quam existentis in poris corporis rarioris; pars autem $t r u x$ existit in corpore densiore, pars $t m o x$ in corpore rariore: atqui si globulus C facilius impellitur, & vibratur secundum sui partem $t r u x$, hoc ipso pulsus, ac motus vibratorius communicari, ac propagari deinceps debet juxta directionem, quę ad perpendicularum $f g$ accedit, nimirum juxta directionem $C e$.

235. Propositio III. Lumen, ex medio densiore oblique incidens in medium rarius, ordinarie refringitur a perpendicularo. Sit in eadem Fig. 51. idem radius $s C$ ex vitro oblique transiens in aerem $A B$; dum radius luminis, seu motus vibratorius secundum directionem obliquam $s C$ propagatur usque ad superficiem aeris $A B$, globulus C utrique medio quasi communis facilius impellitur, & vibratur secundum partem sui hemisphęrii $t m o x$, quam secundum partem $t r u x$ ob rationem antea indicatam: atqui si facilius impellitur, & vibratur secundum partem $t m o x$, hoc ipso pulsus, ac motus vibratorius communicari, ac propagari deinceps debet jux-

juxta directionem, quæ magis recedit a perpendiculari, nimirum juxta directionem C i.

236. Dices 1. Gratis omnino, imo contra rationem asseritur, lumen facilius propagari per medium densius, quam per medium rarius. Prob. 1. Motus translatus corporum difficilius propagatur per medium densius, quam per rarius: ergo idem erit in lumine, quod etiam consistit in motu substantiæ corporeæ. 2. Si lumen facilius propagatur per medium densius, deberet lumen per vitrum transiens esse intensius, quam transiens per aerem. R. N. A. Si in materia de electricitate certum plerisque est hoc principium: pulsus, ac motus vibratorius facilius communicatur materiæ subtili existenti in corpore densiore, quam existenti in corpore rariore, cur hoc idem principium dicatur gratis assumi in materia de lumine, quod pariter consistit in pulsibus, ac motu vibratorio materiæ subtilis?

Ad prob. 1. Tr. A. N. C. Disparitas ex natura utriusque motus est manifesta, eaque talis, quæ magis stabilizat hanc hypothesin. Motus translatus corporum propagari, seu continuari non potest per medium aliquod, quin impellantur, ac loco moveantur particule ipsius medii; cum jam, quo densius est medium, eo plures ipsius particule sint impellendæ, ac loco movendæ (Phys. Gen. N. 182.) patet, cur motus translatus corporum difficilius propagetur, ac continueatur per medium densius. At vero dum lumen propagatur per aliquod medium, non ipsius medii particule sunt impellendæ, aut ad motum vibratorium concitandæ, multo minus loco movendæ; sed impellendæ, & ad motum vibratorium concitandæ duntaxat sunt particule materiæ subtilis in medio, per quod lumen propagatur, existentes: ergo inprimis numerus particularum ipsius medii neque faciliorem, neque difficiliorem reddere potest propagationem motus vibratorii luminis. Imo cum, quo plures sunt particule ipsius medii, sive quo hoc est densius, eo pauciores in eo dentur particule materiæ subtilis, ex hac ipsa paritate sequitur, quod eo facilius propagari lumen debeat per aliquod medium, quo illud est densius, modo poros habeat rite dispositos, & adhuc sufficientem in se contineat materiæ subtilis copiam. Nam motus translatus eo difficilius propagatur, quo plures, eo autem facilius, quo pauciores medii parti-

culæ sunt impellendæ, & loco movendæ: ergo etiam motus vibratorius luminis eo difficilius propagatur per medium, quo plures, eo autem facilius, quo pauciores in eo sunt particulæ materiæ subtilis impellendæ, ac ad motum vibratorium concitandæ; plures autem sunt in medio rariore, pauciores in denfiore. Transmissi prius antecedens, quia si medium aliquod sit viscosius, etsi fors sit multo rarius altero, motus translatus tamen difficilius per illud, quam per hoc continuabitur, ut de impedimentis motus est dictum.

Ad prob. 2. N. M. Ex hoc enim, quod materia subtilis in corpore denfiore existens facilius impellatur, non sequitur, quod impellatur fortius. Præterea cum in medio denfiore vitro v. g. pauciores sint pori, quam in aere, non poterunt tot radii luminis propagari per vitrum, quot possunt per aerem: cum ergo intensio luminis potissimum dependeat a numero radiorum, & vehementia vibrationum, lumen per vitrum transiens neutiquam erit intensius, sed propter radios multos a vitri partibus solidis interceptos, & aliorum in pororum latera incursum etiam debilius.

237. Dices 2. Si assumpta principia subsisterent, lumen semper deberet refringi ad perpendicularum, quoties oblique transit in medium densius, a perpendicularo autem, quoties ita transit in rarius: hoc non fit. Nam ut N. 190. dictum, lumen ex oleo olivarum transiens in boracem non refringitur, licet olei densitas ad illam boracis sit ut 6. ad 11.; sic etiam lumen ex alumine transiens in vitriolum Gedanense, aut ex aqua in terebinthinam refringitur ad perpendicularum, etsi alumen & vitriolum sint ejusdem densitatis, aqua vero densior sit terebinthina nimirum ut 8. ad 7. R. Principium generale a nobis hic assumptum consistit in eo, quod lumen semper refringatur, quoties diversa est facilitas, qua motus vibratorius communicatur, & propagatur per media, in quæ lumen oblique incidit, & quidem, quod semper ad perpendicularum, quoties incidit in medium, per quod motus vibratorius propagatur facilius, a perpendicularo, quoties in tale medium, per quod idem motus difficilius propagatur. Et hoc principium semper subsistit. At, quod major, vel minor facilitas communicandi, ac propagandi motum vibratorium materiæ subtilis unice, ac semper dependeat a majore, vel mino-

re densitate medii, a nobis nec asseritur, nec instar principii assumitur. Hinc in Forma D. M. Si major, aut minor facilitas impellendi, ac ad motum vibratorium concitandi materiam subtilem unice, ac universim dependeret a sola densitate medii, C. M. Si ea facilitas ab aliis etiam causis dependere potest, N. M. Quod autem major, aut minor facilitas impellendi, ac ad motum vibratorium concitandi materiam subtilem potissimum quidem, non tamen unice dependeat a densitate medii, ipsi etiam Adversarii tanquam certum supponunt.

238. Nam 1. in materia de electricitate ipsi, ac plerique alii supponunt, vim electricam ordinarie, & ferme plerumque facilius communicari corporibus densioribus, ac per eadem facilius etiam propagari, quam per corpora rariora, ut ipsa experientia demonstrat; hoc tamen non semper fieri: lignum enim, item funis cannabinus corpora sunt rariora, quam sit vitrum, pix, resina & hujusmodi; quo non obitante certum ipsi nobiscum tenent, vim electricam facilius communicari, ac propagari per illa corpora, quam per hæc, proin, quod idem est, materiam subtilem facilius impelli, ac ad motum vibratorium concitari in illis, quam in his; quia nimirum, ut dicunt, facilitas hæc non solum a densitate, sed etiam a structura partium, earumque inter se nexu dependere potest. 2. In motu translativo major, & minor facilitas propagandi, aut continuandi hujus motus etsi potissimum, tamen non unice dependet a densitate medii, sed simul etiam a structura partium, earumque nexu inter se, ut dictum antea. Cur igitur non idem etiam fieri posse dicamus in motu vibratorio luminis? Poterit ergo facilitas isthæc dependere a densitate medii, quia in medio densiore minor est materiæ subtilis portio ad motum concitanda; sed simul etiam poterit dependere a structura & nexu partium inter se, ob quæ fieri poterit, ut, licet in oleo v. g. & terebinthina, utpote rarioribus, detur major materiæ subtilis portio, quam in borace, & aqua, tamen materia hæc subtilis eadem, aut etiam majore cum facilitate impelli possit in illis, quam in his. Si quærant Adversarii, quomodo structura, & nexus partium possit aliquid conferre ad hanc motus vibratorii facilitatem, dico, mihi quidem naturam omnium corporum nondum satis esse perspectam. Si aliis ea magis per-

specta sit, dicant, cur, & quo fundamento in materia de electricitate idem supponant ipsi, quod ex nobis hic quærent.

239. Dices 3. Assumptis etiam his suppositis tamen non est ratio, cur radius s^c C (Fig. 51.) incidens in medium densius refringatur ad perpendicularum. Prob. Ex hoc, quod materia subtilis in medio densiore facilius impellatur, tantum sequitur, quod motus hic vel citius, vel facilius propagetur secundum directionem Cd , non vero, quod ab hac directione debeat deflectere; sicut in incidentia perpendiculari etiam facilius propagetur, tamen non declinat a priori sua directione. Neque 2. habetur ratio, cur, quo major est radiorum incidentium obliquitas, eo major cæteris paribus sit refraction. R. N. A. Ad prob. 1. iterum N. A. si sermo sit de incidentia obliqua. Refractio luminis sit in ingressu luminis in medium diversum, adeoque tunc, quando globuli materię subtilis utriusque medii superficiiei quodammodo communis ad motum vibratorium sunt concitandi. Si jam globulus C utrique medio communis impellatur a globulo n in medio rariore existente, impulsus quidem sit secundum directionem Cd , &, si nihil circa globulum C esset, quod motum ipsius impediret, globulus sic impulsus re ipsa moveretur secundum directionem facti impulsus Cd . Si autem globulum hunc undique ambirent alii globuli materię subtilis, sed ita, ut illi, qui sunt circa partem hemisphærii $tr u$, facilius possent impelli, quam ii, qui sunt circa partem tmo , globulus C ab his determinaretur, ut accepto impulsu deflectat a directione impulsus Cd , & magis accedat ad perpendicularum fg , adeoque moveatur secundum directionem Ce , ut de refractione motus translativi docent omnes.

At quia globulus C undique ambitur aliis globulis materię subtilis, accepto impulsu loco sensibilibiter moveri non poterit, sed comprimetur; comprimi non potest, quin ad latera m & u extendatur, adeoque axis mu fiat longior; neque axis hic fieri longior potest, quin materia subtilis hinc ex parte u , illinc ex parte m impellatur; cum jam materia subtilis ex parte m , utpote in medio rariore difficilior impellatur, quam ex parte u in medio densiore, globulus C iterum determinabitur, ut deflectat a directione impulsus

sus $C d$, & magis accedat ad perpendicularum. Aliud est in incidentia perpendiculari, si globulus C impellatur secundum directionem $f C g$: ex utroque enim latere t & x materia subtilis ambiens æqua facilitate impellitur, siue spectetur materia subtilis medii rarioris superiorem globuli partem ambiens, siue illa medii densioris ambiens partem globuli inferiorem. Ex his amplius patet, cur radius ex medio densiore in rarius incidens deflectat a perpendicularo, quia nimirum tunc materia subtilis, ambiens latera $r u$ & x , difficilius impellitur, quam illa, quæ ambit latera $t m o$.

Ad 2. N. A. Ratio autem est, quia; quo major est obliquitas incidentiæ, eo major portio lateris $t m o$ existit in medio rariore, siue eo major portio istius lateris est applicata materiæ subtili, difficilius impellendæ; si autem major portio materiæ difficilius impellendæ ambit latera $t m o$, ab illa etiam fortius determinabitur globulus C ad recedendum a directione impulsus $C d$, ut ex antea dictis, atque ex iis intelligi potest, quæ juxta omnes sunt in refractione motus translativi. Cur autem eo major ordinarie sit refractione luminis, quo magis in densitate differunt media, ratio est, quia eo major ordinarie est vel facilitas, vel difficultas impellendi, ac ad motum vibratorium concitandi materiam subtilem in mediis istis contentam. Si demum quis quærat, cur constans semper sit ratio sinus anguli inclinationis ad sinum anguli refracti in ingressu luminis ex aere in vitrum, aut vicissim, vel ex aere in aquam, dico, quod ideo, quia constans etiam est ratio facilitatis, aut difficultatis impellendi materiam subtilem in istis mediis existentem. Atque hæc, quæ de refractione luminis dicta sunt, saltem æque verisimilia videri fors poterunt, ac ea, quæ in altera hypothefi allata superius sunt. Videamus modo

§. VIII.

QUOMODO EXPLICANDA REFLEXIO LUMINIS?

240. **N**ewtonus, & qui cum ipso sentiunt, docent, radium luminis reflecti non ob ipsum impactum in partes solidas corporis reflectentis, sed jam ante

ante ipſum impactum ob vim nimirum repellentem; quæ faciat, ut radii nunquam immediate contingant ſuperficiem refleſcentem vitri v. g.; quoniam vero in eodem vitro datur vis alia attrahens, inde fit, ut aliqui radii tranſeant. Sic etiam vis attrahens in cauſa eſt, cur ex altera vitri ſuperficie non omnes radii egrediantur in aerem, imo, cur ſub certo angulo nulli omnino radii in aerem tranſeant. Hac ipſa vi attrahente, & repellente explicant luminis refractionem; quando nimirum major eſt vis attrahens, dabitur refractione ad perpendicularum; ſi prævaleat vis repellens, aut in altero major ſit vis attrahens, refractione erit a perpendicularo. Verum ſuppoſita etiam hac vi gemina, nullibi mirandas magis proprietates deberet vis iſta induere; quam hic: alias enim vis attractiva ſemper eſt proportionata maſſæ, eſtque hoc principium Newtonianis receptiſſimum; hic vero non poſſe illam eſſe proportionatam maſſæ, patet ex dictis de oleo, & borace, de alumine, & vitriolo, de aqua & terebinthina.

De reflexione autem ut loquamur, id ſolum jam ſatis mirum, quod vitrum in eadem ſuperficie partim repellat, partim attrahat radios. Neque rationes, quibus probare conantur, reflexionem luminis fieri non ab ipſa ſuperficie corporis, adeo convincentes ſunt. Earum potiſſimam inferius adducemus N. 262. Quod autem pilus, filum, acus &c. ſi luci opponantur, majorem projiciant umbram, quam tangentes iſtorum corporum deſiniant, ratio potiſſimum ex penumbra petitur, quæ in tenui adeo lineola ab umbra diſcerni ſatis haud poteſt. Penumbra autem iſta ex eo oritur, quod lux, cui pilus v. g. opponitur, ſit iſto amplior; unde umbra ita projicitur, ut quo longius illa recedit a pilo, eo amplius divaricetur, licet umbræ ita divaricatæ identidem plus luminis admisceatur, donec omnis demum umbra evaneſcat. Suppoſito igitur, quod reflexio luminis fiat ob ipſum impactum in ſuperficiem corporis refleſcentis, videndum, utrum non etiam ea reflexio, quæ ſit a corporibus diaphanis (nam de opacis difficultas adeo magna eſſe non poteſt) ſat convenienter explicari poſſit aſſumptis iſdem principiis, per quæ refractionem explicare conati antea ſumus.

241. Propoſitio I. Lumen ex medio rariore in medium denſius, v. g. ex aere in vitrum, quocunque modo tran-

transiens aliquantum reflectitur, & hujus reflexionis causa præcipua sunt partes solidæ mediæ densioris. Membrum primum certum est ab experientia, & ratione mox danda. Membrum alterum probatur. In corpore densiore plures sunt partes solidæ, quam in rariore: ergo radii aliqui ex rariore egressi impingunt in partes solidas densioris: atqui si radii aliqui in has impingunt, ob ipsam earundem soliditatem debent reflecti: cum enim globuli luminosi per vibrationem compressi restitui non possint versus partes istas solidas, restitutio fieri debet in partem oppositam, ferme uti globus eburneus in obicem etiam non elasticum incurrens per ipsam sui restitutionem determinatur ad reflexionem. Quod autem potissima ratio reflexionis in hoc casu sint partes solidæ ipsius mediæ densioris, ex eo patet, quod materia subtilis in corpore densiore existens facilius impellatur, ac ad motum determinetur, quam existens in corpore rariore: non igitur est ratio, cur ob incursum in ipsam materiam subtilem intra poros latentem adeo notabilis hic fieri reflexio debeat; quia globuli in medio rariore vibrati restitutio fieri potest versus eam ipsam materiam, quæ est in medio densiore.

242. *Propositio II.* Lumen ex medio densiore in medium rarius, v. g. ex vitro in aerem, quocunque modo transiens, etiam, & quandoque admodum copiose reflectitur; & quidem hujus etiam reflexionis causa aliqua sunt partes solidæ mediæ rarioris, sed potissima est ipsa materia subtilis in corpore rariore existens. Primum membrum denuo patet ab experientia, de qua superius, maxime Num. 205., & ex ratione nunc danda sequitur. Ostenditur membrum secundum, & imprimis, quod reflexio aliqua saltem fieri debeat ob incursum in partes solidas aeris, ex Num. priore inferitur: etsi enim pauciores sint partes solidæ in aere, quam sint pori in vitro, tamen pori aeris non ubique ita semper respondebunt poris vitri, ut nullus omnino radius ex vitro in aerem transiens debeat hinc inde impingere in aliquam particulam solidam aeris; sic autem impingens reflectetur. Quod vero hoc casu reflexionis causa potissima sit ipsa materia subtilis in medio rariore existens, sic probatur.

Materia subtilis in medio rariore existens difficilius impellitur, ac ad motum vibratorium concitatur, quam existens in medio densiore ex §. præcedente: ergo potest,

ac debet etiam ipsa esse causa reflexionis. Prob. Cons. Si materia subtilis in medio rariore difficilior impellitur, tunc ob hoc ipsum particulæ materiæ subtilis, quæ utriusque medii superficiæ quasi communes sunt, accepta vibratione facilius restituuntur versus medium densius, quam versus medium rarius, quin etiam versus medium densius aliquantulum fors repelluntur: atqui si hoc, ob hoc ipsum debet dari reflexio: ergo. Minor videtur satis clara: lumen enim reflecti aliud non est, quam quod particulæ materiæ subtilis vibratæ in partem oppositam se se restituentes, aut in hanc partem aliquantum repulsæ contiguas sibi ejusdem materiæ particulas sub debito angulo impellant, atque ad similes suis vibrationes concitent. Major pariter videtur certa: si enim globulus aliquis elasticus incurrat in alium, qui quocunque ex capite difficilior impellatur, aut ad motum concitetur, prior ille necessario reflectetur. Imo si ponatur integra series globulorum elasticorum, etiam quoad massam æqualium, & primus in totam hanc seriem directe incurrat, ultimus vero quacunque ex causa difficilior ad motum concitetur, propter resistentiam hujus vibrationes antea per singulos globulos propagatæ per totam illam seriem quasi revertentur, & ille globulus, qui prius incurrerat, repellitur. Quod denique hujus reflexionis causa potissima sit materia subtilis in medio rariore existens, ex eo sequitur, quod partes solidæ aeris sint paucissimæ, & ad minimum vigesies milles plus pororum in eo detur, quam materiæ propriæ; proin partes solidæ etfi aliquam, tantam tamen causare reflexionem nequeant, quanta in aere sæpissime datur.

243. Æqualitas anguli reflexionis cum angulo incidentiæ in reflexione luminis ex iisdem principiis repeti posse videtur, ex quibus horum angulorum æqualitas in motu locali declarata est Phys. Gen. Dissert. IV. Art. VI. §. 1. Cum enim vibrationes materiæ luminosæ fieri non possint absque impulsu particularum materiæ subtilis versus obicem reflectentem, eadem omnino vi, & eodem modo per impulsum vibratorium sub dato angulo incidentiæ allidentur in obicem, eumque percutient, quæ vi alliderentur, & obicem percuterent, si motu vere locali sub eodem angulo in obicem impingerent ea motus quantitate, quæ respondet quantitati vibrationis; nihil certe apparet, cur id in motu vibratorio luminis fieri aut non possit, aut non debeat. Hoc autem si est, omnia
eodem

eodem modo se habebunt, ac si globulus eburneus v. g. sub angulo quocunque in obicem impingeret, qui post impactum ex datis loco citato principiis redibit per talem lineam, quæ angulum reflexionis faciat æqualem angulo incidentiæ.

244. His suppositis ea, quæ de reflexione luminis habentur, phænomena satis convenienter explicari poterunt. I. Quod omnem refractionem luminis semper committetur aliqua reflexio, dicunt adversarii, constare ex certa Mathematicorum, ac Philosophorum omnium sententia. Sic utique est; sed rationem physicam per hoc non assignant. In nostris principiis id necessario fit ex ipsa natura luminis, & corporum, in quibus refractionis, & reflexio fit. Vel enim refractionis fit in medio densiore, vel in rariore? Si in densiore, radii quamplurimi incurrunt in partes solidas ipsius corporis, quæ, cum vibrationes materiæ luminosæ recipere, & ulterius propagare non possint, erunt obex necessario determinans radios sic incurrentes ad reflexionem. Si refractionis fiat in medio rariore, præterquam, quod etiam hic partes solidæ aliquid conferre valeant, ipsa materia subtilis in medio rariore difficilius impellenda causare reflexionem debet ex N. 232. & 242.

245. II. Quod per duas laminas vitreas, inter quas aer intercipitur, minus luminis transeat, quam per alias duas, inter quas continetur aqua, ex eodem Numero 242. habetur ratio. Materia namque subtilis in aqua medio densiore facilius impellitur, ac ad motum vibratorium concitatur, quam in aere, medio summe raro; si autem radii, seu vibrationes luminosæ facilius propagantur per interceptam aquam, quam per interceptum aerem, minus luminis reflectetur in priore, quam in casu posteriore, atque adeo post laminas aqua discriminatas plus apparebit luminis, quam post illas, inter quas comprehenditur aer. Neque asserto huic obesse potest, quod plures sint partes solidæ in aqua, quam in aere; quia inprimis numerus particularum solidarum ipsius medii per se nihil confert ad vibrationes luminis vel facilius, vel difficilius propagandas, ut dictum Num. 236. atque etiam partes solidæ aquæ tamen sunt pauciores, quam vitri, proin in illa plures, aut ampliores erunt pori, quam in hoc: poterunt igitur radii saltem plerique propagari per aquam, etsi eorum aliqui in partes aquæ solidas incurrentes reflectantur, quod fieri

ex eo etiam constat, quod per laminas istas aqua discriminas minus luminis transmittatur, quam transmittetur per unicam vitri laminam, quæ utriusque crassitiem adæquaret. Ex quo ipso habetur ratio alterius experimenti, in quo assumitur lamina vitrea duos adæquans digitos, & aliæ duæ laminæ, quæ simul junctæ priori quoad crassitiem sunt æquales. Posteriores istæ plus luminis reflectunt, quam illa prior; quia inter has contentus aer, aut potius materia subtilis in aere copiosissima reflexionem valde notabilem ex datis principiis causat.

246. III. Quo major est obliquitas luminis incidentis, five quo minor est angulus incidentiæ, eo plus luminis reflectitur. Sint in Fig. 52 Tab. V. duo fasciculi luminosi ejusdem densitatis *sce*, & *dmr* sub diverso angulo incidentes in laminam vitream *ab*, plus luminis reflectitur de primo *sce*, quam de altero *dmr*, idque in quodcunque medium diaphanum, modo uterque in idem, sub datis angulis incidant. Ratio hujus ex duplici potissimum capite dependere videtur. 1. Dum fasciculus *sce* adeo oblique in superficiem *ab* incurrit, in majorem superficiem reflectentis partem impingit, quam fasciculus *dmr*, ut ex ipsa obliquitate incidentiæ sequitur, & ostendunt lineæ *ce*, & *mr* amplitudinem spatii, in quod uterque fasciculus impingit, metientes: igitur etiam plures particule materiæ luminosæ ex fasciculo *sce* impingunt in superficiem reflectentem, quam ex fasciculo *dmr*: atqui si plures impingunt, plures etiam ad reflexionem determinantur. 2. Quo major est obliquitas luminis incidentis, eo minor est impulsus materiæ luminosæ secundum directionem perpendicularem; si eo minor est hic impulsus, eo facilius ad aliam directionem determinari poterunt vibrationes luminis, ferme ut sit in lapillo admodum oblique in aquam projecto. Hinc etiam habetur ratio, cur, quo major est refractio, eo major etiam cæteris paribus sit reflexio; quia refractio eo major est, quo major est obliquitas incidentiæ.

247. IV. Ex iisdem principiis reddi fors etiam ratio poterit, cur radius oblique in vas recipiens aere crassiore vacuum incidens sensibiliter totus reflectatur. Quo enim rarius est medium, eo difficilius ordinarie materia luminosa in eo existens impellitur: quare cum sub hoc recipiente aer sit non nisi rarissimus, materia vero subtilis ferme sola & unica, materia luminosa in vitro existens,

ac verſus iſtam difficillime impellendam vibrata, repelletur eo, ubi minor eſt materiæ ſubtilis impellendæ difficultas, nimirum verſus oppoſitam partem vitri, in quo utpote medio denſiore ea facilius impelli, ac ad motum vibratorium concitari poteſt. In aquam vero, oleum, aut mel interiori recipientis ſuperficie illitum radius tranſit, quia materia luminofa in hiſ, utpote mediis denſioribus, exiſtens facilius impellitur, quam in aere ſumme rarefacto. Cur autem, dum in idem vas recipiens radius incidit perpendiculariter, non totus reflectatur, ratio eſt, quia, cum omni ex parte æqualis ſit vel facilitas, vel difficultas impellendi materiam luminofam ſub recipiente collectam, nihil eſt, quod radium ad aliam directionem determinet; & cum vibrationes ſecundum hanc directionem ſine intermiſſione ſint continuæ, poterit denique, & debet etiam materia ſubtilis ſub recipiente exiſtens ad ſimiles vibrationes determinari.

248. V. Radius in trigonum rectangulare ſub angulo ſemirecto, aut adhuc minore incidens ſenſibiliter totus reflectitur. Nam inprimis in omni medio, quo minor eſt angulus incidentiæ, eo plus luminis reflectitur; præterea materia ſubtilis in aere exiſtens, per quem radius ex trigono egrediens deberet propagari, multo difficilius impellitur, atque ad motum vibratorium concitatur, quam exiſtens in vitro; denique in obliqua adeo incidentia impulſus ſecundum directionem perpendicularem non amplius eſt adeo vehemens: debet igitur materia luminofa eo repelli, ubi minor eſt difficultas, ſeu minor reſiſtentia. Id quod ex principiis de motu refracto receptis uberius declaratur. Dum lumen ex vitro oblique tranſit in aerem, reſractio eſt talis, ut ſinus anguli inclinationis ad ſinum anguli reſracti ſit ut 2. ad 3., quemadmodum evidens oſtendit experientia: cum igitur reſractio a perpendiculari fiat ideo, quia major eſt difficultas impellendi materiam ſubtilem in medio reſringente, legitime inferitur, materiam ſubtilem in aere exiſtentem tanto difficilius impelli, quam illam in vitro, quanto major eſt declinatio radii reſracti a prima ſua directione. Jam vero dum radius luminis ſub angulo ſemirecto ex vitro in aerem incidit, declinatio radii reſracti a prima ſua directione jam eſt tanta, ut radius ille non amplius per aerem propagetur, quemadmodum oſtenderet ſinus anguli reſracti, qui in tali caſu jam extra circ-

culum caderet: igitur radius redibit in eam partem, versus quam facilius impelli potest materia luminosa, nimirum versus vitrum, sicque saltem sensibilibiter totus reflectetur. Non autem ita reflectetur, si vel digito fortius appresso ad latus inferius removeatur aer, aut trigoni latus inferius incumbat aquæ, quia in utroque casu remota est causa reflectens, & per aquam facilius impellitur materia subtilis, quam per aerem. Atque hæc de diaphaneitate aliquanto fusius pertractata si non certa omnino, ac plane dilucida quis esse existimet, meminisse velit, jam ad ingressum monuisse me, satis hic esse debere, si afferantur verosimilia, aut etiam conjecturæ tantum.

SECTIO V.

DE COLORIBUS.

249. **C**oloratum dicimus objectum, quod lumine perfusum ita visus organum afficit, ut eam, quam coloris vocamus, sensationem in nobis excitet. Duplex ideo color distingui solet, alter *objectivus* seu *fundamentalis*, alter *formalis*. Ille est in ipso objecto colorato; hic vero in medio diaphano, per quod usque ad oculum propagatur. Color itaque fundamentalis est illa corporis affectio, per quam ipsum corpus tale est, ut accedente lumine coloratum appareat. Color formalis est id, quo visus organum ita afficitur, ut sensatio coloris in anima consequatur. Alio modo dividuntur colores in transeuntes, & permanentes. *Transeuntes* dicuntur, qui objectis, in quibus forte apparent, non stabiliter inhaerent, quales videmus in lride, spuma, collo columbæ radiis solaribus obverso &c. *Permanentes* vocant, qui objectis sunt quodammodo affixi, iisque inhaerent stabiliter, talis est albedo lactis, rubedo rosæ &c. Alios denique dicunt *extremos*, alios *medios*; extremos vocant albedinem, & nigredinem, intra quos tanquam terminos cæteri quodammodo continentur; qui autem intra eos continentur, ut ruber, flavus, cærulens &c. appellant medios. Quamquam, ut videbimus, albedo, & nigredo proprie loquendo locum inter colores non habeant.

§. I.

§. I.

IN QUO CONSISTANT COLORES?

250. **D**ubium non est, quin colores transeuntes aliud non sint, quam lumen varie modificatum: colores enim isti a sola luminis incidentia, & modificatione oriuntur, illa cessante, aut variata cessant, aut variantur etiam ipsi, objecto licet non mutato. Sic ubi prisma in certo situ fuerit constitutum, incidentes in ipsum, varieque refracti radii vivacissimos in obverso pariete colores exhibent; imo etiam pulvisculi in radiorum hujusmodi serie volitantes varios eosque amoenissimos colores induunt, qui tamen tum in his, tum in pariete mox dissident, ubi prismatis situs vel tantillum fuerit mutatus. Sic etiam Iris aliud non est, quam lumen in particulis roscidis varie refractum, & reflexum, oculosque afficiens, ut suo tempore uberius ostendetur. Controversia igitur devolvitur ad colores permanentes, de quibus sit

251. **Propositio I.** Color formalis objecti etiam permanentiter colorati in solo lumine modificato consistit. **Prob.** Ex una parte certum est, colorem formalem objecti transeunter colorati in solo lumine modificato consistere; ex altera parte nulla est necessitas colorem formalem objecti etiam permanentiter colorati a lumine modificato distinguendi; cum hi eodem modo oculum afficiant, quo colores transeuntes, nec ullum inter utrosque discrimen interveniat, nisi, quod causa modificans lumen stabilis sit in illis, non item in his. Et sane color formalis cujuscunque demum objecti aliud non est, quam id, quod ab objecto ad oculum usque pertingens visus organum ita afficit, ut pro diversitate impressionis in retinæ fibrillis causatæ varia etiam sensatio, aut visio. varii coloris excitetur; tale autem est lumen varie modificatum, seu varia vibratio radiorum luminis plurium, vel pauciorum, fortius, aut languidius; celerius, aut lentius nerveas retinæ fibrillas impellentium, unde necessario oriatur diversa vibratio, & agitatio spirituum, quibus anima ad diversas sensationes determinatur. Id quod sequens experientia abunde testatur. Si quis solem intentis aliquamdiu oculis intuitus fuerit,

iis subito clausis sentiet adhuc velut imaginem solis ita, ut primo claram adhuc lucem, tum debiliorem albicantem, dein rubrum colorem, postea flavum, subinde cæruleum, postremo nigrum, & quasi tenebras cernere sibi videatur, quo casu cum colores ita varientur, sicuti motus a lumine impressus, & in fibrillis oculi perdurans variatur, ac remittit, donec tandem omnis desinat, perspicuum est, colores a vibratione varia radiorum diversa vi, & impulsu oculos percellentium pendere.

His accedit, quod pro varietate luminis varius etiam appareat color. Sic color, qui ad lumen solis est viridis, ad lumen candelæ cæruleus apparet. 2. Ligni, aut nigri linteaminis accensi fumus ad lucem modicam niger, vel cæruleus, ad intensiorem flavus, vel albicans conspicietur. 3. Aqua ligno nephritico tincta si media ponatur fenestram inter, & oculum, apparet rubra; si vero oculus in certa distantia fuerit medius inter fenestram, & aquam, cærulea videbitur. 4. Quod corpora diaphana, uti aqua, crystallus &c. de se nullius coloris sint, ratio alia non est, nisi quod corpora hæc lumen non ita reflectant ad oculum, quemadmodum opaca: quamprimum enim ad lumen debite reflectendum apta efficiuntur, mox colorem aliquem exhibent, uti patet in candidissima spuma aquæ, pulvisculis vitri contusi, aliisque, in quibus utique nulla qualitas producitur, sed solum lumen certa ratione vibratum ad oculos regeritur.

252. Propositio II. Color fundamentalis objecti permanenter colorati consistit in certa textura corporis, id est, in certa magnitudine, configuratione, & situ particularum. Color enim fundamentalis aliud non est, quam illa affectio corporis, quæ colorem formalem, five certam luminis modificationem causat: sed hoc est certa textura corporis: si enim alia est magnitudo, configuratio, & situs partium, alia etiam erit refractio, reflexio, & vibratio luminis, diverso pariter modo organum visus afficientis. Certe corpus opacum, & colore aliquo imbutum ob id solum nativum sibi colorem mutat, quod partes ipsius aliam configurationem, magnitudinem, ac situm acquirant. Sic marmor etiam nigrum in minutissimos pulvisculos contusum congenitum sibi colorem mutat in album; folium herbæ, aut floris digito compressum alium induit colorem; cancerorum testæ vel solis calori expositæ, vel in aqua ferventi rubescunt,

ma-

maxime, si sal, aut etiam acetum aquis immisceatur, quia sal, & acetum utpote corrosiva squammarum texturam magis immutant. Innumera his similia asserunt Chymici. Lignum Brasilum aquæ immixtum hanc rubedine tingit; addito oleo vitrioli color ruber transit in flavum; in purpureum vero, si affundatur oleum tartari per deliquium. Quænam porro sint causæ, quæ ratio, quibus lumen diversimode modificetur, inferius declarabitur.

253. Dices 1. Color objecti permanenter colorati est in ipso objecto: ergo non consistit in lumine modificato. Ant. habetur ex eo, quod omnes judicent, murum etiam de nocte esse album. R. D. A. Color fundamentalis &c. est in ipso objecto, C. A. formalis, N. A. Homines judicant, esse, & noctu etiam manere in muro id, ob quod accedente lumine murus appareat albus; id autem est color fundamentalis. Si qui aliter judicent, errant, sicut errant, dum existimant, spumam vini, aut cerevisiæ, ac etiam nivem hoc modo esse candidam; cum hæc albedo in sola luminis modificatione certo consistat, & nix microscopio inspecta non tam alba, quam subdiaphana instar glaciei appareat. Et quis sensus rudium esset de coloribus Iridis, prismatis, & ejusmodi?

254. Dices 2. Si color fundamentalis consisteret in ipsa textura corporis, tunc in corporibus eundem colorem referentibus deberet dari eadem textura, & in corporibus diverso modo coloratis textura diversa: hoc non est credibile: quis enim credat, in marmore albo, in panno, & lacte albis dari eandem, diversam vero texturam in tribus v. g. pannis, ex eadem fors lana confectis, quorum unus sit albus, alter niger, tertius ruber? R. D. M. Deberet dari eadem, vel diversa textura sub ea ratione, quæ requiritur ad lumen eodem, vel diverso modo modificandum, C. M. sub omni ratione, & etiam quoad partes majores, N. M. Corpora eodem vel diverso modo colorata sæpissime non habent eandem, vel diversam texturam partium majorum, ut ostendunt exempla in objectione allata; habent tamen semper eandem, vel diversam texturam partium minimarum, saltem in ordine ad modificandum lumen, sive ad illud eodem vel diverso modo reflectendum, refringendum, aut vibrandum, quod quam non gra-

tiæ afferatur, tum ex Num. 252. tum ex fequentibus intelligi poterit. Illud interim nota, per texturam corporis non intelligi folum exteriorem fuperficiem corporis, fed etiam certam partium interiorum difpofitionem, aptam ad radios pro diverfitate colorum aliter reflektendos, refringendos, ac vibrandos, aut etiam fiften-
dos, vel transmittendos.

255. Dices 3. Liquores quomodocunque colorati habent fimilem fuperficiem: omnes enim componunt fe ad æquilibrium: ergo omnes deberent habere eundem colorem. R. 1. N. A. Potest enim dari æquilibrium, etfi non omnes minimæ partes fuperficie extimæ habeant eandem omnino figuram, & fitum. R. 2. Om. A. N. C. Nam color a textura partium fuperficiem componendum dependet, & radii luminis non in fola fuperficie extima, fed etiam in medio varie alterari, & modificari poffunt, cum in liquidis coloratis plurima hæreant corpuscula, quæ lumen certa ratione refringunt, & reflektunt.

§. II.

QUAM MODIFICATIONEM LUMINIS REQUI- RANT COLORES EXTREMI?

256. PROPOSITIO I. Corpus opacum apparet album, quando ea datur partium ipsius textura, ex qua oriatur vivida, non interrupta vel omnium, vel plurimorum luminis adhuc confufi radiorum in omnem partem reflexio ita, ut pauciffimi vel transmittantur, vel fiftantur in ipfo corpore. Lumen enim copiofius, magis collectum, femper fit albicans, ut apparet in foco speculi cauftici, in flamma furni vitriarii, aliisque. Sic etiam charta alba admiſſos in cameram obſcuram ſolis radios copioſiſſime ſimul, ac vivaciſſime reflektit; aliud vero corpus coloratum chartæ ſubſtitutum tanto minus luminis reflektit, quanto propius accedit ad nigredinem. Textura porro corporis albi requirit certam figuram, fitumque particularum. Figura quidem maxime opportuna videtur eſſe vel ſphærica utpote ad lumen in omnem partem reflektendum aptiſſima? vel polyædrica, plurimis nimirum planulis, uſque lævigatiſſimis terminata,

at-

atque ita æquivalens figuræ sphæricæ: hinc enim futurum videtur, ut singulæ particulæ superficiei ita figuratæ, veluti totidem exilissima specula, radium aliquem, proin omnes simul sumptæ plurimum luminis reflectant, & quidem in omnem partem; cum in omnem partem aliqua partium plana obvertantur. Situs vero particularum is esse debet, ut ipsæ sint admodum conjunctæ, & neque nimium promineant, neque etiam nimium sint depressæ: si enim partes essent sejunctæ, radii non pauci in cavitatibus istis quasi absorberentur; si nimium prominerent, radii plures ab istis introrsum reverterentur, ac proinde propter umbreculas frequentiores corpus appareret fuscum; si demum partes ubique omnes nimium essent depressæ, ac lævigatæ ita, ut speculi superficiem exhiberent, radios in unam tantum partem reflecterent.

257. Propositio II. Corpus opacum apparet nigrum, quando vel nullos, vel admodum paucos luminis radios reflectit ad oculum, & reliquos ferme omnes restinguit, aut suffocat. Constat ab experientia, qua habemus, illud apparere nigrum, quod vel lumine perfusum non est, vel luminis vix quidquam ad oculos reflectit: hinc sub noctis adventum sensim omnia ad nigredinem vergunt. Idem habetur in duobus speculis, quorum unum ex marmore albo, alterum ex nigro confectum est: illud enim soli obversum imaginem solis valde lucidam exhibet, tantamque radiorum copiam reflectit, ut iis ferendis oculus non sit; nigrum vero imaginem solis exhibet haud admodum splendentem, radiique ex eo reflexi non multum offendent oculos, certo indicio, eos non nisi paucos, ac oppido raros esse. Hoc autem si est, a corpore nigro ferme nulla in nerveis oculi fibrillis, lisque paucissimis fiet motio, aut vibratio, quam fibrarum quietem nigredinis sensatio comitatur. Textura igitur corporis nigri ea erit, quæ constet particulis pyramidalibus, conicis, cylindricis, aliisque irregularis figuræ, per crebras cavitates interruptis; quia corpora sic figurata radios paucissimos ad oculum reflectunt, cæteris introrsum reflexis, & intra cavitates quodammodo suffocatis.

258. Hinc jam redditur ratio sequentium. I. Cur vitrum, crystallus, marmor, aliaque friabilia minutissime contusa albescant; quia singula pulveris, illius cor-

puscula, ut per microscopium detegitur, figuram habent polyædricam, & adeo vicina sunt inter se, ut interjecta illis spatiola sensum omnem effugiant: copiosi igitur luminis radii in omnem partem reflectentur. Carbo tamen in pulverem contusus nunquam albescit; quia in minimis ejus granulis notantur adhuc plurimæ cavitates, striæ, ac irregularis figuræ particulæ, quæ lumen quasi absorbent. II. Cur spuma ipsius etiam atramenti albescat, quia spuma, ut observat Gassendus, nihil est aliud, quam congeries confertissima bullularum, quarum puncta, ex quibus lumen reflectitur, sunt inter se vicinissima, multumque in se aeris continent, ut adeo ob continuam mediæ diversitatem plurimas versus oculum, & in omnem partem fieri reflexiones necessario fit. Unde etiam intelligitur maxima nivis albedo, quæ est instar spumæ congelatæ, magis adhuc conjunctas habens particulas, quam ipsa spuma. III. Cur oleosa cum aqueis mixta lactis albedinem induant; quia nimirum partes oleosæ in innumeros globulos divisæ totidem quasi specula minima formant, a quibus magna luminis copia in omnem partem reflectitur. IV. Cur corpora quædam non possint scabra reddi, quin hoc ipso albescant, nec lævigari, quin albedine suâ extuantur. Sic argentum igne purgatum per decocturam tartari ita exasperatur, ut radios in omnem partem reflectens albescat; lævigatum vero albedinem deperdit, & radios speculi instar reflectit. Per specula nimirum, quorum superficies lævigatissima est, sola radiorum, ut venerant, conjunctorum directio mutatur, quin isti in omnem partem dispergantur: hinc dum specula radios, prout eos exceperunt, conjunctos, nec immutatos regerunt, objecta potius, a quibus radii venerant, quam se ipsa spectanda exhibent. V. Cur corpora apprimè alba visum plus fatigent, quam alia; nimia nimirum est, quam reflectunt, radiorum copia.

VI. Cur ignis carbones, aliaque sui vestigia relinquat nigra: per ignem enim particulæ innumeræ, humidæ potissimum, cum fumo, ac fuligine e corpore expelluntur, atque ita porulos, & cavitates plurimas, in quibus radii absorbentur, relinquunt. Hinc etiam est, cur artifices vitriolum, aliosque liquores corrosivos adhibeant ad pannos nigro colore tingendos: corrosiva enim plures, amplioresque meatus aperiunt. VII. Cur

nigra cæteris paribus sint albis leviora, sic lignum gravius est carbone, & marmor album gravius nigro; cum enim partes corporis nigri magis sint a se invicem sejunctæ, quam partes corporis albi, minorem quoque materiæ copiam, proin etiam minus pondus habebit corpus nigrum. Ideo etiam pannus niger citius atteritur, quam alio colore tinctus, cum in illo plurimarum partium nexus in ipsa tinctura jam sit solutus. VIII. Cur pannus albus facile assumat colorem nigrum, non item pannus niger colorem album; partes nimirum a liquoribus corrosivis figura sua facile spoliari, atque ita exedi possunt, ut multis porulis, ac cavitatibus corpus fiat pertusum; at particulæ semel ita corrosæ, & a se mutuo sejunctæ haud ita facile obtinent pristinam figuram, & conjunctionem. IX. Cur alba difficiliter speculo, aut vitro caustico accendantur, quam nigra; cur vestes albæ magis arceant solis æstum, quam nigre, ut experiri potest, qui uni manui chirothecam albam, alteri nigram inducit, ac utramque manum soli æstivo exponit; cur ova nigro colore tincta, & soli æstuant in plagis meridionalibus exposita intra breve tempus coquantur, non item alba. Alba nimirum radios ferme omnes reflectunt, atque ita ut minus luminis sic & minus caloris recipiunt; nigra vero cum plurimum luminis, ac radios ferme omnes in se se admittant, internæ eorum partes facilius ad motum concitari poterunt.

259. Ob. I. Credibile haud est, marmor album constare particulis aliam figuram, situm, ac nexum habentibus, quam marmor nigrum; sensus certe hic reclamant. R. Quid sit, quid non sit credibile, non solo testimonio sensuum, tactus præcipue crassioris, definiendum est, secus multa, quæ demonstrata modo sunt, evaderent incredibilia. Sensibus jungenda ratio, & utriusque subsidio, quid vero videatur similis, indagandum. Atqui præter dicta Numeris præcedentibus constat, marmor nigrum soli expositum multo citius, vehementiusque incallescere, quam album; album etsi lævigatissimum imaginem objecti illuminati nunquam ordinate reflectere, cum tamen id faciat marmor nigrum &c. Horum autem, & similium quæ demum erit ratio, si figura, situs, ac nexus partium utrobique est prorsus idem? Prioris itaque ratio erit, quod particulæ marmoris nigri eam figuram, situm, ac nexum habeant, quæ radios plerosque in interiora

admittant, paucos reflectant, secus, ac faciat marmor album; hoc vero, utut lævigatissimum sit, constet tamen plurimis superficiei sphaericis, quæ lumen non in unam, sed in omnem partem reflectant; hinc radii dispersi imaginem objecti distinctam non dabunt: cum tamen nigrum probe lævigatum, nec habens superficies ita sphaericas, radios ab objecto venientes aliquos ordinatius reflectere, proin imaginem objecti saltem sub certo situ sat distincte exhibere possit. Notum præterea est, fuisse Ultrajecti cæcum, tactus adeo acuti, quo jejunos adhuc colores ita exacte noverit discernere, ut vix unquam erraverit. Nimirum sicut diversa rigiditas, nexusque partium corporis sonori causat diversam modificationem, seu vibrationes aeris, atque hac ratione diversos sonos; ita diversa textura corporum causabit diversam modificationem, aut vibrationes luminis, sicque diversos colores formales.

260. Dices 1. Charta candida plures in superficie habet cavitates, quam particulas sphaericas, aut polyædricas: ergo. R. 1. Sit hoc de superficie extima; modo debita configuratio sit texturæ interioris, a qua plurimæ adhuc reflexiones fieri possunt. R. 2. D. A. habet cavitates plures, si spectentur partes crassiores, atque ita, ut tamen tota textura superficie extima simul ac interioribus constans, habeat plurimas particulas polyædricas, C. A. ut hoc non sit, N. A. Porro nivis, vel vitri contusi particulae minimæ, quæ oculo libero albæ apparent, per microscopium inspectæ non tam albæ, quam subdiaphanæ videntur, quia, cum per microscopium modicissima objecti pars videatur, nimia illa, & inordinata lucis copia, quam plures particulae simul junctæ reflectunt, exclusa, particula quælibet sub majore jam angulo, ac eodem modo videtur, quo videretur vitri aut glaciei massa aliquanto major, adeoque diaphana.

261. Dices. 2. Lumen sæpe plurimum mutatur, quin notabiliter mutetur color: aliud enim est lumen candelæ, aliud solis, & hoc ipsum aliud sub meridiem, quam sub crepusculum; & tamen charta alba eundem semper colorem præfert. R. D. A. Lumen mutatur sub ea ratione, quæ requiritur ad efficiendum novum colorem, N. A. sub alia, v. g. quoad intensiorem. C. A. Charta alba, siue intensius, siue remissius lumen recipiat, semper reflectit illud, quod recipit, ferme totum in omnem partem; hinc semper

ma-

manet alba, licet intensio non semper maneat eadem: quod ipsum licet in aliis etiam coloribus plerumque accidat, isti tamen non solum quoad intensiorem, sed quandoque etiam quoad substantiam mutari videntur pro diversitate luminis incidentis: pannus enim, qui ad lumen solis apparet viridis, ad lumen candelæ videbitur cæruleus; idem etiam observatum est de aqua ligno nephritico tincta. Porro sub qua ratione mutari lumen debeat, ut novum efficiat colorem, ex proxime dicendis apparebit.

262. Ob. II. Reflexio luminis nunquam fit in ipsa superficie corporis colorati, sed jam ante impulsus radiorum in hanc superficiem: ergo textura corporis nihil conferre potest ad colorem. Prob. Ant. Corpora etiam solerter lævigata, & perpolita aliquas semper asperitates in superficie retinent; proin nunquam eorum superficies ita reddi æquabilis potest, ut receptos ab objectis radios non in omnem partem diffundat: ergo reflexio vel non fit ab ipsa superficie, aut nunquam ita esse ordinata poterit, qua ipsius objecti lucidi, aut illuminati imago per radios reflexos exhibeatur. Ita quidam ex Newtonianis, qui contendunt, reflexionem luminis fieri per vim repulsivam ante ipsum impactum radiorum in superficiem corporis reflectentis. Verum ut multi haud ita facile sibi persuaderi patientur, globum tormento excussum repelli a muro, quin murum contingat, ita hoc ipsum ut credant de lumine, difficulter induci se sinent. Deinde si dantur ejusmodi asperitates, & quasi colliculi, cum vis repulsiva sit proportionata distantis, radii, qui in partes prominentes incurrunt, jam reflectentur, antequam reflectantur illi, qui in partes superficiei magis depressas incidunt; & illi, qui propius contingunt latera colliculorum, pariter ad latus expellentur: an non igitur etiam hic oriri debeat confusio, & dispersio radiorum?

R. N. A. Ad prob. D. A. Aliquas semper asperitates, aut inæqualitates partium retinet, sed tales, quæ habito respectu ad totam superficiem propemodum nullæ sint, C. A. tales, quæ comparatæ cum tota superficie in ordine ad radios dispergendos attendi mereantur, N. A. Hoc autem modo lumen per inæqualitates istas dispersum rationem vix ullam habebit ad lumen ordinate reflexum. Certe, dum vitrum, aut aliud corpus terra Tri-

politana, aut stanno usto lævigatur, & perpolitur, non solas asperitates sensibiles in eo abstergi, sed minores etiam colliculos quodammodo complanari, verosimillimum redditur ex eo, quod Cl. Rizzetus expertum se scribit. Lentem vitream in cubiculo obscuro ita radiis solaribus obvertit, ut lumen in chartam albam reflecteret; quo minus purgata, minusque polita lens erat, eo minus luminis, eoque plures maculas in charta videre erat, quæ maculæ disperebant, lumenque reflexum intendebatur eo amplius, quo magis lævigata, & polita lentis superficies reddebatur.

263. Ob. III. Nigredo juxta hæc principia esset mera negatio luminis; quomodo autem hæc videri, aut oculum afficere poterit? R. Triplex distingui potest nigredo; 1. nigrum a quibusdam dicitur, quod nullo modo videri potest, uti tenebræ; 2. dicitur nigrum, a quo nullum lumen actu fertur ad oculos, sic noctu omnia sunt nigra; 3. nigrum dicitur, quod aliquid, sed parum luminis, aut hoc prorsus debile ad oculos reflectit, & hoc modo nigra sunt illa corpora, quæ pleno etiam die apparent nigra. Nigredo primi, & secundi generis est mera negatio luminis, & nullam in oculo sensationem causat, sed habet se respectu hujus, ut silentium respectu auris. Nigredo tertii generis non est mera negatio, sed consistit in modico lumine, quod re vera oculum afficit, & sensationem, quam nigredinis dicimus, excitat, licet ipsum lumen non possit dici nigrum. Oculus nimirum, dum videt colorem, semper equidem lumen quoad substantiam idem percipit; pro varietate tamen vibrationis, ac copię, qua illud ad oculum appellitur, varia etiam erit impressio, & immutatio in organo visus, proin etiam varia sensatio consequetur. Si impressio fiat modica, apparebit nigredo; si hoc, vel illo modo, aliud, atque aliud videbitur color; sublata omni impressione in oculo nullus percipitur color, sicut sublata omni impressione in organo auditus nullus percipitur sonus. Hinc a longe spectantibus fenestras cubiculi apertas nil nisi nigredo apparet, licet ibidem aer sit illuminatus; quia nimirum radii in cubiculo absorpti, vel extra cubiculum dispersi non satis efficaciter ad oculum reflectuntur, proin nullam in eo impressionem causant.

264. Huc quoque pertinent sequentia. I. Oculo in-

intra conclave constituto fenestrarum orbes vitrei apparent splendidi, margines vero plumbei videntur nigricantes; e contrario oculo extra conclave in platea consistenti, splendidiore apparent margines plumbei, obscuriores vero orbes vitrei; quia in primo casu lumen per vitra copiosissime transiens prævalet lumini, quod e cubiculo in margines plumbeos, & hinc primum in oculos reflectitur; in altero autem casu cum vitra totum ferme lumen in conclave transmittant, parumque in plateam reflectant, margines vero reflectant plurimum, ideo margines splendere, & vitra nigrescere videntur.

II. Si planum marmoreum nigrum, sed probe politum situ ad horizontem parallelo statuatur in cubiculo fenestram apertam inter, & oculum, in certa distantia lumen a plano reflexum videtur albescere; quia nimirum lumen valde oblique incidens, a speculari marmoris superficie sub angulo adeo acuto satis copiosum reflectitur, quod (cum superficies specularis lumen, ut acceperunt, reddant) non alteratum retinam vivacius afficiens albedinis sensationem excitat. Si vero oculus sit inter planum, & fenestram medius, radii oblique incidentes per fenestram sub æquali angulo potissimam partem reflectuntur in plagam ab oculo averfam, & paucissimi redeunt ad oculum; hinc nigredinis sensatio consequetur.

III. Parisiis, ut habent Acta Trivoltiensium ad annum 1725. Mense Jan. in horto Collegii Ludoviciani concha est aquis plena; e medio conchæ surgit Pyramis quatuor laterum, quorum cuilibet affixa est tabula marmoris nigri sua inscriptione insignita. Tabulæ istæ, dum in aquis conchæ velut in speculo aspiciuntur, apparent albicantes; unius vero antea ruptæ, & postea gypso resectæ partes illæ, quas gypsum occupat, apparent nigrae. Nempe tum marmora lævigata, tum aqua sunt superficies speculares: hinc, dum cælo prorsus sereno radii ex aere quasi albescente in marmora incidunt, iidem ab his reflexi in aquam, & ab hac demum reflexi in oculum, ipsius quæ aeris colorem exhibebunt, sicut fieret, si duo alia specula, marmoris & aquæ loco, in eodem cum his situ essent collocata. Illæ autem partes, quæ gypso sunt incrustatæ, cum hujus superficies admodum aspera, & plurius velut colliculis obsita sit, radios vel omnes alio dispergunt, vel non nisi paucissimos

mos sub eo angulo, sub quo inciderunt, reflectunt in aquam: hinc etiam ab aqua non nisi paucissimi radii iis partibus respondentes reflectuntur ad oculum, qui cum debilem admodum impressionem in fibrillis retinæ efficiant, in præsentia impressionum fortiorum sensationem nigredinis causabunt.

§. III.

QUAM MODIFICATIONEM LUMINIS REQUI- RANT COLORES MEDII?

265. **T**Res potissimum hac super re sunt sententiæ. Prima, quæ est P. Honorati Fabri, luminis modificationem, quam colorum diversitas exigit, a diversa permixtione lucis, & umbræ repetit ita, ut radii omnes ejusdem sint naturæ seu homogenei, & pro diversâ duntaxat mixtura lucis, & umbræ diversi coloris sensationem in anima excitent. Hinc 1. color *albus* consistit in multo lumine reflexo, & aut nullis, aut non nisi paucissimis umbreculis interrupto. 2. *Niger* consistit in modico lumine plurimis umbreculis permixto. 3. *Ruber*, qui est medius inter album, & nigrum, provenit ex æquali lucis, & umbræ mixtura. 4. *Cæruleus*, utpote medius inter rubrum, & nigrum, plus umbræ habet, quam ruber, & plus luminis, quam niger. 5. *Flavus* inter album, & rubrum medius plus lucis habet, quam ruber, & plus umbræ, quam albus. 6. *Viridis* est mixtura ex flavo, & cæruleo, proin plus habet lucis, quam cæruleus, plus umbræ, quam flavus. Reliqui, qui apparere possunt colores, simili cum proportionem erunt explicandi.

266. Sed contra hanc sententiam est. I. Radii luminis per vitrum cæruleum trajecti in opposito plano albo apparent cærulei; interposito autem alio adhuc vitro flavo, iidem radii apparent virides; hoc autem in isto systemate fieri qui possit? Nam color cæruleus obscurior est, & nigro propior, quam viridis, adeoque radiis, dum apparent cærulei, plures permiscebuntur umbreculæ, quam dum apparent virides; & tamen in allato exemplo plures dantur umbreculæ, quando radii isti apparent virides, quam dum apparent cærulei; cum
uti-

antiquè interposito vitro flavo tam ab hujus, quam ab æris illud ambientis superficie plures intercipientur, & reflectantur radii, quam cum isti per solum vitrum cæruleum trajicerentur. II. Si duas lamellas vitreas alteram cærulei, alteram aurei coloris inter se junctas luci obvertas, colorem earum videbis flavescentem, qui parum viridis admixtum habeat; si tertiam jungas lamellam coloris itidem aurei, color ruber exhibebitur. Cur autem hoc, si color flavus, & ruber pauciores exigit umbreculas, quam cæruleus? Denuo si pannus niger per vitrum aurei coloris inspicatur, apparet esse coloris castanei, si per vitrum coloris cærulei, pariter videtur esse cæruleus; cur autem non apparet magis niger, pluribus radiis per vitrum interceptis? III. Accedunt experimenta Prismatis, cujus colores varios in radiis per refractionem separatis vix, ac ne vix quidem explicabunt, qui radios homogeneos, ac lucis & umbræ permixtiones amant, ut mox videbimus.

267. Altera sententia est Celeberrimi Newtoni. Hic colorum diversitatem refundit potius in lucem, quam in objecta lumen reflectentia: putat enim, quemlibet luminis radium, e corpore lucido egressum, septem radiorum species in se continere ita, ut species quælibet peculiarem suum colorem obtineat, & radius, qui hunc determinatum colorem habet, alium acquirere nequeat. Unde radii, qui diversos colores efficiunt, Newtono sunt heterogenei, idque ex ipsa natura sua, in quantum non iisdem, sed diversis constant particulis, qui colores exhibent diversos. Septem porro illi colores primitivi, sive radii primarii, qui in quolibet luminis fasciculo continentur, sunt ruber, aurantius, flavus, viridis, cæruleus, purpureus, violaceus, quorum quilibet nomen suum a colore, quem exhibet, sortitur, non quod re ipsa sit coloratus, sed quia ita est dispositus, & comparatus, ut divisus ab aliis radiis hujus potius, vel illius coloris sensum in nobis excitet. Quicumque autem tales radioli colore differunt, differunt etiam refrangibilitate ita, ut ruber sit omnium minime, violaceus omnium maxime refrangibilis, reliqui plus vel minus refrangibilitatis habeant, prout propius vel ad violaceum, vel ad rubrum in suo, quem indicavimus, ordine accedunt. Circa reflexionem radiorum notandum, inquit Cl. Gravesandius Elem. Phys. L. V. c. 22. Ex-
per.

per. 3. Radios in totum facilius reflecti, qui majorem habent refrangibilitatem; nam quo major datur refractionis, eo minor requiritur obliquitas, ut omnes reflectantur.

268. Tertia sententia est eorum, qui colores medios non explicant quidem per meram mixtionem lucis, & umbræ, proin radios aliquo sensu heterogeneous admittunt, tamen non admittunt radios in sensu Newtoni heterogeneous, & ex ipsa natura sua (ob inæqualem videlicet figuram, & magnitudinem particularum radiorum aliquem componentium) jam diversimode coloratos, sed in explicanda hujusmodi colorum diversitate eum fere modum assumunt, quem nos in explicanda sonorum diversitate tenuimus; nimirum sicut vibrationes aeris, quæ celeritate differunt, diversos efficiunt sonos, acutum, si sint celeriores, gravem, si tardiores; ita vibrationes materiæ luminosæ, quæ differunt celeritate, diversos dant colores, ut adeo radii luminis sint quidem heterogenei, non tamen ex natura sua, sed ob diversam celeritatem, qua eorum vibrationes peraguntur. Ex qua ipsa diversa celeritate etiam dependet diversa eorum refrangibilitas. An illa Newtoni, an hæc posterior sententia sit assumenda, ut appareat, ambæ aliquanto uberius adhuc sunt explanandæ.

§. IV.

AN RADII LUMINIS E CORPORE LUCIDO EGREDIENTES SINT DIVERSIMODE REFRANGIBILES?

269. **R**espondeo. Radii, qui in uno luminis fasciculo quodammodo collecti sunt, sunt diversimode refrangibiles, etiam, dum in idem medium, & sub eodem angulo incident, & quidem, prout radii illi non ab objecto aliquo colorato, sed a corpore lucido, ipso v.g. Sole proveniunt. Ostendunt id experimenta Prismaticis. I. In Fig. 53. Tab. V. per foramen, quod in tenui lamella ænea excisum est, in cubiculum obscurum incidat radius sensibilis; si radius iste libere per foramen transiens excipiat charta ad perpendicularum ipsi opposita, in hac rotundam & albicantem imaginem solis de-

depinget. At ſi idem radius haud procul a foramine excipiatuſ prifmate abc ita, ut latus ab in ſitu ad radium ſenſibiliter parallelo ſupra, acies c infra radium exiſtant, poſt incurſum in latus bc dabitur aliqua refractio, eaque talis, ut radii ed, fg per ipſum priſma pergentes jam aliquantum a ſe incipiant divergere; in egreſſu ex latere ac denuo dabitur refractio, qua magis iterum, atque ita divergant radii, ut, ſi ad certam diſtanti- am obvertatur charta, in hac non jam rotunda, & albicans, ſed oblonga ſolis imago mn depingatur adeo, ut, dum latitudo hi manet eadem, quæ eſſet remoto priſmate, longitudo tamen, ſeu altitudo mn ſit fere quadruplo major, quam eſſet remoto priſmate; & hæc imago ſeptem coloribus primariis diſtincta erit hoc ordine: in loco ſupremo circa n erit color violaceus, tum ſequentur purpureus, cæruleus, viridis, flavus, aurantius, in infimo circa m erit color ruber. Si priſma invertatur ita, ut acies c ſit ſupra radium, imago ſolis denuo erit oblongata, ut ante, ſed, quæ prius erat elevata, nunc erit magis depreſſa, eritque colorum ordo inverſus, dum ruber locum tenebit ſupremum, infimum violaceus, cæteris ordine pariter inverſo eadem, ut prius, ratione ſe ſe excipientibus.

Duo hic potiffimum obſerva, 1. quod imago ſolis depingatur oblonga; 2. quod radii violacei ſemper occupent locum, qui magis recedit a perpendiculari pq ducto ad latus ac ; rubri vero eum, qui ab eodem perpendiculari minus recedit. Ex primo ſequitur in genere, radios in eodem ſciculo ſ contentos eſſe diverſimode refrangibiles: ſecus enim radii ſub eodem angulo incidentes, ſi omnes ac ſinguli eandem ſubirent refractionem, non poſſent in oppoſita charta depingere imaginem ſolis oblongatam: altius quidem tota imago deberet attolli, ſed ſimul deberet manere rotunda, ut ante. Ex altero ſequitur, quod in ſpecie omnium maxime refrangibiles ſint radii violacei, omnium minime radii rubri; cæteri vero, a rubro verſus violaceum progrediendo, identidem ſequens radio præcedente magis ſint refrangibiles.

270. II. Idem radius ſenſibilis s , ut antea, incidat in priſma abc (Fig. 54. Tab. V.) In hoc priſmate omnia ſe habebunt eo modo, quo ſe habebant Numero præcedente, eademque erit imago ſolis oblongata, iisdem coloribus diſtincta. Hoc factò radius ex primo priſ-

M

ma

mate egressus excipiat altero prismatico ita, ut hujus acies, seu axis op ad horizontem sit perpendicularis. Dum radius ex altero hoc prismatico egressus in eadem, qua prius, distantia excipitur charta aliqua, imago solis iterum apparet oblonga, sed simul inclinata ita, ut radii rubri sint in h , violacei vero notabiliter inclinati sint in latus l . Jam si radii luminis non essent diversimode refrangibiles, posset quidem imago solis per primum prisma in altum prolongata nunc per prisma alterum dilatari versus latera, sed non posset ita inclinari, ut radii aliqui magis versus latera declinent, quam alii: sicut enim per primum prisma refractione facta est secundum longitudinem, sive in altum, ita per prisma alterum refractione fit secundum latitudinem, sive versus latera, ut ex ipsa positione prismatum, & natura refractionis evidens est: igitur cum radii sive circa u , sive circa t omnes incidant sub eodem angulo, nisi isti essent diversimode refrangibiles, omnes eodem modo, & sub eodem angulo deberent refringi, proin imago solis deberet quidem dilatari, non vero ad latera inclinari ita, ut violacei magis iterum recedant a perpendiculari, quam ab eodem recedant radii rubri.

271. III. Idem radius sensibilis s sicut in primo, & secundo casu incidat in prisma abc (Fig. 54.) & loco secundi prismatis in distantia op circiter obvertatur charta; apparebit in charta imago solis jam aliquantulum prolongata, & superius tenni fimbria coloris primo violacei, tum cærulei & subviridis, seu a reliquis nondum plene separati, inferius simili fimbria coloris rubri, tum, ut supra, subflavi & viridis quasi ex utroque mixti cincta; medium autem imaginis adhuc erit candidum. Quo longius dein a prismatico removetur charta, eo longior fit imago, eo latiores fimbriæ coloratæ, eo magis segregati colores, & eo minus albedinis in medio remanet, donec tandem in debita distantia albedo omnis dispereat, & representetur imago plena $m n$, septem coloribus suis distincta. 1. Imago, postquam radii ex prismatico in chartam proximam sunt egressi, jam est aliquantum prolongata: ergo radii aliqui jam reliquis magis recedunt a perpendiculari. 2. In fimbria superiore extremi sunt violacei, in inferiore rubri: ergo determinate violacei maxime recedunt a perpendiculari, minime rubri. 3. Medium imaginis adhuc est candidum; quia,

cuius

cum per refractionem radii nondum sint multum divaricati, in medio omnium colorum radii adhuc sunt inter se permixti, nec, qui diversum colorem exhibent, invicem separati. 4. Quo longius removetur charta, eo longior fit imago; quia identidem magis divaricantur radii: fimbriæ fiunt latiores; quia superius jam plures radii violacei, inferius plures rubri ab aliis separantur: minus albedinis apparet in medio; quia pauciores radii manent inter se permixti, ut ex ipsa natura refractionis, & divaricationis manifestum est.

272. IV. Idem radius *s* (Fig. 55. Tab. V.) incidat primo in prisma *abc*; dein simile prisma *ABC* priori obvertatur ita, ut acies *A* sit supra radium, latus vero *AC* sit parallelum lateri prioris prismatici *ac*. Tunc radii per primam refractionem in *e* & *fa* se non nihil divergentes, ut antea, per prisma pergent ita, ut in latere *ac* jam sint limbi *dn*, *mg* iisdem, ut in experimento priore, coloribus tincti, quod ostendit charta lateri *ac* propius admota. Dum postea radius secundo prismate excipitur, in latere *AC* limbi *i*, *r*, *wt* totius radii eosdem colores exhibent, quos limbi *dn*, *mg* in prismate primo; post egressum vero ex secundo prismate totus radius tenebit eandem directionem, quam tenuit ante ingressum in prisma primum, & in opposita charta, si hæc a secundo prismate non longe distet, depinget imaginem solis ferme rotundam, eamque omnino candidam, nisi quod superius in *p* fimbria aliqua cærulea, inferius in *q* rubra, & subflava appareat. In hoc experimento tria iterum sunt notanda. 1. Limbi in utroque prismate colorati. 2. Directio radii post egressum ex prismate secundo. 3. Fimbriæ in ipsa imagine solis.

Ratio primi habetur ex casu præcedente: cum enim violaceus omnium maxime refrangibilis sit, ex radiis in *e* incidentibus, & ibidem ad refractionem determinatis, violaceus jam non nihil supra reliquos attolletur, & a reliquis separatus apparere distinctus poterit; ruber vero & huic proximi ex iisdem radiis in *e* incidentibus adhuc permixtus cum reliquis distingui non poterit. E contrario ex radiis in *f* incidentibus, atque ibidem ad refractionem determinatis, cum ruber omnium minime refringibilis sit, cæteri omnes supra rubrum attollentur, ipse autem sic separatus a reliquis apparere circa *g* debet. Quia tamen divaricatio radiorum ob primam eorum refractionem usque ad alterum

prismatis latus modica est, etiam limbi colorati non poterunt non esse exigui.

Ratio secundi ex communibus refractionum legibus habetur, ex quibus constat, quod radius per medium duabus superficiebus parallelis terminatum transiens, quantum in ingressu refringitur ad perpendicularum v. g., tantundem in egressu iterum refringi debeat a perpendicularo, & vicissim: quare cum duo prismata hæc eo modo sibi opposita, ut latus $A C$ sit parallelum lateri $a c$, constituent unum quodammodo medium superficiebus $A B$, & $b c$ sibi parallelis terminatum, radius s ex ultima superficie $A B$ egregiens eodem modo refringitur a perpendicularo, quo modo ingrediens in superficiem $b c$ refringebatur ad perpendicularum. Neque obest, quod inter utrumque prisma hic interceptus sit aer; quia etiam ipse superficiebus sibi parallelis comprehenditur.

Ratio tertiæ, cur fimbriæ imaginis solaris, etsi hæc ferme rotunda sit, tamen appareant coloratæ, hæc est. Dum radii $e d$, & $e n$ per primum prisma refracti, & per egressum ex eo adhuc magis a se invicem divaricati incidunt in prisma secundum circa i & r , refractione quidem in hoc prismate fit modo contrario ita, ut radii isti per primum prisma a se invicem separati, & aliquantum divaricati, nunc per secundum prisma deberent ad se mutuo accedere, ac denique iterum conjungi; proin, si in ea distantia, in qua radii uniuntur, charta esset opposita, imago solis plene candida, nec ullis fimbriis coloratis cincta deberet apparere. At, quia radii isti per totum spatium $e d i$ semper magis a se invicem fuere divaricati, spatium vero $i o$, intra quod deberet fieri unio, sit admodum breve, in transitu per istud spatium perfecta conjunctio fieri non poterit: igitur adhuc separati a se ex prismate egredientur, & in opposita charta fimbriam coloratam exhibebunt in p . Id ipsum intellige de radiis inferioribus $f m$, & $f g$; qui tamen, cum in secundo prismate longiorem viam emeliantur, nimirum æqualem $w k$, magis etiam in isto transitu ad se mutuo accedent, quam radii superiores.

272. V. Si lamella aliqua diversis certa ad intervalla coloribus tingatur, rubro v. g., flavo, viridi, caeruleo &c. ita, ut colores isti rectam lamellæ superficiem exacte impleant, dein lamella coloribus suis sic distincta per prisma inspiciatur, color unus altero altior,

&c

& ipſa lamella reſtitutionem ſuam amiſiſſe videbitur ita, ut ſi color ruber locum teneat ſupremum, cæruleus appareat in infimo, vel inverſo priſmate, ſi hic ſupremum teneat, ruber in infimo ſit futurus. VI. Si lamella alia rubro ſimul, & cæruleo colore tinſta radios emittat in lentem convexam non nihil ampliorem, & radii iſti excipiantur plano albo, radii cærulei citius, id eſt, ad minorem a lente diſtantiā, colligentur in focum, quam radii rubri.

273. Ex iſtis omnibus hoc jam formari argumentum poteſt. Si radii luminis, prout a corpore lucido egrediuntur, omnes eſſent homogenei, ſeu æqualiter refrangibiles, tunc quotieſcunque radii iſti in idem omnino medium, & ſub eodem angulo incidunt, ſemper omnes deberent ſub eodem angulo refringi: atqui non omnes ſi ſub eodem angulo refringuntur, qui in idem medium, & ſub eodem angulo incidunt: ergo radii luminis, prout a corpore lucido egrediuntur, non ſunt homogenei, ſed heterogenei, aut diverſimode refrangibiles. Major intelligenti terminos, & principia refractio- nis eſt evidens: quæ enim diverſam cauſare refractio- nem poſſunt, ſunt vel diverſa media, vel diverſa inci- dentia, vel diverſa diſpoſitio ejus, quod refringitur: ſi igitur & medium ſit idem reſpectu omnium. & inci- dentia etiam eadem, diverſa refractio non aliunde, quam ex diverſa diſpoſitione ejus, quod refringitur, luminis nimirum oriri poterit.

Minor ſequitur ex præcedentibus. Dum idem radio- rum faſciculus incidit in priſma unum, radii ex priſ- mate egrediuntur a ſe invicem divaricati ita, ut viola- cei magis recedant a perpendiculari, quam purpurei, iſti magis, quam cærulei, & ſic de reliquis uſque ad rubros, qui omnium minime a perpendiculari recedunt, ex caſu primo. Dum radii ex primo priſmate egreſſi alio adhuc priſmate excipiuntur, jam non amplius in novos colores tranſmutantur (quod tamen fieri deberet, ſi radii iſti eſſent homogenei, eoquod in ſecundo priſma- te eandem poſſent habere incidentiam, quam habuere in primo) ſed ſi priſma ſitu verticali obvertatur radiis e primo priſmate egreſſis, aliud non ſit, niſi quod radii antea a perpendiculari primi priſmatis recedentes, & in al- tum elati, nunc etiam a perpendiculari ſecundi priſmatis recedentes detorqueantur ad latus, ita tamen, ut etiam

hic magis ad latus declinent radii violacei, quam purpurei, magis hi, quam cærulei, omnium minime rubri, etsi hic evidens sit, radios sub æquali angulo in secundum prisma incidere, ut ostensum casu secundo.

Quodsi istis etiam jungantur ea, quæ in reliquis porro casibus eveniunt, manifestum erit, colores similes semper eandem, diversos semper diversam subire refractionem; hoc autem dum medium est prorsus idem, idemque angulus incidentiæ, qui fieri demum posset, nisi ipsi radii quocunque demum ex capite jam tales forent, ut alii aliis magis refrangibiles sint. Profecto radios per lentem convexam colligi in focus, aliud non est, quam radios, qui divaricati ex objecto in lentem incidunt, tum in transitu per lentem, tum in egressu ex illa ad se se mutuo refringi ita, ut demum ad certam a lente distantiam inter se conveniant: igitur etiam ad minorem a lente distantiam, sive citius colligi in focus idem erit, ac magis refringi; serius vero, sive ad majorem a lente distantiam in focus colligi idem erit, ac minus refringi: cum ergo radii violacei, ac cærulei multo citius per ejusmodi lentem in focus colligantur, quam rubri, etiam abstrahendo ab experimentis prismatis indubitata adhuc erit diversa radiorum refrangibilitas.

274. Hinc sequitur 1. Experimenta prismatis novum esse argumentum contra sententiam P. Fabri, de qua N. 265. Cum enim radii diversimode refringantur, etiam diversimode a se invicem divergunt, & divaricantur; quo minus a se divergunt, eo plus in iis erit luminis, quo plus autem divergunt, eo plus umbrarum inter ipsos intercipietur. Cum jam in oblonga illa imagine solis, quam radii per prisma transmissi in charta depingunt, omnium minime refringantur radii rubri, etiam pauciores umbreculas, quam cæteri omnes, sibi deberent habere permixtas, & tamen juxta hunc Auctorem color ruber haberetur per æqualem mixturam lucis, & umbræ, cum econtra color flavus, qui ea in imagine magis, quam ruber refringitur, minus umbræ juxta eundem contineret, quam ruber. Sequitur 2. Colorem album, seu albedinem aliud non esse, quam compositum ex omnibus coloribus intermediis, id est, radios luminis, prout a corpore lucido egrediuntur, inter se adhuc plane permixtos: si enim imago solis colorata *m n* (Fig. 53. Tab. V.) quæ per prisma *abc* in

In pariete fuit depicta, per aliud prisma in eodem cum priore situ, & distantia oculis admotum inspiciatur, per hoc denuo colliguntur radii, & commiscuntur ita, ut imaginem solis albam exhibeant; quod ipsum patet ex casu III. Num. 271. Sequitur 3. Radios luminis, prout a corpore lucido egrediuntur, jam posse dici diversimode coloratos, non, quod isti radii in se quasi coloribus istis tincti sint, prout colore rubro v. g. tinctum dicimus filum aliquod; sed quod in radiis istis jam detur talis dispositio ad movendas fibrillas retinæ, ut pro diverso harum motu diversi quoque coloris sensatio in anima excitetur. Qualis autem sit ista dispositio, deinceps erit indagandum.

275. Dices 1. Dum radii solis per foramen immissi in prisma incident, non omnes incident sub eodem angulo: ergo potest dari diversa refractio, etsi radii de se non sint diversimode refrangibiles. Prob. Ant. Dum radii per foramen ingrediuntur, in ipso ingressu fit aliqua radiorum decussatio: ergo non omnes incident sub eodem angulo. R. 1. N. A. quod non omnes, qui ex iisdem partibus disci solaris egrediuntur, incident sub angulo æquali, dum foramen est exiguum. Ad Prob. D. A. Fit decussatio radiorum, illorum nempe, qui a diversis partibus disci solaris ad foramen partingunt, C. A. etiam eorum, qui ab iisdem partibus foramen ingrediuntur. N. A. Si etiam fiat aliqua decussatio, ea tamen, dum prisma proxime admoveatur foramini, tanta non est, ut radii non possint haberi pro physice parallelis, aut ut imaginem solis adeo oblongatam exhibere debeant; cum decussatio æque fiat ad latera, ac sursum & deorsum.

R. 2. Om. A. si sermo sit de radiis in unum duntaxat prisma *abc* (Fig. 54.) incidentibus, D. C. ergo potest dari diversa refractio, si radii per unum duntaxat prisma transmittantur, Om. C. si post primum prisma admoveatur alterum *op* ita, ut in hoc radii debeant sub æquali angulo incidere, N. C. Hæc quorundam replica, quæ aliquam veri speciem habere posset, manifesto refellitur per experimentum secundum, quo radiis per primum prisma transmissis opponitur prisma alterum ita, ut axis hujus sit normalis ad axem primi: hoc enim casu certum est, radios in eadem sectione verticali in prisma secundum sub æquali omnino angulo omnes incidere, & tamen radii rubri multo minus a perpendiculo

recedunt, quam cæteri usque ad violaceum, qui hic ferme tantum ad latus inclinatur, quantum per prisma primum antea in altum fuerat elevatus. Dein in lentem convexam lamellæ, latera parallela habentis, & cæruleo simul, ac rubro colore, ab invicem separatis, tinctæ oppositam radii utriusque coloris sub eodem angulo incidunt, nec tamen sub eodem refringuntur.

276. Dices 2. Si radii aliqui per eandem lentem transmissi citius coirent in focus, quam alii, per telescopia haberi nunquam posset distincta visio objecti diversimode colorati: quacunque enim in distantia a lente objectiva collocaretur lens ocularis, nunquam possent radii ita colligi, ut in utriusque lentis foco convenirent; hoc autem ni fiat, visio nunquam erit distincta. R. certum esse, radios diversos ad diversam a lente distantiam colligi in focus. Sit in Fig. 56. Tab. V. lentis alicujus objectivæ apertura ab , axis ejusdem lentis cl . Si hoc casu radii violacei, utpote maxime refrangibiles, in focus colligantur in d , radii rubri, omnium minime refrangibiles, primum unientur in e ita, ut magnitudo spatii de , quod metitur differentiam utriusque foci, sit vigesima septima aut octava pars totius distantiae ec , quam habet focus a lente; spatium vero mn , seu diameter circuli, quem rubrorum conus aeb , & violaceorum conus fdg mutua sui intersectione efformant, sit circiter quinquagesima quinta pars aperture ab . Hoc, inquam, certum est, atque experientia manifesta comprobandum. Unde iis etiam, qui petitam inde difficultatem nobis objiciunt, laborandum, ut ostendant, quomodo tamen per telescopia haberi possit visio distincta objecti variis coloribus imbuti. Ideo nimirum distincta potest esse talis objecti visio, quia, ut Newtonus instituto etiam calculo ostendit (Opt. L. I. p. I. propos 7.) radii errantes non uniformiter per totum illud spatium, seu circulum, cujus diameter esset basis conorum mn , sunt diffusi, sed in centrum illius velut infinite densius collecti ita, ut a centro versus circumferentiam continuo evadant rariores; proin ob hanc ipsam raritatem sensu percipi nequeant nisi in ipso centro, aut prope istud; si autem radii isti errantes in præsentia aliorum summe efficacium sensu percipi non possunt, etiam non poterunt causare confusam objecti visionem, quamvis hæc etiam absolute distincta esse non possit. Hanc ipsam
ob

ob causam telescopio dioptrico Newtonus substituit catadioptricum, de quo N. 159.

277. Dices. 3. E flamma candelæ eodem modo lumen egreditur, quo a sole, & tamen lumen candelæ non potest separari in eos colores, in quos separatur lumen solis. R. Tr. 1. m. Ant. N. 2. Lucet flamma candelæ etiam lumine, ut sic dicam, proprio, quemadmodum sol; hinc etiam, dum per prisma aspicitur, eosdem ferme colores exhibet, quos radii solis, hoc tamen cum discrimine, quod in tali imagine flammæ partem multo majorem occupent colores violaceus, viridis, & maxime ruber, quam occupent radii cæteri: flavus enim non nisi gracilem quasi fimbriam efformat saltem tunc, quando illi prismatis lateri, quod oculo admovetur, opæ ceræ applicatur tenuis lamella plumbea, & per excisam in lamella crenam, cujus amplitudo $\frac{1}{3}$. lin. vix excedat, flamma aspicitur. Cur autem in ejusmodi flamma cæteris coloribus prædominentur violaceus, viridis, & ruber, ratio erit, quod non omnia corpora ignita eundem prorsus in omnibus suis partibus motum vibratorium habeant, quem habet Sol; proin habere possunt vibrationes magis opportunas his coloribus, quam aliis. Certe etiam stellæ fixæ, quæ ferme omnes libero oculo videntur esse coloris, aut luminis omnino ejusdem, si per telescopium longius inspiciantur, aliæ ab aliis colore luminis sui differreprehenduntur.

278. Dices 4. Si albedo nihil aliud esset, quam lumen compositum ex radiis diversi coloris, deberet denique ex particulis diversi coloris rubri, flavi, viridis &c. inter se mixtis oriri color albus: hoc non fit. R. N. M. universaliter sumptam: particulæ enim illæ coloratæ nunquam ita inter se misceri poterunt, ut a singulis punctis hujus mixturæ omnium colorum radii simul juncti reflectantur ad oculum; nam, cum particulæ illæ certam jam, ac determinato colori repræsentando idoneam habeant texturam, neque etiam indivisibiles sint, sed sensibili quadam magnitudine præditæ, fieri nunquam poterit, ut a singulis his particulis radii luminis inter se permixti reflectantur, sed quælibet colorem suæ texturæ convenientem, jamque ab aliis separatim remittet ad oculum, atque in fibrillis retinæ impressionem huic colori competentem faciet. Nihilominus corpuscula variè

jam colorata, ſi rite inter ſe miſceantur, tertium ſæpe colorem exhibere poſſe, infra dicitur. Imo, ut teſtatur Muſchenbroekius, ſi diverſiſſimi coloris pigmenta in certa quantitate permiſceantur, qualia ſunt auri pigmentum, viride æris, cæruleum montanum, purpura, componetur pulvis, qui chartæ craſſiori illitus, & ad diſtantiã 18. pedum inſpectus æque albus appareat, ac ipſa charta, cui illitus hic pulvis eſt. Suppoſito jam, radios luminis ex ipſa velut origine ſua jam eſſe diverſimode refrangibiles, atque hoc ſenſu diverſimode coloratos, indagandum ulterius, undenam iſthæc diverſa radiorum refrangibilitas ſit repetenda.

§. V.

AN RADII EX IPSA NATURA SUA SINT DIVERSIMODE REFRANGIBILES?

279. **N**ewtonus, ut dictum, docet, quemlibet luminis radium e corpore lucido egreſſum ſeptem radiorum colore differentium ſpecies in ſe continere, idque ita, ut ſeptem illi diverſi radii ex ipſa natura ſua ſint diverſi, & heterogenei, in quantum ruber v. g. aliis conſtat particulis materiæ luminofæ, quam cæruleus, hic iterum aliis, quam flavus. Hoc ipſo ex capite etiam repetit diverſam eorum refrangibilitatem ita, ut hæc ſit proportionata magnitudini ac figuræ particularum certam coloris ſpeciem conſtituentium. Violacei proin omnium maxime refrangibiles ſunt, quia conſtant particulis omnium minimis, quæ cum minus habeant virium ad vincenda obſtacula, facilius a linea recta detorqueantur; rubri autem omnium minime refrangibiles ſunt, quia conſtant particulis omnium maximis, in quibus proin detur plus virium ad vincenda obſtacula, ne tam facile a recta detorqueantur; qui inter rubrum, & violaceum inedii ſunt, eo magis, aut minus erunt refrangibiles, quominoribus, aut majoribus e particulis fuerint compoſiti.

280. Circa albedinem pariter docet, eam aliud non eſſe, quam omnes radios luminis adhuc confuſos, ac permixtos, quod hoc experimento magis adhuc firmat Cl. Graveſandius Elem. Phyſ. L. V. c. 23. Exper. 4. & Cl. Muſchenbroekius §. 1165. Si radii antea per priſma ſeparati, ſicque jam colorati excipiantur lente vitrea, in hu-

hujus foco per planum aliquod excepto albedinem splendori solis analogam exhibebunt. Quod autem in hujusmodi foco fiat tantum conjunctio radiorum, non vero destructio, ex eo patet, quod, si ultra focum removeatur charta, denuo appareant colores iidem, sed ob decessionem ordine inverso. Si non omnium colorum radii lente excipiantur, sicque in focum colligantur, non apparebit albedo, sed eo major ab hac fiet recessus, quo pauciores radii heterogenei fuerint conjuncti. De flavis tamen radiis ait Gravesandius *ibid.* *exper. 8.*, licet isti interposito corpore opaco intercipientur, ne ad chartam pertingant, in hac tamen ex permixtione reliquorum oritur albedinem: unde infert, non omnium omnino colorum, qui in oblonga solis imagine observantur, permixtionem ad conflandam albedinem necessariam esse.

281. Originem colorum apparentium pariter explicat per separationem radiorum in uno radio sensibili collectorum, in quantum per prisma, aut aliud medium, diversimode refracti, atque ita a se invicem separati, ii, qui ejusdem speciei sunt, colliguntur, sicque colorem sibi proprium exhibent. Originem colorum permanentium, quem præcipue corpora opaca constanter exhibent, potissimum per reflexionem, quæ post varias refractiones ab interioribus etiam superficiei lamellis fieret, explicat, docens, ejus coloris apparere objectum opacum, cujus coloris sunt eæ particulæ luminosæ, quæ ex corpore opaco regeruntur in oculum: sola enim corpora alba puram lucem, atque adeo omnium radiorum genera simul permixta reflectunt; cætera vero, licet omne genus radiorum, dum lumine perfunduntur, excipiant, tamen non nisi genus unum reflectunt copiosius, scilicet non nisi rubros, quæ rubra sunt, flavos duntaxat, quæ flava, reliquis radiorum generibus maximam partem interceptis, ac veluti suffocatis, aut etiam transmissis, idque ob diversam corporum texturam, ac componentium partium inæqualem crassitiem. Hanc tamen texturam non in sola extrema superficie constituit, sed etiam in partibus corporis interioribus, in quibus varias reflexiones, & refractiones fieri necesse est. Denique licet 7. duntaxat colores naturales, ac primigenios numeret, non tamen diffinitur, quod ex permixtione plurium radiorum heterogeneorum componi possit unicus tantum color derivativus, qui oculo libero aspectus colorem quemdam primi-

mitivum æmuletur; sic ex flavis, & cæruleis inter se permixtis prodit color viridis, ex flavo & rubro aurantius. Hi tamen multum differunt a viridi, & aurantio primitivo, uti videre erit, si & primitivus, & alter ad hujus imitationem compositus per prismata aspiciatur: hic enim per prismata denuo in suos primitivos separatur; prior vero in nullum alium separari poterit.

282. Verum etsi radii luminis ex ipsa origine sua sint heterogenei, dici tamen haud posse videtur, eos ex ipsa natura sua in sensu Newtoni esse heterogeneous. 1. Experimentia enim docet, quod corpus aliquod opacum, constanti ac permanente colore imbutum, e. g. rubrum non unum tantum, sibi quæ proprium, sed plures, eosque diversos colores reflectat; certe si colores prismatis jam separati plano rubro excipiantur, eodem modo reflectuntur, quo reflecterentur a plano albo hoc solo cum discrimine, quod sint non nihil debiliores: id autem fieri in systemate Newtoniano vix posse videtur: corpus enim rubrum juxta Newtonum est, quod radios non nisi rubros reflectit, cæteros vero aut absorbet, aut transmittit: igitur fieri non posset, ut a plano rubro etiam reflectantur colores flavi, cærulei &c., & quidem in tanta copia, in quanta ex prismate projecti in plano rubro apparent, dum in eo loco, in quem color flavus incidit, rubedo disparet, & non nisi color flavus exhibetur. 2. Captu difficillimum est, quomodo a corpore ex natura sua violacei coloris radii violacei ferme omnes reflectantur, etsi ex particulis omnium minimis constent; reliqui vero radii, qui ex majoribus successive particulis componuntur, absorbeantur, vel transmittantur: si enim pori tales sunt, ut particulae minimæ nequeant per eos penetrare, quomodo particulae majores penetrare poterunt? 3. Æque parum capi posse videtur, quomodo a vitro colorato e. g. flavo reflectantur radii flavi ferme omnes, & simul transmittantur ferme omnes: nam non modo ipsum vitrum apparet flavum, sed etiam objectum, quod per tale vitrum aspicitur.

§. VI.

UNDENAM PROVENIAT DIVERSA RADIORUM
REFRANGIBILITAS ?

283. **R**espondeo. Diversa radiorum luminis refrangibilitas repetenda videtur a diverso motu materiae luminosae, quo diversae particulae ætheris aut celerius aut tardius debita cum proportionem vibrantur ita, ut ab hac ipsa vibrationum diversitate dependeat etiam diversitas colorum. Probatum. Radii luminis, prout ab ipsa corpore lucido proveniunt, etiam dum in idem medium, & sub eodem angulo incidunt, diversimode refringuntur ex §. 4. ergo debet aliquid vel in medio, vel in ipsis radiis dari, ob quod diversimode refringantur: nihil enim fit sine ratione, & quidem semper, ac constanter eodem modo. In medio nihil datur ad diversam refractionem determinans, utpote quod respectu cujuslibet radii est prorsus idem, & quolibet parallele cum alio incidentem sub eodem angulo excipit: ergo debet in ipsis radiis dari id, ob quod ad diversam refractionem determinantur; in ipsis autem radiis nihil est, nisi materia luminosa, seu particulae ætheris tum secundum naturam suam, id est, magnitudinem & figuram, tum secundum motum; quo actu vibrantur, spectatae: lumen enim aliud non est, quam materia ætheream motu rectilineo, ac celerissimo vibrata: ergo id, ob quod ad diversam refractionem determinantur, debet provenire vel a magnitudine & figura, vel ex motu particularum materiae luminosae; ex magnitudine & figura id non provenit ex §. præced. ergo dicendum, id provenire ex diverso motu materiae luminosae, eoque tali, quo diversae particulae ætheris aut celerius, aut tardius debita cum proportionem vibrantur.

284. Quod si igitur vibrationes radiorum sint æque veloces, & isochronae, seu si æqualibus temporis intervallis inchoentur, & absolvantur, erunt radii ejusdem coloris, & æqualiter refrangibiles; si vero sint radii, quorum vibrationes non æqualibus temporis intervallis inchoentur, & absolvantur, sed unius vibratio sit celerior, alterius vero tardior, erunt radii diversi coloris, ac diversimode refrangibiles; & quidem ii radii, quorum vibra-

brationes sunt celeriores, minus cæteris erunt refrangibiles, illi autem, quorum vibrationes tardiores sunt, cæteris magis erunt refrangibiles. Sequitur hoc ex ipsa natura motus, & refractionis. Sic in Fig. 51. Tab. V. dum radius luminis ex aere transit in vitrum AB, etsi materia subtilis existens in aere, quæ est potissima causa determinans ad refractionem versus perpendicularum, parti hemisphærii *t m o* æqualiter sit applicata, sive globulus ille vibretur velocius, sive tardius, tamen, si vibratur tardius, eaque vibratio intra tempusculum longius peragatur, materia subtilis hemisphærio *t m o* in ordine ad mutandam directionem motus est diutius applicata ita, ut versus illud agere debeat, quam applicata sit, si idem globulus vibretur celerius, eaque vibratio intra tempusculum brevius absolveretur: igitur cum determinatio ad refractionem fiat durante ea vibratione, magis etiam versus perpendicularum urgebitur, quam si ea vibratio breviori tempore perageretur. Idem certe fit in motu translativo corporum, dum duo globi ejusdem molis sub eodem angulo incidunt in aquam v.g. ille minus refringitur, qui movetur celerius, magis ille, qui tardius movetur; quia huic per longius tempus applicata est causa ad refractionem determinans. Fors radii magis refrangibiles sunt etiam aliquantum debiliores, quam ii, qui minus refrangibiles sunt. Quare cum radii rubri sint omnium minime refrangibiles, ipsorum vibrationes erunt omnium velocissimæ, & cum violacei omnium maxime refrangibiles sint, erunt ipsorum vibrationes omnium reliquorum tardissimæ; cæteri quoad velocitatem vibrationum tum ab his, tum inter se differant ea proportionem, qua differunt in refrangibilitate.

285. Quod autem ab hac ipsa vibrationum diversitate dependeat etiam diversitas colorum, proin diversa modificatio luminis ad diversos colores requisita aliud demum non sit, quam diversa vibratio materiæ luminosæ, sic probatur. 1. Per motum, & vibrationem materiæ luminosæ determinatur oculus ad perceptionem luminis: ergo per diversum motum, & diversam vibrationem ejusdem materiæ determinari debet ad perceptionem diversi luminis; cum ergo colores diversi aliud non sint, quam lumen diversum, seu diversimode modificatum, si diversæ sunt vibrationes & motus, erit etiam perceptio diversi luminis. 2. Impossibile est, ut mate-

ria luminosa diversimode vibrata impellat ad fibrillas retinæ, quin etiam in illis diversas impressiones causet: atqui si per hoc, quod materia luminosa diversimode vibretur, diversas impressiones causat in fibrillis retinæ, per hoc ipsum determinat animam ad sensationem diversi coloris: non potest enim ad diversas impressiones in organis non etiam diversa sensatio in anima consequi. 3. Sicut perceptio soni habetur a vibrationibus aeris, ita perceptio diversi soni, seu tonorum habetur a diversis vibrationibus aeris: ergo sicut perceptio luminis habetur a motu ætheris, ita perceptio diversi luminis, seu colorum, habetur a motu diverso ætheris. Certe si idem aer nunc celerius, nunc tardius vibratus diversas impressiones in organo auditus facere, atque ita animam ad perceptionem diversi toni determinare potest, etiam idem æther, si eadem materia luminosa nunc celerius, nunc tardius vibrata diversas impressiones in organo visus efficere, atque ita animam ad perceptionem diversi coloris determinare debet: sic enim uniformis, quem natura, dum eadem sunt circumstantiæ, tenere solet, habetur operandi modus, & diversi colores eo modo inter se discrepabunt quoad numerum vibrationum, quo modo inter se discrepant diversi toni ita, ut color ruber cum sonis acutioribus, violaceus vero cum gravioribus sit comparandus.

286. Ob. I. Si diversa radiorum refrangibilitas oriatur ex diverso materiæ luminosæ motu, in quolibet radio sensibili luminis deberent dari tot diversi motus, seu tot vibrationes quoad celeritatem differentes, in quot diversos colores is separari per prisma potest: hoc est impossibile: quomodo enim una eademque materia quoad elasticitatem, figuram, ac magnitudinem in omnibus suis particulis prorsus æqualis tam diversis, idque constanter, agitari motibus queat? R. C. M. N. min. Aliud est, rem fieri non posse, seu esse impossibilem, & aliud, capi aut explicari non posse, quomodo res fiat. Si omnia forent impossibilia, quæ vel verbis ad captum explicare, vel etiam cogitando assequi non possumus, mundus aut nullus, aut certe multo alius foret, quam nunc est. Interim iis, qui in materia de sono, de quo sat certum est, eum haberi per motum aeris, diversosque sonos consistere in diversis quoad celeritatem vibrationibus ejusdem aeris, qui, inquam, in materia de sono nobiscum

cum sentiunt, impossibile videri non poterit, eandem portionem sensibilem materiæ luminosæ diversis simul agitari motibus posse, sicut impossibile non est, eandem sensibilem portionem aeris diversas simul vibrationes recipere, ac ulterius propagare, dum in ea concurrunt plures soni inter se diversi, idque etiam constanter, quamdiu perseverat eadem causa aerem ad tam diversas vibrationes determinans.

Neque timendum hic erit, ne diversi isti motus ita se se mutuo elidant, ut perpetua colorum confusio oriri debeat: cum enim vibrationes luminosæ sint velocissimæ, atque in instantibus quasi infinite parvis peragantur, si etiam in instantibus quibusdam minimis radii aliqui se se mutuo eliderent, sicque daretur aliqua colorum confusio, hæc tamen sensibus, qui minima non discernunt, observari hand posset, cum illico succedant vibrationes novæ, eoquod causa ad illas determinans perpetuo maneat. Neque etiam illud necessario dicendum esse existimo, septem præcise, neque plures esse diversos motus, quibus radii luminis vibrentur, eoquod septem præcise colores diversos in radio luminis per prisma diviso observemus: possunt namque in uno sensibili radio multo plures esse diversi motus, qui quoad celeritatem inter se absolute differant, quin tamen isthæc differentia a nobis etiam distincte possit discerni, quemadmodum etiam fit in sonis diversis, in quibus nemo dicet, tot præcise diversas quoad celeritatem vibrationes aeris esse, quot diversos sonos Musici solent distinguere, eoquod sensus nostri tanti acuminis non sint, ut ea etiam discernere illico possint, quæ reipsa inter se differunt, nisi ipsa etiam differentia sensibilis, & non qualiscunque tantum sit. Videmus certe in ipso etiam prismate, colorem cæruleum v. g. evadere quasi subtiliorem, quo magis accedit ad confinia coloris viridis, rubrum quoque eo magis quodammodo dilui, quo propior fit colori aurantio.

Denique certum videri potest, in radio sensibili luminis aliud nec esse, nec spectari posse, nisi & materiam luminosam, & motum hujus materiæ. Cum præterea certum sit, in radio isto sensibili radios minores contineri quam plurimos, quorum alii aliis magis sint refrangibiles, & qui per refractiones has diversas a se invicem separati diversas impressiones in organo visus

cau-

causare possint, necessario in eodem radio sensibili dari aliquid debet, propter quod alii aliis magis refrangibiles sint, & per quod diversas in fibrillis retinæ impressiones causare possint. Neutrum datur in ipsa materia luminosa, utpote cujus particulæ probabilius & figura & magnitudine prorsus æquales sunt: utrumque igitur repetendum erit ex motu hujus materiæ, utpote ex quo necessario sequitur & diversa refrangibilitas, & diversa impressio in fibrillis retinæ, ut ostensum Num. 284. & 285.

287. Dices. Si in radio luminis est motus adeo diversus, etiam in ipso corpore lucido, sole v. g. deberet dari diversissimus particularum motus: hoc dici non potest: undenam enim tam diversi motus in particulis corporis solaris? R. Tr. M. quia utique circa hoc determinari non potest, undenam adeo diversi materiæ luminosæ motus seu mediate, seu immediate proveniant. Nego minorem. Non enim videtur verosimile, singulas corporis solaris particulas iisdem perpetuo motibus agitari: nam, cum ipsi substantiæ solis igneæ admixtæ sint innumerae particulæ heterogeneæ, ut satis ostendunt maculæ solares, fieri necesse est, ut solis moleculæ per heterogeneas hæc partes magis, minusve in motu impedian- tur, proin etiam diversimode moveantur. Dein motus particularum corporis lucidi, quod proprio lumine gaudet, duplex est, localis, quo particulæ rapidissimo, ac simul perturbatissimo motu inter se se agitantur (corpora enim, quæ inest lux, ignea, aut ignita sunt, a quibus calor nunquam abest) & vibratorius, quo singulæ moleculæ vibrantur elastice; hoc autem si est, non poterit non diversissimus ex diversissimis impulsibus, ac perturbatissimis reflexionibus oriri motus particularum solis, & ab his communicari ætheri ambienti. Utrum etiam aliqua motus diversitas induci possit ab atmosphæra tum solis, tum etiam terræ, per quam radii luminosi ad nos usque propagantur, haud scio. Si non possit, non erit necessarium; si possit, erit eo melius.

288. Ob. II. Tres tantum sunt colores primarii, cæruleus nimirum, ruber, & flavus: ergo ruit hypothesis Newtoniana. Prob. A. Potest dici, colores cæteros, qui præter tres memoratos in imagine illa ope prismatis depicta apparent, oriri ex diversa combinatione cærulei, rubri, & flavi. Ita P. Castel, qui eadem, quæ

Newtonus, experimenta instituit, at non eo, quo Newtonus, modo. Radium luminis per foramen non adeo tenue, sed aliquanto amplius admisit P. Castel, & imaginem coloratam ad 5. tantum, aut 6. pollicum a prismate distantiam excepit, viditque in medio coloratæ imaginis splendentem albedinem, supra hanc flavum, & rubrum, infra albedinem cæruleum, & violaceum. Dum chartam longius a prismate removit, fatetur P. Castel, alios præterea colores apparuisse, imo plures, quam viderit ipse Newtonus. R. 1. Si etiam non nisi tres forent colores primarii, iidem tamen essent diversimode refrangibiles; & hujus diversæ refrangibilitatis ratio æque a P. Castel, ac a nobis danda foret.

R. 2. N. A. Ad Prob. iterum N. A. Si enim colores cæteri essent ex tribus istis primariis compositi, deberent illi denuo in hos suos colores fundamentales posse dividi: fatetur enim P. Castel, cæruleum, rubrum, & flavum esse diversimode refrangibiles: atqui non amplius possunt dividi, ut experimenta manifesta ostendunt. Newtonus namque, & alii repetitis vicibus perforato plano albo, in quo imago solis colorata visebatur, nunc solum viridem, nunc solum violaceum, nunc alios colores ejusdem imaginis seorsum, & singillatim per aliud adhuc prisma projecerunt in planum aliud, & post secundam etiam, imo post tertiam quoque refractionem radii semper mansere iidem, viridis semper viridis, violaceus mansit violaceus absque ullo vestigio coloris rubri, aut flavi: sat certum igitur est, colores hos, prout a prismate in imagine solis exhibentur, non esse ex aliis compositos, sed peculiare, adeoque primarios.

Imo nisi vera esset hypothesis Newtoniana, ne videre quidem potuisset P. Castel ea, quæ vidit; hypothesei autem illa assumpta aliud videre nec potuit, nec debuit. Nam 1. in medio imaginis coloratæ vidit albedinem; sed nimirum in distantia 5. aut 6. pollicum, in qua distantia radii, etsi jam ad refractionem determinati, tamen nondum satis potuerunt divaricari, atque a se invicem divergere: hinc in medio radii omnium colorum adhuc inter se confusi & permixti præter albedinem aliud exhibere non poterant, præsertim in tanta copia luminis, quanta per foramen adeo amplum in prisma incidebat. 2. Supra albedinem vidit colorem rubrum,

&

& flavum; nimirum isti colores sunt inter eos, qui omnium minime refrangibiles sunt; hinc cæteris magis a perpendiculo deorsum refractis, illi a reliquis aliquantum jam separati distinctam sui visionem excitare poterant. Aurantius inter duos hos medius, mirum non est, si in tanta luminis copia, & tam modica a prisma-
te distantia adeo manifeste se non prodiderit. Eodem ex capite fluit, cur infra albedinem apparuerit color violaceus, & cæruleus, qui sunt inter maxime refrangibiles. 3. Dum chartam longius a prisma-
te removit, alii etiam colores apparuerunt; & apparuissent haud dubie omnes 7. colores Newtoniani, si magis adhuc a prisma-
te removisset chartam; quia per se divaricatio identidem evasit major, quo longius removebatur charta: proin etiam magis identidem a se invicem separati colores sunt, donec tandem omnes fuerint evoluti. Quales autem colores præter Newtonianos adhuc viderit, non memorat citatus Auctor.

289. Dices 1. Constat colorem viridem oriri ex conjunctione flavi, & cærulei: nam 1. ex pigmentis flavis, & cæruleis inter se rite permixtis prodit color viridis; 2. si quis per duo vitra, alterum cærulei, flavi coloris alterum, sibi mutuo imposita objectum aliquod intuetur, istud apparet subviride. R. D. A. Constat, aliquem colorem viridem oriri posse ex conjunctione flavi & cærulei, C. A. omnem colorem viridem esse compositum ex flavo, & cæruleo, N. A. Dubitari non potest, quin ex radiis etiam heterogeneis inter se mixtis oriri possit color aliquis medius, qui colorem simplicem, ac primigenium æmuletur. Sic si duo prismata ita dirigantur, ut color flavus ex uno, cæruleus ex altero in eandem chartæ oppositæ partem incidant, apparebit color aliquis intermedius subviridis; sic etiam funiculus ex subtilissimis flavis, aut cæruleis filis contextus remotius aspicienti videtur virescere; pariter ex flavo, & rubro commixtis prodit aurantius. Neque mirum hoc videri debet: cum enim ex majore aliqua distantia plures objecti partes in oculum incurrant, radii ex punctis objecti sibi immediate contiguis eandem ferme retinæ partem afficiunt, ac commovent, ut proin, etsi diversæ impressiones sint, earum tamen diversitas discerni sufficienter non possit, atque adeo medii coloris sensatio oriri debeat; cumque viridis sit medius in-

ter flavum, & cæruleum, aurantius vero medius inter flavum, & rubrum, utriusque extremi vibrationes simul in eandem retinæ partem concurrentes poterunt animam determinare ad sensationem coloris medii. Præterea, dum partes ejusmodi minutæ, quales sunt in funiculo memorato, sub tam exiguo angulo optico in oculum incidunt, in majori distantia discerni ab invicem non poterunt, proin sub colore aliquo medio apparebunt.

Hinc tamen inferri non potest, colorem viridem semper, & ubique esse duntaxat mixtum ex flavo, & cæruleo; illum quidem, qui per duo prismata, ut mox dictum, quasi generatur, esse compositum, manifestum fit ex eo, quod, si color hic hac ratione compositus excipiat prismatico tertio, denuo dividatur in suos primigenios flavum, & cæruleum. Is autem viridis, qui in imagine ab uno prismate formata exhibetur, etiam per plura adhuc prismata transiens idem semper, sibi que constans perseverat: hic igitur non compositus, sed simplex, & primigenius est, ut indicatum jam est Num. 281. Sic etiam viridem illum, qui in funiculo isto serico apparet, compositum esse, liberis adeo oculis cernitur, si quis propius & attentius funiculum aspiciat, multo magis, si ope microscopii intueatur: apparent enim distincte & flava, & cærulea filamenta.

290. Dices 2. Si etiam color viridis esset inter primarios, nulla foret ratio, cur, si tabula, in qua solis imago depingitur, prismati propius admoveatur, color viridis transeat in album. 2. Neque ex dictis habetur ratio, cur, si tabula longius removeatur, flavus omnino evanescat. R. N. A. In minore a prismate distantia divaricatio radiorum necdum sat magna est: hinc circa medium imaginis omnium colorum radii eo ipso, quod diversa sit eorum refractione, se se mutuo interfecant, sicque confunduntur: quare, cum coloris viridis refrangibilitas ea determinate sit, ut mediam inter reliquos viam teneant radii virides, hi in medio eum cæteris commixti apparere amplius non poterunt, sed ita confusi albedinem exhibebunt; cæteri vero, eoquod magis in refrangibilitate differant, ex utroque latere adhuc aliquantum separati, debitum sibi colorem dabunt, donec charta propius iterum admota, successive omnes dispareant, remanente duntaxat gemina; eaque tenui fimbria colorata, de qua N. 271. & 272. Ad 2. Experimenti admodum

dum dubii ratio esse potest, quod, quo major est obicis distantia, eo magis etiam divaricentur radii; cum jam radii flavi per se proxime accedant ad albedinem chartæ, fiet, ut radii ita divaricati, ac proin prorsus rari, notabilem sui impressionem in oculo causare nequeant.

291. Ob. III. In imagine illa per prismâ formata colores eo ordine se se excipiunt, ut si imago dividatur in 360. partes æquales, color ruber 45. aurantius 27. flavus 48. viridis 60. cæruleus 60. purpureus 40. violaceus 80 ejusmodi partes occupet: hujus autem nulla vel verosimilis ratio est, si diversa refrangibilitas repetatur a diverso motu materiæ luminosæ. R. Quænam ergo hujus ratio erit, si diversa refrangibilitas repetatur a figura & magnitudine particularum materiæ luminosæ? aut, si radii dicantur esse homogenei, quæ tandem erit ratio, quod hac, nec alia proportionem fiat mixtura lucis, & umbræ? Omnes, puto, dicent, experimento aliquo particulari non illico everti sententiam, si ea antea sat firmis rationum momentis fuerit stabilita. Jam vero, quod radii sint diversimode refrangibiles, solide admodum, atque ita probatum est, ut dubium de eo superesse non possit; illud vero, quod radii non sint ex ipsa natura sua in sensu Newtoni refrangibiles, saltem multo probabilius est ex Num. 282. quodsi ergo circa experimentum hoc prorsus singulare nostra æque, ac aliorum hypothesen, deficeret, maneret tamen istis adhuc verosimilior.

Et sane, si iis, qui assumunt radios homogeneos, fas est dicere, eam posse esse minimarum particularum vitri texturam, ut ea, quæ ad colores hoc ordine exhibendos requiritur, modificatio, seu mixtura lucis & umbræ dari possit; si licet Newtono dicere, eum præcise numerum particularum materiæ luminosæ figura & magnitudine differentium in quovis radio sensibili dari, qui ad istam colorum proportionem requiratur; cur non & nobis fas sit ponere, iis præcise motibus agitari partes solis, atque iisdem impelli particulas materiæ luminosæ in radio sensibili contentas, qui ad memoratam colorum proportionem sint necessarii. Possit autem ex diverso motu particularum solis oriri etiam diversum motum materiæ luminosæ, tum ex natura motus, tum ex dictis de sono, tum denique ex eo colligitur, quod expertum se testatur Boyle. Chalybem ferro candenti imposuit;

& variam in eo colorum mutationem pro diverso augmento caloris observavit. Primo quidem massa chalybea colorem ostendit cæruleum, seu lividum, tum aliquos intermedios, denique, dum tota incanduit, album quasi colorem igni proprium exhibuit. Dum massam hanc a ferro candente removit, albedo primum mutata est in colorem flavum, hic in cæruleum, iste in subnigrum, qualis chalybi refrigerato nativus est.

Si jam dicenda de calore cum principiis de coloribus conferantur, apparet, quod pro diversis illius incrementis etiam diversus fuerit color: cum ergo incrementa caloris consistant in incremento motus, patet, pro diversitate motus, diversum etiam colorem esse. Hoc autem si est, cur supponere non liceat, particulas solis quocunque demum ex capite diversis motibus agitari, istas sic agitatas ad diversos etiam motus ambientem undique ætherem concitare, hunc ita concitatum diversi coloris sensationem in anima excitare. Sed cur determinate eo ordine, & proportionem, qua dictum antea est? quia nimirum ea determinate proportionem motus isti inter se differunt. Si dicas, hanc esse conjecturam, id neutiquam diffitemur; modo conjectura assequamur id, quod est.

292. Porro color ille cæruleus, qui cælo sereno per totum ferme hemisphærium apparet, non provenit unice a radiis cæruleis homogeneis ita, ut radii aliorum colorum nihil conferre possint: posse enim ex commixtione radiorum diversi generis oriri colorem quemdam medium, qui primigenium æmuletur, dictum jam est, licet medius ille minus vivax sit, quam primigenius ipsi similis; proin etiam color cæruleus oriri poterit ex commixtione plurium radiorum diversi generis, cum & ipse multo minus vivax sit, quam cæruleus per prisma separatus. Nempe radii solis, qui per totum hemisphærium diffunduntur, innumeras, diversissimasque in atmosphæra nostra patiuntur refractiones & reflexiones; per has autem motum ac pulsus radiorum sensim debilitari, verosimillimum est. Hinc etiam illi motus & vibrationes, quæ radiis rubris, flavis, aliisque propriæ sunt, ita quodammodo enervari, ac aliquantum immutari poterunt, ut, quemadmodum alias radii cærulei, non nihil languidius fibrillas retinæ afficiant, atque ita sensationem coloris cærulei in anima excitent. Alii

putant, cæruleum hunc colorem provenire a particulis non diaphanis ipsius aeris tali colore reipsa præditis, quæ tamen sub hoc colore non appareant, nisi valde ampla aeris portio, in qua innumeræ ejusmodi particulæ in longa aliqua serie se se excipiunt, simul videatur ferme, sicuti aqua croco tenuiter imbuta, si aliquanto major illius portio aspiciatur, apparet flava, qualis tamen non apparet, si non nihil tenuior ipsius lamella oculo obijciatur. Color ruber, qui quandoque prope horizontem oriente, vel occidente sole apparet, a diversa vaporum ibidem existentium constitutione provenire potest. Nubes vero, quæ in atmosphæra nostra plerumque apparent albæ, partibus constant fere nebulosis, subin, imo fors plerumque glacialibus, quarum superficies instar speculi radios nihil immutatos, ac confusos ad nos reflectit. Dum alii quandoque colores in nubibus apparent, ii denuo a diversis refractionibus & reflexionibus, atque etiam a commixtione quorundam radiorum diversi generis provenire poterunt.

293. Dices. Diversi soni in eodem aere editi nunquam ita inter se permiscuntur, ut sonum aliquem medium causent: ergo neque radii diversi ita inter se permisceri poterunt, ut colorem quemdam medium referant. R. Om. A. N. C. Si verum est, quod in Antecedente dicitur, ratio erit, quia, licet etiam soni vibrationes sint celeriores, eæ tamen multo tardiores sunt, quam sint vibrationes, quibus lumen, & radii colorati propagantur; si autem multo tardiores sunt, poterit anima earum differentiam adhuc satis discernere, nisi nimium multi, nimiumque diversi concurrant: si enim nimis multi, diversi que soni conveniant, aut nullum satis distincte percipere, atque ab aliis discernere poterimus, aut debemus attentionem nostram in unum præ aliis convertere. Imo si diversi etiam soni, in eodem tamen tono consonantes e loco remotiore audiantur, plerumque degenerant in sonum aliquem medium. In lumine vibrationes sunt tanto celeriores, quanto celerior est propagatio luminis, quam soni: quodsi igitur impressiones plurium radiorum etiam diversi generis, quorum vibrationes propius accedunt ad intermedium quemdam, ex punctis immediate sibi contiguis, sub angulo optico prorsus insensibili, in iisdem quodammodo retinæ partibus simul fiant, anima illas quasi per modum unius percipiet,

quin eas a se invicem perfecte distinguat; idque tum potissimum fieri necesse est, quando radii ita concurrentes in numero vibrationum minus a se invicem differunt, uti sunt cæruleus & flavus, flavus & ruber, cæruleus & violaceus. Quando vero radii magis etiam differentes simul concurrunt, oritur quidem etiam color aliquis mixtus, non tamen talis, qui unum ex primitivis proxime æmuletur.

§. VII.

ORIGO COLORUM PERMANENTIUM.

294. Vidimus hucusque, in lumine, prout a corpore lucide egreditur, diversos contineri colores hoc sensu, quod radii in lumine solis contenti ita sint constituti, ut pro diversitate motuum, quibus vibrantur, diversas impressiones in organo causare possint, quodque diversas has impressiones actu etiam causent, si a se invicem separati in oculum incurrant. Inde fit, ut objectum qualecunque, in quod radii jam separati incidunt, diversos colores exhibeat, iterum perituros, si radiorum separatio tollatur. At nunc quæritur, qui fiat, ut corpora opaca, in quæ radii non jam separati, sed plane conjuncti, iique omnis generis simul incidunt, tamen unum duntaxat, determinatum, ac constantem, quamdiu constans est textura corporum, colorem exhibeant. Dum enim radii adhuc conjuncti in planum v. g. rubrum incidunt, an reflectuntur soli radii rubri, an etiam alii? si etiam alii, an iidem omnino, qui inciderunt, an forte quoad vibrationes suas aliquantum, aut saltem quoad intensiorem suam magis immutati? Si reflectantur soli radii rubri, quorsum deveniunt reliqui? & cur non etiam cæteri reflectuntur? si etiam alii, sed nihil nec quoad motum, nec quoad intensiorem immutati, reflectitur idem lumen, quod inciderat, proin radii confusi & permixti, atque ita inepti ad exhibendum colorem rubrum; cum radii omnes adhuc confusi, ac nihil immutati, non nisi albedinem exhibeant. Si autem radii reliqui prædicto modo aliquantum immutantur, quænam est causa hujus mutationis?

295. Ad isthæc ut verosimile responsum saltem per modum conjecturæ dari queat, Not. 1. Si colores per
pris-

prisma separati excipiantur obice albo, colores omnes admodum vivaces reflectuntur ad oculum; si autem excipiantur obice colorato, illi omnium vivacissime reflectuntur, qui colori obicis respondent: cæteri etsi distinctam sui visionem causent, tamen adeo vivaces neutiquam sunt, quam essent, si color obicis ipsis responderet. Sic in obice rubro vivacissime splendent colores rubri, in viridi virides &c. Hinc apparet, quod radii in corpus opacum, colore a se diverso tinctum, incidentes non quidem destruantur penitus, neque etiam ita immutentur, ut in absentia aliorum sui sensationem causare nequeant; attamen a tali corpore opaco aliquantum saltem immutentur hoc sensu, quod non tam vivacem colorem exhibeant, quam exhiberent, si obex aut nullo, aut sibi respondente colore tinctus esset.

Not. 2. A majore, vel minore intensione luminis per se quidem non dependet variatio coloris; potest tamen intensio hæc aliquid ad diversitatem coloris conferre, maxime tunc, quando plures colores diversi ex punctis objecti immediate contiguis sub diversa intensione in oculum incurrunt: tunc enim, qui magis intensi sunt, cæteris quodammodo prævalentes sui potissimum sensationem in anima excitabunt. Sic si radii per prisma in colores suos separati projiciantur in obicem rubrum v.g., & imago in hoc obice septem coloribus suis depicta per aliud prisma eo, quo N. 274. diximus, modo aspiciatur, radii per alterum hoc prisma denuo collecti non jam albedinem exhibebunt, nec quidquam de aliis coloribus; sed unice colorem radiorum prævalentium, rubrum nimirum, oculo sistent. Imo etiam unus idemque color, si radii minus intense reflectantur, jam apparet obscurior, & sub certa ratione alius, ut colligi posse videtur ex eo, quod de aqua ligno nephritico tincta dictum est Num. 251.

Not. 3. Non incongrue posse poni, radios sicut pulsum, & vibrationum frequentia, ita etiam eorundem pulsum vehementia, seu intensione non nihil inter se differre ita, ut, qui sunt celeriores, de se etiam sint aliquanto intensiores; ut adeo colorum differentia non tantum ex majore, minorive pulsum frequentia, sed etiam aliquo saltem modo ex majore, minorive eorundem pulsum intensione simul juncta habeatur; quamquam, si sola sit major, minorve vibrationum vis, ut plurimum non nisi vivacior, aut languidior evadat color. Hocer-

te cum dictis de diversa radiorum refrangibilitate optime congruit; cum utique eos etiam magis refringi necesse sit, quorum vibratio non tantum lentior, sed etiam aliquanto debilior est.

Not. 4. Si globulus elasticus incurrat in obicem, eo cæteris paribus is celerius, fortiusque repellitur, quo rigidior est obex, in quem incurrit, cujus ratio ex dictis de Percussione, & Motu reflexo in Physica Generali facile eruitur. Luminis porro reflexio non absolvitur illico in extima, & velut tenuissima superficie corporis opaci, sed etiam partes interiores, quæ superficiem proxime excipiunt, ad reflexionem plurimum possunt conferre, si vel particulis superficie, vel ipsis moleculis materiæ luminosæ intra hanc superficiem, & particulas proxime contiguas comprehensis magis, minusve resistent. Denique ex dictis N. 289. recolendum, ex conjunctione radiorum, quorum vibrationes parum admodum inter se differunt, oriri posse colorem quemdam medium, quando radii parum inter se differentes ex punctis objecti maxime contiguis versus oculum reflectuntur præcipue, si major aliquanto sit, oculi ab objecto distantia. His notatis

296. Censeo 1. originem colorum permanentium non haberi ex eo, quod illi duntaxat radii ab objecto reflectantur, qui respondent colori, quem objectum constanter coloratum exhibet, v. g. rubri duntaxat ab objecto rubro, cæteri vero radii omnes aut absorbeantur, aut dispergantur: cur enim cæteri radii, qui pariter impingunt in superficiem reflectentem, non etiam ad reditum determinantur? nihil sane est vel in particulis materiæ luminosæ, vel in earum motu, vel in superficie corporis, ob quod reflexio talis fieri non debeat. Deinde dum radii per prisma separati incidunt in obicem coloratum, omnium colorum radii (licet illi, qui obici colorato non respondent, cæteris sint debiliores) reflectuntur: cur ergo non etiam reflectantur, dum simul juncti in eundem incurrunr obicem?

Censeo 2. Originem istiusmodi colorum potissimum haberi ex eo, quod illi quidem radii reflectantur vivacissime, qui colori, quem objectum constanter coloratum exhibet, quoad vibrationes proprii sunt, idque ob texturam partium corporis iis maxime radiis vivacius reflectendis aptam; simul tamen etiam reflectantur

radii alii, ob texturam corporis aliquantum immutati, quod ex eo inferri posse videtur, quod, dum radii per prisma separati incidunt in obicem coloratum, singulæ quidem radiorum species reflectantur, at jam aliquantum, saltem quoad intensionem, ac vivacitatem, diversæ ab iis coloribus, qui reflecterentur, si obex coloratus non esset, aut eum ubique colorem haberet, qui cuilibet speciei proprius est.

Censeo 3. Ipsam intensionem, aut remissionem radiorum, qui a corpore reflectuntur, multum conferre ad diversum in eo colorem exhibendum, ut superius Not. 2. diximus. Denique hanc colorum permanentium diversitatem dependere etiam posse ab eo, quod plures non multum inter se differentes radii quodammodo confundantur, sicque confusi cæteris prævalere, atque ita colorem quemdam medium exhibere possint, quod maxime continget, dum pigmenta diversi generis inter se commiscuntur: ut adeo non una tantum, sed diversa pro diversitate corporum sit origo colorum permanentium: cum enim colores in genere aliud non sint, quam lumen diversimode modificatum, sive ita dispositum, ut diversas in organo visus impressiones causare possit, nemo facile dixerit, unicui duntaxat modum esse, quo luminis radii ita modificari, ac disponi possint, eoquod omnis colorum sensatio ultimato dependeat a motu, quo fibrillæ organi commoventur, motus autem diversitas variis utique ex causis oriri possit.

297. Ob. I. Si a quolibet corpore opaco radii etiam diversi generis inter se confusi reflecterentur, quodlibet corpus opacum deberet apparere album: albedo enim aliud non est, quam omnes radii luminis inter se confusi. R. D. M. si reflecterentur etiam eodem modo, quo inciderunt, C. M. si non eodem modo, sed jam aliquantum immutati, N. M. Duplicem in radiis luminis spectare possumus mutationem; 1. quoad intensionem, seu vivacitatem; 2. quoad ipsam frequentiam, seu celeritatem vibrationum. Si radii luminis mutantur secundo modo, alium jam, quam antea, exhibebunt colorem; si vero mutantur duntaxat quoad intensionem, de se quidem, ac seorsim spectati, alium colorem non dabunt, tamen, si cum alterius cujusdam coloris radiis vivacissime ab objecto aliquo reflexis, atque adeo multum prævalentibus, in oculum incidunt, impedire non poterunt,

terunt, quominus radiorum multum prævalentium color in oculo percipiatur.

Incidant radii omnis generis in obicem v. g. violaceum, cujus textura maxime apta est reflectendis radiis violaceis, ut adeo isti vivacissime ad oculum reflecti debeant. Si jam radii colorum a violaceo differentium in hoc obice mutantur quoad celeritatem vibrationum ita, ut pulsuum frequentia minuat, sicque radii hoc modo immutati propius accedant ad radios violaceos, ab his vivacissime in fibrillas retinæ impellentibus discerni non poterunt: proin obex apparebit violaceus. Quodsi autem radii a violaceo differentes in hoc obice tantum debilitentur, eorumque intensio, ac vivacitas minuat, dum ita debilitati ex iisdem objecti punctis una cum radiis violaceis, qui vivacissime reflectuntur, ad oculum perveniunt, in præsentia horum, multum prævalentium, sensibilem, quæ discerni queat, impressionem non facient, sicque obex denuo apparebit violaceus. Atque ego quidem existimo, ad explicandos colores permanentes sufficere, si dicamus, eos radios, qui obicis colorati texture congruunt, reflecti vivacissime, cæteros vero colorum differentium radios equidem etiam reflecti, sed admodum debilitatos, ut adeo cum prævalentibus permixti nec albedinem, quæ ex omnium colorum radiis æque vivacibus inter se confusis oritur, exhibere, nec colorem radiorum prævalentium possint impedire, quemadmodum ex N. 295. Not. 2. intelligi potest.

298. Quodsi tamen aliquis existimet, posse, atque etiam debere fieri radiorum mutationem quoad ipsam frequentiam, seu celeritatem vibrationum, fors hoc modo discurret. 1. Certum est, quod non omnium corporum opacorum eadem sit rigiditas, idque non solum, si attendatur tota massa, sed etiam si spectentur moleculæ massam componentes, de quibus supponi poterit, eas pro diversitate colorum, quos exhibent, diversa rigiditate esse præditas. 2. Quo rigidiores sunt moleculæ, eo magis illæ resistunt sui compressioni, & si comprimantur, eo fortius; celeriusque restituantur. Si moleculæ sunt minus rigidæ, per hoc ipsum, quod cedant, aliquantum enervant vim restitutionis in globulo incurrente; & ipsæ etiam, si comprimantur, lentius, & languidius restituantur. 3. In ipsis moleculis continetur mate-

materia luminosa ita, ut particulae moleculeas constituentes impelli nequeant, quin etiam impellantur particulae materiae luminosae. 4. Dum lumen incidit in corpus opacum, non solum impelluntur moleculeae in extrema superficie, sed aliquanto altius illi pulsus propagantur ita, ut etiam partes corporis interiores aliquid ad reflexionem conferant. His positis mutationem motus quoad frequentiam pulsum, siquidem etiam haec fieri possit ac debeat, potissimum dependere censeo a rigiditate molecularum corporis opaci colorati, quod declaratur in exemplis.

299. Sit 1. Corpus opacum rubrum, in quod lumen, seu radii diversi generis simul mixti incidunt. Si corporis hujus particulae sunt vehementer rigidae, dum illae, quae ipsam superficiem constituunt, impelluntur, simul impelluntur moleculeae materiae luminosae intra superficiem contentae; ab his impelluntur particulae proximae atque ita pulsus isti aliquo usque propagabuntur. A singulis tum particulis corporis, tum moleculis materiae luminosae fit aliqua reflexio, seu repercussio, & quidem eo fortior, & celerior, quo major est rigiditas; cumque repercussio isthaec non tantum fiat in particulas, quibus celerius vibratis constant radii rubri, sed etiam in eas, quae in lumine directo lentius vibratae caeteros radios efficiebant, poterit frequentia pulsum reflectentium aliquantum augeri ita, ut etiam radii caeteri propius accedant ad radios rubros. Quod dum fit, radii rubri omnium vivacissime reflexi, ac ferme nihil immutati cum caeteris jam minus differentibus poterunt sensationem coloris rubri in organo excitare.

Sit 2. Corpus opacum violaceum. Si hujus particulae sunt minus rigidae, per hoc ipsum, quod impellentibus in se particulis, quibus constant radii rubri, aurantii, flavi &c. cedant facilius, jam aliquantum in iis enervatur vis restitutionis, neque tam vivaciter impelluntur moleculeae materiae luminosae sub istis particulis contentae; ipsa quoque repercussio erit languidior, & lentior, ut adeo frequentia pulsum reflectentium evadat minor, atque ita radii caeteri propius accedant ad radios violaceos, quibuscum nihil immutatis reflexi sensationem coloris hujus causare poterunt. Caetera corpora opaca, quo magis vel minus in rigiditate molecularum differunt a corpore rubro, aut violaceo, eo magis, aut minus accedunt ad unum ex his coloribus.

300. Dices 1. Sonus in obicem impingens non ita mutatur, ut sonus reflexus in alium transeat: ergo neque radii immutari ab obice poterunt ita, ut alium colorem referant. R. 1. N. A. Certum est, quod chorda, quæ tensa & vibrata per se jam sonum edit, alium edat sonum, si tendatur super asserem nudum, alium si tendatur super chelin intus cavam, item alium, si chelis ampliore fuerit, vel tenuiore corpore, si asserculis constet magis, vel minus rigidis. Sic etiam in instrumentis, quæ aeris inspiratione animantur, pro diversitate materiæ diversus est sonus, etsi aer eodem modo inspiretur. R. 2. Om. A. N. C. Reflexio soni in iis objectis, a quibus nihil immutatur, absolvitur in extima obicis reflectentis superficie; reflexio luminis non fit in sola extima superficie: hinc radii in interioribus adhuc partibus corporis opaci diverso modo possunt impelli, refringi, sicque sub diversis impulsibus, & refractionibus ad oculum reflexi una cum aliis prævalentibus alium exhibere colorem.

301. Dices 2. Si radii ab ipso corpore opaco possent immutari, tunc, si radii luminis per prisma separati incidunt in obicem rubrum v. g., ubique non nisi color ruber deberet apparere. R. D. M. Si radii possent penitus immutari ita, ut eorum vibrationes perfecte respondeant colori, quem habet obex reflectens, C. M. Si solum ita possint immutari, ut vel reddantur debiliores, vel quoad frequentiam pulsuum propius accedant ad radios, quorum colorem exhibet obex reflectens, N. M. Opus non est, neque etiam me quidem iudice fieri posse videtur, ut radii ab obice colorato penitus immutentur; modo enim debiliores effecti sint radii, aut aliquantum quoad pulsuum frequentiam immutati, si cum illis, qui ab obice sibi proportionato vivacissime reflectuntur, ex iisdem punctis in oculum incurrant, cum his multum prævalentibus mixti aliam sensationem excitare non poterunt, nisi ejus coloris, cujus sunt radii prævalentes. Si autem radii jam separati, v. g. cærulei, in chartam rubram incidunt, etsi aliquantum immutentur ita, ut colorem cæruleum non jam eo cum vigore referant, quo referrent, si in chartam pariter cæruleam incidissent, tamen colorem rubrum exhibere non possunt tum, quod in eam obicis rubri partem, in quam separati incidunt radii cærulei, nulli perveniant radii rubri, quibuscum prævalentibus confusi illi colorem rubrum sistere possent; tum etiam, quod

quod in eadem obicis parte, in quam soli cærulei incidunt, nihil sit, quod horum celeritatem, aut frequentiam pulsum augere posset.

302. Ob. II. Dum radii transeunt per vitrum coloratum, color, qui in vitro est, tum per radios reflexos, tum etiam per transientes exhibetur: hujus nulla hic dari ratio potest. R. C. M. N. min. Dum vitrum est coloratum, particulis vitri, quod alias esset diaphanum, intermixtæ sunt particulæ ei colori exhibendo aptæ, quem vitrum repræsentat: hinc radii etiam diversi tum, qui reflectuntur, tum, qui transeunt, ab illis eo modo immutari aliquantum poterunt, quo immutantur a corpore opaco, ut sic immutati, ac cæteris prævalentibus permixti, cum his determinatum colorem exhibere possint. Si vitra diversi coloris sibi imponantur, cum a quolibet aliqua immutatio fieri debeat, radii ita immutati simul concurrentes tertium quendam colorem exhibebunt. Hinc est, quod ipse etiam pannus niger, saltem si lumine admodum copioso perfundatur, per vitrum coloris aurei appareat esse coloris castanei, cærulei vero, licet valde obscuri, si per vitrum cæruleum aspi-ciatur: radii enim a panno nigro reflexi in transitu per talia vitra aliquantum immutantur; quia tamen radii isti sunt admodum pauci, ac debiles, vivacitatem coloris aurei, ac cærulei non assequuntur; rosa vero sublime rubescens per cæruleum etiam vitrum aspecta rubedinem servat, attamen minus vividam: cum enim pulsus coloris rubri sint admodum fortes, & vitrum, licet coloratum, adhuc diaphaneitatem aliquam habeat. poterunt pulsus isti sat efficaces etiam per vitrum istud propagari, ob incursum tamen in particulas cæruleas aliquantum debilitati minus vivaciter organum afficient. Quodsi vitrum, per quod radii transeunt, non sit coloratum, cum sit medium valde diaphanum, & quidem ubique æqualiter, poterunt vibrationes luminosæ per poros ejus propagari, quin sensibilibiter immutentur. Si tamen plura ejusmodi vitra sibi conjungantur, radii transmissi ob frequentiores reflexiones evadent admodum rari, ac debiles, & colorem quasi subcinericium, seu albedinem admodum obscuram, prout nimirum fuerit compositio vitri, exhibebunt.

§. VIII.

ALIA QUÆDAM COLORUM PHÆNOMENA.

303. I. Dubium non est, quin diversa ipsius organi constitutio diversos possit reddere colores: Ictericis enim omnia objecta apparent flava, Ophthalmicis rubra. Nimirum variis in morbis per diffusionem bilis, aut nimium sanguinis, spirituumve affluxum variis modis tenduntur nervi optici, ac fibrillæ ipsius retinæ; ipsi etiam spiritus ad varios motus concitantur, ut proin ab eodem lumine diversæ commotiones fibrillarum, ac spirituum causari possint, quemadmodum idem etiam sapor aliter afficit ægros, aliter sanos. Quodsi noxius humor per vim medicaminum ab oculis abstractus e corpore expellatur, redit prior organi dispositio, & debita colorum perceptio. Isti tamen colores non tam permanentibus, quam transeuntibus accensendi erunt.

304. II. Si in cubiculo obscuro radius solaris permeet intervallum, quod est inter duorum cultrorum, vix decimam pollicis partem a se distantium, acies parallelas, atque cultri paulatim propius sibi admoveantur, radius in charta exceptus in fimbriis variis coloribus conspicuas separatur; fimbriæ aciebus cultrorum sunt parallelæ, ampliores, quo cultri sunt propiores; aciebus ferme se tangentibus remotiores evanescent; cultris autem omnino se se tangentibus etiam cæteræ disparent. Nempe ex una parte in particulis cultri, quæ aciem utriusque constituunt, non solum fit reflexio, sed etiam refractio; & ex altera parte ipsi radii sunt diversimode refrangibiles; hinc eo ferme modo, quo fit in prismatico, radii pro ratione refrangibilitatis a se invicem separantur, sicque separati fimbrias istas exhibent.

305. III. Quotiescunque lumen in laminas tenues pellucidas incidit, separatur in colores, quorum alii reflectuntur, alii transmittuntur pro varia lamellarum crassitie. Apparet id in duabus lentibus objectivis sibi ex illa parte, qua parum admodum convexæ sunt, mutuo impositis ita, ut aer interjacens sit instar laminæ tenuis diversæ crassitie: tenuissima est circa punctum contactus, inde versus peripheriam evadit identidem crassior. Incidat lux in superiorem lentem, eamque a parte superiore in-

intueamur; in puncto contactus apparet macula aliqua subnigra; hanc varii ambiunt annuli, quorum colores a centro versus peripheriam hunc ordinem tenent: niger, cæruleus, albus, flavus, rubeus. — violaceus, cæruleus, viridis, flavus, rubeus. — purpureus, cæruleus, viridis, flavus, rubeus. Si lentes easdem ex adversa parte inspiciamus, in puncto contactus apparet splendens albedo; hanc denuo ambiunt annuli colorati, sed iis in locis, in quibus inter priores annulos erant intervalla. Ordo eorum a centro versus peripheriam hic est: albus, rubens, flavescens, nigricans, violaceus, cæruleus. — albus, flavus, rubeus, violaceus, cæruleus. — viridis, flavus, rubeus, viridis, subcæruleus. Jam in primo casu medium apparet nigrum, quia, dum ibi duo vitra convexa se mutuo tangunt, unum velut continuum efficiunt: hinc modica erit reflexio luminis, ut adeo in præsentia colorum valde efficacium punctum istud apparere nigrum debeat. In casu altero idem punctum apparet album, quia lumen copiosissime, & sine notabili reflexione ac refractione per punctum contactus transit: radii igitur copiosi, ac inter se permixti albedinem dabunt. Reliqui annulorum colores varii oriuntur ex diversa radiorum reflexione, & refractione, quæ fit in superficie trium quasi lamellarum, geminæ scilicet vitreæ, & unius aeræ, inæqualem crassitiem habentium. Cur autem hic determinate ordo colorum in annulis servetur, vereor, ut vel in Newtoni, vel quacunque alia hypothesi sat apta reddi ratio queat.

306. IV. Si tenuissimo solis radio per foramen angustum admissio opponatur filum, acus &c, umbra, ut dictum N. 240. aliquanto amplior projicitur, & simul radii luminis ad latera non nihil detorquentur, quam luminis ad latera detorsionem plerumque vocant *diffractionem* luminis; in lumine autem sic diffracto varii etiam colores apparent, idque ita, ut rubri magis distent a directione ipsius radii incidentis; cærulei vero minus. Putant aliqui hanc luminis diffractionem, colorumque separationem fieri ob atmosphæram aliquam licet tenuem, qua filum, aut acus ambiatur, dum nimirum radii confusi in atmosphæram istam nonnihil oblique incidentes refringantur, atque hac ipsa refractione in colores suos separentur.

Verum etsi atmosphæra ista multum conferre pos-

se videatur, fors tamen negotium omne per illam non absolvitur: cur enim non in extimis ipsius corporis lamellis tenuissimis, quæ omnes, ut constat, aliquantum diaphanæ sunt, fieri possit aliqua refractionis luminis, atque ita separatio ejusdem in diversos colores? Fors ad hanc divaricationem conferre etiam aliquid poterit reflexio luminis, dum nimirum radii extremi in latera acus impellentes ab his sub eodem, sub quo inciderant, angulo ad reflexionem determinantur. Sic habetur ratio, cur radii rubri separentur a reliquis, & cur magis declinent a directione radii incidentis, quam cærulei: cum enim radii rubri fortius impingant in latera, quam cærulei, etiam magis ad reflexionem determinantur; si magis ad reflexionem determinantur, hoc ipso separantur a cæruleis, & magis declinant a directione radii incidentis.

ARTICULUS III.

DE ORGANO, ET OBJECTO GUSTUS.

307. **G**ustus is sensus est, quo corporum sapes percipimus. Hujus organum præcipuum esse linguam, nemo dubitat; quæritur tamen, quænam illius pars organum istud constituat. Partes porro linguæ sunt membrana exterior admodum porosa, ut corpuscula sapida promptius admittat, & in hominibus quidem mediocriter lævis, asperior in brutis, præcipue in leonibus, qui lambendo manum v. g. sæpe sanguinem eliciunt. Huic membranæ subjicitur alia retis instar perforata; tertia denique tota est nervosa, ex innumeris scilicet nervorum filamentis, quæ in papillulas conicas assurgunt, contexta. Atque in his papillis nerveis præcipuum gustus organum residet: nam membrana linguæ superior, & quæ huic subternitur, carnosæ sunt substantiæ, non nerveæ, proinde ad sentiendos sapes ineptæ; papillæ autem utpote nerveæ, ac subtilissimæ sunt ad eam sensationem aptissimæ. Præterea ubi plures sunt ejusmodi papillæ, ibi vivacior in ipsa quoque lingua est gustandi vis, ut in primo apice, & in opposita ejusdem extremitate guttur versus; ubi vero nullæ, aut rariores sunt papillæ, ut infra linguam, ibi nullus, aut rarior est gustus. Denique ubi humore aliquo vitioso imbuuntur papillæ, omnia

nia amaritiem sapiunt, ut in ægrotis, & sæpe etiam e somno recenter expergefactis accidit, dum humor biliosus papillas inficit. Quoniam autem similes papillæ etiam in palato, & faucibus dantur, illuc etiam gustus organum extenditur, ut proin mirum non sit, eos etiam percepisse saporem, quibus excisa lingua erat, ut in Actis Acad. Reg. Paris. legere est.

308. Cæterum gustus organum perinde, ac aliorum sensuum hebetatur immodico usu objecti sui: vehementes enim sapes, ut liquores admodum spiritosi, valde diminuunt subtilitatem nervearum papillarum, dum nimis frequenter in eas agunt; sic hominibus spiritui vini assuetis ipsum vinum videtur insipidum: contra vero abstemii, sola nimirum aqua utentes, plerumque gustum habent delicatorem; quia aqua, omni ferme carens sapore, organi texturam non alterat. Quodsi organum jam prius aliquo sapore infectum fuerit, de alterius rei sapore æquum non illico ferri iudicium poterit, nisi prius vel masticato pane, vel ingesto etiam sale organum fuerit purgatum, quod familiare est iis, qui varia explorare vini genera cupiunt. Demum quia nervulorum, ac papillarum in variis varia potest esse constructio, patet, non eundem omnibus esse gustum, ut proin verum sit receptum illud, de gustibus non esse disputandum.

309. Sapor potissimum consistit in salinis corporis sapidi particulis, certa magnitudine, ac figura præditis, vi cujus accedente motu nerveas linguae papillas debito modo afficere, & commovere possunt, Ubi salis nomine non intelligitur id, quod vulgus hoc nomine denotat, & ad condiendos cibos adhibere solet; intelligitur hic sal chymicus, cujus diversæ admodum species in mixtis deprehenduntur, & figura, & magnitudine particularum plurimum inter se differentes. Atque hæ quidem particulæ primario sunt, quæ gustus organum varie afficientes diversi saporis sensationem causant; interrim si eadem particulæ cum aliis, sulphureis præcipue, ac oleosis diversimode conjunctæ ad organum pertingant, aliam etiam ac diversam causare impressionem debebunt: proin sapor, ejusque diversitas multum dependere potest a commixtione salium cum aliis quoque corporis sapidi particulis. Asserti sic declarati veritas ex eo patet, quod corpora omnia, quæ sale abundant, sint sapida, & quidem sapidiora, quo majorem salis copiam continent;

contra vero illa, quæ nihil, aut ferme nihil salinæ substantiæ complectuntur, sunt plane insipida; cumque ea, quæ sapida sunt, plerumque etiam sint odora, in iis etiam dari particulas sulphureas, aut oleosas, ex Art. sequ. intelligetur. Particulæ porro istæ nec debent esse nimis magnæ, ut possint linguæ poros penetrare, nec nimis parvæ, ut papillas sufficienter possint commovere. Figura earum debebit esse angulosa, qualis etiam est omnium salium figura: hæc enim ad faciendam impressionem aptissima est.

310. Hinc redditur ratio 1. Cur nullius corporis solidi sapor percipiatur, nisi illud dentibus conteratur, aut per salivam dissolvatur; quia nimirum salinæ corporis particulæ afficere non possunt gustus organum, nisi ab aliis, quibus in corpore sunt permixtæ, sejungantur, & extimæ, qua lingua tegitur, membranæ poros subeant. 2. Cur solidorum sapor non percipiatur, si lingua vel nimis arida sit, vel nimio humore turgida: in primo enim casu salina corporis substantia ex defectu salivæ dissolvi non potest; in altero vis particularum, etsi solutæ jam sint, retunditur, ne ad nerveas linguæ papillulas penetret. 3. Cur sapida corpora calore plerumque fiant sapidiora, & nimio frigore omnino insipida: calor namque non modo perfectius dissolvit salinas particulas, sed eas etiam fortius impellit in papillas nerveas; frigus vero & dissolutionem impedit, & motum hebetat. Ea tamen, quæ dulcia sunt, calefacta plerumque sapiunt minus, quia fibrillæ organi a calore agitantur, & dilatantur amplius, atque etiam subtiliores moleculæ fors disperguntur.

311. Inde etiam sequitur, quod immutatio saporis provenire inprimis possit a diversa commixtione particularum earum, quæ seorsim sumptæ jam sapidæ sunt, tum illarum, quæ seorsim nullum saporis sensum causare possunt: si enim particulæ diversi saporis inter se artius conjunctæ ad organum appellant, alia ab iis impressio fiet, quam fieret a singulis seorsim; &, si particulis de se sapidis jungantur aliæ nullius saporis, de novo alia erit impressio, quam si solæ sapidæ ad idem organum pervenirent. Præterea immutari sapor potest ope caloris: dum enim per calorem vel solis, vel alterius ignis causatur motus intestinus partium, particulæ antea nimis asperæ diuturna agitatione, ac mutuo incursum

curfu invicem atteruntur; particulæ salinæ crudioribus implicitæ exsolvuntur, aliæ ab aliis sejunguntur, cum aliis diversimode implicantur, figura, magnitudo immutatur, ex quibus omnibus diversas in organo impressiones oriri necesse est. Hinc fructuum, dum maturefunt, mutatur sapor, caro assata gratum pariter saporem induit, &c. Si calori accedant humida, uti fit in coctione, denuo diversa particularum tum quoad figuram, & molem mutatio, tum conjunctio, aut divisio, proin diversa etiam impressio in organis fieri debet. Denique etiam percolatione saporum per insipida mutari sapor potest partim, quod multæ particulæ sapidæ remaneant in arena v. g., qua percolatio fit, partim, quod a se mutuo separentur, aut etiam figura immutetur.

312. Sapor in genere gratus erit, qui nerveas papillulas blande, ordinateque commovet; ingratus, qui easdem inordinate, & aspere vellicat pro diversitate nervulorum organum gustus constituentium, de qua N. 308. Saporum species variæ sunt, quæ varietas tum a varia permixtione, tum a varia etiam magnitudine & figura particularum ad saporem conducentium dependet. De his conjecturas aliquas addere juvat. *Salsus*, ut ex Chymicis explicat Clar. P. Fortun. a Brixia, proprius salii marino, cujus figura cubica est, videtur provenire a particulis rectos, vel quasi rectos angulos habentibus. *Acer*, ut in pipere, a corpusculis apprime subtilibus, angulo acutissimo præditis, motuque celeri, ac perturbato agitatis. *Acidus*, in aceto, pomis citrinis, a corpusculis quam maxime rigidis, quadrangulæ figura affectis, cuspidemque teretem, & acutum habentibus. *Acerbus*, ut in fructibus immaturis, pomis silvestribus, a particulis rigidis, uncinatis, & asperis, quæ in gustus organum incurrentes illius poros obstruunt, nerveas ejus fibrillas ligant, ipsisque insiguntur, ut ab illis dimoveri difficulter queant: hinc stupor dentium, ac palati. *Austrius*, qui vix differt ab acerbis, & sentitur in alumine, vitriolo, ex iisdem ferme cum acerbis principiis oritur. *Dulcis* provenit ex particulis, quæ obtulis angulis præditæ sunt, & cum subtiliori sulphuris substantia permixtæ. Dulcedo duplex distinguitur, altera, in qua salina substantia prævalet, estque summe vivida, ut in saccharo; altera, in qua prævalet substantia sulphurea, priore delicatior, ut in melle, manna, fructibus maturis.

Denique sapor *amarus*, qui dulci opponitur, & sentitur in absynthio, myrrha, aloe &c.; oritur ex corpusculis, quæ multiplicibus angulis prædita inæqualiter, ac dure nerveas fibrillas movent, & quasi mordent. Et hi quidem sapes dicuntur simplices, ex quibus varie inter se mixtis alios, eosque diversissimos oriri posse, quivis perspicit. Sed dixi: conjecturæ hæc sunt: quis enim particularum minimarum figuras omnes, harumque cum animæ in corpus suum actione convenientiam ausit determinare?

ARTICULUS IV.

DE ORGANO, ET OBJECTO ODORATUS.

313. **N**asus, ut organa alia, variis constat partibus. Superior, quæ ossea est, vocatur *dorsum*, inferior, quæ cartilaginea, dicitur *globulus*, partes laterales *pinnæ*, aut *alæ* nuncupantur. Nasus interior per septum medium partim osseum, partim cartilagineum dividitur in duo foramina, quæ *nares* dicuntur, & quarum quælibet circa nasi medium denuo dividitur in duas partes, e quibus una sursum ascendit ad os cribriforme; altera abit in palatum, & fauces: hinc potus aliquando per nares effluit, & excrementa per nares emitti solita subin in fauces delabuntur. Interior suprema nasi pars constat lamellis osseis, & cartilagineis ossi cribriformi adherentibus, quarum anfractus, & recessus vestiuntur membrana tenuissima, per quam subtilissima nervorum fila, per foramina ossis cribriformis trajecta, & in exiles veluti papillas desinentia, miro artificio disseminantur.

314. Atque hæc membrana interiores narium anfractus, seu lamellas vestiens est organum odoratus: hujus enim membranæ nervæ papillulæ, cum solæ inter omnes partes nasi ex intima cerebri substantia propagentur, solæ etiam aptæ sunt ad percipiendos odores, utpote quæ solæ spiritus animales sensationi necessarios recipere, & impressionem a corpusculis odoris in se primo factam ad cerebrum usque propagare possunt. Hinc est, quod animalia sagacioris odoratus, uti canes, ha-

habeant dictam membranam magis rugosam; habent nimirum numerosiores lamellas, quas omnes involvit hæc membrana, ut proin pluribus corpusculis odoris simul affici organum possit; hinc etiam destillationes, dum magna pituitæ copia membranæ hujus rugas obsidet, olfactum hebetant, ut evenit catarrho laborantibus. Et quoniam in hac membrana jam sistuntur corpuscula odorata, odoratus organum male constituitur a Cl. Diemerbroeckio in carne papillosa membranæ huic subjecta; processus quoque mammillares, ut vocant, ossi cribroso incumbentes jam sunt intra cranium, nec quidquam habent de nervis: proin etiam isti organum odoratus esse nequeunt.

Quamquam autem ad linguam usque propagetur hæc membrana, tamen in lingua non percipitur odor; cum nervi olfactorii papillulæ ad linguam usque non extendantur: nervi vero gustatorii, cujus ramuli aliquot ad nares etiam ascendunt, ramus crassior in lingua residens minus aptus est ad percipiendas subtilissimas odoris particulas. Ob miram tamen nervorum conjunctionem, & consensionem fieri facile potest, ut odor suavis salivam, acrior vero etiam lacrymas cieat. Imo etiam vomitum excitare odores possunt: dum enim nimis sollicitant narium membranam, etiam motum aliquem nervis ad præcordia usque excurrentibus communicare possunt. Dum autem tabacco eadem membrana acrius vellicatur, ob eundem nervorum consensum succussio diaphragmatis, ac proin sternutatio sequitur.

315. Ipse odor non propagatur, nisi per effluvium corpusculorum, e corpore odore emissorum. In quibusdam certe id ipsis adeo oculis cernimus, ut in thure prunis imposito; in aliis corporibus id ipsum fieri, multiplex suadet ratio. Sic 1. res odoræ diutius servant odorem, si cistis inclusæ, aut pannis involutæ fuerint, quia nimirum sic parcius exhalant sua corpuscula; quin in vitro hermetico clauso plane nullum foras spargunt odorem, quia corpusculis odoris licet subtilissimis nullus per vitri poros exitus patet. 2. Calor, & quæ juvant exhalationem, ut affricus solidorum, vel confusio, & fermentatio liquidorum, etiam serviunt ad diffusionem odoris; frigus vero, & quæ exhalationem impediunt, odoris quoque diffusionem minuunt. Hinc odores quidam non propagantur, nisi per calorem, & omnes magis

diffunduntur in regionibus calidis, quam in frigidis; plus item in æstate, quam in hyeme. Ubi tamen advertendum, sub vespertum, & circa solis occasum florum fragrantiam melius percipi, quam in ipso æstu meridiei, quia nimirum per æstum solis corpuscula odora sunt nimis attenuata, per succedens vero frigus vespertinum aer magis condensatur, proin etiam odoris corpuscula in determinato aeris volumine magis conjuncta efficiunt, ut cum inspirato aere plura simul applicentur olfactus organo. 3. Flante vento in unam partem longius fertur odor. & impeditur, ne feratur in alteram oppositam, quamvis vicinam.

316. Corpuscula autem illa, per quorum effluvium odor propagatur, & in quibus odor re ipsa consistit, videntur potissimum esse salino-sulphurea, valde tenuia & volatilia, certam denuo magnitudinem, ac figuram habentia, queis organi fibrillas nerveas debito modo afficere, atque hac impressione facta animam ad perceptionem odoris determinare queant. Suadet id experientia, qua habemus, ea corpora, quæ spiritu salino, & sulphureo abundant, plus cæteris esse odora; illa vero, quæ particulis oleosis, ac inflammabilibus, seu sulphureis destituuntur, aut arte chymica privantur, destitui, ac privari simul odore suo. Qualem vero figuram exigant corpuscula odora, nemo facile definierit. Illud scimus, fieri quandoque, ut, dum duo corpora seorsim inodora, aut odoris minus grati, commiscantur, mixtum illud evadat odorum, ut patet in calce viva cum sale amonica permixta, aut in aqua communi camphoræ in oleo vitrioli dissolutæ commixta; aqua etiam fortis graviter olens si cum spiritu inflammabili ingrati pariter odoris permisceatur, odorem aromaticum spargit; his autem in casibus aliud utique non fit, nisi quod mutetur structura particularum, detorque alia mixtura sulphuris chymici cum particulis aliis præcipue salinis.

317. Diversitatem odorum quod concernit, orietur illa haud dubie tum ex diversitate particularum salis, & sulphuris, tum ex diversa conjunctione harum inter se, & combinatione cum aliis quoque particulis, ferme ut de saporibus dictum. Quinam vero inter illos sint simplices, ac quasi fundamentales, haud satis constat, vixque aliud distinguitur, quam duo suprema odorum genera, quorum unum suave sive gratum, alterum grave, seu

seu molestum dicitur. Odores minus cognitos solemus referre ad alios notiores dicendo v. g. hoc corpus habet odorem sulphuris, rosæ &c. Suavis porro odor generatim loquendo nobis ille est, qui nerveas membranæ papillulas blande, ordinateque commovet; gravis vero, qui easdem inordinate, & aspere vellicat. Potest etiam idem odor uni esse suavis, alteri molestus, quia varia potest esse constitutio organi; imo potest subin odor causare deliquium, subin a deliquio revocare: cum enim filamenta membranæ cerebro sint vicinissima, iis hoc, vel illo modo commotis ipsum cerebrum, totumque nervorum systema proportionatam mutationem subit, sicque spiritus animales vel torpescere incipiunt, ut in deliquio, vel torpentes excitantur.

318. Dices 1. Odor, ut constat, sæpe propagatur in spatium ingens: ergo non potest consistere in effluvio corpusculorum: ad implendum namque tantum spatium requireretur immensa corpusculorum quantitas adeo, ut corpora odora notabiliter deberent deficere, quod tamen non fit. R. D. A. Odor propagatur in spatium ingens, si corpora odora sint admodum magna, aut multa, C. A. Si parva sint, & pauca, N. A. Nam 1. Vultures, ac Lupi non percipiunt ad magnam adeo distantiam odorem unius tantum cadaveris; si autem major fuerit cadaverum cumulus, corpuscula exhalata per aërem ad maximam etiam distantiam deferri poterunt. 2. Caryophyllum, cujus odorem navigantes in ortum dicuntur flante vento sentire ad plura miliaria, in Molucis nascitur copiosissimum, & plurimos agros implet; idem est de Cinnamonomo, quod in Zailano floret. 3. Ut canes vel feras, vel dominos suos longe absentes odorentur, sufficiunt corpuscula pauca, semitis, per quas transiere, fruticibus adhærentia, quæ naribus sagacissimis per respirationem attrahunt; posse autem corpuscula hujusmodi subjectis suis diutissime inhærere, vel in solis podagricis abunde patet.

Diminutionem vero corporum quod concernit, duplici potissimum modo possent illa deficere, nimirum quoad odorem, & quoad pondus. Quod caryophylla v. g. non deficient quoad odorem, ratio est, tum, quia eorum numerus est ingens, tum, quia particulae odoriferæ sunt subtilissimæ, tum etiam, quia emissarum particularum jactura in iis reparatur per novam eorum nutritio-

nem. Quod attinet defectum ponderis, certum est, quod, si effluvia sint paulo majora, corpora plerumque notabilem ponderis jacturam patiantur; quod autem hæc non semper notetur, in causa denuo est stupenda particularum subtilitas. atque etiam particulæ heterogenæ per aerem sparsæ, quæ in locum avolantium succedunt, & ponderis defectum suppleant. Hæc de subtilitate particularum odoriferarum dicta non mirabitur, qui relegerit ea, quæ de immensa ferme corporum divisibilitate dicta sunt *Phyf. Gener. Diff. II. Art. I. §. I.*

319. Dices 2. Modicum etiam granum Ambre odorem quaquaversum spargit, idque per plures annos; idem ferme est de chirotheeis Hispanicis, modica ambra tinctis: hoc fieri non potest per effluvium corpusculorum. Prob. Singulis minutis secundis deberet emitti tanta corpusculorum copia, quæ implendo toti cubiculo sufficeret. R. Tr. M. N. min. Ad prob. N. M. Licet non quolibet minuto tanta odoris copia emittatur ex ipsa ambra, sentiri tamen potest odor, tum quia eadem particulæ odoræ diutius manere possunt in aere, aut alio medio, tum etiam, quia illæ particulæ, quæ jam in sensorio hærent, cum attracto aere sæpius possunt in membranæ papillas impingere, sicque eas debito modo commovere. Præterea ambra odorem nec ad spatium adeo magnum diffundit, &, ut cætera odorifera, diutius conservat odorem, si vel cista, vel involucrio custodiatur, quam si aeri libero fuerit exposita.

Quod aliqua corpora sponte quasi odorem emittant, alia vero non, nisi aut accendantur, aut prunis saltem ardentibus injiciantur, ratio est diversa structura corporum, & maxime nexus partium inter se, qui facit, ut, dum in aliis effluvia odora facillime per poros corporis transpirent, in aliis avolare nequeant, nisi calore solvatur nexus, & particulæ odoræ ab iis, quibus implicitæ sunt, expellantur; quod vero aliqua, uti thus, dum accendantur, ingratum odorem spargant, inde est, quia vehementi actione ignis nexus illico solvitur undique, atque ita particulæ etiam crassiores simul ad organum deferuntur, aliarum vero figura eadem ignis actione non nihil immutatur. Flores quoque contusi ingratum quandoque odorem emittunt, quia per contusionem laxatis nimium poris etiam crassiores, ac nondum satis excoctæ particulæ avolare possunt. Denique liquores, dum essan-

duntur, copiosius odorem spargunt, quam dum vitro etiam aperto continentur, quia effusi majorem acquirunt superficiem, atque ita ex pluribus partibus simul corpuscula odora emittunt.

ARTICULUS V.

DE ORGANO, & OBJECTO TACTUS.

§. I.

DE ORGANO TACTUS.

320. **O**Mnium sensuum universalissimus idem, ac crassissimus est Tactus proprie dictus, quo calida, & frigida, humida, & sicca, & aliæ id genus corporum affectiones a nobis percipiuntur. Atque hujus organum per totum corpus animalis diffunditur, ut melius consultum sit animali, quod alias hostem lædentem nec advertere, minus fugere, aut illi se se opponere posset. In interioribus quoque corporis partibus sensus hic invenitur, ut experimur in cholica, aliisque infirmitatibus. Hic præcipue sermo est de tactu externo, de quo communis nunc sententia est, organum tactus externum esse nerveas pyramidales papillulas ex cute erumpentes, & versus cuticulam assurgentes: proin non ipsa cuticula extima, sed eæ papillæ, quæ ex cute proprie dicta, & ex innumeris arteriis, venulis, nervulis ac fibrillis contexta versus cuticulam prominent, externum tactus organum constituunt. Papillæ namque istæ nerveæ per nervorum filamenta communicant cum cerebro, adeoque ad devehendos spiritus animales, impressionemque in se factam ad cerebrum usque propagandam sunt aptissimæ. Præterea ubi copiosiores simul, ac delicatiores sunt hujusmodi papillæ, ut in planta pedis, digitorum apicibus &c. ibi exquisitior solet esse tactus, obtusior vero, ubi vel pauciores fuerint papillæ, vel callo ita obductæ, ut sat valide commoveri nequeant. Internum porro tactus organum est quælibet pars membræ interna interior animalis, utpote ex innumeris fibrillis nervis

veis contexta, proin ad recipiendos spiritus, & impressiones propagandas idonea. Ut adeo tactus sensatio habeatur, quando vel externa corpora delitescentes sub cuticula papillas impellunt, ac commovent, vel nervorum fibræ per interiores membranas, aliasve partes diffusæ a corpusculis, aut humoribus ad illas delatis diversa ratione sollicitantur, oriturque dehinc vel jucunda, & grata sensatio, cum nervæ papillulæ blande, ac æquabiliter afficiuntur, vel molesta, & dolorifera, cum illæ nimium vellicantur, motuque inordinato sollicitantur, laxantur, vel constringuntur.

321. His positis explicatur 1. cur manus aut pedes frigore algentes, si subito calentem in aquam immitantur, acerbè doleant: humores enim frigore intra cutem contracti celerius rarefiunt, & ita fibras subito, ac nimium distendunt. 2. Cur, si diutius, maxime hyberno tempore, sedeamus, fornicationem in pedibus sentiamus sæpe adeo molestam, ut vix terram absque doloris sensu contingere valeamus haud secus, ac si spinis pes pungeretur. Oritur hæc fornicatio pariter ab humore frigido, qui intra nervos illapsus eorum orificia obstruit, novaque pressione illos constringit; calore, vel agitatione rarefit ille humor, & sic fornicatio tollitur. 3. Ægrius ferimus, si vulnus aliquod tangatur, tum, quia læsæ partes ab objecto immediate afficiuntur, tum, quia ex mala illa affectione minimæ etiam impressiones gravius fibrillas infirmas commovent. 4. Cur, qui febris calida, aut frigore nimio extinguuntur, sæpe sine doloris sensu, placideque expirent; quia præcedentium dolorum vehementia absumpti sunt spiritus, vel frigore contracti a motu ad sensationem excitandam necessario impediuntur. 5. Cur calorem cordis, & sanguinis, aliasque affectiones internas ordinariè non sentiamus; quia anima ad ea, quæ eodem semper modo se habent, & connaturalia homini sunt, non attendit, sed ad solas mutationes, quæ subita in corpore accidunt: hinc si mutationes aliquæ in internis fiant, defectum, vel excessum mox sentimus.

§. II.

DE CALORE.

322. **D**uplici modo spectari calor potest, vel prout est in corpore calido, vel prout a nobis percipitur;

ca-

calor enim existens in calido causat affectionem illam, quæ datur in membris nostris, dum calorem in iis percipimus. Quæritur hic de calore, qui in corpore calido inest. Hunc moderni Philosophi, licet non omnino consentiant, fere omnes in motu perturbato, & expansivo partium quarundam minimarum constituunt. Est autem motus perturbatus, quo partes secundum directiones varias sursum, deorsum, ad latera moventur, & aliæ in alias per mutuam actionem, & reactionem reflectuntur; motus vero expansivus est, quo partes a centro corporis ad hujus peripheriam tendunt ita, ut corporis extensio secundum omnem dimensionem, nisi impedimentum addit, augeatur. Nos, qui pridem admisimus materiam quamdam subtilissimam ubique diffusam, quæ jam ignem, jam lumen constituat, principiis his inhærentes calorem quoque quoad substantiam nihil ab igne diversum arbitramur. Sentimus hac in re cum Philosopho, juxta quem ignis aliud non est, quam excessus caloris, vel, ut Moderni loquuntur, ignis est quædam concentratio caloris.

323. Propositio. Calor consistit in corpusculis potissimum igneis, minutissimis, expansivo, & perturbato motu vehementissime agitati. Dicitur 1. in corpusculis: calor enim est substantia impenetrabilis, adeoque corporea, utpote quæ non solum corporum poros laxat, sed partes eorum etiam vario motu agitatur, quod utrumque fieri non posset, nisi calor esset substantia impenetrabilis. 2. In corpusculis potissimum igneis: motus enim, quo partes ipsius corporis incaléscentis agitantur, jam effectus aliquis caloris est, talis tamen, qui sensationem caloris vividiores in nobis causare potest. 3. In corpusculis minutissimis: calor enim per corpora etiam densissima penetrat, ea etiam, quorum pori sunt exilissimi. 4. In corpusculis motu expansivo, ac perturbato vehementissime agitati: cum enim ipsæ partes corporis incaléscentis eo motu agitentur, ut videbimus, a fortiori particulas calorigificas, si ita vocare placeat, ceu unicam motus istius causam oportet simili modo agitari velocissime. Et vero, quod ita agitantur, videmus in flamma, radiis solaribus, lente aut speculo in focus collectis. Sic declarata propositio

324. Probatur. In eo jure dicitur consistere calor, quo posito datur, quo aucto vel imminuto augetur vel
mi-

minuitur, & quo sublato tollitur calor, quodque est omnino proportionatum ad effectus caloris edendos: tale quid est motus expansivus, perturbatus, & rapidissimus igniculorum: ergo, Major ex eo constat, quod, quidquid præterea adstrueretur, foret superfluum. Minor ostenditur. I. Corpora inprimis duriora mutuo, & vehementi attritu magis semper incalescunt, adeo, ut flammam aliquando concipiant. Exempla hujus varia adducit Cl. Boerhaavius Chimie suæ P. II. & experiri quivis poterit, si vel cultrum, aut frustum ligni durioris celeri reciprocatione supra aliud corpus durum diutius moveat, aut funem rapido motu per manum trahat.

II. Lamina ferrea ictibus nulla interjecta mora repetitis percussa tantum fervorem concipit, ut etiam sulphur accendat, imo aliquando candescat. Horum ratio alia non est, nisi, quod partes talium corporum magis semper, magisque succutiantur, particulæ igneæ tum in poris corporum, tum circa corpus existentes motu perturbato, ac rapido liberius agitentur, & in solidas corporum partes impactæ aut eas ita attenuent, ut secum illas in flammam abripiant, aut, si nexum earum dissolvere nequeant, saltem candefaciant.

III. Liquida omnia, dum calorem concipiunt, motu quodam interno concitantur, crescente calore ebulliunt, eo iterum decrescente sensim ad quietem redeunt. Quod ipsum etiam patet in corpore humano, dum humores æstu febrili motu tumultuario agitantur. Sæpe dum liquida de se frigida commiscuntur, ita effervescent, ut partibus eorum rapido, confusoque motu agitatæ calorem subin sat intensum concipiant. Quod etiam fit, dum calci vivæ aqua affunditur; & præcipue si limatura Martis cum sulphure permixta, & aqua irrorata in notabili quantitate ollæ fictili longæ & angustæ immitatur, ac in terram defodiatur: tum enim post 8. vel 9. horas terra superposita intumescit, atque dehiscens primum exhalationes expirat, tum flammæ eructat, effusæ circum flavo, & nigro quodam pulvere, unde causa caloris subterranei, thermarum, montium ignivomorum, terræ motuum &c. evidentissime, ut loquitur Cl. Verdries, deducitur. Nobis hic sufficit, ejusmodi fermentationes calidas sine rapidissimo motu non fieri.

IV. Hunc ipsum motum etiam auribus manifestat cylindrus aurichalceus ignitus, qui dum sensim refrige-

ratur, per intervalla inæqualia idemitem sonos edit: imo etiam quædam scoriz corpuseula durante sonitu ad aliquot digitorum distantiam a se projicit. Sic etiam frustum sulphuris manu calidiore aliquamdiu retentum fragores admodum notabiles edit, quamprimum non nihil incallescere cœpit; unde autem sonus, ubi nullus est motus?

V. Metalla omnia vi caloris dissolvuntur, liquefunt, ac denique ebulliunt; lapides calcinantur, alia vitrificantur: hæc autem quomodo sine motu intestino fieri poterunt? Corpora denique etiam durissima calore expanduntur ita, ut aliquod voluminis sui augmentum acquirant, id quod Grævesandius in annulo & globo cupreo demonstrat. Globus hic, dum friget, per annulum ita trajici potest, ut nullum tamen ad latera relinquat interstitium sensibile. Si calefiat globus, per annulum jam non amplius transit, quocunque situ applicetur. Id ipsum in cylindris ferreis ostendit Boerhaavius, quorum & longitudo, & crassities calore aucta admodum est. Præcipue hoc patet in Thermometris seu e mercurio, si ve e spiritu aliquo confectis, quæ fluida ad minimum caloris incrementum voluminis etiam sui augmentum capiunt. Quid vero est ita extendi, & expandi, quam particulas corporum in alia atque alia spatia moveri? igitur etiam particule igneæ, quæ hujusmodi expansionis causa sunt, movebuntur, & quidem, ut hinc manifeste patet, motu expansivo, cujus motus, si subitus sit, vis rapidissima ex eo adhuc intelligi potest, quod in Actis Acad. Reg. Paris. ad annum 1699. habetur, videlicet si æris fusi grana aliquot injiciantur aquæ, tam stupenda mox exeritur vis, ut vas fortissimum ad latera & fundum uno ictu displodat, ipsumque in pollinem disjiciat tenuissimum. Ex his principiis confectum est instrumentum, quod Nolletus Pyrometrum appellat, lamina nimirum, vel cylindrus metallicus, supra plures flammulas in longum suspensus: is enim vix recepto calore extenditur, suæque extensione vicinam rotulam dentatam, & hac mediante indicem movet ita, ut hujus motus augmentum uti extensionis, ita etiam caloris in cylindro demonstret.

325. Ob. I. Sæpe datur motus in corpore, quin detur calor, ut patet in variis fermentationibus ex confusione liquorum ortis. R. D. A. Datur motus partium: major-

majorum, aut etiam minimarum, at non talis, qualem requirit calor, quin detur calor, C. A. datur motus particularum minimarum, & quidem expansivus, & perturbatus, proveniens ab igniculis simili motu rapidissime agitat, quin detur calor, N. A. Sat certum est, sonum consistere in motu aeris, & tamen sæpe datur motus aeris, quin detur sonus; quia nimirum non qualiscunque, sed determinatus motus aeris sonum efficit; idem erit de calore. Atque hæc responsio est universalis ad varia, quæ afferri possunt phænomena.

In specie autem, dum spiritus acidi miscetur cum sale volatili, oritur effervescentia quædam illi non abfimilis, quæ causari a calore solet; & tamen mixtura, ut immisum in eam thermometrum testatur, est frigida. Quando nimirum particulæ spirituum acidorum in sales vimagna irruunt, oritur quidem ebullitio, & motus perturbatus, sed talis, qui ad unionem potius, & conjunctionem, quam disjunctionem, & expansionem materiæ tendat; quo fit ut particulæ magis volatiles, & qui in illis insunt, igniculi expellantur, sicque libere avolent, quin in reliquis partes invicem coeuntes agere valeant, id quod ex eo intelligi potest, quod ex mixtura hac frigida durante fermentatione fumi ac halitus adeo calidi assurgant, ut, si in iis teneatur thermometrum, liquor ad 10. non raro gradus ascendat, ut præter alios expertum se testatur Gravesandius. Quodsi vero spiritus ejusmodi liquoribus oleosis misceantur, cum fermentatione etiam adest calor; quia nimirum igniculi non ita libere se extricare, ac avolare possunt; hinc in ipsa mixtura rapidissime agitati calorem valde sensibilem excitant, uti fit, si spiritus acidi misceatur oleo terebinthinæ, aut spiritus vini purgatissimus oleo tartari. Quod vero motus lactis, aut cerevisiæ sub recipiente quodammodo ebullientis sit longe diversus ab eo, quo corpora hæc super ignem posita ebulliunt, ad oculum patet: est enim motus ille ab aeris expansione proveniens admodum lentus, & non nisi imperfectam quamdam similitudinem habet cum ebullitione, vi caloris causata.

326. Dices 1. Sæpe datur motus etiam vehemens, ac perturbatus, licet detur intensum frigus, ut sit tempore hyberno furente Borea, aut dum aqua baculo, aut manu perturbate agitur. R. Servit hic data antea distinctio. Boreas ex frigidissima regione propulsus pluri-

ma secum advehit corpuscula cutem acriter rodentia, maxime nitrofa, per quæ cur intendatur frigus, *S.* sequi ostendetur. Quod autem manus per aquas versata plus frigoris sentiat, quam, dum in aqua quiescit, inde est, quia, dum quiescit, erumpentes ex manu igniculi ambientem aquæ superficiem aliquantulum temperant, non vero superficies remotiores; hinc si ad has non ita temperatas manus perveniat, plus frigoris, quam in priore statione percipiet; sic etiam flabello, quo utuntur fæminæ, calor temperatur, quia removentur semper superficies aeris ambientis jam aliquantum calefactæ, & succedunt aliæ adhuc minus calidæ.

327. Dices 2. Sæpe, dum minor est calor, major est partium motus, & vicissim crescente calore minuitur motus; sic massa picis igni primum admota majorem exhibet effervescentiam, motumque; qui sensum minuitur, dum augetur calor. *R. D. A.* Major est motus partium sensibilibum, ac crassiorum, non proveniens a majore copia, aut agitatione igniculorum, *C. A.* partium minimarum, & proveniens a majore igniculorum copia, aut agitatione, *N. A.* Ab initio pix intumescit vehementius, quia partes ejus crassiores nondum satis evolutæ, ac multo aere repletæ, ab igniculis expanduntur, & attolluntur; postea vero, dum partes jam magis sunt resolutæ, & aer antea latens expulsus, igniculi fortius agitati non quidem majorem ebullitionem partium sensibilibum, sed tamen majorem motum partium minimarum causant, dum bullulæ quidem fiunt minores, multo tamen vehementius agitantur, quam antea agitabantur bullulæ majores, ut oculis etiam intueri licet. Quod autem dum liquor aliquis ab igne removetur, cesset ebullitio, quia cesset illico calor, ratio est, quia novi igniculi a flamma non amplius intruduntur, qui sensibilem illam ebullitionem continent; in liquore tamen eadem ferme copia, & agitatio igniculorum adhuc datur, proin calor non illico cessat.

328. Ob. II. Sæpe datur calor, quin ullus detur motus: nam 1. in marmore modicum incalescente quis credat, dari motum aliquem perturbatum? 2. In permixtione aquæ cum oleo vitrioli nulla datur effervescencia, & tamen calor valde intensus. *R. D. A.* quin ullus detur motus, qui sola experientia sensuum possit apprehendi, *Tr. A.* qui ex ratione legitime inferatur, *N. A.* In innu-

meris, dum calor valde augetur, datur motus etiam sensu perceptibilis, imo ebullitio: cum ergo calor augeatur successive, legitime infertur, etiam motum, qui nunc est admodum vehemens, crevisse successive, ut adeo jam ab exordio caloris datus fuerit motus, qui sensim talia sumpserit incrementa, ut etiam fieret sensibilis. Motum hunc etiam demonstrant calida, dum immerguntur frigida, dum liquefiunt, dum expanduntur, dum liquorem thermometri cogunt ascendere, qui ascensus nisi adscribatur motui igniculorum, & per hunc expansioni ipsius liquoris, explicari nulla ratione poterit. Sed cur manus admota marmori non sentit hunc motum particularum? R. Sentit illum manus, sed sub ratione caloris, dum ea in manu fit impressio, quam sensatio caloris consequitur: sicut auris v. g. sentit motum vibratorium aeris, sed sub ratione soni, quem ipsum motum aeris non sentit manus. Si denuo quæras, cur non excutiantur saltem tenuissimi pulvisculi marmori fors incumbentes. R. id ab aliquibus omnino candescentibus fieri, dictum est N. 324. de cylindro aurichalcino; fors idem fieret in marmore, aut alio corpore, si ad similem caloris gradum perduceretur: cum igitur a notis ad ignota valeat argumentatio, rite infertur, motum ubique esse, ubi est calor, proin etiam in mixtura illa aquæ cum oleo vitrioli, quod satis demonstrat thermometrum eidem immersum.

329. Ob. III. Calor non potest consistere in motu expansivo. Prob. plurima sunt, quæ vi caloris contrahuntur, & constringuntur, qualia sunt lutum, albumen ovi. R. N. A. Ad prob. D. A. Et hic effectus est calori mere per accidens, C. A. est effectus caloris per se, N. A. Effectus caloris per se est expansio & dilatio, quam dum in his corporibus causat, plurimæ eorum particulæ, quibus antea reddebantur fluida, aut mollia, evaporant, ac dissipantur, quod imminutum eorum pondus ostendit; interstitia igitur a particulis exhalatis relicta ut occupent partes cæteræ, arctius ad se invicem accedunt, sicque volumen totius corporis imminuitur. Albumen ovi ideo in massam solidam concrevit, quia possunt illius particulæ talem habere magnitudinem, figuram, & texturam, ut moveri ab igniculis nequeant, quin inter se implicentur, & in duram massam concrevant. Quodsi tamen calor nimium augeatur,

tur, intrusa majore igniculorum copia albumen antea concretum denuo dissolvitur indicio sat certo, priorem ipsius concretionem effectum caloris fuisse solum per accidens. Neque hic dictis obest, quod in Actis Acad. Reg. Paris. ad annum 1705. habetur. In pelvim majorem infundebatur aqua frigida; in medio pelvis erat cucurbita vitrea similem aquam continens; huic immersum thermometer gradum frigoris indicabat. Cum postea aliquot carbones igniti in pelvis aquam essent injecti, liquor thermometri duabus vel tribus lineis descendebat. Nempe subitaneo hoc calore primo dilatabatur vitrum ipsius thermometri; unde liquor in globulum jam capaciores delabi omnino debuit, usque dum calor sufficiens in ipsum thermometri liquorem penetrans eundem postea dilatare, atque attollere in altum potuerit.

330. Aliqua adhuc addi in compendio possunt. I. Corpus calidum aliis obvolutum calorem servat diutius; quia nimirum igniculi sic magis continentur, ne illico avolent, nec mutatur identidem superficies aeris ambientis, in quem frigidiores, ut mox dicetur, calor egredi deberet: hinc prunæ cineribus coopertæ diutius calorem retinent, & vestimenta eundem foveant. Liquor calidus bacillo agitatus calorem celerius perdit; quia motu illo corpuscula ignea facilius dissipantur. Corpora, quæ tardius incalescunt, diutius calorem servant; sicut enim corpuscula ignea difficilius pervadunt horum corporum poros, ita pariter arctius in iis, ac diutius continentur. II. Flamma pro diversitate subjecti inflammata, aut nutrimenti diverso caloris gradu sensum afficit; sic flamma straminis, lignorum molliorum, tantum haud efficit calorem, quantum flamma ligni solidi, ac durioris: dum enim in illis partium nexus facile solvitur, igniculi in eis non tot tantisque reflexionibus, nec tanta cum vi in se mutuo impingent, proin nec tam vehementi motu agitabuntur, quo agitantur in illis, quorum nexus solvitur difficilior.

III. Quando aqua igni imposita calefit, hæc ferme accidunt; 1. quo densior est fundus vasis, eo plus caloris recipit; 2. dum aqua primum incipit calefieri, calidior est fundus, quam dum aqua jam ebullit; 3. si aqua jam ad certum ebullitionis gradum pervenit, calor ipsius non amplius augetur, sive supra eundem, sive supra vehementiorem ignem constituitur, quod ostendit

Boerhaavius, dum phialam tubulo oblongo instructam, & oleo repletam immisit aquæ super carbones ardentes positæ. Quamdiu calor successive intrabat in aquam, in tubulo ascenderat oleum; mox ubi aqua cœpit ebullire, stetit oleum, etsi diutius apposito novo igne urgeretur aqua ebulliens; id ipsi ostendi posset thermometro alias usitato; 4. si vas demum ab igne removetur, fundus, maxime, si tenuior est, minus est calidus, quamdiu aqua ebullit, quam quando ebullire cessavit. Ratio primi est, quia, quo densior est fundus, eo diutius ac copiosius in illo detinetur ignis. Secundi, quia ab initio ignis in fundo jam agitatus non tam liberum habet transitum per aquam, minus adhuc rarefactam, quam dum jam magis rarefacta ebullit. Terti, quia obtento semel certo ebullitionis gradu ignis subsequens liberius per aquam transit, quin sufficientem resistantiam in aquæ partibus inveniat, aut motus sui incrementum accipiat. Quarti demum ratio est, quia durante ebullitione igniculi libere transeunt a fundi partibus in aquam, & aerem; illa vero cessante, ab incumbente aere, & aqua reperiuntur in fundum, eique excessum agitationis, seu motus, qui calori proprius est, in aqua alias excitandi, communicant.

331. Quæres I. Quid sit, quo modo, & quâ proportionem fiat communicatio caloris? R. ad 1. Communicatio est aliqua quasi diffusio caloris ex uno corpore in aliud, dum corpus magis calidum calorem excitat in altero frigido, aut in minus calido calorem auget, simul tamen de suo aliquid deperdit; sic aqua ebulliens affusa tepidæ hujus calorem auget, atque ita eidem aliquid de suo calore communicare dicitur. Ad 2. Cum intensio caloris habeatur vel per majorem copiam igneæ materiæ in corpore calido agitæ, vel per celeriore, & vehementiorem ejusdem materiæ motum, communicatio caloris fit vel per hoc, quod ex corpore calido materia ignea ingrediatur in alterum minus calidum, vel quod materia ignea in minus calido existens ad celeriore, vehementioremque motum concitetur. Ad 3. Communicatio caloris inter duo corpora homogenea, & inæqualiter calida fit ea proportionem, ut excessus, seu differentia caloris in uno, per utriusque massam distribuatur in ratione voluminum. Sic si pes cubicus aquæ calidæ ut 60. commisceatur pedi cubico aquæ calidæ ut 30., excessus

sus in priore — 30., cum volumina sint æqualia, utrinque æqualiter distribuetur, eritque tota massa aquæ ita confusæ calida ut 45. Si duo pedes cubici aquæ calidæ ut 60. misceantur uni pedi cubico aquæ calidæ ut 30., massa confusa erit calida ut 50. Si unus pes cubicus aquæ calidæ ut 60. misceatur duobus pedibus aquæ calidæ ut 30. massa confusa erit calida ut 40.

Ratio hujus proportionis fluit ex natura motus, & legibus æquilibrii: cum enim fluida omnia se se ad æquilibrium componant, si in corpore calidiore ponatur esse major quantitas materiæ igneæ, dum illi commisceatur corpus minus calidum, in quo minor ejusdem materiæ quantitas esse ponitur, copia major materiæ hujus fluidissimæ ad æquilibrium se reducens pro ratione voluminum utrinque uniformiter dispensabitur ita, ut æqualis in æquali volumine detur ejusdem materiæ quantitas. Si vero in corpore calidiore ponatur esse celerior materiæ igneæ motus, & huic commisceatur aliud minus calidum, in quo tardior ejusdem materiæ motus sit, materia illa celerius mota alteram tardius agitatam fortius impellens, hisque impulsibus aliquid de sua celeritate amittens, eam denique motus proportionem causabit, ut utrinque æqualis sit actio & reactio igniculorum, proin æqualis etiam velocitas. Si duo homogenea æqualiter calida commisceantur, nullum fit vel incrementum, vel decrementum caloris; quia neque copia materiæ igneæ, neque motus illius in determinata liquidi portione vel augetur, vel minuitur. Facilior autem, vel difficilior caloris communicatio a diversa structura corporum dependet, vi cujus materia ignea in iis existens, atque etiam particulæ ipsius corporis vel facilius, vel difficilins ad motum perturbatum concitari possunt.

332. Quæres 2. Quinam sint caloris effectus præcipui? R. Primo. Effectus caloris est fusio, & liquatio, qua metalla, aliaque corpora dura, dum igni vehementiore urgentur, demum in massam fluidam abeunt. Particulæ nimirum igneæ, copiosius in corpus intrusæ, & vehementius in illius poris agitatæ partes corporis a se invicem sejungunt, ad motum vehementiorem concitant, sicque efficiunt, ut massa tota instar alterius fluidi sibi relicta undique diffluat, & cuicunque figuræ facillime se accommodet. Putant non nulli, ad hoc, ut corpora dura actione caloris liquefieri possint, requiri humorem

quemdam, vel materiam uliginosam, cui partes solutæ quasi innatent. Hinc reddunt rationem, cur lignum, marmor &c. nunquam possint liquefieri, quia vel talem materiam non continent, vel, si calore nimio urgeantur, eam non amplius retinent. Interim valde dubium est, utrum metalla omnia ejusmodi humorem contineant. Fors sola particularum corpus componentium structura, & figura in causa est, cur ignis in his causet liquationem, in aliis incinerationem, calcinationem &c.

II. Effectus caloris est expansio: si enim vel major materiæ igneæ copia poros corporis subit, vel in iis vehementius agitatur, latera pororum, seu partes solidas a se invicem sejungit, sicque volumen corporis auget. Expansio hæc solet esse varia ab eodem igne pro diversitate corporum; fluida plerumque citius ob partium mobilitatem, magisque expanduntur, quam solida; inter fluida quoque alia citius, magisque expanduntur, quam alia, cujus ratio dependet a diversis corporum affectionibus mechanicis.

III. Effectus caloris est evaporatio; dum nimirum particulæ corporis fluidi actione ignis solutæ, & attenuatæ motu illo vehementi ejiciuntur, & in auras dissipantur instar fumi. Neque particulæ illæ, quæ ex aqua v. g. sensim incalcescente evaporant, duntaxat sunt bullulæ aeræ, sed ipsius aquæ, quod ostendit carbo ignitus, qui, dum supra fumum ita evaporantem tenetur, brevi extinguitur.

IV. Ejusdem caloris effectus est ebullitio, quando nimirum tanta jam materiæ igneæ copia in fluidum intrusa est, quantam illud vi structuræ suæ recipere, ac retinere potest, proin etiam partes fluidæ ad motum vehementiorem jam sunt expeditissimæ, novi illi impulsus ab igne subjecto causati, iique vehementissimi repetitis incurfibus fluidi partes eo impellunt, ubi minor est resistentia, nimirum versus superiorem fluidi superficiem, ubi aer incumbens admodum rarefactus est. Dum ab igne removetur fluidum, brevi cessat ebullitio, quia novi impulsus ex parte inferiore non amplius fiunt.

V. Huc etiam pertinet Coctio, quæ est motus intestinalis, quo per subeuntes ignis particulas, & exilissimas liquorum moleculas corporum partes crudiores magis subiguntur, & atteruntur, atque humor superfluus evaporat: hinc carnes coctæ teneriores evadunt,

faciliusque digeruntur, quia fibrarum plexus per coſticionem jam multum ſolutus, crudiores partes attenuatæ, aut per evaporationem ejeſtæ ſunt. Item Aſſatio, quæ eſt imperfecta quædam corporis diſſolutio, dum ab igneis particulis poros corporis ingredientibus, & ibidem vehementius agitatæ, partes crudiores attenuantur, magnaſque ex parte expelluntur, fibrarum quoque nexus aliquantum ſolvitur ita, ut particulæ ſalinæ, ac ſulphuræ ab aliis extricatæ maſſæ ſaporem concilient.

§. III.

DE FRIGORE.

333. **C**alori opponitur Frigus; hinc ſicut illum in motu particularum potiſſimum ignearum, ita hoc in reſpectiva earundem quiete, ſeu motu remiſſiore conſiſtere volunt Philoſophi quamplurimi, ut adeo frigus, prout eſt in corpore frigido, aliud non ſit, quam imminutio caloris, ac reſpectiva partium quies. Dixi: *reſpectiva quies*, cum fors nullum ſit corpus, cujus partes absolute quieſcant, eoquod corpora omnia ſuas habeant tranſpirationes, quæ ſine omni motu inteſtino dari non poſſunt. Sententia hæc ſic probatur. I. In eo convenientiſſime ſtatuitur natura frigoris, quod plane eſt oppoſitum calori, cui notæ nobis frigoris proprietates optime conveniunt, & quod frigoris phænomena rite explicat: atqui tale quid eſt ſola caloris imminutio, ac reſpectiva partium quies. Minor probatur. Proprietates, & phænomena frigoris ſunt cauſare ſenſationem frigoris, condenſare, indurare corpora, impedire, ac minuere diſſipationem partium: hæc omnia rite explicantur. Nam ſi particulis in aliquo corporis noſtri membro decedit motus temperamento ſuo connaturali debitus, anima continuo id percipit; hinc ſenſatio frigoris, quæ proſecto non aliunde, quam a privatione motus competentis in iis nervorum fibræ eritur, quæ organum taſtus conſtituunt. Dein imminuto notabiliter partium motu eæ magis coeunt, compinguntur, & ſubſidunt, aliæque aliis impli-
vantur tum actione materiæ gravificæ, tum preſſione aliorum corporum ambientium; & hæc eſt condenſatio. Hoc ipſo autem, quod partes inter ſe arctius implicentur, corpus durum, & taſtui reſiſtens eliciunt, & ſi-

mul earum partium diffipatio, quam calor promovet, frigore impeditur.

II. Ultimus frigoris effectus, nimirum glacies, habetur per solam igniculorum defectum, partium quietem, & ex hac fecutam earum inter se implicationem. Certe metalla, cera &c. ignis actione liquata per solam ignis absentiam fine ingressu corpusculorum, quæ partes eorum quasi conglutinent, denuo fiunt massa solida, & dura: igitur idem dicendum de aqua in glaciem concreta, maxime, dum aqua in tubo vitreo hermetice clauso congelatur: quis enim dicat, hanc congelationem fieri ob ingressum particularum salis, ac nitri, cum pori vitri de se angustissimi, ipso frigore arctius adhuc constringantur?

III. Si, ut observat Illustr. Wolfius, lapsus frigidus aquæ immittatur, redditur aqua frigidior; quis vero etiam hic dicat, in lapide frigido multum nitri contineri, atque ex eo transmigrare in aquam? Si enim lapide frigido in aquam immerso attendatur, quantum liquor thermometri descendat, dein vero assumatur alia aquæ portio, eundem habens frigoris gradum, quem ante lapidis immersionem habuerat aqua prior, illique tantum nitri admisceatur, quantum requiritur, ut liquor thermometri ad notatum antea gradum descendat, aqua posterior satis sensibilem nitri saporem dabit, prior vero ne minimum quidem ejusdem saporis indicium. Cur autem hoc, si universim ratio, & incrementum frigoris dependeat a particulis nitrosis: ubi enim æquale frigus, æqualis etiam erit nitri portio; ubi æqualis est nitri portio in eadem massa, etiam æqualis ejusdem sapor deberet deprehendi. Cur in nostris principiis aqua immerso lapide frigido evadat frigidior, ex dictis de communicatione caloris intelligi potest.

334. Ob. I. Frigus constringit poros corporum, immo si intensius sit, etiam labia, ac cutem digitorum quandoque findit: ergo non potest esse mera quies &c. R. D. A. ita, ut frigus ipsum sit vera, ac realis horum effectuum causa, N. A. ut sit causa quodammodo occasionalis, C. A. Dum in extremis membrorum partibus cessat agitatio caloris, partes illæ arctius ad se invicem coeunt; hinc obstructio pororum: partibus ita coeuntibus fluxus sanguinis, humorum, & spirituum impeditur, proin fibræ hinc tenduntur, illinc constringuntur, donec tandem cuticula

ob

ob diversas adeo tractiones disrumpatur. Quodsi forte velint, in ejusmodi casibus etiam intrudi corpuscula nitrosa, aut salina, quæ motum caloris hebetent, id equidem admitti poterit; at non propterea frigus ipsum in ejusmodi particulis consistit. Illud porro cavendum, ne membrum frigore contractum repente admoveatur igni, aut aquæ calidæ immergatur: sic enim intrusis subito igniculis nimia fieret tensio, ac divisio partium; miti primum frictione illud est demulcendum, molliterque vellicandi articuli, ut sic partes membri ordinate pristinum ad statum se reducant. Imo præstat membrum torpens frigidæ immergere, ut hoc modo sensim aperiantur meatus corporis, ac debitus humorum fluxus successive procuretur. Hoc modo etiam poma congelata pristinae integritati restituuntur.

335. Dices. In glacie datur frigus, nec tamen in ea datur illa quies partium; cum in ea detur transpiratio, ut ostendit decrementum ponderis in glacie aeri libero exposita. R. D. 2. membr. Non datur quies absoluta. C. non datur quies respectiva, & talis, qualis ad sensationem frigoris causandam sufficit, N. 2. m. Cum omnia corpora, de quibus constat, sua habeant effluvia, hæc autem sine motu aliquo dari nequeant, rite inferitur, nullum esse corpus, in quo detur plena, & absoluta quies partium. Quodsi tale daretur, illud dici posset absolute frigidum; reliqua dicentur respective frigida, cum unum magis, alterum minus possit esse frigidum, prout nimirum quies illa respectiva in uno major, in altero minor est. Certe frigus, quod in glacie, ut primum nata hæc est, reperitur, neutiquam esse frigus summum, ostendunt observationes a Clar. Fahrenheit institutæ, quibus ille comprobatur, infra congelationis frigus aliud 32. gradibus magis intensum in rerum natura fuisse observatum; imo per artem etiam infra hunc gradum frigoris aliud adhuc 40. omnino gradibus majus conciliari posse idem Auctor ostendit. Quodsi igitur incrementa frigoris aliud non sunt, quam decrementsa caloris, & hæc nil aliud, quam imminutio motus, apparet, etiam in glacie dandum adhuc motum esse, qui 70. & amplius etiam gradibus esse minor possit.

336. Ob. II. Conglaciatio liquidorum non fit ob egressum igniculorum: ergo secunda ratio nihil probat. Prob. Ant. Si lagena vitrea statuatur in glacie rasa, aut nive,

nitro vel sale communi mixta, aqua lagenæ etiam in æstate, & ad fornacem calidam intus frigescit, & congelatur: hoc non fit ob egressum materię igneæ; cum ob præsentiam fornacis igniculi potius ingrediantur, nec ulla sit ratio, cur ex aqua erumpant. R. N. A. Ad prob. N. min. Argumentum hoc supponit, dari in vitro poros corpusculis nitrosis pervios, quales tamen nullo alio experimento probantur. Alia igitur hujus, & similium ratio sit, necessè est. Nimirum cum in illa mixtura salis, & glaciei, aut nivis sit frigus oppido intensum, ut ostendit thermometer illi immisum, igniculi in aqua etiamnum residui ratione æquilibrii in hanc mixturam egrediuntur; inde congelatio, non obstante, quod igniculi alii respective pauci a sole, aut fornace in aquam immittantur, quippe qui ex aqua mox iterum in mixturam frigidiorē prorumpunt. Quodsi copiosiores in eam aquam statim initio subire possint igniculi, nunquam illa congelatur. Confirmatur hoc ex eo, quod aqua non nisi, dum nix dissolvi jam incipit, congelietur, indicio sat manifesto, congelationem non inchoari, nisi factò prius igniculorum transitu.

Idem est de aliis congelationibus artificialibus, in quibus nequiquam negatur, præsentiam salis, nitri, nivis, & ejusmodi posse aliquid ad congelationem conducere, in quantum videlicet salinæ, aut nitrosæ particulæ motum igniculorum impediunt, vel quia igniculi ex aqua in frigidiores salis, ac nitri particulas transeunt, quibus ex aqua elapsis sequi congelatio debet. Id solum negatur, quod aqua per has particulas veluti configatur, & constringatur, ac si ratio formalis glaciei ex his unice repetenda esset, id quod magis adhuc stabilitur experimento Nolleti. Hic dum glaciei rasæ duas vel tres uncias salis affunderet, illico in fundo vasis aqua salsa se collegit; quomodo autem per particulas salis liquefieri glacies posset, si eæ ipsæ particulæ glaciem efficerent? Neque etiam ex eo, quod, dum glacies sale aut nitro permixta follis alicujus tubo circumponitur, liquor thermometer, ad quod aer per follem emittitur, descendat, quidquam inferri potest: cum enim aer per tubum illum summe frigidum transit, ipse etiam de calore suo aliquid amittit, atque ita causat descensum liquoris in thermometro.

337. Naturalis porro glaciei formatio, ut notat Mariottus, hoc ferme modo peragitur. Aeri eo usque frig-

gido, ut thermometer in eo consistens gradum congelationis designet, exponitur aqua vase vitreo, eoque aperto contenta. Superficies aeri incumbenti proxima tenui primum pellicula glaciale obducitur; tum circa vasis circumferentiam ab hac medium versus emittuntur filamenta quædam tenuissima, inclinata ad vasis latus sub angulis variis; dein sensim nova fila undique prioribus se se affociant, implicant, nexuque in latitudinem continuo lamellas formant subtilissimas. Hæ accedentibus identidem novis auctæ, & sibi sine ordine impositæ, massam aqueam varie intercipiunt, & incrustant, donec tandem aqua in unam massam glaciale, variis bullulis distinctam, indurescat. Si frigus sit nimis intensum, ac proin congelatio subita, superficies aquæ primo glaciale tela obtegatur, a parietibus ad medium diffusa; huic aliæ, atque aliæ lamellæ celerrime, ac inordinate accrescunt, dum interim plures hinc inde bullulæ quasi aeræ exoriantur. Quandoque moles aquea in convexam superficiem assurgit, & si in supremæ superficiei lamella fiat foramen, per hoc aqua sensim exit, & tandem tumulum aliquem glaciale efformat.

Hæc ut ad data hucusque principia revocemus, 1. superficies aeri incumbenti proxima tenui ab initio pellicula tegitur: cum enim aer incumbens sit frigidior aqua, juxta leges communicationis caloris materia ignea ex proxima aquæ superficiei in aerem egreditur, atque ita tollitur id, per quod etiam juxta Adversarios hos antea habebatur ipsius fluiditas; hinc illa superficies concrefcit in lamellam solidam 2. Circa vasis circumferentiam ab hac versus medium emittuntur filamenta glaciale: vas namque ex omni parte ambit idem aer frigidus, qui incumbit supremæ superficiei; hinc in eundem per poros vasis exhibit materia ignea tum in vitro, tum in aqua existens. Hac successive dilabente variis e sectionibus tollitur ut antea id, quod fluiditatem aquæ iis in sectionibus conservaverat; eo sublato diversæ series particularum aquæ sibi associatæ in filamenta solida coeunt sub diversis angulis, quia utique egressus materiæ igneæ per diversos vitri poros adeo ordinatus non erit, ut ubique sub eodem angulo via prorsus recta peragatur. 3. Perdurante frigore plus identidem materiæ igneæ dilabatur, & ideo plura semper filamenta solida nascentur, quæ simul junctæ lamellas, ac demum massam solidam efficiunt.

Quod

Quod concernit bullulas in massa glaciali conspicuas, communis quidem in utraque sententia opinio est, eas esse bullas aereas, inde ortas, quod aer particulis aqueis propius ad se se accedentibus sua statione pulsus ad interiora aquæ se recipiat, ibique cum aliis particulis aereis conjunctus bullas denique sæpe admodum sensibiles exhibeat. Atque hinc etiam repetunt causam, cur massæ glacialis volumen ita non raro augeatur, ut vasa etiam ænea disfringat. Verum, an opinio hæc sat certa sit, non ausim affirmare: bullulæ enim istæ in glacie eo plane modo oriri posse videntur, quo modo oriuntur in lacryma Batavica, ubi tamen illas nemo facile dixerit esse aereas, & quidem aere confitipato plenas. Violenta vasorum quorundam disfractio ex eo etiam dependere fors potest, quod ob frigus intensum magis undique constringantur vasa, quam ipsa aqua. Quod aqua sensim congelascens per apertum superius foramen effluat, ratio esse potest, quia, dum motus materiæ igneæ, poris ad latera jam arctius constrictis, magis impeditur, eo potissimum se exerit, unde minor est resistentia, nimirum versus foramen, atque eo etiam aquam exagitans attollit.

338. Nunc quoniam Thermometri sæpius jam facta mentio est, videndum breviter, quid istud sit, quisque ejus usus. Thermometri, aut Therinoscopii nomine venit instrumentum, quo metimur calorem, & frigus. Primus illius inventor fuit Drebellius Hollandus; sed Drebellianum valde imperfectum emendarunt Florentini: ad majorem adhuc perfectionem illud præter alios adduxit Cl. Reaumur, & D. Farenheit, ac novissime D. Brander celebris Augustæ Mechanicus. Structuram quod concernit, est Thermometrum tubulus vitreus; inferius globo intus cavo, aut rotunda phiala instructus, in quo ex ascensu, ac descensu spiritus vini rectificati, & aliquo colore tincti, aut etiam mercurii colligimus aeris, & cujuscunque alterius materiæ, cui Thermometrum immergitur, calorem, & frigus. Assumitur spiritus vini, isque rectificatus, tum quod alii liquores tempore hyemali facilius congelantur, tum quod Spiritus vini facillime dilatatur calore, & constringitur frigore; tingitur autem spiritus hic colore aliquo, ut illius ascensus, & descensus promptius notari queat. Ad tubum quod attinet, exactius est Thermometrum hermetice clausum, quam

quam apertum, quale fuerat Drebellianum, quia, si apertum est, præter calorem, & frigus intervenit etiam pressio aeris.

Modus conficiendi Thermometrum ordinarius hic est. Globus, seu phiala tubulo longiore instructa repletur spiritu vini colorato, aut mercurio ita, ut hic supra globum in ipsum tubulum aliquantum assurgat, tum ope caloris aer ex tubulo expellitur, & hic hermetice clauditur; quo facto pro diversa caloris, & frigoris intensione liquor in tubulo vel altior, vel depressior erit. Ut autem istæ vicissitudines commodius notari possint, tubulo additur scala in plures partes æquales divisa. Initium numerandi gradus istos varii varium assument. D. Amontons pro gradu caloris supremo assumpsit calorem aquæ ebullientis, & relate ad hunc gradum reliquam scalæ suæ divisionem absolvit. At quia calor aquæ ebullientis tubum valde longum exigit, alii initium numerandi gradus ducunt a frigore illo, quod in glacie naturali observatur, ut facit Cl. Reaumur. D. Fahrenheit divisionem scalæ suæ inchoavit a frigore, quod in glacie ope salis amoniaci producta notatur. Alii alium modum determinandi gradus assument. Cur spiritus vini, aut mercurius urgente calore ascendat, descendat vero, dum frigus dominatur, ex dictis de calore, & frigore satis constat.

339. Usus Thermometri permagnas affert utilitates: ex illo enim cognoscimus diversam temperiem aeris, & locorum, in quibus sæpe ad effectum, quem quærimus, determinatus caloris gradus requiritur; item temperamentum certarum mixtionum, & compositionum, quæ certum pariter, ne obsint, caloris gradum exigunt. Thermometro etiam usus est Sanctorius Medicus, ut, dum ægrotus Thermometri globum manu tenet, caloris in illo intensiorem agnosceret. Hoc ipso instrumento discimus incrementum, ac decrementum caloris, quod solo tactu neutiquam discernemus. Sic innotuit, in cellis, aliisque locis subterraneis hyeme non majorem esse calorem, quam in æstate, aut aliis anni temporibus, licet nos ex sensu per errorem id judicaremus. Cur autem cellas has in hyeme calidiores esse credamus, ratio est, quia aer in cella existens, utpote qui in hyeme est aere externo calidior, minus caloris nostro corpori adimit, quam.

quam aer exterior. Interdum tamen intercepti halitus calidi cryptarum calorem augere possunt.

Demum in usu Thermometri hæc potissimum sunt observanda. 1. Thermometrum pendeat in aere libero, si hujus temperies exploretur; secus cubiculi, non item aeris externi temperies indicatur. 2. Facies Thermometri a sole averfa Septentrionem respiciat, ne incidentes radii solis calorem augeant. 3. Ex 24. horis diei ac noctis illa, quæ solis ortum antevertit, vel illa, quæ post meridiem secunda est, sunt eligendæ: illa enim frigidissima, ista vero calidissima esse censetur. 4. Observans oculum teneat in eadem altitudine, quam habet liquor. 5. Cavendum, ne vel corpore, aut halitu nimis propinque vel diu immineamus Thermometro. Certe Boerhaavius notasse se scribit, accessu hominis calidioris naturæ ad quatuor etiam pedum distantiam liquoris in Thermometro altitudinem sæpius fuisse mutatam.

§. IV.

DE SOLIDITATE CORPORUM.

340. **C**ORPUS solidum, firmum, seu consistens nuncupatur, quod sibi relictum non dissolvitur, sed veluti sponte sua eam, quam habet, figuram tuetur. Talia sunt ligna, lapides, metalla, cera, succi concreti &c. ex quo patet, corpus solidum latius patere, quam durum, ut ex dicendis de duritie uberius intelligitur. Soliditas proin est ea corporum affectio, qua particulæ corporis ita inter se nectuntur, ut nec dissolvere a se mutuo, & figuram, in quam collocatæ sunt, retinere possint. Undenam oriatur isthæc affectio, mysterium naturæ merito creditur. Qui ex principiis mechanicis eam repetunt, in tres potissimum opiniones abeunt. 1. Cartesius soliditatem a sola partium quiete respectiva, earumque immediato contactu repetit. 2. Alii præter contactum immediatum, & quietem respectivam assumunt fluidum aliquod subtilissimum in partes corporum undique premens. 3. Gassendus firmitatem derivat a particulis lamatis, uncinatis, aliave figura præditis, qua aptæ fiant, ut inter se implicari, seque mutuo complecti possint. Præter has opiniones Peripatus olim admittebat unionem continuativam, consistentem in entitate quadam
mo-

modali, essentialiter respectiva partium, quas connectit. Loco hujus entitatis aliqui ex Newtonianis ponunt vim suam attractivam. Et sane vel per entitatem illam respectivam, vel per vim attractivam utique explicatur soliditas corporum; at fors hoc modo unum mysterium explicatur per alterum, cujus ideam distinctam, ut multi existimant, nemo facile sibi formaverit. Alii itaque, ut firmitatis rationem assignent, triplicem hypothesin antea indicatam colligunt in unam, dicuntque:

341. Soliditas corporum tum a contactu partium, & quiete respectiva, tum a pressione fluidi ambientis, tum a figura, situ, implexione quadam, & mutua minimarum massularum congruentia deducenda est. Et primo quidem ad firmitatem corporis requiritur unio partium, ac consociatio talis, vi cujus difficulter a se invicem separari, & nulla sensibilibiter moveri possit, quin tota simul massa motum recipiat; talis autem unio sine quiete, & contactu partium intelligi satis haud potest: quæ enim distant, non uniuntur; & si una pars quiescat, dum altera movetur, non unio, sed divisio sequitur. Interim mutuus ille contactus, & respectiva quies nondum sufficiunt: in cumulo enim arenularum datur quies, & contactus mutuus, non tamen firmitas; in chorda tensa, si percutiatur, datur motus tremulus omnium partium, & tamen datur soliditas; item dum filum metallicum per foramina identidem minora urgetur, omnes partes in motu aliquo sunt, & situm priorem mutant, neque tamen tollitur firma ipsius fili cohesio.

Igitur fluidum exterius premens in partes sibi contiguas separationem earum impedit, proin etiam ad firmitatem corporum concurret maxime, dum molecule corporum solidorum in pluribus se se planulis contingunt, secus, ac sit in corporibus fluidis, quorum particule potissimum sphericæ in minimis superficieculis se tangunt ita, ut per earum interstitia materia fluida subtilis liberrime permeet. Quantum porro fluidum exterius premens conferre possit ad cohesionem, ex dictis per decursum præcipue de pressione aeris intelligi potest. Porro fluidum illud, cujus pressioni adscribendam etiam esse putant soliditatem, non esse aerem crassiorem (quamquam etiam hic in cohesione artificiali corporum sensibilibus conferre aliquid possit) sed materiam subtilem undique diffusam, vel ex eo colligitur, quod aere crassio-

re, quantum fieri poteft, remoto notabiliter non mutetur firmitas corporum, etfi preffio aeris notabiliter fit immutata. Materia certe illa subtiliffima, dum corpora omnia pervadit, intimas eorum inaffulas premere, & urgere poteft.

342. Cur autem fola preffio fluidi ambientis ad efficiendam corporum firmitatem non fufficiat, varias varii rationes affignant. 1. Dicunt, fi firmitas corporum haberetur per preffionem fluidi ambientis, corpora, quo funt denfiora, & in fpecie graviora, eo univerfim deberent eſſe firmiora; quia majorem ſub eodem volumine preffionem ætheris ambientis reciperent: hoc falſum eſſe patet in mercurio v. g. corpore poſt aurum graviffimo, & tamen fluido. At reponunt alii: præter preffionem fluidi ambientis ad majorem firmitatem requiri etiam contactum in maioribus, aut pluribus planulis, qualis contactus in particulis fluidorum, utpote ſphæricis, non detur. 2. Putant aliqui preffionem ætheris tantam eſſe non poſſe, quanta requiritur ad efficiendam corporum firmitatem ex eo potiffimum capite, quod gravitas ætheris aut nulla fit, aut non tanta, quanta eſt aeris, cujus tamen preffio tantam cohæſionem nequit efficere, quanta eſt particularum in annulo v. g. æneo, etſi craſſities ejus duos digitos non excedat. Reſpondent tamen alii, vim premendi in æthere non ab ejus gravitate pendere, ſed ab eo, quod undique fit diffuſus implens ſpatia omnia, quodque comprimi ſenſibiliter, niſi ſumma cum difficultate, non poſſit: hinc nec removeri, nec compreſſus cedere locum poterit; aliud eſt de aere, qui, licet removeri non ita facile poſſit, poteſt tamen comprimi, dum vis major accedit. 3. Dicunt, eam eſſe fluidorum proprietatem, ut partes corporum, quarum poris inſinuare ſe poſſunt, diſſolvant, aut laxent potius, quam comprimant. Reſpondebunt alii, fieri id etiam ab æthere, dum calore vehementi urgentur corpora: tunc enim ætherem perturbatiſſime agitatam a preffione ſua ſat conſtanti, & æquabili impediri, vi maxima impingere in particulas ſibi immediate contiguas, ſicque eas ſenſim a contactu immediato dimovere, ut tandem etiam metalla firmiſſima in maſſam fluidam abeant; cur autem æther id non ſemper faciat, rationem eſſe ipſum contactum immediatum particularum, ut adeo inter iſtas materia etiam subtiliſſima ſe inſinuare

nequeat, nisi particulæ illæ motu vehementissimo antea varie succutiantur, & commoveantur.

343. Alii itaque, ut ostendant, etiam figuram, ac texturam particularum requiri ad causandam firmitatem corporum, hanc potissimum rationem assument: certum est, partes corporis firmi separationi mutuae æqualiter resistere secundum omnem directionem, secundum quam ad separationem impelluntur: igitur contactus secundum planam superficiem, & quies partium ab externo fluido pressarum non sufficit ad hoc, ut eæ firmiter corpus constituent. Certe marmora polita, quæ ab externo fluido pressa sibi mutuo adhærent ideo, quia secundum planam superficiem se contingunt, separari haud difficulter possunt, si secundum directionem plano contactus parallelam urgeantur. Quare præter contactum secundum planas superficieculas, & pressionem fluidi externi requiritur aliquid, quod efficiat, ne aliqua sit directio, secundum quam partes pressæ cedant vi secundum quamcumque directionem prementi; hoc autem aliud esse non poterit, quam textura, certa figura, & situs partium, vi quorum aliqua earum implexio dari possit. Colligi hoc posse videtur ex structura sensibili corporum, quæ solida, & firma sunt: in iis enim varios ductus filamentorum se se complectentium microscopia ostendunt, ut in carne animalium, in herbis, arboribus &c. Sic etiam ars naturam imitata pannos, lintea, funes & ejusmodi diversa partium textura, & implexione format.

344. Interim, quæ dicta hic sunt, intelligi potissimum debent de firmitate corporum sensibilium, quam derivativam vocant: de moleculis enim primigeniis, de quibus constans Philosophorum opinio est, eas viribus naturalibus dividi in suas particulas componentes non posse, si quæeratur, undenam illarum firmitas & consistentia habeatur, plerique (nisi ad causam æque additam confugere malint) fatendum esse existimant, id non esse satis perspectum, maxime, si quis credat, in particulis omnino indivisibilibus figuræ diversitatem locum non habere. Illud ajunt, hanc earum firmitatem, quam primitivam vocant, ab eo proficisci, qui primigenias illas massulas, e quibus deinceps oritura esset omnis natura corporea, condidit, jugiterque conservat, qui materiæ rerum univrsarum soliditatem, magnitudinem, figuram, habilitatem ad motum, alias

que affectiones impertivit. Hoc non obstante hæc de firmitate corporum sensibilium opinio subsistit; quia ipsa etiam corpora fluida constant massulis primigeniis sua firmitate præditis, quæ tamen corpus sensibile solidum aut firmum non efficiunt.

345. Assumpta porro sententia hæc redditur ratio I. cur corpora sint firmitiora, dum datur partium homogeneitas, quam dum istæ particulis heterogeneis interumpuntur; sic metalla, quæ non fuerunt ab heterogeneis purgata, facilius franguntur iis in locis, in quibus adsunt illæ partes heterogeneæ, quam in aliis. Corpus ligneum, aut ferreum magna vi appressum corpori plumbeo nunquam huic firmiter adhæret; at duo corpora plumbea minore vi ad se mutuo appressa arte connectuntur. Metallicæ laminæ firmitus nectuntur ferrumine confecto ex metallicis, aut mineralibus particulis, quam parato ex pice. Duæ laminæ cupreæ strictius nectuntur a ferrumine facto ex majore cupri copia, quam ab alio. Nempe particulæ homogeneæ quoad texturam, & figuram magis inter se conveniunt, quam eædem congruant cum heterogeneis: hinc in illis contactus perfectior, & arctior implicatio dabitur. II. Cur subtilissima gypsi, aqua prius diluti, particulæ in massam admodum firmam coeant. Per assusam nimirum aquam expellitur aer, qui gypsi pulvisculos ante sejunxerat; cumque oriatur fermentatio sat notabilis, ipsius etiam aquæ particulæ vel evaporant, vel gravitate sua in fundum decidunt; hinc jam perfectior contactus, & implexio inter particulas gypsi. III. Vegetabilium firmitas multum dependet ab oleo admodum tenaci, quo si combustionem priventur, in cineres abeunt: etsi ipsum hoc oleum corpus solidum non sit, tamen particulis solidorum diversas omnino figuras habentibus ita commisceri potest, ut plurium partium detur contactus immediatus, & cum ipsum etiam tenax sit, constabit particulis talibus, quæ ad mutuam implexionem magis aptæ sint.

Ex quo ipso reddi potest ratio eorum, quæ ex observationibus chymicis habemus. I. Si albuminis ovi scrupulis quatuor adhibita valida agitatione commisceantur duo scrupuli spiritus salis communis, indurefcit coagulum in massam solidam. II. Salis Glauberiani, seu mirabilis, ut vocant, drachma solvatur in duabus aquæ simplicis drachmis; tum per aliquot horas aeri exponatur,

tur, glaciem æmulabitur massa. III. Oleum tartari per deliquium affundatur in portione æquali alteri cuidam liquori, qui e calcis vivæ, ac salis amoniaci partibus æqualibus invicem confusis, & aere humido in cella solutis fuit præparatus, prodibit magna oppido solidum. IV. Crytalli montanæ particula, sale tartari commixta, solvatur in igne, tum refrigerata massa exponatur aeri, liquor erit; oleosi hujus liquoris guttas aliquot instilla aquæ forti, ex alumine, & nitro paratæ, infusus tartari liquor in butyrum coagulabitur. Horum omnium ratio erit, quod diversæ particulæ vel in poros mutuo intrusæ, vel quoad figuram aliquantum immutatæ, atque inter se implexæ perfectiorem contactum acquirant, quodque expulsiis particulis aliis, quæ prius implexionem impediabant, jam ad motum minus expeditæ fluiditatem suam amittant, sicque ad tuendam figuram quamcunque magis aptæ efficiantur.

346. Huc etiam facit sequens experimentum. Assumantur duo cylindri planis, quibus commituntur, probe politis, ex adversa utrinque superficie annulis instructi. Si alter alteri fortius apprimatur, arcte cohærent; cohærebunt arctius, si sebo, aut alia materia uliginosa interius illinantur, & vehementius antea calefacti ad frigus aliquanto intensius reducantur. Ita teste Musschenbroekio cylindri, quorum diameter x. poll. xi. lin. erat, exacte politi, atque ad gradum aquæ ebullientis calefacti, seboque fuso illiti, subinde refrigerati adeo sibi mutuo adhæsere, ut vi complurium etiam librarum divelli haud potuerint. Et quidem cylindri ex Vitro sustentarunt libras 130. ex Orichalcho 150. ex Cupro rubro 200. ex Argento 125. ex Chalybe 225. ex Ferro molli 300. ex Stanno 100. ex Plumbo 275. ex Marmore nigro 230. ex Ebore 108. Hæc jam tam arcta cohæsiō undenam habetur? Scio, qui vires attractivas cum Cl. Musschenbroekio amant, putant istas his experimentis esse demonstratas.

Verum in his experimentis rueret lex fundamentalis, quod nimirum vis attractiva sit proportionata massis: nam vitrum est ad argentum ferme ut 12. ad 54; & tamen attractio in cylindris vitreis esset major, quam in argenteis. Idem vitrum est ad stannum ut 12. ad 39. & tamen attractio illius denuo esset major. Ad Orichalchum se habet vitrum ut 12. ad 45; attractio autem est

ferme æqualis, ut ex allato schemate patet. Ferrum est ad argentum ut 42. ad 54. & attractio illius est ut 300. hujus ut 125. &c. igitur vis attrahens massis hic plane non est proportionata. 2. Si cylindri manente eadem diametro fiunt longiores, augetur massa, nec tamen crescit vis attractiva. An forte vis hæc tantum agit in extima superficie? At quomodo attractio globi terræquei a centro usque ad superficiem, & ultra extenditur? 3. Cur cylindri, ut tantam vim exerant, debent prius calefieri, & post calorem intensum, dum conjuncti jam sunt, denuo reduci ad frigus, idque pariter sat intensum? Ad quid opus calore, si vis ista est corpori innata, in eoque semper datur? si semper datur, semper agit, & semper, quantum potest, utpote causa necessaria. 4. Cur non tanta vi se se attrahunt, si sebo, aut alia materia pingui non illinantur? ut enim fatetur Musschenbroekius, iidem cylindri, qui nulla materia pingui antea illiti cohæserant vi 2. granorum, illiti aqua cohærebant vi 12. granorum, oleo raparum vi 18. unciarum. Quid intermedia materia pinguis conferat, si cohæsiō a sola vi attractiva in cylindris residente provenit? 5. Cur non eadem omnino vi cohærent sub recipiente, qua extra illud? Ait quidem Musschenbroekius, eos adhucdum cohære; at non dicit, quo adhæsiōis discrimine relate ad eam, quam fieri dixerat extra recipiens. Igitur adhæsiō ista non videtur provenire a vi attractiva, aut leges hujus attractionis in omnes denique formas torqueri poterunt.

347. Fors adhæsiōis hujus ratio ex iisdem reddi principiis potest, ex quibus cohæsiō partium in corpore solido, & aliæ cohæsiōes huic similes deduci solent. Nempe attendi etiam hic debent tria superius indicata, mutuus contactus immediatus, aliqua partium implicatio, & pressio ambientis fluidi. Contactus immediatus facit, ut vel nulla, vel rara admodum inter cylindros intercipiatur materia fluida, quæ exterius in cylindros prementis fluidi vim posset elidere. Cumque in adductis exemplis illæ superficies, secundam quas cylindri sibi mutuo apprimebantur, fuerint probe politæ, particulæ quamplurimæ utriusque cylindri se se immediate debebant contingere ita, ut inter has particulas nulla prorsus materia fluida separationem adjuvans potuerit intercipi. Hæc ipsa materia interlabens, aerea præcipue, per se

ſectius adhuc excluderetur ope caloris, & interfuſæ materia pinguis, ſibi nimirum, colophonix, aut picis liquatæ, item fortiori appreſſione, qua durante cylindrorum ſuperficies ſupra ſe mutuo aliquoties circumrotabantur. Materia interlabente ſic excluſa fluidum ambiens libere premit in particulas immediato contactu ſibi junctas; & cum in ſuperficiebus adeo politis quamplurimæ, ut dictum, particulæ ſe ſe immediate contingant, preſſio ambientis fluidi, etſi in ſingulas particulas ſeorſum ſpectatas, utpote valde exiguas, haud adeo fortis eſſe queat, tamen ſi in omnes particulas ſimul ſumptas veluti collecta conſideretur, erit admodum vehemens. Accedit, quod fortiori appreſſione, & circumrotatione particulæ aliquæ non nihil inter ſe mutuo implicari poſſint, atque etiam debeant.

348. His omnibus ſimul ſumptis habetur 1. quidem ratio, cur cylindri, etiam nulla materia pingui antea illiti, tamen aliquanta vi cohæreant: corpora enim, quæ in planis ſuperficiebus ſibi immediate contigua vi quacunque adverſus ſe ſe mutuo urgentur, & nulla, aut ſaltem non tanta vi a ſe invicem repelluntur, quanta adverſus ſe urgentur, debent in planis iſtis ſuperficiebus cohærere, id quod nemini dubium fore exiſtimo: atqui cylindri in planis ſuperficiebus ſibi immediate contigui, etſi nulla materia pingui illinantur, vi quadam adverſus ſe mutuo urgentur, & nulla, aut ſaltem non tanta vi a ſe repelluntur: ergo. Minor oſtenditur. Cylindri iſti undique ambiuntur duplici fluido, aere nimirum, & materia ſubtili; utrumque hoc fluidum premit in hos cylindros, aer in extimam eorum ſuperficiem, æther in maſſulas utriusque ſuperficieſ interioris mutuo contactu ſibi immediate contiguas, atque ita cylindros vi utriusque preſſioni proportionata adverſus ſe mutuo urgent; intra planas cylindrorum ſuperficies, utpote probe politas, aut nullus, aut modiciſſimus eſt aer, preſſionem exterioris elidens; intra maſſulas interiorum ſuperficierum contactu immediato ſibi contiguas nullus eſt æther, alias non eſſent ſibi immediate contiguæ: igitur cylindri vel nulla, vel ſaltem non tanta vi a ſe invicem repelluntur, quanta adverſus ſe mutuo urgentur.

Neque ſcrupulum movere debet, quod materia ſubtilis omnium corporum poros liberrime pervadat: nam poros quidem permeat, at inter particulas immediato

contactu ſibi contiguas non intercipitur; hinc iſtas particulas adverſus ſe mutuo urgens poteſt aliquid ad cohæſionem hanc conferre. Sicut ſi eſſent duo plana marmorea non nihil ampliora, & pluribus ſibi mutuo reſpondentibus foraminibus perforata, per quæ aeri, aut aquæ liber omnino tranſitus pateat, ſi plana iſta ita ſibi mutuo apprimantur, ut foramina unius foraminibus alterius, & partes ſolidæ utriuſque ſibi congruant, nemo erit, qui neget, preſſionem aeris, ut aquæ ambientis, inque partes ſolidas prementis in cauſa eſſe, cur ſibi mutuo cohæreant, licet vi minori, quam ſi foramina iſta abeſſent, dummodo inter ipſas partes ſolidas nullus aut aer, aut aqua intercipiatur, vi cujus preſſio ambientis elideretur. Atque hinc patet, cur marmora lævigata etiam non inuncta ſub recipiente evacuato quandoque adhuc cohæreant, etſi hemiſphæria Magdeburgica ſub eodem haud amplius cohæreant: ſub recipiente enim etiam evacuato tamen ſemper adhuc reſiduus eſt aliquis aer, qui in externas marmorum ſuperficies premens una cum æthere cohæſionem aliquam cauſare poteſt eo potiffimum ex capite, quod intra planas marmorum ſuperficies nullus omnino aer ſit interceptus, qui preſſionem exterioris poſſet elidere. Quoniam vero intra ipſa hemiſphæria, quæ ope antiſtæ exhausta ſunt, ſimilis omnino aer interceptus eſt, qualis eſt iſ, qui ſub recipiente in hemiſphæria premit, huius preſſio cum interius latente & æqualiter denſo in æquilibrio eſt; hinc prævalente gravitate ſeparantur. Si etiam hic interveniret vis attrahens, cur, dum cylindri, & marmora ſub recipiente cohærent, non ibidem etiam cohærent hemiſphæria?

349. Habetur 2. ratio, cur firmius ſibi cohæreant cylindri, ſi inungantur materia fluida, pingui præcipue, aut viſcoſa: quantumvis enim politæ ſint cylindrorum ſuperficies, nunquam tamen erunt mathematicè planæ; hinc fieri poteſt, ut aliquis licet modicus inter eas conſeſus maneat aer. Cum jam aer iſte interfuſa materia fluida excludatur, & fluida cætera expansioni haud ita ſint obnoxia, quemadmodum aer, vel ex hoc capite habetur ratio firmioris cohæſionis. Si vero fluida iſta inſuper ſint pingua & viſcoſa, ipſa quoque conſtabunt particulis arctius inter ſe cohærentibus, atque ita figuratis, ut tum ipſæ ſe ſe in planulis aliquanto amplioribus contingant, tum etiam particulis ſolidis cylindro-

rum

tum in planulis itidem majoribus jungi valeant, unde denuo firmiter cohesio sequetur. Denique firmiter adhuc cohererent, si cera, colophonia, aut pice liquatis fuerint inuncti, & ab intenso calore ad frigus reducti: cera enim, colophonia, & pix per frigus ad consistentiam redeunt, sicque evadunt corpora solida, quorum particulae nexu admodum firmo cohererent, ut proin hoc casu idem praestent, quod gluten aliud respectu dnorum asserum, qui utique non per vim attractivam sibi mutuo tam firmiter sociantur.

350. Habetur 3. cur firmiter cohaereant, si cylindri prius intense calefiant, idque multiplici ex capite. 1. Si intense calefiant, aer superficies politas ambiens plurimum rarefit; hinc si conjunguntur, & inter eas sic conjunctas aer aliquis interciperetur, is summe rarefactus pressionem exterioris elidere non poterit. 2. Per intensum calorem particulae crassiores fluidi magis dissolvuntur; sic dissolutae perfectius applicari poterunt particulis solidis cylindrorum; quin, cum per calorem pori cylindrorum magis aperiantur, etiam inter particulas solidas superficierum quodammodo insigi, atque ita implicationem mutuam causare debebunt. 3. Per intensum calorem particulae solidae cylindrorum a se invicem non nihil remouentur (calor enim expandit solida) & ad motum aliquem concitantur; sic a se dimotae, & ad motum concitatae particulae utriusque superficier per fortem illam appressionem, & celerem circumrotationem necessario inter se aliquantum implicari debent; sic implicatis particulis datur mutuus contactus plurium, & ob ipsam illarum figuram arctior cohesio.

Et sane fieri aliquam particularum utriusque superficier implicationem, ad oculum patet, si duae massae plumbeae antea rite laevigatae sibi tamdiu fortius apprimantur, donec arctius non nihil cohaereant: superficies namque hujusmodi massarum, quae ante cohesionem erant omnino splendidae, ac laevigatissimae, facta separatione apparent splendore suo destitutae, atque admodum asperae. Quod in plumbo oculis observare est, fieri etiam poterit in aliis, ac debebit, cum superficies quantumlibet politae tamen aliquas semper prominentes habeant particulas, quae inter se implicari mutuo poterunt. Si denique calor ita intenderetur, ut particulae utriusque cylindri superficiem constituentes omnino funderentur,

derentur, ac liquefierent, ficque ſibi mutuo apprimerentur, dari jam poſſet perfecta implicatio, & cohæſio ferme tanta, quanta eſt reliquæ maſſæ ſolidæ. Unde etiam patet, cur cylindri iſti ſat firmiter cohærere poſſint ſub recipiente, quia hic jam non ſola preſſio fluidi ambientis, ſed etiam, & potiſſimum implicatio mutua particularum, & tenacitas fluidorum cohæſionis iſtius cauſa ſunt.

351. Habetur demum 4. cur firmitas cohæſionis non reſpondeat denſitati maſſæ, prout tamen deberet, ſi cohæſio iſta haberetur a vi attractiva maſſis proportionata; quia nimirum particulæ corporum quorundam magis aptæ ſunt, ut per appreſſionem fortioſiorem, ac celerem circumrotationem inter ſe mutuo implicentur; item particulæ fluidi intercepti aptius applicari poſſunt particulis unius, quam alterius corporis, quæ aptitudo non a denſitate maſſæ, ſed a figura particularum dependet.

§. V.

DE FLUIDITATE CORPORUM.

352. FLUIDI nomine intelligimus corpus, quod ſibi relictum quoquoeverſus diſfluit, & cuilibet figuræ facillime ſe ſe accommodat, ut ſunt aer, aqua, oleum &c. Cartefius quemadmodum ſoliditatem in quiete, ita fluiditatem in continuo partium motu conſiſtere docet. Gaſſendus ad fluiditatem requirit, ut particulæ corporis fluidi, ob ſpatiola intermedia vacua, ſint inter ſe ita diſſociatæ, ut evadant invicem mobiles circa ſuperficies ſuas, quibus ſe contingunt; hinc ſtatuit particulæ fluidorum rotundas, aut ad orbicularem figuram accedentes. Alii fluiditatem repetunt ex eo, quod in corpore detur, & conſervetur expedita partium mobilitas, proin talis detur figura partium, qua iſtæ ſint proxime expeditæ ad motum. Alii præter hanc partium mobilitatem aſſumunt materiam ſubtiliſſimam, ætheream nimirum corporibus fluidis ita interfuſum, ut partium implicatio impediatur. Newtoniani ad fluiditatem requirunt minores partium contactus, aut minorem in particulis vim attrahentem.

Quod

Quod jam attinet opinionem Cartesii, certum quidem est, nullum esse corpus fluidum, in quo non detur perpetuus aliquis partium insensibilium motus; cum etiam de solidis constet, ea omnia gaudere motu quodam intestino. At quæstio est, utrum motus actualis ita sit de ratione fluidi, ut sine illo corpus fluidum esse, aut dici nequeat. Circa opinionem Gallendi denuo conveniunt plerique, quod particulæ corporum fluidorum talem habere figuram debeant, ut sint ad motum expeditissimæ: qualis potissimum est figura sphaerica. Utrum autem particulæ istæ ita debeant a se invicem esse dissociatæ, ut nulla omnino cohesio inter illas locum habeat, haud adeo certum omnibus est; eoquod dentur corpora, quæ proprie fluida, simul tamen aliquantum viscosa sunt, proin aliquam saltem, licet facile solubilem, cohesionem habent. Sic guttula roris matutini non nihil elongatur, si folium, cui incumbit, inflectitur; si tubulus gracilis extrahitur ex liquore, hic eidem ad aliquantulum spatium adhæret; acus sicca innatat aquæ &c. De tertio, & quarto, utrum sola partium mobilitas, an vero etiam interlabens materia subtilis sit de ratione fluiditatis, mox dicetur. De vi attractiva, quibus ea minus arridet, putant, illam vix alibi mirandas magis proprietates debere induere, quam hic, ubi agitur de fluiditate corporum.

353. Propositio I. Ad rationem fluiditatis non requiritur motus actualis particularum corporis fluidi. Prob. Ratio fluidi aliud non dicit, quam talem affectionem corporis, qua illud sibi relictum quaquaversum diffluit, & cuilibet figuræ facillime se accommodat: atqui hoc totum habetur sine motu actuali particularum, ut patebit ex Proposit. II. Addunt aliqui 1. Minutissimæ pulveris subtilissimi particulæ in aquam stagnantem injectæ mox fundum recta petunt, & ibi quiescunt. 2. Vinum aquæ leniter superinfusum eidem supernatat. 3. Si in aqua stagnante collocetur particula ceræ a ferri scobe admixta ad eandem cum aqua gravitatem reducta, ubique quiescit: hæc fieri non posse videntur, si ipsa fluiditas motum actualem involveret. Verum si Cartesius responderet, ad fluiditatem requiri motum tantummodo insensibilem, fors experientiæ istæ non multum evincerent. Hinc sufficere potest argumentum primum, ex ipsa natura fluidi petitum.

354. Propositio II. Fluiditas consistit in aliqua dissoci-

ciatione partium, harumque structura tali, qua se non nisi in punctis exiguis tangant, proin ad motum sint valde expeditæ, qualis figura potissimum est sphaerica, aut ad hanc propius accedens. Declaratur. 1. Requiritur aliqua dissociatio partium, talis nimirum, ut nexus, quem fors habent, sit facillime solubilis: fluidum enim est, quod sibi relictum diffinit, & cuius pressioni secundum omnem directionem facillime cedit; tale autem non esset corpus, nisi nexus, quem particulae habent, secundum omnem directionem facillime esset solubilis. Præterea liquores plurimi facile inter se ita misceri possunt, ut unius partes a partibus alterius non discernantur: igitur particulae debent esse vel dissociatae penitus, vel nexu non nisi facillime solubili cohaerere. 2. Si particulae fluidi secundum plana majora se se mutuo tangerent, ex dictis de soliditate corporum ita sibi adhærerent mutuo, ut sibi relictæ non diffunderent; si autem non nisi in punctis admodum exiguis se contingant, atque ob hoc ipsum ad motum sint valde expeditæ, corpus ejusmodi particulis constans, si sibi relinquatur, undique diffuset, & cuicumque figurae se se accommodabit. 3. Quod autem figura, qua particulae ad motum magis expeditæ redduntur, sit potissimum sphaerica, per se liquet: globulus enim alteri impositus haud diu immotus stabit.

355. Hinc patet 1. Corpus altero fluidius illud esse, cujus particulae magis sunt lævigatae, magisque ad figuram sphaericam accedunt; quo magis enim ad hanc figuram accedunt, eo minoribus superficiei punctis se tangunt; quo vero sunt lævigatiores, eo promptius volutari, ac impressioni cuius cedere possunt, præcipue, si etiam accedat minor massa, & gravitas. Quod si particulae sint minus lævigatae, & secundum planam aliquant superficiem se tangant, erit fluidum aliquantum tenax, & viscosum. 2. Cur unum fluidum sit subtilius altero, quia componentibus illius particulae minoris sunt molis. 3. Quomodo unum subtilius altero possit tamen isto esse tenacius; quia nimirum particulae illius etiam quoad molem minores simul tamen minus ad figuram sphaericam accedunt, adeoque non in puncto, sed in planulis se contingunt. 4. Qua ratione ex corpore solido fieri possit fluidum, & vicissim. Si nimirum facta divisione corporis solidi particulae ejus sphaericam, aut ad hanc propius

pius accedentem figuram, eamque non nihil lævigatam acquirant; vel si ab ingrediente fluido, materia nimirum ignea, particulæ istæ sejunctæ continuo moveantur, ut sic mutua implicatione, & contactu perfectiore impedito quodammodo supra moleculas igneas facillime volutari possint, sicque in omnem partem diffluere debeant, quamdiu ista fluidi ignei agitatio mutuum contactum, & implicationem impedit. Vicissim corpus fluidum in firmum transit, si vel textura partium aliquantum immutata particulæ in pluribus se se planulis possunt contingere; vel si ingressa heterogenea, & poris velut infixa superficiem reddunt & asperam, proin ad motum minusabilem, & simul aptam, ut pluribus in planis dari contactus queat; vel denique si fluidum antea interfusum tollatur, ut sic contactus, & implicatio partium impedita non amplius sit. Cur autem liquores aliqui, ut spiritus vini æthereus, mercurius, olea destillata non congelentur in massam solidam, etsi aeri frigido exponantur, ratio potissima erit, quod particulæ hujusmodi liquorum magis sphericæ sint, quam aliorum: proin etsi materia subtilis magnam partem in aerem frigidum egrediatur, contactus tamen non nisi in punctis, nulla vero implicatio particularum dari queat; quo utroque deficiente massa solida formari nec debet, nec poterit. Verum ex hoc ipso

356. Quæres I. an ergo materia subtilis inter particulas corporis fluidi interfusa sit de ratione fluiditatis? R. Prout corpus fluidum in diverso statu consideratur, materia interlabens est, vel non est de ratione fluiditatis. Si corpus fluidum spectetur præcise in se, & abstrahendo ab eo, qui nunc datur, rerum naturalium ordine, materia interfusa non est de ratione fluiditatis: modo enim detur dissociatio, & debita mobilitas particularum corpus componentium, jam habetur corpus, quod quacunque demum ratione ad motum determinatum quaquaversum diffunderet, & figuræ cuius se accommodaret. Et nunquid ipsa materia subtilis est summe fluida, non utique per aliam materiam interlabentem, sed ob particulas dissociatas, sphericas, lævigatas, id est, summe mobiles? igitur de ratione fluiditatis in se spectatæ non est materia interlabens. At si spectemus corpora sensibilia, quæ in hoc rerum naturalium ordine vel natura sua videntur fluida, vel actione ignis ex solidis

lidis in fluida sunt mutata, ut horum saltem plerorumque fluiditas conservetur, necessaria utique est materia subtilis eorum particulis interfusa. Sic metalla liquata tamdiu statum sensibilem fluiditatis retinent, quamdiu materia ignea copiosior inter eorum particulas intercipitur, & agitur; ea dilabente priorem ad soliditatem redeunt. Aqua, multique alii liquores tamdiu manent fluida, quamdiu materia subtilis sat copiosa inter ejus particulas intercepta manet; hæc ob frigus majus dilabente, vertitur in glaciem solidam ex N. 337. In his itaque ad conservandam fluiditatem, quam habent, necessaria erit materia subtilis interlabens.

Si quis dicat, hinc sequi, aquam potius esse corpus solidum, quam fluidum, eoquod perpetuam glaciei speciem exhiberet, nisi respectivam suarum partium mobilitatem ab igne in regionibus his temperatis interlabente reciperet; ille autem status corporum naturalis dici debeat, in quo hæc subsisterent, si nulla materia aliena permiscerentur. R. Quid tum, si etiam hoc sequatur? ita certe loquuntur Nolletus, Mariottus, Boerhaavius, alique rerum naturalium peritissimi, atque ita etiam loqui debent omnes, qui corpus natura sua solidum vocant id, quod secundum materiam sibi propriam spectatum, & abstrahendo ab agente extrinseco statum sensibilem corporis solidi exhibet. Sed hoc est contra sensum communem omnium: omnes enim judicant, aquam esse corpus fluidum. Distinguitur hoc: judicant (illi præcipue, qui corporum naturam altius non rimantur) aquam esse corpus fluidum, quin tamen judicent, statum sensibilem fluiditatis competere aquæ ex natura sua, & sublata materia subtili inter aquæ particulas interlabente, conceditur; ut etiam hoc judicent, negatur. Quia frequentius videmus aquam in statu fluiditatis, ideo ipsam vocamus corpus fluidum: si ceram v. g. quin & metalla frequentius observarem in statu fluiditatis, fors etiam isthæc corpora sensus ille communis, de quo hic, judicaret esse corpora fluida.

357. De moleculis porro, ex quibus dissociatis corpus fluidum componitur, sat certum est, eas esse duras, & solidas: si enim fluidæ dicantur, ipsæ quoque ex aliis dissociatis, ac facile mobilibus coalescerent, & de
his

his iterum rediret: quæstio, num fluidæ sint, an duræ, & solidæ. Neque absurdi quidquam est in eo, quod corpus fluidum ex particulis solidis componatur: modo enim particula solidæ a se invicem sint dissociatæ, ac debita mobilitate præditæ, habetur compositum, quod sibi relictum quaquaverfum diffluit, & cuicunque figuræ se se accommodat. Huc facit, quod refert Boyle. Alabastrum, vel gypsum Parisiense in pulveres minutissimos contusum si igni admoveatur successive aucto, formam liquoris induit, plurimis confusisque undis ad instar ebullentis fluidi effervesceit minutus pulvis vase aliquo ferreo contentus; &, si eum bacillo quis agitet, nullam sentit resistentiam a pulvere, sed levissimo nisu eum ab uno in alterum latus aquæ in morem agitare poterit. At, sic nulla molecula fluidi esset fluida? sic est, quia nulli competit notio fluidi. Notiones has formamus de corporibus, prout ea statum sensibilem habent: quid enim de insensibilibus loquamur? molecula autem fluidi statum sensibilem non facit.

358. Quæres 2. quomodo fieri possit solutio corporum solidorum per liquida, si ipsa ratio fluiditatis non consistat in motu actuali? R. Certum quidem est, solutionem non fieri absque motu particularum tum fluidi, tum solidi: particulae enim fluidæ in latera pororum impingentes ea sensim a se mutuo removent, & particulas solidi per massam fluidi dispergunt. Hinc tamen non sequitur, quod ad ipsam rationem fluidi requiratur motus actualis: motus enim in fluidis æque, ac solidis semper datur, & quo major est hic motus, eo citius, si cætera sint paria, solutio peragitur. Sic frustum Sacchari v. g. citius solvitur in aqua non nihil calida, quam in frigida. Motus hic intestinus partium augetur etiam per immissionem corporis solidi, per aerem ex poris corporis expulsum, ut adeo sufficiens ad solutionem motus haberi possit, etsi ipsa ratio fluiditatis in motu actuali non consistat. Cur autem idem solidum non eadem facilitate a quovis fluido solvi possit, non solum a tenacitate ac figura particularum fluidi, sed etiam a constructione pororum ipsius solidi dependet. Denique cur non omnia fluida æquali facilitate inter se permisceri valeant, pariter ex affectionibus mechanicis particularum repetendum est; figura nimirum congrua tum pororum, tum particularum, vi cujus hæ implicari, vel facile adhaerere aliis

aliis poffunt, vel poris fe fe infinuare; facilior, vel difficilior divifibilitas partium fluidi; differentia in gravitate, in mole particularum; lubricitas, aut viscofitas diverfa, & quæ his fimilia funt, efficere poffunt, ut vel facilius, vel difficiliius inter fe fe permifceantur.

§. VI.

DE ALIIS QUALITATIBUS TACTILIBUS.

359. *H*umidum, feu humectans eft illud corpus, cujus partes fluidæ aliorum corporum maxime humani, dum eorum superficiem attingunt, particulis adhærent, aut adhærere, in eorumque poros fe infinuare, texturam mutare, fibras emollire, ac talem fenfum excitare in nobis poffunt, quem humiditatis appellamus. Hinc apparet, fluidum latius patere, quam humidum adeo, ut omne humidum fit fimul fluidum, at non viciffim: mercurius enim, imo & metalla liquata fluida funt, quia tamen funt humida. Debet autem effe fluidum tale, quod adhærens etiam corporibus maneat fluidum: fi enim illico ad confidentiam redeat, uti cera liquata, inter humida non recensetur. Cur in hac descriptione fpecialis fiat mentio corporis humani, ratio eft, quia qualitates fenfibiles fpecialiter ad noftrum fenfum funt exigendæ: Unde quidquid tactus noftri organum non humectat, aut per iftud menti humiditatis fenfum non affert, humidum proprie non dicitur. Sic mercurius, etfi particulis auri & argenti eo modo adhærefcat, quo humida alia manui noftræ, fenfui tamen nofthro eft corpus ficcum potius, quam humidum; ex adverfo aqua eft corpus humidum, etfi anferum, anatumque plumis non adhæreat, nifi iftæ aut attritu vehementi comprimantur, aut aquæ bullienti immergantur, quod fi fiat, adhærebit aqua, quia textura plumarum, & pori per attritum mutantur, per calorem vero iidem pori magis ampliantur. Quodfi corpus five fluidum, five folidum fit, dictas affectiones non habeat, *Siccum* nuncupatur, ut adeo ficcitas fit mera privatio, aut abfentia humoris fenfibilis.

360. Varia porro funt inftrumenta (*Hygrometra*, aut *Hygrofcopia* vocant) quibus humiditatis in corpore humectato maxime in aere gradus observamus. Materię,

for-

formæque hanc in rem aliæ, atque aliæ sunt assumptæ; jam lignum, quod humore distenditur in latitudinem; jam funes, qui humore constringuntur in longitudine; jam spongia aqua salsa primum repleta, tum exsiccata, ac libræ exactissimæ applicata, quæ aere humoribus resperso semper sit gravior. Alii adhibent aristam avenæ silvestris, utpote in modum heliciis contortam, quæ ad minimum humoris attactum varie detorquetur, quod ipsum in chordis, quæ fiunt ex intestinis animalium, videmus: hæc namque, dum mutato humore se varie torquent, per indicem subjecto circulo rite aptatum vel minimam aeris mutationem ostendunt. Ubi advertendum, quamlibet hujusmodi materiam, quæ humoris per aerem sparsu criterium præbeat, ipsi aeri libero debere esse expositam. Illud demum fatentur omnes, multum adhuc perfectionis his in instrumentis desiderari.

361. Quæres, cur non quodlibet fluidum cuilibet solido æqua facilitate adhæreat? Sic aqua adhæret ligno, lapidi, vitro &c. non item sebo, aut alteri materiæ pingui; mercurius adhæret auro, argento, non autem ferro, ligno, aut vitro. R. Hujus ratio potissima ex structura tum pororum solidi, tum particularum fluidi erit repetenda. Possunt particule fluidi cum poris solidi congruere ea lege, ut ob exilitatem suam, & figuræ similitudinem, quam habent cum porulis, habiles sint ad penetrandum in hos meatus; vel possunt eadem particule aut esse majores, quam ut subire poros angustissimos queant, aut tali figura præditæ, ut poris illis non satis congruant, aut textura tali; qua nimium sint lubricæ, aut volubiles. Potest quoque ipsa solidorum superficies nimium esse lævigata, & polita, adeoque minus apta ad sustentandas particulas fluidas forte applicatas. Ratio proin adhæssionis fluidorum ad solida in eo maxime sita erit, quod fluida, dum solidum corpus attingunt, hujus poris, cum quibus proportionem habent, se se aliquantum insinuent, quodque ab extrinsecus premento fluido alio, aere potissimum versus solidi superficiem urgeantur: unde requiritur, ut saltem alterutrum non constet superficie valde polita, lubrica, aut simili, quæ volubilitatem promovere posset.

Hinc redditur ratio 1. cur aqua corporibus pinguedine illitis non adhæreat: pingues enim particule caver-
nulas corporum solidorum implent, & cum ipsa pinguis

content superficie non nihil lubrica, particulae aquae ipsis adhærere non possunt. 2. Cur mercurius adhæreat auro, non item ferro, aut vitro, ratio erit major congruentia particularum mercurii cum poris, & particulis auri, quam cum poris, & particulis ferri, aut vitri. 3. Cur pocula vitrea, aut stannea, dum liquor admodum frigidus æstatis tempore in ea infunditur, quodammodo sudare videantur, ratio non est, quod liquidi in vase contenti particulae per poros ad extimam usque superficiem penetrent, sed quod particulae humidæ vaporum, qui copiosius per aerem dispersi sunt, ob continuum motum aeris in vasa hujusmodi impingentes eorum poris aliquantum sese insinuant; cumque a frigore, quod in vasis per insusum liquorem intenditur, condensentur, & identidem novæ succedant, denique sensibiles evadant, & aliquam sudoris speciem referant. 4. Huc revocari potest, quod tempore hyberno fieri cernimus in fenestris cubiculi, in quo homo de nocte dormit: vitrei enim orbiculi in interiore superficie crusta aliqua glaciali obducuntur ideo, quia aer cubiculi ob continuam hominis transpirationem plenus est vaporibus. Vapores isti cum aere agitato ad orbiculos vitreos delati ob frigus in orbiculis admodum intensum congelantur; cumque motus aeris sit inordinatus, ipsi etiam vapores sine lege per aerem dispersi, diversissimas sæpe figuras ita congelati exhibent, quas ad figuras conferre etiam aliquid possunt alia corpuscula heterogenea vaporibus, ac aeri velut innatantia, & simul cum iis ad fenestras delata; diffuente certe glacie filamenta hujusmodi tenuissima in orbiculis vitreis observare est.

362. *Durum* dicitur corpus, cujus partes, si valide premantur, vix, aut parum pressioni cedunt: durities proin est ea corporis affectio, qua partes ipsius dispositæ sunt ad ægre cedendum tactui, estque gradus aliquis soliditatis aut firmitatis, ut adeo ex iisdem cum his principiis repetenda sit. Fundatur in molecularum solidarum arcto nexu, & implicato, ut particulae non nisi ægre inseri invicem possint, proin magis etiam resistent tactui. Si partes pressæ introrsum facile cedant, atque aliqua factæ pressioni vestigia relinquant, corpus *Molle* dicitur. Hæc corporis affectio dependet ab ea particularum præcipue lævium connexionem, ac situ non nihil laxiore, vi cujus partes pressæ ad se arctius possint accedere, ad quod plurimum conducit fluidum aliquod inter.

ter partes corporis interceptum. Si ea sit in corporis superficie configuratio partium, quæ, quia partium minorum una super alteram eminet, tactus organum vellicetur, raditur, aut etiam læditur, corpus *Asperum* erit, ut asseres non dolati, ferra, lima &c. *Læve* autem erit, si ea sit partium superficiiei dispositio, qua partes sunt in eadem planitie, nec una ultra alteram prominat, ut adeo tactus organum non modo non vellicetur, sed blanda potius affectione per ea decurrat, ut sunt ebur, vitrum &c. Si corpus vim comprimentem effugiat, seque manui illud prehensuræ subducatur, *Lubricum* dicitur. Lubricitas hæc dependet vel a nimia lævigatione, ut nullæ partes promineant, quibus implicari manuum cavernulæ possent, vel ab uligine, quæ, cum rugas expleat, & constet particulis lævigatissimis, facit, ut corpus iisdem cavernulis apte inseri, & intricari nequeat.

363. *Flexile* dicitur corpus, quod sine sensibili partium separatione ad alium situm v. g. curvum determinari potest. Provenit hæc affectio ex particulis mollius implexis, & varie inter se convolutis. *Ductile* vocatur illud, cujus partes ita cohærent, ut corpus ipsum vel malleo tractatum, vel alia ratione distentum in tenuissima fila, aut lamellas duci queat, quin partium cohæsiō tolleretur. Ductilitas exigit insignem partium compactionem, molecularum tenacitatem, ac miram inter se implicationem. *Rigiditas* est ea partium dispositio, qua tali sibi mutuo implicantur nexu, ut, cum nec cedere, nec flecti queant, ubi vis major accesserit, frangantur. Superficies partium fractarum pro varia molecularum indole aut lævis est, ut in vitro, aut aspera, ut in ferro, ligno &c. Corpus *Fissile* est, quod habet particulas nexu in longum validiore implicitas, quam in latum, uti in ligno, quod secundum longitudinem findi haud difficulter potest, dum nimirum particulæ cujuslibet fibræ tenacius inter se cohærent, quam una fibra cohæreat alteri. *Scissibile* est, quod citra imminutionem aut tritum dividi potest, dum nimirum particulæ ita coordinatæ sunt, ut una versus alteram comprimi possit, sicque ab aliis avelli. Si partium diremptione scolis aliqua remaneat, dicitur corpus *Limabile*; si ramenta aliquanto majora, corpus nuncupatur *Serrabile*. Denique *Friabile* dicitur, quod levi digitorum attritu in pulverem abit, ob summam videlicet ariditatem, & debilissimum particularum nexum.

ARTICULUS VI.

DE SENSATIONE, ET SENSIBUS INTERNIS.

364. **I**N corporis humani fabrica obſervamus, ex quo-
vis organo ſensorio nervum quemdam ad cere-
brum uſque protendi, atque inde in ſingulas corporis
humani partes propagari nervos, qui omnes ſubtiliſſimo
quodam fluido, quod ſuccum nerveum, aut ſpiritus
appellant, ſint repleti. Hiſ ex obſervationibus ſequen-
tes ſenſationum leges ſtatuunt,

Lex I. Impreſſiones in organa ſensoria ab objectis
ſenſibilibus factæ communicantur cerebro. In organum
namque nulla fieri poteſt impreſſio, quia ſimul fiat in
nervum illi connexum: igitur una cum nervo agitabi-
tur etiam fluidum in illo contentum, & iſte motus mox
per omnem nervum ad cerebrum uſque propagabitur;
ſicque in cerebro fiet mutatio aliqua, vel impreſſio, ea-
que pro varietate impreſſionis in organo ſensorio factæ
varia.

Lex II. Quæ, & quales mutationes in organis ſen-
ſoriis cauſantur ab objecto ſenſibili, illæ, atque etiam
tales ab anima percipiuntur. Quæ enim, & quales mu-
tationes cauſantur in organis, illæ, ac tales producun-
tur quoque in cerebro; has, quoniam una cum iis im-
mutatur etiam actio animæ in corpus ſuum (Psychol.
Num. 68. 74.) neceſſario percipiet anima.

365. Hinc intelligi poteſt 1. Senſationem *internam*
aliud non eſſe, quam cognitionem factæ in organo ſen-
ſorio ſimul, ac cerebro immutationis, qua immutatur
ipſa etiam actio animæ in corpus ſuum. 2. Organum
ſenſationis internæ eſſe cerebrum, &, ut plerique vo-
lunt, præcipue ſubſtantiam illius calloſam: modo enim
hæc integra ſit, integer etiam eſt uſus ſenſuum inter-
norum, ut variis ex obſervationibus oſtendunt. Nervos
quoque, & fluidum in iis contentum instrumentum eſſe
adeo neceſſarium, ut ſine illis ne ullus quidem habeatur
ſenſus, prout experientia comprobatur, ſi ligato ner-
vo propagatio motus ad cerebrum impediatur. 3. Poſſe
dari ſubim mutationem in organo tum externo, tum in-
terno,

terno, quin detur sensatio; si nempe anima vehementius distracta, & alterius rei cogitatione penitus absorpta ad factam in cerebro mutationem non attendat 4. In potestate animæ haud quidem esse, positis omnibus conditionibus ad sentiendum necessariis non sentire; eam tamen ideo non impediri, quo minus conditiones mutet, sicque, ne objecta externa in sensorium incurrant, efficiat; e. g. si objectum aliquod tibi visu periculosum scias, oculos ab illo avertere & poteris, & debebis, atque hoc ipso visionem impedies.

366. Quæri posset, quisnam ille motus sit ab objectis externis fluido nerveo communicandus? Cl. Hartley alium efficiendæ sensationi aptum non esse censet, nisi vibratorium, quod, ut ait in Actis PP. Trivolt. A. 1756. Mense Martio Art. 30., objecta externa, cum sint corporea, in nervos aut cerebrum agere haud possint, nisi imprimendo motum vibratorium, qui etiam solus in particulis nervorum & cerebri medullaribus, atque infinite parvis, diutius persistere valeat. Numerum porro sensuum interiorum quod attinet, is apud Philosophos necdum rite definitus est. Nos cum communiiori ternarium eligemus acturi primum de sensu communi, tum de Phantasia, ac denique de Memoria. Quibus nonnulla de Intellectu, & Voluntate cum quaeritis quibusdam huc pertinentibus addere licebit.

§. I.

DE SENSU COMMUNI.

367. **E**st hic organum illud commune, quo mediante anima omnes sensibiles res cognoscit; seu, ut cum Philosopho explicat Gassendus Phys. Sect. III. Memb. II. L. VIII. c. 1. Aggeries externorum sensuum, quatenus interius illis competit communis sedes aliqua, in qua seorsim quidem, sed proxime tamen (hoc est, qua nervi omnes ab externis usque sensoriis tendunt) disponuntur. Dicitur etiam potentia æstimativa, quod per illum anima perceptiones etiam inter se conferat, & discernat. Sic cum anima nervum opticum moveri advertit, visionem potius, quam sensationem aliam a se elici cognoscit, & sic de aliis.

368. In quam autem corporis parte eam aggeriem

riem reperire est? Respondent cum aliis Viri Clarissimi Boerhaavius, & Willifius, nervorum, qui actionibus hominis animalibus inferviunt, radicem esse medullarem cerebri substantiam; alios vero, qui naturalibus ejusdem operationibus destinati sunt, e cerebelli substantia pariter medullari originem ducere. His consentire videtur Cl. Harley, dum ait: *si non nihil ledatur cerebri substantia medullaris, mox sensatio, motus voluntarius, memoria, & judicium aut perdentur omnino, aut misere debilitabuntur: quodsi vero ea lesio valde magna futura sit (tanta nimirum, ut ipsum etiam cerebellum afficiat) actum erit de organis respirationis, de motu cordis, & de ipsa etiam vita.* Porro Cl. Willifius in animalibus quibusvis, licet inter se non parum differentibus. eandem pæne cerebelli, diversam vero cerebri formam constanter se observasse asserit, cujus rei hanc esse rationem ingeniose arguit, quod sensationes, motusque spontanei non perinde ac functiones naturales simili ferme in omnibus animalibus modo peragantur.

§. II.

DE PHANTASIA.

369. **H**Æc alio nomine vis imaginativa dicitur, estque ea animæ potentia, qua imagines rerum sensibilibus cerebro semel impressas etiam tunc, cum facta in cerebro impressio jam cessavit, denuo sibi repræsentat. Negotium imaginationis hoc modo fieri putat Gassendus. *Ex illu, qui a re sensibili advenit, remanet quoddam vestigium, seu quasi character, typusque cerebro impressus; ob hoc ipsum vestigium si a re sensibili, etsi longe diversa, iterato adveniat motio, qua cerebrum feriatur. potest mens eandem rem licet absentem iterum recolere.* Possunt autem motiones ejusmodi a variis causis intra corpus existentibus, a calore, spirituum fermentatione &c. quin ab ipsa etiam anima in corpus agente produci.

370. Leges imaginationis statui possunt sequentes. Lex I. Major, aut minor imaginationis vivacitas dependet a majori, vel minori similitudine impulsus interni cum illo, qui alias in sensum externum factus est. Quodsi hi impulsus omnino æquales futuri sint, res licet

vet absens veluti præsens nobis repræsentabitur, eaque, ut loquimur, oculis quasi obversabitur. Atque inde est, quod imaginatio tam stupendos sæpe effectus in corpore æque, ac anima producat ita, ut eos vix ab actuali sensatione externa produci posse crederes, id quod exempla passim obvia demonstrant. Illas tamen maculas, quas in infantibus subin notamus, non tam imaginationi matris, quam variis foetus compressionibus, motibus, aliisque causis physicis hodie adscribunt multi, hac potissimum ratione inducti, quod nulla prorsus via impressionibus maternæ imaginationis ad foetum patere videatur, cum nervi, & fibræ cum eo proffus non communicent; spiritus vero per vasa sanguinea non nisi valde debilitati eo devenire possint. Contradicunt alii, & ex eo, quod via illa nobis necdum sit cognita, male argui contendunt, illam non dari, præsertim in re, quæ a tot, tamque manifestis experimentis pridem veritatis suffragium tulisset.

371. Lex II. Si perceptio, vel impressio præterita viva, & distincta fuerit, ea integra postmodum solet recurrere, etsi præsens impressio forte tantum partem contineat. Sic recurrente phantasmate alicujus Tragædiæ, quæ olim fortem tibi impressionem fecerat, mox etiam recurrent personæ, earum actiones, vestes &c.

372. Lex III. Imaginationes non sunt semper in potestate animæ: sunt enim quasi continuatæ sensationes: ergo tam parum, quam hæ directo animæ dominio subjacent. Id tamen non obest, quo minus indirecte evitari possint, evitando nimirum objecta, ex quibus nunc sensatio, & postea orietur imaginatio.

373. Lex IV. Imaginationes jam obortæ possunt opprimi tum dictaminibus rationis, tum imaginationibus fortioribus. Cl. Fortunat. a Brixia omnino impossibile censet, fortem imaginationem *soli*us ratiocinii vi superare. Assertum comprobatur verbis Cl. Boerhaavii: si sensorium meum commune ita dispositum fuerit, uti dispositum est, quando circulum rubrum ante oculos video, credam utique, videre me circulum rubrum, licet ducenti homines me circumstarent, qui communi sensu negarent, adesse circulum rubrum. Homo melancholicus profundo ratiocinio, & verissimo judicio præditus in omni rerum genere manebit in opinione, quam conceperit animo, donec violentus aliquis in corpore motus fiat, cujus im-

pressio in sensorium commune fortior fit, quam causa internæ ideæ præconceptæ, & tunc quidem liberabitur.

§. III.

DE MEMORIA.

374. **H**Æc, quam Augustinus sapientiæ parentem appellat, Philosophis est ea animæ potentia, qua cognoscit res præteritas (vel cognitiones antea habitas, vel objecta prius cognita) idque sine sensorii externi immutatione, cum intimo tamen sensu, illas jam olim esse a se cognitās. Dissert 1. a sensatione, quod rei præteritæ perceptio fiat, quin ulla detur in organo sensus externi mutatio; 2. a reminiscencia, quod non solum nova sit hæc cognitio, sed insuper anima habitæ olim cognitionis conscia sibi reddatur. Cum anima corpori juncta ad quascunque demum cognitiones indifferens sit, etiam ad cognitionem rerum præteritarum erit indifferens: proin, ut harum memor sit, determinari debet; non potest autem determinari a re sensibili organum externum mutante, cum hoc non agat in istud; igitur ab aliquo alio determinetur, necesse est; a speciebus nempe, quas rememorativas vocant, & quibus rite excitatis in anima actus memoriæ dabitur.

375. At quid rei sunt species istæ rememorativæ? Moderni, ut species directas dicunt consistere in certis spirituum animalium motibus, ortisque exinde variis in cerebro impressionibus; ita simili fere modo discurrunt de speciebus rememorativis, & reflexis. En conjecturam. Per spirituum animalium motum, qui in sensatione fit, factasque in cerebro impressiones efformantur in eodem variæ veluti striæ, sulci, cavernulæ, canales &c. fibrarum quoque nervearum, ex quibus innumeris contextum est cerebrum, fit aliqua mutatio, implicatio, divulgatio, crispatio &c. quæ cerebri affectiones, si diutius persistant, erunt species rememorativæ, seu memoria habitualis materialis. Quodsi jam contingat, spiritus quacunque ex causa in cerebrum, dictasque cellulas incurrere, per has, & strias antea efformatas movebuntur eo modo, quo moti erant, dum cellulas istas efformabant; fibrillæ quoque simili iterum ratione afficientur: hinc anima determinabitur iterum ad cognitiones eas-

easdem, quas antea habuerat, adeoque idem, quod prius cognoverat, rursus cognoscet objectum.

376. His positis diversa memoriæ phænomena non infeliciter explicant. I. Memoria exercendo excolitur; quia frequenti spirituum animalium impulsu fibræ cerebri ad motum redduntur magis expeditæ. II. Pueri plerumque facilius aliquid memoriæ mandant, quia in molliorem, quam ætas adhuc tenera habet, cerebri substantiam facilius debitæ inducuntur striæ &c. Sed quia ob nimiam molliem eadem striæ facile iterum concidunt, & obstruuntur, facillimè etiam eorum, quæ semel tantum didicere, obliviscuntur; hinc iteratæ fiant impressiones oportet. Verum qui solidioris sunt cerebri, iis majore quidem labore stat memoriæ aliquid imprimere, impressum tamen haud ita facile elabetur; cujus ratio alia non esse videtur, quam major cerebri durities. III. Senes ob cerebri siccitatem ægre aliquid memoriæ mandant, quia difficilior imprimuntur vestigia motuum, quibus agitabantur spiritus animales; tenacissime tamen sicca materia vestigia prius impressa retinet: hinc facile recordantur illi eorum, quæ ipsis olim pueris ac juvenibus acta sunt, etsi nunc sæpe nesciant, quid factum sit heri. IV. Quo plura quis memoriæ de novo committit, eo plura plerumque eorum, quæ prius tenebat, dilabentur: novæ enim, & plures continuo striæ priorum aliquas necessario evertent.

V. In morbis quibusdam spiritus in capite tumultuantes mechanicas cerebri dispositiones, ac una memoriæ destruunt; in aliis materia peccans, & morbida eadem cerebri vestigia quasi obsidens usum memoriæ tamdiu impedit, dum vel ipsa sensim dilabatur materia, vel medicamentorum vi abstrahatur. VI. Deliria in febris calida oriuntur, cum spiritus animales cerebri motu inordinatissimo agitati modo in hanc, modo in istam cavernulam irruunt, atque ita animam ad varias cognitiones rerum, quæ nullo inter se ordine connexæ sunt, determinant. Idem quandoque contingit in somniis, quando scilicet spiritus animales agitantur vel eo motu, quo agitati fuerant per diem ad quorundam objectorum præsentiam; vel alio motu, quo nunquam simul agitata fuerat cerebri substantia: unde possunt in somniis occurrere, quæ nunquam simul cogitavimus. VII. Facilius imprimuntur memoriæ, quæ per sensus externos,

quam quæ sola imaginatione attinguntur; quia in priore casu fibræ cerebri validius commoventur, proin etiam vestigia rei cognitæ majora relinquunt.

377. Accedit & illud, quod quis agit, dum rei aliqujus, quæ memoriæ excidisse videtur, recordari vult. Talis homo omnia circumspicit, diversa objecta intuetur, varia profert, aut secum ruminat nomina, sæpe initia nominum, & exitus repetit, fricat frontem, ungues mordet, scabit crines adeo, ut ipsum sæpe caput incallescere sentiat. Hæc omnia servire videntur, ut spiritus denique ad eum concitentur motum, qui excitandis, quas nunc cupit, speciebus aptus est. Fors ipsa quoque anima diversimode impellit & agitat spiritus eundem in finem, qua ex agitatione interius oriri calor potest.

378. Ex his verosimile fit, memoriam humanæ mentis corpori conjunctæ dependere a mechanica quadam cerebri affectione, spirituumque animalium motu. Neque tamen omnia hac in opinione ita sunt complanata, ut non in salebras sat multas intellectus etiam docilis impingat: quis enim capere mox possit tot diversorum plexuum, striarum &c. millia, tantum omnium, eumque constantem ordinem, & quæ sunt alia non impossibilia quidem, satis tamen paradoxa? Inde est, cur Viri clarissimi suam hac in re ignorantiam palam fateri non erubescant, maxime, si explicandum quoque ipsis sit, quomodo anima corporeis soluta vinculis eorum, quæ in vita gessit, meminisse queat.

379. Sed sint incerta isthæc, certum tamen illud est, memoriam a quovis excoli posse, & debere etiam ab illo, qui hanc penuariam disciplinarum cellam, ut Plutarchus loquitur, in se vacuam nolnerit. Solet id autem sapientum judicio hisce perfici mediis. 1. Exercitatione continuata. 2. Ordine discendorum. Gradatim nempe procedendum, &, quæ præcedunt, prius, tum, quæ sequuntur, discenda, nec omnia simul deglutienda, sed in bolos quasi sunt dividenda. 3. Distincta perceptione: nil enim difficilius, quam discere ea, quorum sensum non rite penetraveris. 4. Attentione viva. 5. Symbolica repræsentatione: nam ejusmodi phantasmata memoriam mire adjuvant. 6. Scriptiæ compendiaria. 7. His addere juvat illud: quidquid fideli, tenacique memoria complecti volueris, poetico ligatum metro

metro illi manda. Adminiculi hujus præstantiam pridem habuere perspectam tum Grammatici, tum Dialectici, ut ex eorum libris constat. Majus quid ausus est noster P. Buffier, qui Historiam primum, & Chronologiam universalem, tum in particulari Historiam Sacram, & Profanam, & totius Galliæ peculiarem non ita multis, & elegantibus in lingua gallica rhythmis comprehendit, addita brevi, quam per dialogos proposuit, explanatione. Artificii fructum primi exhibuere Adolescentes Collegii Ludoviciani cum stupore audientium, quos id secreti latebat, ut habent Acta PP. Trivolt. A. 1705. Mens. Jul. Art. 103.

§. IV.

DE INTELLECTU.

380. **E**st hic illa animæ vis, qua res, eas etiam, quæ nec sensu, nec phantasia attingi possunt, percipimus, de rebus perceptis judicamus, unum ex alio, ignotum nempe ex noto, inferimus, ac denique nostrarum cogitationum seriem ad verum tum inveniendum, tum aliis demonstrandum rite disponimus. De quatuor his intellectus nostri operationibus totidem Logicæ partibus actum jam est. Ad aliquas tamen quæstiones hic adhuc respondendum.

381. Quæres 1. Quomodo anima rationalis unita corpori acquirat ideas rerum insensibilium? Sunt, qui cum Cartesio existimant, ideas rerum insensibilium, Dei, Entis in genere, Substantiæ, Veritatis &c. esse tales, quæ nullo sensuum ministerio acquisitæ, nec ab intellectu formatæ, sed ab ipso Auctore naturæ mentibus nostris sint insitæ, non quidem ita, ut continuo obversentur animo, sed, ut per varia objecta sensibilia, variasque sensationes mens quasi determinetur, ut ideas ab Auctore naturæ inditas, & ex animæ cum corpore conjunctione non nihil obfuscatas excitet in se ipsa, eas, & per illas earum objecta contempletur. Ideas has vocant *Innatas*. At multo verisimilius est, quod anima corpori unita rerum etiam insensibilium notiones ex ideis rerum sensibilibus eruat, proin mediate saltem opæ sensuum acquirat. Profecto si ipsæ ideæ innatæ rerum

insensibilem fatente Cartesio excitari possunt cognitione rerum sensibilem, cur non eadem etiam via possint acquiri?

Sic 1. Notionem *DEI* acquirimus tum positione, qua DEO attribuimus omnia prædicata excellentiæ, quæ in nobis, aliisque rebus sensibilibus perfectionem præferunt; tum negatione, qua a DEO removemus, quidquid imperfectionem aliquam habere videtur. Primam hanc *DEI* notionem, quæ a sensibus, & phantasia oritur, intellectus phantasmate omni remoto perficit, DEumque ut Ens infinites perfectius sibi repræsentat, quam ipse cogitando assequi valeat. 2. Notionem *Entis* in genere acquirit mens, cum plures res seu possibiles, seu existentes ita considerat, ut neglectis omnibus aliis, quæ in ipsis dantur, affectionibus & prædicatis solummodo attendat ad negationem repugnantiam, sicque cognoscit aliquid, cui non repugnet existere, id est ens in genere. 3. Ope sensuum scimus, totum hominem excedere quoad magnitudinem unam sui partem, & id ipsum videmus de toto quolibet: hinc mens acquirit notionem principii hujus: *Totum est majus sua parte.* 4. Cum *verum* dicamus, quod suo exemplari conforme est, & simul multa videamus, quæ exemplaribus suis re ipsa sunt conformia, mens ope præcisionis abstrahit conformitatem, eamque transfert ad actum & objectum, sicque habet notionem *Veritatis*. 5. Ex ideis, quas simul habemus de DEO, de hominibus, iisque in vita sociali degentibus &c. infert mens principia generalia morum, DENum esse colendum, nulli inferendam injuriam, & sic de aliis. Si quis per ideas innatas aliud non intelligat, quam quod anima eam intelligendi perspicaciam sibi habeat congenitam, ut recto illius usu facile devenire possit in cognitionem illorum entium, quorum ideæ innatæ dicuntur dari, non erit, qui eas hoc sensu neget.

382. Quæres 2. Quid sint habitus intellectus? R. Habitus intellectuales acquisiti (de infusis a DEO sermo non est in Philosophia) consistunt in speciebus rite inter se ordinatis, firmatis, ac facile excitabilibus: cum enim nomine habitus intelligatur facilitas aliqua ad actus ipsi potentiae superaddita, & difficulter mobilis a subiecto, cui inest; talis autem facilitas in intellectu detur tunc, quando ad sunt species rite ordinatæ, firmatæ &c.

In his rite constituitur habitus intellectualis, quamvis non ita constet, quid rerum denique species istæ sint. Acquiruntur hæ species, & cum istis habitus per actus frequentatos, quorum tamen numerus, quod a diversitate subjecti dependere videatur, nunquam certo determinabitur.

§. V.

DE VOLUNTATE.

383. **V**oluntas est ea animæ facultas, qua illa appetit bonum, & averfatur malum. Dicitur etiam *Appetitus rationalis*, seu talis, qui ex distincta intellectus repræsentatione oritur. Objectum voluntatis, in quod ea fertur, *Bonum* est vel verum, vel apparens. Illud distinguunt rursus in honestum, utile, & jucundum. Sed hæc, & alia, quod ad Ethices forum pertinent, omitti hic absque piaculo possunt. Porro, qua libertate voluntas sit prædita, dictum in Psychologia. Fors adhuc

384. Quæres 1. An voluntati aliqua in vim motricem potestas sit, & quo eam modo anima exerceat? Ad partem quæstionis primam respondet S. Augustinus L. 8. Conf. c. 9. Imperat animus, ut moveatur manus; & tanta est facilitas, ut vix a servitio discernatur imperium. Accedit testimonium experientiæ tam manifestum, ut dubio locus superesse vix possit, quin despotica quasi potestate motibus, quos spontaneos dicimus, omnibus voluntas imperet. Partem alteram, seu modum potestatem exercendi quod concernit, ita differunt Recentiores. Certum est, ajunt, completa omnium motuum instrumenta esse musculos, quorum ingens sane numerus in corpore humano deprehenditur. In iis musculis, quibus ossa, & reliquæ corporis partes adducuntur, & ad motum concitantur, distinguitur caput, cauda, & venter. Capitis, & caudæ nomine veniunt partes extremæ, sibi oppositæ, ac tendinosæ; per ventrem pars musculi media, carnosæ, & partibus extremis amplior designatur. Musculus totus est collectio plurium fibrillarum, ita connexarum, ut fibræ capitis per carnosas ad alterum extremum propagentur.

Ex observationibus jam habetur, quod solæ ventris

tris fibræ, carneæ nempe, mutationi sint obnoxie ita, ut possint intumescere, ac denuo subsidere, & contrahi. Cum intumescunt, musculi longitudo imminuitur, & crescit latitudo; redit utraque, cum rursus concidunt. Quando musculus fit brevior, attrahit eas, quibus annexus est, partes; quas mox in priorem situm redire permittit, si priorem ipse recipit extensionem. Hæc autem musculorum intumescencia oritur a materia quadam fluida in carnosas musculorum fibras intrusa. Opus tamen haud est, ut magna materiæ hujus fluidæ, seu spirituum copia de novo affluat: cum enim spiritus isti per nervos omnes in homine vigilante diffusi musculos quasi in æquilibrio contineant, si vel minima pars spirituum versus musculos quosdam ab anima impellatur, sublato mox æquilibrio muscoli intumescunt, decurtabuntur, attrahent. Exemplum quoddam habes in funibus ob ingressum humorum intumescuntibus, & in veficis, quæ mediantibus tubulis inter se communicant, aere inspirato expansis; & hæc, & illi pondera sæpe ingentia attollunt. Id ipsum ergo poterunt etiam musculi, & magis quidem, si Botello credimus, qui ex principiis mechanicis demonstrare nititur, tantarum illos esse virium, ut aliqui vim ponderis 375. 420. librarum etiam superent.

385. Quæres 2. Quid sint affectus voluntatis, & respondentes his passionēs? R. *Affectus*, seu, ut Orator ait, appetitus vehementiores, sunt eæ naturæ humanæ commotiones, quæ ex perceptione boni vel mali nascuntur. Omnes ad duos præcipue revocari possunt, ad *Amorem*, quo bonum prosequimur, & *Odium*, quo malum averfamur. Ex his veluti fontibus fluunt reliqui: vel enim bonum est præsens, & frueris illo cum *Gaudio*; vel est absens, & tendes in illud per *Desiderium*; si tibi repræsentetur ut possibile obtentu, *Spes* te lætabit; si non nisi maxima cum difficultate acquiri poterit, in *Audaciam* assurges; si denique ejus possessio impossibilis appareat, *Desperatione* agitaberis. Contra malum præsens *Tristitia* animum replet; absens *Fuga* evitare nitimur; si imminere illud jam jam videamus, *Timor* nos invadit; si aut averti, aut vindicari saltem posse videatur, *Ira* accendimur; sin, in *Rabiem*, & *Desperationem* agimur.

Passiones affectibus ita respondent, ut eos nunc præ-
ce-

cedant, nunc consequantur certi in corpore, fluidarum præcipue partium, motus, qui appetitiones, & averfationes sensitivæ, vel etiam passionες dicuntur. *Iram* præcedit, vel sequitur effusio bilis, quæ acri humore suo sanguinem concitat, & vehementer facit effervesce. In *timore* spiritus, & sanguis ad partes interiores; in *audacia* iidem humores primo quidem ad interiora se recipiunt, tum vero vehementer iterum inde propelluntur. In *desperatione* stupent; in *spe* diffunduntur per omnes corporis partes, & sic istas ad operandum cum majori vigore fortiores reddunt. In *tristitia* contrahitur cor, venæ, & arteriæ, imo viscera, atque ipsum adeo cerebrum; idem est de odio. Oppositi tristitiæ, speique affines motus ad gaudium, & amorem in corpore cientur tunc, cum spes delectationem includit; dilatatur nempe cor, vasa, viscera, sanguis toto corpore facile fluit, & laxatis meatibus cuncta percurrit. In *desiderio* ob emissam nimium spirituum quantitatem ad partes exteriores tum cor, tum arteriæ distenduntur; hinc magnus ut plurimum, & frequens istorum motus notatur propter nimiam, qua spiritus protruduntur, festinationem. Si motus hi nimium vehementes sint, & perturbati, ideas pariter perturbatas efficient, unde rationis naufragium sequetur, ut in vehementibus sæpe passionibus tristis experientia docet. Hæc relata potius, quam asserta a me credi velim.

386. Quæres 3. Quid sint habitus voluntatis? R. Habitus acquisiti voluntatis consistunt in speciebus rememorativis rite coordinatis, firmatis, facile excitabilibus, & experimentaliter notam proponentibus bonitatem aut malitiam objecti, gustum, aut molestiam ætuum præteritorum, cum negatione specierum oppositarum æque faciliter excitabilium, vel æquali vivacitate in oppositum trahentium. Positis namque speciebus hisce sufficienter intelligi potest facilitas illa, qua voluntas juvatur, & inclinatur ad id, ad quod habitu instructa dicitur: tanto enim intensius, & facilius voluntas inclinatur ad objectum suum, quanto clarius, vivacius, atque frequentius proponitur bonitas illius, & delectatio ex prosecutione ejusdem olim percepta, ut omnes experimur; tali autem modo objectum proponunt species rememorativæ. Etiam hæc species, ut illæ intellectus, acquiruntur per frequentatos actus, quo-

quorum numerum nemo facile definierit. Id certum, in actibus voluntatis unum sæpe actum *heroicum* habitum conciliasse, idque tum in mente, tum in corpore uno effecisse impetu, quod actus remissiores frequentius repetiti non nisi sensim præstare solent.

§. VI.

QUÆSITA VARIA HUC REVOCANDA.

387. **Q**Uæres 1. Quid sit *Vigilia*? R. Est status, in quo animal expedite sensibus internis, & externis uti potest. *Dependet* is secundum Boerhaavium Tom. IV. Prælect. in Instit. Med. N. 588. a *præsentia spirituum bonorum, copiosorum in cerebro, medulla ejus, nervis, & musculis; tum simul a bona conditione partium solidarum cerebrum, nervos, musculos constituentium.* Primum enim requiritur, ut sentire, alterum, ut moveri corpus possit. Quodsi alterutrum, aut utrumque in corpore sano deficiat aliquantulum, dormituri et animal; si vero multum, aut omnino deficiat, denique dormiet.

388. Quæres 2. Quid sit *Somnus*? R. Est ille animalis status, in quo sensuum externorum functiones, & alia motuum animalium exercitia vel ex toto, vel ex parte saltem cessant. Oritur somnus, cum sensuum ac motuum organa, seu fibræ motrices, & nervi laxantur, spiritibus aut consumptis, ut Boerhaavius vult, aut ad interiora se recipientibus eorum elaterium tollitur, ut nec ad recipiendas, & propagandas objectorum externorum impressiones, nec ad motus in corpore pro animæ arbitrio efficiendos serviant. Ex hac explicatione patet, cur nimia defatigatio, immoderatio cibi, potusque usus, immodicum frigus, aut calor nimis intensus & alia somnum accire soleant. Somnium dicitur una vel plures perceptiones in somno excitatæ, & ut Gassendus affirmat Phys. Sect. III. M. 2. L. VIII. c. 2., inde nascitur, quod consopitis sensibus, qui interea spiritus discurrunt per cerebrum, in impressa vestigia subeant, & phantasiam non secus ac per vigiliam moveant. Atque ex his, aliisque, quæ de phantasia superius sunt dicta, ratio reddi potest earum, quæ de somniis habentur, observationum.

389. Quæres 3. Quid de Temperamentis notandum?

dum? R. Hæc in quatuor genera solent dividi, cholericum, sanguineum, melancholicum, & phlegmaticum. Diversitatem istam olim explicabant per diversam mixtionem quatuor humorum, qui in corpore humano credebantur præcipui, sanguinis nempe, bilis atræ, bilis flavæ, & pituitæ seu phlegmatis. *Cholericum* igitur illum esse dixerunt, qui abundaret cholera, seu bili flavâ, per quam intelligebant quasi florem materiæ biliosæ. *Melancholicum* eum, in quo prædominaretur bilis atrâ, ex sanguine crassiore, eoque amaro excocta. *Sanguineum*, cui major esset copia sanguinis vividi, quam alterius. Demum *Phlegmaticum* illum, in quo redundaret pituita, humor frigidus, & albescens. Ast Recentiores eandem temperamentorum diversitatem repetunt a diversa fibrarum per omne corpus diffusarum constructione. Sic

Cholerici temperamenti eum dicunt, qui habeat fibras tenuiores, magisque tensas, proinde tales, quæ facilius impressionem, ac tremorem concipiant. Atque hinc explicant, quæ in cholericis plerumque observantur: nam si vivacior est impressio in tali corpore, vivacior quoque erit perceptio & cognitio: si ergo datur dispositio ad impressiones vivaciores, etiam erit major appetitudo, & promptitudo ad studia. Dein ipsius etiam corporis motus solent esse proportionati impressionibus: si igitur vivaciores in corpore talis hominis sunt impressiones, erit etiam velocior sanguinis circulatio; ex hac major proveniet calor, digestio ciborum promptior, quæ omnia in cholericis non raro notari possunt. Ex eadem vivacitate impressionum, & nimia fibrarum tensione sequitur agilitas corporis, actionum vehementia, proclivitas ad iram, non diu tamen duraturam, quia fibræ facillime mobiles brevi iterum ad alium motum determinabuntur, vel utpote nimium tensæ ipsæ ad quietem se se reducent.

Melancholicum censent, in quo fibræ sint quidem valde tensæ, sed simul crassæ, ut adeo ad motum non tam cito possint determinari, aut ad motum determinatæ ad quietem non nisi ægre reducantur. Hinc ut fiant impressiones vivaciores, objecta vel diutius, vel majore vi in organa agere debent; ex quo sequitur, melancholicos aliquanto tardius rem intelligere, at, quia impressiones & commotiones fibrarum sunt diuturniores, species magis inhaerent, & semel conceptæ diutius remanent.

ment. Eodem ex capite fluit, cur melancholici plerumque segnius irascantur, at semel concitati ad iram difficillius placentur; acceptas olim injurias diu mente retinent, præteritarum calamitatum meditatione se cruciant, & adhuc magis suspicione futurarum. In risum semel effusus cavendum, ne diaphragma rumpatur. Interim ad negotia seria, & studia severiora admodum apti sunt, utpote qui objecto diutius expendendo assueti singula non delibant tantum, sed attentione fixa rimantur.

Sanguineum appellant, qui fibras habet teneras, nec nimium tensas; unde impressiones & perceptiones nec erunt tam vivaces, ut in cholericis, nec tam diuturnæ, ut in melancholicis: proin hi quasi medium tenent, nec tam prompte ut cholerici rem comprehendunt, nec tam diu retinent, ut melancholici; cumque motus corporis his quoque impressionibus sint proportionati, illi nec vehementes nimium, nec nimium lenti, & graves erunt. Quietem ac voluptatem quærunt, eamque, nisi virtus alio ducat, in corporis relaxationibus plerumque reponunt. Ad amorem sunt proclives, ingenio capaci, sed sæpius vago, & instabili.

Phlegmaticus denique ipsis est, cui fibræ crassiores, & minus tensæ; hinc impressiones in eo & tarde fiunt, & non admodum vivaces; dum autem perceptiones vivaces non fiunt, in somnum valde pronum se sentit. Ex hoc ipso, quod impressiones non sint multum efficaces, non tam facile irascitur, est quietus, & tractabilis; ad ardua non raro nimis timidus: cum enim ea, quæ ardua apparent, impressionem nimis vivacem efficiant, ipse talibus non assuetus illico terretur. Verum quodcunque temperamenti genus natura dederit, virtus omni affectione naturali potentior efficiet, ut illud & DEO & rationi inservire, sicque & propria sibi incommoda declinare, &, quæ in aliis sunt, consecrari emolumenta discat.



DIS-

DISSERTATIO III.

DE PLANTIS.

AB animalibus proximus naturæ gradus est ad Plantas, quas inter & illa ut in multis functionibus naturalibus maxima est analogia, ita simul discrimen maximum vel in eo, quod istæ nec loco movere se, nec sentire valeant. De his nunc pauca; uberiores eorum, quæ huc revocari possent, examine Botanicis relicto.

ARTICULUS I.

STRUCTURA PLANTARUM.

390. **P**lantam dicimus corpus organicum sola vegetandi facultate præditum. Constat ea partibus tum solidis tum fluidis, ut corpus animalis. Solidæ compaginantur ex fibris in longum protensis, in continuo minores dividendis, quæ in fistulas succiferas, analogas arteriis, ac tracheas, quæ instar venarum sunt, disparti possunt. Fluidam plantæ partem constituit succus nutritius per omnem plantam diffusus. Deprehenduntur præterea in plantis utriculi, præcipue in cortice, & medulla, qui, quod stomachus animali, id ferme præstant plantis, utpote digerendo quasi, ac rite excoquendo succo alimentitio destinati. Ex istis solidis, fluidisque partibus coagmentantur organa magis composita.

391. Inter hæc primo loco recensenda venit *Radix*, sine qua planta ex terra progerminans nulla potest subsistere, cum in hujus poris & meatibus recipi debeat alimentum in reliquis plantæ partes dispensandum. Constat illa *cortice*, ex cuticula, & materia spongiosa, quam *parenchyma* vocant, composito; item *ligno*, ex tenuissimis fibrillis in longum ductis contexto, ac poris rarioribus quidem, simul tamen laxioribus distincto; ac demum *medulla*, quæ ex variis ordinibus transversalium utriculorum composita ejusdem cum parenchymate sub-

S

stan-

stantiæ est, nec nisi figura & loco ab eodem diſt. Cumque ſubſtantia lignoſa etiam in corticem tenuæ fibrillas, quas *infertamenta* dicunt, undique emittat, tum per has, tum per poros ligni poterit ſuccus diſpenſari ad latera, atque ita etiam augeri latitudo radicis.

392. Altera plantæ pars *Truncus* eſt, quem in arbore *ſtipitem*, in herbis *caulem* vocant. Hic quoque, ut radix, ex cortice, ligno, & medulla componitur. Cortex trunci præter cuticulam, & parenchyma habet etiam cutem interiorem, quam *librum* appellant; in ligno autem trunci præter fibras, & utriculos horizontaliter diſpoſitos notantur inſuper fiſtulæ quædam ampliores, quas *tracheas* vocant, quæque contrahi, & diduci facile poſſunt, ut adeo inſpirando quaſi, ac exſpirando aeri a natura deſtinatæ eſſe non paucis videantur. Ex trunco prodeunt *Rami*, iisdem partibus & vafis, quibus truncus, inſtruſti. Qui ex radice arboris, aut parte trunci inferiore ſubin erumpunt rami, *ſtolones* vocantur, ſedulo, ne ſuccum reliquis ſuffurentur, reſecandi; qui vero ex ramo prodeunt ramuli novelli, dicuntur *furculi*.

393. Hi emittunt folia, gemmas, flores, & fructus. *Folia* furculis adhærent pediculo, quem *Petiolum* nuncupant, ejusdem cum ramo ſubſtantia, cujus eſt etiam ipſum corpus folii, niſi quod ea hic ſit expaſa, quæ in petiolo eſt collecta. *Gemma* ſunt quodammodo embryones quidam, ramis proxime adhærentes, & ſquammoſa pellicula autumnî tempore involuti, e quibus adventante vere novi furculi evolvuntur. *Flores* plerumque calicem, folia, & ſertum habent. Horum prima duo per ſe patent; *ſertum* autem ſunt fila tenuia, ex fundo calicis aut foliorum aſſurgentia, quorum apices (*antheras* dicunt) tenuiſſimo pulvere obſiti ſunt. In medio ſerti exſurgit *piſtillus*, fructus, & ſeminis rudimento adhærens, aut ipſe fructum, & ſemina in ſe continens. *Fructus* non tam pars, quam foetus eſt plantæ, habetque pellem, ſeu involucrum, carnem, & granum, ſeu ſemen; in quibusdam conſtat teſta duriore, tunica, & nucleo.

394. In *ſemine* quatuor ut plurimum diſtinguuntur involucra. Extimum cæteris durius eſt veluti ſeminis capſula, & adverſus aeris injurias munimentum. Huic ſuccedunt duæ pelliculæ, quarum exterior ſerme cartilagineoſa, interior in paucis ſubtilis. Continentur iſtis duo,

aut

aut plures etiam lobi, tenui admodum, & pellucida membranula, quæ ordine quarta est, muniti. Inter lobos, velut excavata utrinque in fossula, *germen* futuræ plantæ jacet, id est, ipsa ex semine hoc nascitura plantula, partibus suis pæne omnibus instructa, & ab adulta non nisi partium subtilitate differens. Duæ sunt in germine partes, *radicula*, in qua rudimenta radicum, & *plumula*, in qua reliquæ partes plantæ velut in compendio latent; radicula denique tenuissima quædam filamenta per mollem loborum substantiam, aut parenchyma diffeminat.

ARTICULUS II. ORIGO PLANTARUM.

§. I.

AN PLANTÆ OMNES NASCANTUR EX SEMINE?

395. **U**T de insectis (Psychol. N. 96.) ita de plantis olim docuere non nulli, plantas quandoque nasci ex fortuito elementorum concursu. Verum eas omnes ex specifico semine oriri, tam certum est, quam certum est, insectum aut animal nullum ex materia putrescente sine semine prognerari. Structura namque, & organizatio prorsus stupenda, eaque in eadem specie semper constans opus esse non potest casus fortuiti; aut poterant, quin & debebunt plantarum species indies multiplicari, cum diversæ particularum elementarium combinationes fieri indies possint, fiantque innumeræ. Dein Cl. Malpighius, qui hanc de plantis materiam fuse, ac erudite pertractat, terram virginem, profundiore e specu erutam, in vase vitreo reposuit, idque multiplici velo ita obduxit, ut aerem & aquas excipere posset, semina autem, quæ huc illuc in aere jactantur, excluderet; terra hæc sæpius licet irrigata, atque aeri, & solis calori exposita, sterilis tamen permanfit semper. Denique constans experientia docet, triticum, olera &c. non oriri, nisi ex jacto antea semine; ad quid vero opus sit semine, si ex fortuito elementorum concursu generari plantæ possent?

396. Variæ porro, quas afferunt non nulli, plantarum origines absque semine nunquam erant. Sic 1. quod in tergo Balænarum, si tamen verum est, subin frutices enascantur, inde provenit, quod semina in limoso animalis tergo accedente solis calore excludi utique possint. 2. Quod ex naribus cujusdam semina spica enata sit, nisi etiam hoc ad fabulas ablegandum, ratio erit, quod granum aliquod fors attractum, & viscoso humori inhærens excoqui in plantam debuerit. 3. Ad tecta domorum, & turrium fastigia semina exilissima per ventos, pluvias, ac aviculas sæpius deferuntur; ubi si aliquid terræ repererint, progerminare in plantam poterunt. 4. In hortorum areolis recens subactis nascuntur lolia, etsi nulla ibi semina sint jacta, imo etsi eorum radices solerter extirpentur; quia nimirum vel in ipsa terra jam antea latuerunt ejusmodi semina altius defossa, vel per fimum, aut ventos, pluviasque eo deferuntur; radices quoque, dum extrahuntur, rumpuntur frequentissime, & pars remanens in novum germen pullulat. Illud quoque satis certum, quod in excrementis animalium semina quamplurima lateant, quæ utpote crustis sæpe admodum firmis inclusa absque noxa stomachum, & intestina animalium transire possunt maxime, cum multa caloris valde dinturno indigeant, ut germinare incipiant.

397. Neque his dictis obest degeneratio plantarum si-
ve accidentalis, ut vocant, si-ve essentialis illa sit: acci-
dentalis namque datur, quando planta non quidem abiit
in aliam specie diversam, defectu tamen succi debiti hau-
rit alienum, qui tenerrimam in semine structuram vel ni-
mium laxet, vel organa quædam, in quibus melius ex-
coqui debuerat, non subeat, aut omnino destruat; quo
casu tum soli, tum aeris culpa ita vitari planta poterit,
ut in aliam quasi natura dissimilem videatur esse mutata.
Quod vero natura dissimilis re ipsa non sit, ex eo po-
test intelligi, quod vel ipsa hæc planta, vel semina ip-
sius meliorem in humum translata, ubi debitum sibi suc-
cum, aerisque, & terræ temperiem reperit, denuo nati-
vam ad perfectionem redire soleant, nisi organa nimium
sint corrupta. Alii putant, in ipso semine dari partes
heterogeneas ita, ut perfectioribus defectu alimenti con-
venientis jam destructis, partes cæteræ minus perfectæ
proin etiam minus delicatæ, ope alimenti, in humo haud
adeo sæcunda reperti, sufficienter ali, atque in plantam
mi.

minus tamen perfectam excrefcere poffint. Degeneratio quafi effentialis plantæ tunc datur, quando germen alterius plantæ in ipfa feminis maceratione viam reperit, qua fe velut in alienum ovulum infinuet, atque hac ratione alteri nutrimentum fubtrahens ipfum hujus loco efflorefcat. Fors etiam femen jam degenerat aliquando in ipfa fæcundatione, dum alterius plantæ pulveres, de quibus inferius N. 426., fe immifcent, novamque, ac inſolitam dehinc fermentationem, ac partium explicationem efficiunt, ut adeo idem hic, quod in monſtris, dum a duplici diverſa ſpecie gignitur tertia, evenire poſſit.

398. Ex ſemine porro hoc ferme modo enaſcitur planta. Dum ſemen fæcundatum idoneæ terræ committitur, tum hujus, tum ſolis leni calore fovetur, & fibræ, ac pori membranæ laxantur multum huc conferente aere, intra ſemen concluſo; per poros paulatim ingreditur humor, & in illis varie percolatur, fermentaturque. Præparatus ita ſuccus in lorum ſubſtantiam ſe ſe infinuat, ubi cum ſpecifico plantæ ſucco permixtus, ac nova ratione præparatus ſubtiliſſimas radiculæ fibras ſubit. Radicula hoc ſucco nutrita ſe expandit, capillitium extendit, & ope filamentorum iſtorum terræ inferitur. unde dein ſufficienter expaſa radice purior nutritii ſucci portio in plumam germinis tranſit, ex quo partium futuræ plantæ, quæ hucusque deliteſcebant, evolutio ordinata. Undenam autem fiat, ut, quamvis ſemen ita terræ mandetur, ut plumula germinis deorſum, radiculæ vero ſuſum ſpectent, tamen mox, ubi germinare ſemen incipit, radices deorſum ſe ſelectant, plumulæ vero erigantur ſuſum, haud adeo pronum eſt definire. Putant aliqui, cauſam hujus eſſe, quod ſtructura radicis ea ſit, ut ſuccos craſſiores copioſe recipiat, atque horum pondere ad debitum ſitum determinetur; cum autem ſtipitis, & caulibus fibræ tenuiſſimis ſucci particulis alantur, ab horum veluti niſu evolandi dirigantur ſuſum.

§. II.

UNDENAM ORIATUR IPSUM SEMEN?

SYSTEMA EVOLUTIONIS.

399. **I**N hac materia, quam inter arcana naturæ plerique reponunt, Recentiores plurimi putant, nulla amplius

plius semina formari de novo, sed omnia jam in prima mundi creatione a DEo fuisse producta, & vel primo femini, vel arbori primæ ita inclusa, ut in eo arbores omnes illius speciei per omnem mundi ætatem nascituræ jam continerentur, nec alio opus foret, quam ut accedente motu, & materia apta, semina isthæc successive evolverentur, unde systemati huic nomen *evolutionis* adhæsit. Itaque quercus omnes v. g., inde ab exordio mundi ad nostra usque tempora natæ, jam collectæ tenebantur vel in quercu prima, ab Auctore mundi creata, vel in semine illo, ex quo prima illa quercus enata est, neque ita tantum continebantur, ut in quercu illa datum sit principium quoddam activum, a quo semina sequentium formarentur, sed ipsa semina jam plene formata in unico illo semine essent inclusa. Opinionem hanc suam probant duplici argumento.

I. Quandocunque nascitur ex semine nova planta, hæc jam prius actu continebatur in illo semine ita quidem, ut semen jam sit planta inchoata, & velut in compendio, quæ dein vegetationis ope excitatur, evolvitur, ac dilatatur, donec ad præfixum magnitudinis terminum perveniat: ergo omnes plantæ in primo ejusdem speciei semine latuerunt.

II. Tam accurata corporis organici delineatio, qualis observatur in semine, haberi non potest a planta, utpote in qua nihil occurrit, nisi fasciculus quidam fibrillarum, & trachearum utriculi, per quos quasi tubulos succus nutritius circulatur. Jam vero licet fasciculus ille in longum, & latum distendi possit ope aeris & alimenti, nihil tamen unquam prodibit, nisi longior, latiorque truncus. Sed neque succus nutritius, quacunque ratione percoletur, aptus est ad efformandum novum semen: nam succus plantam semel formatam alere quidem potest, sed capi nequit, quomodo ex partium agitatione formetur plantula illi, ex qua succi partes fuerant secretæ, omnino simillima, cum eadem prorsus forma, ac figura foliorum, iisdem viribus medicis, partiumque structura organica. Recurrendum proin est ad Mentem sapientissimam, quæ in prima jam creatione omnia rerum producendarum rudimenta formarit, & in primo cujusque speciei semine concluderit.

400. Equidem de systemate hoc fidenter pronuntiat Cl. Vallisnerius, eum nec diligentem micrographum, nec

nec subtilem esse philosophum, qui systema istud non amplecteretur, utpote quod celeberrimæ quæque totius Europæ Academiæ suo calculo confirmarent. Malim tamen ego inter minus subtiles recenseri, quam huic systemati subscribere. Et prima quidem ratio pro systemate hoc allata convincens haud est: etsi enim planta evolvatur e semine, nondum sequitur, etiam semen istud ex alio semine esse evolutum: nam si semen istud a planta sic evoluta formatur de novo, poterit ex eo evolvi planta, quin ipsum semen jam antea latuerit in semine alio. Dein si semina omnia in primo cujusque speciei semine contingerentur inclusa, in unico seminis granulo aut omnino infinita, aut tot saltem semina jam actu formata deberent contineri, ut eorum numerus non tantum vim imaginationis, sed fidem omnem, modumque excederet.

Declaratur in exemplis. Unica Ornus, ut observat Cl. Dodartus, actu sæpe continet semina 20000000. cum jam ex quolibet tali semine iterum generari posset ornus, & harum quælibet denuo tot semina contineret, quodlibet tale semen, quod in compendio jam est tota ornus, complures seminum milliones continebit ita, ut etiam ex quolibet horum nova iterum ornus, ejusdemque cum prima fecunditatis progerminare possit, atque ita deinceps; quodsi jam numerus seminum, quæ intra 10., aut 20. annos ex semine unico evolverentur, computetur, talis omnino prodibit numerus, qui fors subtilissimo etiam Philosopho fidem ægre extorquebit. Et quid sint 10. anni ad omnem, qua mundus jam extitit, & existet ætatem? Item ponamus, quod pisum unum primo anno centum alia produxerit; ex his centenis quodvis anno altero pariter 100. omnia simul 10000. producent; hæc anno tertio dabunt 1000000, quarto anno 100000000, & sic progrediendo ad sequentes annos in proportionem geometrica, cujus ratio communis est 100. Quare ad exprimendum numerum pisorum, quæ a mundi creatione per annos 5700. & amplius ex unico pisco produci potuissent, adhibendus foret numerus constans unitate, & plus quam 11000. cyphris, seu zeris. Hunc proin pisorum numerum cubus descriptus circa Saturni orbitam, licet hæc ponatur habere 378000000. milliaria in diametro, nullatenus caperet; & capere tamen possit subtilis Philosophus, ea omnia jam formata

in primo, eoque unico pifo fuiſſe concluda, & quidem incluſa femina, quorum quodlibet denuo innumeris, ac diverſiſſimis conſtaret organis. Hoc argumento communiter impugnari ſolet ſyſtema evolutionis, tanquam tale, quod homini non præoccupato videri debeat prorfus incredibile.

401. Illud ego quæro: dicuntne iſti Auctores I. quod in femine arboris v. g. actu jam formatæ contineantur fibræ, ac tracheæ ligni & radicum omnes eodem numero, ejusdemque longitudinis, prout ex dabuntur in arbore jam annosa; vel quod aliquæ tantum actu formatæ, aut omnes quidem, ſed tantum inchoatæ in femine lateant, reliquæ vero ſucceſſu temporis ex aſſumpto ſucco alimentitio prioribus de novo adgenerentur, aut, quæ inchoatæ jam ſunt, ex eodem ſucco ſenſim ad debitam ſibi longitudinem creſcant? Si dicant, tot numero fibras & tracheas, tantæque longitudinis, quot, & quantæ erunt in arbore adulta, re ipſa contineri in femine, dicunt aliquid, quod ne ipſi quidem judicabunt eſſe verofiſſime, aut etiam poſſibile. Si vero dicant, quod vel novæ fibræ prioribus adgenerentur, vel illæ, quæ inchoatæ duntaxat ſunt, ex ſucco alimentitio creſcant in longum, eo ipſo admittunt, eſſe in natura creata principium aliquod, per quod novæ fibræ, & tracheæ plantarum iis, quæ in femine latebant, quoad ſtructuram prorfus ſimiles ex aſſumpto ſucco alimentitio produci ac formari poſſint. Eadem quæſtio ſi repetatur de tunicis, & utriculis, qui in cortice, & medulla ſunt, fatebuntur haud dubie, horum quoque vel tantum aliquos, vel eos non niſi inchoatos latuiſſe in femine, cæteras vero partes lapſu temporis & numero, & extensione ex aſſumpto ſæpius ſucco augeri. At hoc modo ſimul fatentur, ab ipſa planta quocunque demum modo formari poſſe fibras, tunicas & utriculos, id eſt, partes iis quoad omnia ſimiles, ex quibus ipſum germen ſeminis componitur.

II. Dicuntne iſti Auctores, quod folia, flores, ac fructus, quot annis ab arbore vaſtiſſima producti omnes actu jam formati latuerint in femine, vel quod ab ipſa arbore ex ſucco nutritio formentur? Si iſthæc omnia præter fibras, tracheas, tunicas & utriculos latuiſſe affirmant, rei impoſſibilitatem nemo non videt. Igitur ipſa arbor iſthæc formabit. Et tamen quis unquam mirari fat

fat possit structuram illam, & organizationem, quam in simplicissimo etiam folio oculis nostris microscopia exhibent. Flores quoque quam nobile opus non sunt? Certe, si partes eorum omnes accuratius inspiciantur, ea in illis textura, & organizatio apparebit, quæ organizationi ipsius seminis nihil concedat. Fructus denique etiam ipsi mirandam fibrarum texturam, plexumque illarum omnino stupendum, maxime, dum nucleus & membranæ adhuc sunt teneriores, ostendunt.

III. Vel dicunt, quod gemmæ, & furculi omnes, qui successive ex arbore progerminant, actu jam formati latuerint in semine, vel quod ab ipsa arbore ex succo alimentitio primum efflorentur, & ex eodem dein succo adulescant in ramos? Ist hæc præter fructus, flores, folia, fibras &c. latuisse in semine, fors ne per somnium quidem reddi verosimile poterit. Si autem gemmæ, & furculi ab ipsa arbore efflorentur, datur in natura creata principium, quod novam plantam parenti prorsus similem efformare queat: gemma enim inchoata jam planta est, quemadmodum semen; furculus quoque ex arbore recisus eo ferme modo assurgit in arborem, quo semen ipsum.

402. Ex his ita formari argumentum potest. Vel admittendum est, quod non tantum semina, seu prima illa plantæ cujusvis germina, sed etiam fibræ, tunicæ &c. medullæ, ligni, corticis, ac radicum omnes debita jam longitudine sua præditæ, item folia quot annis enata, flores quoque, fructus, gemmæ, ac furculi omnes actu jam formati in unico semine per plura sæcula multiplicando lateant; vel admittendum est, quod ab ipsa planta produci etiam semen possit: prius illud admittetur a nemine: ergo admittendum, quod ab ipsa planta formari etiam semen possit. Major ostenditur I. Nisi fibræ, & tracheæ omnes debita longitudine sua jam præditæ, tunicæ item, ac utriculi actu jam formati in semine lateant, admittendum est, quod planta ipsa novas fibras, tracheas, tunicas, & utriculos ex succo alimentitio formare, iisque formatis novas fibrarum &c. partes prioribus perfecte similes adgenerare possit: neque enim dicent, credo, quod non solum semen, tanquam initium plantæ, sed etiam nutritio, & augmentatio plantæ unice adscribenda sit Menti Sapientissimæ, quæ operi suo continuo assistens novas succi partes prioribus agglu-

tinet. At fi illud fieri a planta poteft, poterit etiam a planta formari novum femen: fi enim partes omnes, quibus femen conftat, formari a planta poffunt, cur non etiam ipfum femen? Semen profecto eft, atque ab omnibus dicitur planta jam inchoata, iisdem in compendio conftans partibus, quibus conftat planta parens; proin eft complexum ex subtiliffimis fibris, tunicis, utriculis medullæ, ligni, corticis, ac radicum, quas fi ex fucco alimentitio efformare planta poteft, poterit fane partes feminis omnes ex eodem fucco efformare, nifi forte obftet, quod fibræ feminis fint subtiliores, quam fint in planta matre. Sed fi fola subtilitas obftet, obftaculum hoc a Philofopho subtili facile removebitur, fi cogitet, quanta fit partium fucci alimentitii subtilitas, præcipue, fi teneretur fyftema evolutionis.

Eadem Major probatur II. Nifi gemmæ, & furculi omnes actu jam formati in femine lateant, debent ab ipfa planta poffe efformari: fi gemmæ, & furculi efformari a planta poffunt, ab eadem formari etiam poffunt nova femina: furculi enim, ut dictum, & gemmæ jam funt planta inchoata, quemadmodum feminæ, nec ab hoc differt, nifi denuo in subtilitate, atque in eo, quod germen feminis radículas fuas emittat in lobos, queis involutum eft, gemina vero, & furculus fuas veluti radices mittat in ipsam arborem, aut plantam, cui adhæret, de cætero crefcunt ambo, & in plantam, aut arborem affurgunt prorfus eodem modo.

III. Si his etiam pofitis tamen a planta formari non poffet feminæ, unice obftaret perfecta illa organizatio, quæ in femine deprehenditur: at enim hæc perfectior non eft in femine, quam fit in gemma, & furculo: partibus namque iisdem, eodemque modo formatis conftat feminæ, quibus gemma, & furculus. Imo cum feminæ tanquam planta inchoata aliud non fit, quam complexum ex fibris, tunicis, utriculis medullæ, ligni, corticis, & radicum, tota denique organizatio feminis alia non erit, quam fit in partibus hic memoratis abfque ullo discrimine, præterquam hoc, quod partes iftæ in tota planta exiftentes non ita funt conjunctæ, tamque arctum in fpatium collectæ, quam collectæ illæ funt in femine. Hocne autem fit difcrimen tantum, ut quis dicere debeat, etfi planta partes feminis omnes ex fucco nutritio efformare poffit, easdem tamen partes

a planta colligi non posse in tam arctum spatium maxime, cum constet, partes illas ab ipsa planta colligi, debitoque ordine inter se conjungi posse in gemma, & furculo? Denique si structura, & organizatio obesset, quo minus semen formari a planta possit, nec folia, nec flores, aut fructus formari possent a planta; cum in iis, præcipue in floribus, structura, & organizatio sit longe nobilissima.

403. Hinc apparet, quid respondendum ad alterum argumentum, quo dicunt, tam accuratam corporis organici delineationem, qualis observatur in semine, haberi non posse ab ipsa planta; eoquod ex quacunque demum succi nutritii per plantæ fibras circulatione, & percolatione aliud prodire non possit, quam longior, latiorque truncus; nec etiam capi queat, quomodo ex agitatione, & percolatione succi formetur plantula illi, ex qua succi partes fuerant secretæ, simillima. An enim folia, flores, fructus, gemmæ, & furculi aliud non sunt, quam longior, latiorque truncus? & tamen hæc supposito etiam systemate evolutionis ex succi nutritii per plantæ fibras percolatione, & circulatione formari ab ipsa planta, sat certum est. Dein si capi potest, quomodo ex agitatione, & percolatione succi nutritii a planta formentur tum folia, tum flores, tum fructus illius duntaxat speciei, cujus est planta efformans; aut quomodo a planta formentur gemmæ, & furculi, qui etiam sunt novæ plantulæ illi, ex qua succi partes secretæ fuerant, simillimæ, cur capi non possit, quomodo ab eadem planta ex eodem succo formetur semen, tanquam plantula illi, ex qua succi partes fuerant secretæ, simillima?

Igitur systema Evolutionis non modo est prorsus incredibile, sed ne sufficiens quidem, ac proin etiam non necessarium. Non sufficiens, quia assumpto etiam illo nondum habetur, undenam sint, & a qua causa formentur fibræ, trachæ, tunicæ, utriculi &c. quæ in medulla, ligno, cortice, ac radicibus sunt, item folia, flores, fructus, gemmæ, ac furculi, nisi admittatur, quod planta ipsa ex succo alimentitio isthæc omnia formare possit; hoc autem si admittatur, systema evolutionis non erit necessarium: si enim hæc omnia formari a planta possunt, formari ab eadem poterit etiam semen.

SYSTEMA PERIPATI.

404. **D**Ocuit peripatus, in plantis dari vitam vere talem, proin animam vegetativam, & principium vitale ab omni elementorum combinatione distinctum, quod cum plantæ corpore hæud secus, ac anima sensitiva cum corpore bruti compenretur, uniatur, & cum eo compositum vivens constituat; hanc tamen animam longe esse ignobiliorem, quam sit anima bruti, cum destituatur facultate cognoscendi, atque unice ad peragendas nutritionis functiones, & ad propagationem speciei, seu seminis formationem esset destinata. Hanc ipsam animam dicebant esse divisibilem ita, ut singulæ partes materiæ peculiarem animæ partem habeant; cum partes plantarum a se invicem separatæ adhuc vivant, in novas plantas excrescant, & per producta semina suas species propagent, neque etiam sit ratio sufficiens, cur indivisibilitas animæ plantarum attribuantur. Cur autem talem animam in plantis admittant hi Auctores, rationem dant, quod sine ea propagatio speciei, & formatio seminis haberi non possit, tantusque apparatus organorum, eaque nutritio in plantis detur, quæ proxime accederet ad organizationem, & nutritionem brutorum.

405. Verum omissis iis, quibus impugnari solet anima hæc cognitionis quidem experts, potens tamen formare organizationem seminis tam stupendam, ut eam intellectus humanus satis mirari hæud possit, iis, inquam, omissis quæro: vel potest nutritio, & augmentatio fibrarum &c. medullæ, ligni, corticis, ac radicum haberi sine anima vegetativa, vel non potest haberi? Si non; dicant, cur sine tali anima succus nutritius nequeat in altum elevari, per omnes plantæ partes distribui, in fibris plantæ circulari, diversimode in iis percolari ita, ut aliquæ succi particulæ accrescant fibris ligni, aliæ fibris radicum, istæ tunicis, ac utriculis medullæ, ac corticis, cum ad isthæc omnia alio opus hæud esse videatur, quam motu, motus autem succi nutritii haberi possit sine anima vegetativa, ut ostendetur N. 422. Nempe quemadmodum nutritio ipsorum etiam animalium habetur per hoc, quod sanguis per totum corpus circumvehatur diversas particulas, quæ partium nutriendarum porulis, ac particulis varie adhæreant, insigantur, &
ag-

agglutinentur, quin ista agglutinatio dicatur esse actio animæ, sic etiam nutritio plantarum habebitur per hoc, quod succus nutritivus varias secum vehat particulas, quæ partium nutriendarum porulis, aut etiam planulis varie adhæreant, infigantur, & agglutinentur, quin ad id opus sit ulla actione animæ. Si quærant, cur aliæ particulæ adhæreant tunicis medullæ, aliæ fibris ligni &c. R. quia istæ magis congruunt particulis, & porulis medullæ, aliæ magis congruunt fibris ligni, sicut in nutritione animalis aliæ adhærent carni, aliæ nervis, ossibus aliæ. Neque dicent utique, animam vegetativam esse, quæ ejusmodi selectum particularum faciat, quarum figuram, & proportionem non cognoscit.

406. Jam vero, si nutritio, & augmentatio fibrarum &c. medullæ, ligni, corticis, ac radicum haberi potest sine anima, nulla amplius animæ hujus necessitas erit ad efformationem seminis, ut ex N. 402. colligi potest, & ulterius declaratur. Si novæ istæ fibræ, tunicæ, & utriculi formari sine anima possunt, absque ea ex succo nutritio formari etiam poterunt novæ gemmæ, & novi furculi; cum ista aliud non sint, quam complexum ex ejusmodi fibris, tunicis, & utriculis extra reliquum plantæ corpus emergens; si novæ gemmæ, & novi furculi haberi sine anima possunt, ipsum etiam semen sine hac anima haberi potest, ut ex clt. Num. Prob. II. & III. potest intelligi: proin nulla erit animæ hujus necessitas.

407. Dein assumpta etiam anima hac non potest explicari formatio seminis, nisi idem id explicandi modus assumatur, quem assument ii, qui absque tali anima eam formationem explicare conantur. Formatio enim seminis alio modo non fiet, quam, quo fit formatio gemmæ, ac furculi; hæc autem qua ratione fieri ab anima possit, ni dicatur, quod ex succo alimentitio rite percolato fibræ &c. medullæ, ligni, ac corticis extra corpus plantæ aliquantum producantur, ibidem eo modo inter se conjungantur, & consocientur, quo modo in tenerioribus plantæ partibus conjunctæ jam sunt, proin, quod initium gemmæ, & furculi detur tunc, quando fibræ illæ ex intima medulla penetrantes extra corticem emergere incipiunt. Hoc vero in negotio quid anima agit aliud, nisi quod succum alimentitium in fistulis ligneis, aliisque moveat, & quidem moveat in canaliculis jam antea in planta existentibus, & ideo moveat, ut parti-
cu-

culæ variæ in ſucco contentæ fibris prioribus poſſint accreſcere, quibus ita accreſcentibus fibræ prolongentur, extra reliquum plantæ corpus emergant, atque ita gemmam, vel ſurculum efficiant. Aliud certe, præter motum, ad quem anima particulas ſucci concitet, oſtendi non poterit, quod agat anima in formatione gemmæ, aut ſurculi: quid igitur, præter motum, aliud aget anima in formatione ſeminis?

408. Imo ne illud quidem explicari poteſt, quomodo anima hunc ſucci alimentitii motum cauſet? Quomodo enim anima iſta inprimis attrahit ſuccum in oſcula radicum? non eo utique modo, quo animalia potum ſuum dicuntur attrahere. Quomodo ſuccum ſemel aſſumptum ſecundum directiones adeo diverſas movet? An ipſa impellit particulas ſucci, idque vel immediate per ſe, vel mediantibus illis particulis, quibus ipſa eſt unita, dum nimirum organa plantæ ſuæ varie commovet, ea nunc dilatando, nunc conſtringendo? At ſic animæ huic non ſenſitivæ jam videtur concedi potentia loco motiva, & ea etiam conceſſa, nondum habetur, quomodo anima ſua organa moveat. Utique non per hoc, quod ipſa in organis exiſtens ſe ſe commoveat, & ita ſeiſpſam commovens ſimul organum, quocum eſt compenetrata, ad motum concitet. Adhæc ſi etiam ad motum concitare ſuccum nutritium anima poſſet, quomodo, & qua ratione diverſiſſimas ſucci particulas eo determinate ordine diſponit, conjungit, & contextit, quo id requirit organizatio ſeminis? Iſta certe tam parum explicantur aſſumpta etiam anima vegetativa, quam parum ea quibusdam explicari poſſe videntur anima illa non aſſumpta, proin nulla erit animæ hujus in planta exiſtentis utilitas.

SYSTEMA P. HONORATI FABRI.

409. **V**ir hic orbi literato æſtimatiſſimus docet, ſemen formari ab ipſa planta idque ſine forma aliqua ſubſtantiali, materiæ in plantam combinatæ ſuperaddita, quæ tanquam entitas diſtincta dici poſſit anima plantæ. Hunc in finem duo potiſſimum aſſerit, 1. ex ſubtiliſſima ſucci percolati portione naſci tenuiſſimos quosdam fibrarum apices, ſive fibrarum deſinentium appendices eo partium ſitu, plexuque diſpoſitas, quem alias per reliquum plantæ corpus obtinent fibræ; 2. apices iſtos tenuiſſ.

nuissimos denique conjungi, & in nova germina, & semina coire. Ut totius systematis ratio intelligi facilius queat, ex præclaro Auctoris volumine, quod de plantis edidit, aliquas hic propositiones adducere juvat.

410. Libro II. Propos. 64. exponit conformationem succi nutritii. „Succus, inquit, dum per corpus plantæ circulator, non modo præparatur, percolatur, concrevit, sed certa etiam conformatio illi inducitur. Hæc autem conformatio in singulis plantæ partibus considerari potest, v. g. in radice, trunco, ramis, foliis, imo etiam in ipso plexu fibrarum vel ligni, vel folii, vel fructus; v. g. lignum roboris diversum plexum habet ab abiegno: ergo idem succus in diversis plantis diversum plexum induit. Ratio petitur a prima organizatione plantæ: nam primus ille fibrarum plexus non mutatur, sed producit, induciturque talis conformatio præparato succo, tali modo filtrato, seu percolato per tales meatus, qui sane in alia planta alio modo percolaretur, quia diversi meatus essent, & diversus coli plexus. Quod dico de ligni plexu, idem dici debet de plexu fructus, folii, floris, seminis. „

411. Propos. 70. dicit: „nutritionem excipit plantæ germinatio. Fit germinatio, cum vel cortex folia, vel rami gemmas, flores, fructus, semina felici fibrarum propagatione germinant. --- Quod autem germinatio nutritionem excipiat, & in eam quasi desinat, dubium esse non potest; nempe succus alimentitius rite percolatus, ac præparatus foras erumpit, & prioribus fibris attextus, plexum huc illuc promovet, atque producit. Propositione 84. sic pergit: hinc vere planta generat, cum germen illud in lucem edit, hoc est, cum ex ultimo illo fibrarum plexu illa quasi appendix ejusdem plexus resultat, quæ revera ex illa portione elaborati succi fit, quæ est purior, defæciatior. Præparatur autem multiplici percolatione, qua scilicet humor separatur, colligunturque partes subtiliores tum ignis, tum terræ, ac disponuntur tali situ, loco, & plexu, ut quædam organizatio inchoata inde resultet, igitur planta inchoata, primumque illud rudimentum, quo semel admisso vix ulla amplius restat in hac materia difficultas. „

412. Propos. 71. germinationem foliorum sic explicat. „Folium est immediatus plantæ foetus; ex cortice erumpit, cui scilicet in nodo umbilicari adnascitur, & qua-

qua-

quafi agglutinatur ; nempe in ea corticis parte , unde erumpit , occurrit germen novæ hujus plantæ : folium enim nova planta eft. Eft autem hoc germen ultima fibrarum definentia , in rudimentum novæ plantæ conformata , quod inde fuas radices agit inter alias corticis fibras , inde vero novi folii primum cacumen exerit. Hinc communi nodo , vel umbilico fibræ omnes gaudent illæ , quæ verſus radicem , tum illæ , quæ verſus cacumen porriguntur. Quod autem fit nodus umbilicaris , vel ex eo evincitur , quod folium decidat : ſi enim fibræ continuæ eſſent , haud dubie folium non decideret ; ſic ramus etiam exſuccus non decidit. - - - Ubi folium primum emicuit , ſenſim deinde creſcit , producantur fibræ , diſtrahuntur , explicantur , decuſſantur , coeunt , abeuntque in talem , vel talem figuram. - - - Decidit folium , cum fracto umbilicari vaſe , ſcilicet pediculo , idque in communi nodo , deficiente ulgiñoſo ſucco , quo perinde quaſi glutine parenti jungebatur. „

413. Propos. 72. explicat germinationem furculi. „ Plantæ ſuos oculos , ſuas gemmas habent. Prodit autem gemma ab intima trunci medulla , ad quam uſque pertinges , ſi primum furculi ortum inveſtigas , ut videre eſt in omnibus plantis , ſed præſertim in abiete ; hinc medulla rami eſt continua cum medulla trunci. Diſtrahuntur autem fibræ illæ matricis , ac per mediam trunci carnem producantur , donec in oculum turgescant , & hic in furculum emicet , hic demum adoleſcat in ramum. Cortex ſenſim finditur , vel potius ad inſtar vaginæ porrigitur , & furculo obducitur ; hinc , dum ſiccatur lignum , illa medullæ durioris portio , quæ per mediam trunci carnem tranſverſa ducitur , ab alio ligno ſeparatur , & factum foramen relinquit , ut in abiegnis aſſeribus sæpe videmus ; reliquæ tamen mollioris ligni fibræ furculum eundem comitantur , eodem ſcilicet cum ipſo cortice obductæ. Nec ramus ex ſola medulla conſtat , ſed ex ſimili cum ipſo trunco ſubſtantia ; hinc rami , dum per medium truncum tranſverſi eunt , rectum fibrarum curſum interrumpunt. &c.

414. Germinationem florum ſequenti mox Propositione 73. ſic declarat. „ Flores haud dubie novæ ſunt plantæ ; imo idem flos diverſis plantis conſtat , v. g. foliolis , calice , ungue , capillitio ſeu ſtamine , tudiculis , apicibus , floccis , pediculo &c. Foliolum quodlibet
ex

ex suo umbilicari nodo nascitur; hinc decidit, quando maturum est. Nascitur autem ex semine, vel rudimento quodam, in quod internæ fibræ definunt, quodque radices agit, ut dictum est supra de folio. Hæc autem est differentia, quod folia ex cortice plantæ, flores vero ex interiore plantæ substantia suum ortum ducant: ut enim pars humidior corticis in folium abit, ita tenuior portio fructus in florem textitur; hoc est, pars humidior corticis in prima illa semina, seu rudimenta definit, quæ dein cortici quasi insita manent; & pars illa tenuior, quæ in fructum abiret, in semina, seu rudimenta florum definit, vel potius illarum omnium partium, quæ florem componunt. Porro tenuitatem materię subtilitas plexus floris demonstrat. - Adde odorem, & fragrantiam, quæ subtilitatem halitus evincunt; hic vero ex bene cocta, & defæcata materia duntaxat avolat. Illi varii ductus diversicolores, qui in foliis florum videntur, sunt a materia heterogenea magis, vel minus cocta concrefcente. Quælibet pars floris suum semen, seu primum rudimentum, ex quo nascitur, habet. - - - Illa autem prima rudimenta sunt insensibiles foetus, & interiora quædam germina, in quæ definunt fibræ tum fructus, tum seminis. Porro secundum diversum ordinem, & situm interiorum fibrarum diversum quoque ordinem servant prima illa rudimenta, in quæ definunt; & pro diverso situ, & ordine istorum partes, quæ florem componunt, diversum quoque situm obtinent.

415. De Germinatione seminis Propos. 75. sic loquitur. „ Semen est ultimus plantæ foetus; itemque nova planta multiplici portione gaudens, scilicet testa, vel nucleo, membrana, massa, seu carne spermatica, & insensibili germine. Imo animum dicere, esse toridem plantas parenti plantæ adnatas, & similem ortum prioribus habentes. Nascuntur autem ex primo semine, seu rudimento, in quod matricis, seu medullæ fibræ definunt. Quod autem nucleus ipse, seu testa, planta sit, dubium esse non potest: est enim ad instar folii plicatilis, imo dum adhuc tenerior est, videntur fibræ, quibus alimentum derivatur, percolatur &c. Membrana ipsa, quæ novum foetum involvit, est etiam nova planta ex sicca quidem, sed magis ductili medullæ portione suum ortum ducens; ejus fibræ ipsis oculis subjacent, item illarum exquisitus plexus. Quod vero attinet ad nucleum

T

inte-

interiorem, qui vulgo semen dicitur, est etiam nova planta alteri adnascens, ducitque ortum ex insensibili semine, seu rudimento, in quod fibrillæ medullæ, sed delicatiores desinunt. Hinc succo pretioso vivit, & constat: quod enim minus purum est, & crassum testæ, quod nimis exsuccum, membranæ, quod nimis humidum, & tenue, flori, quod vero pingue, defæcatum, succosum, interiori nucleo cedit. -- Finis nuclei est, ut novus foetus primum alimentum ex eo habeat: est enim ad instar lactis, vel puliculæ. Grana quædam testa carent, non tamen paulo crassiore cortice. Idem fructus multa grana hujusmodi continet, quæ scilicet ex multis primis rudimentis procedunt. Ratio figuræ a primo illo rudimento petenda est, in quo est inchoata. Præter hæc omnia inest quoque nucleo germen interius, in quibusdam insensibile, in aliis vero sensibile; & hoc germen jam est nova planta, sed tantum inchoata.,

416. Igitur systema hoc, si mentem Auctoris rite assequor, ponit I., tres potissimum partes esse in planta, a quibus germinatio cæterarum plantæ vel partium, vel fructuum habeatur, medullam nimirum, carnem lignosam seu truncum, & corticem. II. Partes has singulas diversis omnino constare fibris, quæ non tantum magnitudine, sed textura etiam, & configuratione inter se differant. Neque dubium de hoc esse alicui potest, cum trium istarum partium diversitas quoad statum sensibilem etiam oculis pateat. III. Succum alimentitium considerari haud debere tanquam massam aliquam duntaxat fluidam, sed instar talis fluidi, in quo innueræ, ac diversissimæ insunt particule solidæ, quæ una cum succo, cui innatant, per arterias, & venas plantæ perpetuo circulantur, id quod denuo omnes admittent; cum utique per succum alimentitium planta acquirat augmentum partium solidarum, medullæ, trunci, ac corticis. IV. Dum succi particule hoc modo per diversas plantæ fibras circulantur, etiam ipsis diversa textura, ac figura inducitur; dum aliæ ab aliis separantur, aliæ inter se hoc, vel illo modo conjunguntur, ut sic istæ sint aptiores ad hoc, ut accrescant fibris medullæ, illæ, ut fibris ligni, aliæ, ut fibris corticis associantur. Particulis ita associatis crescunt identidem fibræ tum medullæ; tum ligni, ac corticis. V. Dum fibræ harum partium alicubi extra plantæ corpus emergunt, datur se-

men

men, ut vocat Auctor, sive primum rudimentum novi alicujus partus istius plantæ, videlicet rudimentum sive exordium folii, vel furculi, vel fructus ipsius, in quo semen proprie dictum continetur.

417. Et folii quidem exordium sive primum rudimentum datur, quando fibræ aliquæ teneriores corticis extra reliquum corticem emergunt, in quas dum succi, ad corticis nutritionem destinati, portio humidior sensim expellitur, fibræ producuntur, dilatantur, & in tenuem abeunt pelliculam ferme similem iis, ex quibus corticis substantia contexta est. Quod folium ex cortice ipso, non ex interiore trunci, aut medullæ substantia nascatur, inde patet, quod detracto cortici folia adhæreant, nec ullum folii enati vestigium deprehendatur in ipsa trunci carne, multo minus in medulla. Diversa porro est foliorum figura. Aliquando oblongum est folium, ut in junco, arundine, tritico; quia fibræ in longum tantummodo porriguntur. Aliquando ellipticum, ut in stirpe rosarum; cum scilicet e principe fibra aliæ transversæ explicantur. Non nunquam extremus folii limbus denticulatus est, dum fibræ extremæ in acumen desinunt. Aliquando folium e basi latiore desinit in mucronem; quia fibræ sensim dilatantur minus. In non nullis costas habet crassiores; ratio petitur a multis, iisque laxioribus fibris, quas copiosus humor occupat. Folia aliquando sunt crispata, ut in brassica, rosæ, lactuca; quia fibræ transversæ non ubique æqualiter explicantur: hinc statim ferme illarum extremitates cœunt, uberiorque est materia in fibris, quam ut plano rectilineo illdem comprehenso contineri possit, ut adeo portio illa fibrarum, & materiæ incurvari quodammodo in gibbum debeat. Diversus foliorum color a diversa textura particularum tum folii, tum succi dependet.

418. Gemmæ, sive furculi rudimentum primum datur, quando fibræ medullæ non nihil solidiores per trunci carnem penetrant, quas ita penetrantes comitantur fibræ aliquæ ipsius trunci, dum denique per corticem ambæ ita conjunctæ emicent. Dum autem corticem penetrant, etiam corticis fibræ aliquæ iis adnascuntur, atque ita furculus & medulla, & ligno, & cortice constans producitur. Surculus eo modo, quo planta tota, nutritur, & crescit; ex eo ita crescente novi progerminant furculi, & ita demum evadit ramus.

419. Fructus, seu seminis ipsius rudimentum primum originem suam trahit ex intimis, & subtilioribus medullæ fibris, quæ, dum per carnem lignosam penetrantes ex cortice promicant, initium sunt fructus, in quo semen reconditur. Fibras illas subtilissimas medullæ sic productas comitantur subtiliores pariter fibræ carnis lignosæ, ac tenuior corticis portio. Ex omnibus istis formatur pediculus, cui fructus adhæret, qui pediculus & tenero cortice, & subtili ligno, & medulla constat. Ex cortice hoc tenero prodeunt folia florum, ut folia cætera ex cortice reliquo. Per fibrillas carnis lignosæ subvehitur succus fructui ac nucleo destinatus; ex iisdem, & maxime ex subtilissimis medullæ fibris formatur denique germen illud, quod corculum seminis nuncupatur, & re ipsa integra jam planta est non secus, ac furculus ex gemma prognatus. Atque hoc ferme est systema P. Fabri, quod mihi quidem videtur admodum verisimile. Certe supposita illa (N. 416.) quibus opinio hæc potissimum nititur, non video, cur multum displicere alicui debeant. Folia quoque, gemmas, ac furculos ab ipsa planta formari de novo, sat certum esse existimo: quidni ergo formari etiam semen de novo possit, etsi modum, quo id fiat, haud satis perspiciamus? Utrum hunc sua declaratione Auctor hic plane sit assecutus, penes alios iudicium esto.

420. Illud adhuc advertendum, semen a planta formatum, ut in plantam excrecere queat, sæcundari debere, quemadmodum communis jam est opinio. Nimirum in ferti interioris, seu capillitii apicibus (N. 393.) adhærent pulvisculi subtilissimi, qui microscopiis inspecti utriculos exhibent plerumque globulosos, aut ovaes, succi plenos. Pulvisculi illi agitato leniter capillitio decidunt in pistillum, velut receptaculum seminum, eo situ dispositum, ut pulvisculos hosce commodissime possit excipere tubulis suis, quorum papillulæ cavæ cum internis meatibus communicantes prominent plurimæ. Hanc seminum sæcundationem esse necessariam, ex variis inferunt. 1. Experientia docet, quod dum verno tempore ac in æstate frequentioribus pluviis pulvisculi hi ex plantarum floribus absterguntur, semina a plantis relicta minus sint sæcunda. 2. Si succidantur stamina, seu capillitium illud, nunquam ex flore prodibit semen, quod germinet. 3. Testatur Cl. le Pluche, fuisse hor-

tulanum, qui peponem nullum ad maturitatem potuerit perducere, eoquod flores, ut vocant, adulterinos ex imperitia abstulisset antea, quam genuini defloruissent. Pepones nimirum duplicis generis flores proferunt; alios, qui fructus producunt, & hos genuinos appellant; alios, quos nunquam fructus sequitur, & istos adulterinos vocant; habent tamen hi in se pulvisculos subtilissimos, qui dum in floris genuini pistillum penetrant, huic fecunditatem conferunt.

Putat equidem Morlandus, in pulvisculis his totam plantam inesse; semen vero his duntaxat ad nutritionem servire. Verum cum in semine deprehendatur vera plantula, in his vero pulvisculis plantæ, aut organorum vestigium nullum unquam apparuerit, censendum, in iis ipsam seminis rationem non contineri; ad fecundandum tamen semen eos necessarios esse, quia in iis conclusi sunt subtilissimi quidam halitus sulphurei (quemadmodum odor ex iis accensis emanans ostendit) qui in interiora seminis penetrans illud inchoandæ, dum debitæ dispositiones accesserint, vegetationi aptum efficiant, adjuvando primam fermentationem, & expansionem partium tenerimarum germinis.

ARTICULUS III.

NUTRITIO PLANTARUM.

421. **A** Limentum plantarum non esse solam aquam, quod voluisse videntur Helmontius, & Boyleus, ex variis inferunt. x. Cl. Hombergius ejusdem plantæ semina diversis in vasis terræ commiserat ita, ut terræ unius, non item alterius vasis admixtæ fuerint duæ ferræ unciae nitri; aquæ autem copia utrique singulis diebus affunderetur æqualis. Expertus est, plantam e terra nitro permixta enatam & vigorem, & pondus habuisse multo majus, quam haberet altera, quæ ex terra nitro destituta prodierat. Sic etiam Cl. Woodwardus plantam unam in vitrum aqua pura repletum, alteram vero in aliud plenum pariter aqua, sed in qua portio aliqua terræ hortensis dissoluta erat, inseruit, & post dies aliquot deprehendit, hanc præ illa majus sumplisse incrementum. a. Constat, plantam copiosius, lætiusque succrescere, si

ea fata fuerit in terra, cui admixti antea fuerunt cines, vel sales ex similibus plantis educti. Hinc agricolæ in quibusdam locis finita messe residuas in agris stipulas igne comburunt. 3. Terra easdem plantas nimis frequenter proferens, dum salibus suis plus æquo privatur; ad eas deinceps proferendas minus apta reperitur, nisi quies aliqua eidem indulgeatur, aut pinguiore simo succurratur: simus namque salibus, ac nitro abundat. Quod vero plantæ etiam in aquis incrementum capiant, inde est, quod aqua nunquam careat particulis heterogeneis, quæ plantis cedere in nutrimentum queant. Succus igitur nutritivus plantarum non erit sola aqua, sed aqua terreis, salinis, nitrosis, ac sulphureis particulis permixta ita, ut aqua fors vehiculum potius alimenti, quam ipsum alimentum plantæ dici debeat.

422. Succo isthoc per terræ viscera diffuso ut nutri-ri planta queat, debet is radices plantæ subire, per fistulas tanquam fibras aut arterias sursum elevari, inque omnes plantæ partes dispensari. Totum hoc nutritionis negotium potissimum dependet tum a calore, tum a pressione aeris, tum a motu intestino ac alterna dilatatione, & constrictione vasorum, tum ab eorum structura, ac debita inter se communicatione. Calor namque tam solis, quam terræ radicum poros, seu oscula plantæ, aperit, & succum circa radices extantem attenuat, atque etiam commovet. Sic attenuatæ, & commotæ succi particule in aperta radicum oscula tum actione caloris, tum pressione aeris impelluntur. Succus in radicum canaliculos semel intrusus in iisdem, & reliquis plantæ fibris in altum attollitur potissimum per actionem aeris, in succum alimentitium ex omni parte prementis. Atque ne nimium aeris pressioni hic a nobis attribui quis credat, considerata etiam sunt ea, quibus hæc aeris pressio adjuvatur, & succi motus sursum reddi facilius potest.

423. Et primo quidem fistulæ ligneæ, in quibus iste succus elevandus ad arborum cacumina est, sunt canaliculi angustissimi, ac tubuli omnino capillares, in quibus liquida altius eluctantur (Phyf. Gen. N. 478. &c.) 2. Canaliculi isti interiorius sunt asperi, & infinitis quasi planulis inclinatis constant, quibus succi jam elevati particule possunt inniti. 3. Eadem fistulæ sursum porrectæ communicant cum innumeris aliis fibrillis transversum locatis, iisque adhuc angustioribus, in quas ali-

qua

qua succi portio ad latera diffluere atque ab utriculis spongiosis, per plantam omnem, maxime per medullam copiose dispersis, imbibiri potest. 4. Dum succus ad aliquod spatium in arbore est elevatus, atque ab asperis fistularum cavitatibus, & canaliculis transversis sustentatur, si novi succedant impulsus, promovebitur altius; novi autem impulsus succedunt, dum in oscula radicum partim actione caloris, partim pressione aeris nova portio succi impellitur. 5. Accedente motu intestino in ipsius plantæ partibus aliæ non nihil dilatantur, aliæ constringuntur; dum autem constringuntur, succus ex illis expellitur, & in dilatatas, ac minus repletas urgetur.

Alternæ hæc dilatatio, & constrictio vasorum variis ex causis oriri potest, partim ex agitatione totius plantæ, quæ fieri non potest, quin partes inflectantur; inflecti autem non possunt, quin aliæ comprimantur, aliæ extendantur: hinc etiam motus aeris plantam ambientis, & agitantis plurimum confert ad elevationem succi. Partim oriri ea potest ex aere in ipsius plantæ tracheis concluso, qui pro diversitate caloris, ac frigoris nunc expandi, nunc condensari debet. Maxime attendi potest illa dilatatio & constrictio trachearum, & utriculorum, quæ fit ob alternam caloris de die, & frigoris de nocte successiōnem: dum enim tracheæ, & utriculi per calorem diurnum dilatantur, ac succo alimentitio replentur, dein vero ob frigus nocturnum sensim appropinquans successive constringuntur, succus, quo antea turgebant, ex utriculis expressus per fibras, & canaliculos denuo promovebitur altius, ferme uti liquor aliquis in canali membranaceo conclusus per illum moveri debet, dum is quacunq; demum a causa comprimitur. Imminente porro nocturna constrictiōne succus non deorsum, sed sursum movetur, quia motui sursum aut nulla, aut non tanta ponuntur obstacula, quanta motui deorsum; motui enim deorsum obstat continua pressio aeris, ipsa constrictio trachearum inferiorum, & succus ex utriculis inferioribus expressus, ac præcipue valvulæ vesiculis, fors etiam fibris ita adaptatæ, ut reditum succo intercipient; motui vero sursum nulla aeris pressio obstitit, &, licet tracheæ etiam superiores constringantur, quia tamen in iis non datur succus tam copiosus, uti in inferioribus, isque jam magis filtratus, & excoctus, per canaliculos ita coar-

statos altius attolli poterit, sicut altius attollitur fluidum per tubulum capillarem angustiores.

Denique ad elevationem succi conferre etiam plurimum potest communicatio fibrarum, per quas succus ascendit, cum illis fibris, per quas magna succi portio iterum ad radices descendit: sic enim dabitur circulatio succi alimentitii in planta haud secus, ac datur circulatio sanguinis in animali, & fibræ ac tracheæ plantarum eo ferre modo se habebunt, quo in corpore humano se habent arteriæ ac venæ; & succus nutritius per illas tanquam per siphones fursum, ac deorsum movebitur. Vid. Num. 30.

424. Hæc quidem ostendunt, quomodo alimentum plantæ fursum elevari ad cacumina etiam arborum queat. Hoc semel ostenso per se patet, quomodo ad latera & ramos idem succus pervenire possit. Nam sicut arteriis & venis majoribus per totum corpus adnatæ sunt venæ & arteriæ aliæ per totum corpus excurrentes, ita fibris & tracheis plantarum fursum porrectis annexæ sunt fibræ & tracheæ ramorum, in quas succus eodem modo impellitur, & promovetur, quo in illis, quæ fursum porriguntur.

425. Succus iste per oscula radicum semel assumptus, & per lignosas plantarum fistulas ascendens ex his transit in utriculos spongiosos, atque inde in medullam, in quam utriculi exporriguntur. In utriculis miscetur humori, quo illi turgent, ac calore, & motu intestino agitatus fermentescit, particulæ crassiores atteruntur, atque ita alimentum quasi digeritur, aptumque redditur ad nutriendam plantam, omnesque illius partes. Neque solum per oscula radicum, sed etiam per folia, ramos, & corticis poros succus recipitur: quando nimirum dispersus per ærem humor, pluviarum subtilior substantia, ac maxime roris particulæ tenuissimæ in laxatos calore poros se se insinuant, & reliquo, qui in planta est, succo permixtæ cum eodem in omnes plantæ partes dispensantur. Ramulos certe quoad texturam plurimum convenire cum radicibus, ex eo potest intelligi, quod tilia a Cl. Lewenhoeckio terræ ita immissa, ut radices fursum spectarent, rami vero infra terram essent sepulti, tamen effloruerit, atque ex ramis radices, ex radicibus vero rami fuerint progeniti.

426. Dum succus perpetuo motu per plantam circula-

culatur, relictis hinc inde particulis eæ, quæ deperditæ fors erant, restaurantur, atque ita planta nutritur. Cumque idem succus continuo tum ad latera, tum sursum urgeatur, motu hoc suo partes extimas, & teneriores magis semper, magisque propellit, & relictis particulis solidis tum in extimis rami apicibus, tum etiam in transversis plantæ sectionibus ramos longiores, & firmiores efficit, qua ratione planta, ejusque rami crescunt in longum. Quando copiosior succus per plantam, & maxime per medullam diffusus est, per laxatos calore, ac motu intestino fibrarum nexus aliqua ejus portio e medulla expellitur versus corticem, ipsumque corticem vel findit, vel potius instar vaginæ ante se protrudit; & dum postmodum per novum hunc canalem ex eadem medulla novus identidem succus affluit, oritur gemma, seu novi furculi rudimentum (Num. 418.) quæ gemma sensim aucta, se seque explicans demum in novum ramum extenditur. In latum denique crescunt arbores, dum annis singulis in vere interior corticis pellicula se ab ipso cortice separat, lignoque adnata novum fibrillarum lignearum circulum constituit ita, ut arbores pleræque horizontaliter sectæ tot circulos exhibeant, quot annos numerant.

Circuli isti plerumque versus plagam meridionalem sunt ampliores, contractiores versus Boream, quod inde provenire potest, quia calore e plaga meridionali vehementiore magis dilatari solent fistulæ, & fibræ, per quas magis dilatatas & amplior succi portio ascendit, & intra corticem amplior iterum descendens in pelliculam ex ea parte crassiores concrevit. Notatum tamen a quibusdam est, circulos hos in pluribus arboribus ex ea parte fuisse ampliores, ex qua vastius radicis brachium, succum copiosorem plantæ subministravit, etsi pars illa non fuerit obversa plagæ meridionali. Interim intelligi hinc potest, cur variae figuræ, cruces, numeri &c. cortici tenerioris plantæ profundius aliquanto incisæ lapsu temporis in ipsa ligni substantia interiore reperiantur.

427. Quod autem de circulatione succi nutritii dictum antea est, tum ratione, tum experientia comprobatur. Rationem quidem desumere possumus ex analogia, quam nutritio plantarum habet cum nutritione animalis, atque ex eo, quod nobiliore alimenti portione in nutritionem plantæ absumpta, pars reliqua non-

dum satis excocta ad eas partes refluere convenientissime dicatur, in quibus repetita fermentatione magis perficiatur; quamquam non negetur, multas quoque succi particulas per continuam transpirationem e planta avolare. Experientia vero multiplex id ipsum commonstrat, ut ex Malpighio, Peraultio, aliisque ostendit P. Regnault. I. Si planta aliqua lactaria, ficus v. g., arctiore vinculo medio caule constringatur, supra vinculum intumescit eo modo, quo venæ animalium, si brachium ligetur; hic vero tumor non aliunde, quam ex succo intra corticem resfluente provenit. II. Si culmus papaveris, dum maturefcere incipit, in distantia 4. digitorum a vertice amputetur, cernitur in canaliculis partis abscissæ succus flavus descendens, in alterius partis succus albus ascendens. III. Si plantæ languentis folia per aspersam aquam reficiantur, toti plantæ vigor redditur, quia liquor per poros foliorum receptus ad ipsas etiam radices permeat. IV. Toti plantæ morbus, vel interitus imminet, si aliqua illius pars morsu animalis noxii, vel assusa duntaxat saliva lædatur; quia succus noxius ex ramis, & foliis remotioribus in totum plantæ corpus diffunditur, quemadmodum venenum manni se se insinuans totum hominem inficit. V. Si arbor spoliatur foliis suis, mors plantæ imminet, quia deficit organum, in quo succus nutritius perficiatur, & in partes inferiores resfluat.

Maxime huc facit, quod expertum se scribit Cl. Mariottus. Ex longa carpinorum serie duas arbores selegit, quæ sibi in aliqua trunci parte mutuo adnatæ erant. Earum unam sesquipedali infra locum cohæsionis istius spatio a trunco suo, & radicibus refecuit, & in sectionis locum immisit lapidem, qui ascensum succi nutritii interciperet. Eo non obstante truncus etiam a radice sua resectus ingruente vere haud secus, ac antea, ramulos plures infra locum cohæsionis emisit: nutrita igitur etiam hæc arbor fuit, & succum proferendis ramulis sufficientem habuit infra locum cohæsionis; succum autem hoc in loco aliunde habere non potuit, nisi ex adnata sibi arbore altera, in quam succus ascendens, ac postmodum iterum resfluens etiam ad partem suis a radicibus recisam descendit. Venæ porro istæ, per quas humor resluit, potissimum sunt in cortice, & infra illum; fistulæ autem, seu arteriæ, per quas succus ascendit, sunt in interiore substantia plantæ.

428. Quamdiu jam memorata succi circulatio, aliæque operationes in planta rite peraguntur, sana illa, vegetaque persistit: dum vero vel partium solidarum turbato ordine, vel alia de causa hæc succi dispensatio intercipitur, tum morbi, morsque ipsa plantæ contingunt. Sic 1. excessus succi plantæ vascula diffringit, aut in iis coagulatus circulationem impedit, sicque plantam quodammodo suffocat. Malum hoc cavetur per incisionem, haud secus, ac in animali abundantia sanguinis per venæ sectionem tollitur. 2. Morbus æque periculosus est defectus succi alimentitii, quo deficiente partes per continuam transpirationem deperditæ non amplius resarciuntur, fibræ lignosæ, ac utriculi magis semper constringuntur, arecentesque inepti fiunt ad succos porro recipiendos. Proderit hic irrigatio frequens, & stercoratio. 3. Malignitas succi plantis aut morbum, aut interitum assert; si nimium succus nimium sit viscosus, proin circulationi debitæ minus aptus; vel corrosivus, ut aqua calce imbuta, quæ tenerrima radicum capillamenta exurit, & vitiat. 4. Nocet etiam nimia plantarum fertilitas: dum enim porissima alimenti portio in fructus abit, planta ista necessario cibo destituitur; hinc juvat subinde fructus, & flores quosdam auferre, ni id ipsum per ventos, aut insecta præstitum jam sit.

Inter morbos plantarum etiam numeratur, rubigo, quæ in leguminibus, & fructibus a roscido quodam, & acri humore causata interiorem plantæ substantiam corrumpit; item roratio, dum nimia imbrium copia flores decutit, fibras radicum, corticumque plus æquo emollit, sicque ad dissolutionem, & corruptionem disponit. Huc pertinet etiam ustilago, seu carbunculatio, quæ fit, dum gelidus humor de nocte in vitis v. g. gemma constringitur, vel dum post lapsum copiosum rorem sol illico ardet: tunc enim salinæ roris particulæ, ubi ardore foliis agitantur, e poris plantæ teneræ egredi nequeunt, quin eosdem poros, & fibras lacerent. Quantum mali inferre plantis soleant grando, insecta, nimiumque frigus, per se manifestum est. Memorandæ quoque sunt plantæ, ut vocant, parasitæ, quæ arbori quodammodo adnatæ succum isti alendæ destinatum suffurantur. Inter has eminet muscus, qui, ne plantæ noceat, tempore pluvie non absque molestia abradendus a cortice est. Aliud medium suggerit Cl. Ressons experientia compro-

batum. Mense Martio, aut Aprili cortex usque ad lignum linea recta a ramis infimis ad terram usque incidatur, idque ea parte, quæ soli obvertitur, ut vulnus facilius coeat: hac enim ratione succus in cortice stagnans, quo maxime aluntur ejusmodi parasitæ, facilius circulatur, adeoque noxiis hospitibus alimentum subtrahitur.

429. Quæres adhuc r., cur flores aliqui solem respicere, ejusque motum sequi soleant. Respondent, hoc provenire a structura caudicis, cujus fibræ non nihil sint contortæ instar funis, aut sidium ex animalium intestinis confectarum: hinc dum calore solis expanduntur fibræ, caudex non secus, ac funis circumagitur. Fors aliqui, uti Tulipæ, ideo caput solem versus quodammodo inclinant, quod fibræ eorum ex illa parte, ad quam solis radii directe pertingunt, calore non nihil flaccescant: hinc cum fibræ reliquæ, quæ in umbra versantur, sint rigidiores, flos ipso pondere suo in eam propendebit partem, ex qua flaccidioribus sustentatur fibris. 2. Cur aliqui flores oriente sole se se explicent, eo occidente denuo contrahant? Ratio iterum erit, quia calore laxantur fibræ foliorum, in laxas amplior succus intruditur; frigore iterum imminente eædem fibræ constringuntur. 3. Cur plantæ aliquæ animalia quædam alliciant, alia fugent, proveniet ab effluvio illis grato, aliis molesto, sicut odor floris cujusdam uni hominum gratus, alteri ob eandem causam esse ingratus potest. 4. Cur etiam plantæ aliquæ ad se mutuo quasi accedant, aut se se quodammodo fugiant, rationem pariter repetunt ab effluviis, & atmosphæra plantarum. Esse equidem effluvia copiosissima in plantis, certum omnino est, illaque ad mutuum hunc accessum, aut recessum multum posse conferre, nemo negaverit; at, qua id ratione faciant, haud erit facile, qui determinare auit. Cæterum plurimæ de plantis circumferuntur fabulæ, quibus rationem physicam promptius assignaverit, qui melius noverit fingere. Uberrime hanc

de plantis materiam pertractant Viri Clarissimi Mal-

pighius, Grewius, Linnæus, Hermannus,

P. Fabri &c.



PHY-

PHYSICÆ PARTICULARIS PARS SECUNDA DE MUNDO ELEMENTARI.

Elementorum nomine hic veniunt quatuor elementa vulgaria, Terra videlicet, Aqua, Aer, & Ignis. Sparsum de singulis jam dictum sæpius; nunc speciatim illa sunt consideranda. Addentur, quæ ad quodvis elementum revocari possunt, Meteora, seu illa corpora cælum inter ac terram versantia, quæ intra atmosphæram suspensa, natantia, mota, incensa &c. diversia exhibent phænomena.

DISSERTATIO I. DE ELEMENTO IGNIS.

Quoniam cum meteoris igneis commune quid habent phænomena Electricitatis, abs re non erit, si ista quoque hac dissertatione complectamur.

ARTICULUS I. NATURA IGNIS, & FLAMMÆ.

430. **Q**uæ de natura Ignis penitus perspecta habemus, pauca admodum esse, fatentur omnes. Illud constare videtur, Ignem esse corpus summe fluidum, constans particulis subtilissimis, durissimis, ac maxime mobilibus. Et 1. quidem, ignem esse corpus, inde patet, quod, sicut corpora omnia, substantia sit impenetrabilis, nullam sibi similem in eundem secum locum admittens.

2. Corpus *summe fluidum*: ignis enim id est, quod aliis cor-

poribus fluiditatem conciliat, ut sit in metallis ad ignem liquatis; quod fluiditatem conservat in aliis, quæ in absentia ignis solidam in massam concrefcunt; quod denique sicuti fluida cætera ad æquilibrum se reducit: calor enim in vase aquis pleno, aut etiam in cubiculo probe clauso de se undique æqualiter diffunditur. 3. *Consistans particulis subtilissimis*; cum corpus nullum adeo densum sit, in quod calor, proinde etiam ignis, se intine non infuset, in ea etiam, quæ aliis, nobis hucusque cognitis, prorsus impervia sunt. 4. *Durissimis*, utpote quæ in aliorum corporum partes impulsæ ferme omnia dissolvunt, & quasi discerpunt. 5. *Maxime mobilibus*, quod tum ex summa ipsius fluiditate, tum ex dictis de calore consequitur.

431. Atque hoc fluidum, ut dictum sæpius, ubique per omnia cœli, terræque spacia diffusum plurimos, eosque diversissimos in rerum natura effectus causat, & pro ratione istorum diversa etiam sortitur nomina, ferme, sicut aqua, quam, prout illam debita sibi fluiditate ac densitate præditam in fontibus, fluviis &c. cernimus, aquam proprie appellamus, ope caloris extenuata, inque bullulas rarissimas expansa vapores; in infimis aeris regionibus hærens nebulam; in superioribus atmosphæræ partibus suspensa nubes; in guttulas collecta, inque terram recidens pluviam; concreta vero in floccos candidissimos nivem; in globulos congelata grandinem; in massam solidiorem frigore condensata glaciem efficit, ita sane materia ignea, quæ fors pressione, aut motu versus certi systematis centrum causat descensum gravium; constanti vero nisu ubique in æquilibrio se conservandi motus elasticos; motu vibratorio celerrimo, ac pressione rectilinea lumen; motu perturbato & expansivo agitata calorem; aucto hoc motu magisque conjuncta id, quod nos ignem dicimus; denique particulis oleosis, sulphureis, aliisque irretita, & cum iis agitata flammam efficit.

432. Flamma igitur, & ignis confundi haud debent: etsi enim nulla unquam detur flamma, ubi nullus est ignis, datur tamen ignis, isque non raro intensissimus, ubi nulla adest flamma. Sic in foco vitri, aut speculi caustici adest ignis etiam metalla dissolvens, neque tamen ibidem adest flamma. Dein flamma nunquam datur, nisi, ut metaphoricè loquimur, competens sibi in-

veniat pabulum; ignis vero in memorati speculi foco per horas etiam subsistit intensissimus, etli nullo ibidem nutriatur alimento. Præterea flamina omnis in recipiente evacuato exstinguitur, cum tamen sub eodem ignis, speculo caustico in focum collectus easdem, quas in aere libero, vires exerat. Flamma proin præter ignem, qui forte minimam illius partem constituit, dicit insuper particulas heterogeneas innumeras illius pabuli, in quo excitata, & conservata flamma est. Pabulum porro flammæ, ut experimentis compluribus egregie ostendit Cl. Boerhaavius, aliud nullum est, quam partes corporum oleosæ seu sulphureæ, ac spiritosæ. Quoniam autem partes istæ in corporibus, quæ ab igne consumpta flammam exhibent, semper permixtæ sunt aliis particulis terreis, aqueis &c. flamma dici poterit congeries ex bullulis, sive particulis spiritosis, sulphureis, salinis, aqueis ac terreis (sumendo voces has in sensu Chymicis usitato) a fluido subtilissimo igneo motu vehementi & perturbato exagitatis, atque ab aere circumfuso, ne continuo dissipentur, condensatis.

433. Quare diversa etiam sunt excitare ignem, & succendere, seu excitare flammam. Ignis excitari dicitur, dum materia ignea ubique diffusa alicubi copiosius colligitur, atque ad motum rapidissimum concitatur. Fieri id potest I. vehementi attritu eorum corporum, quæ magis dura, ac rigida sunt: hoc enim attritu non modo particulæ ferreæ v. g., sed etiam, quæ in illarum poris, & circa ipsas est, materia ignea motu vehementissimo agitur, aere vix non omni inter laminas istas excluso materia ignea copiosior affluit, quæ similem ad motum concitata tum igniculos in ferro, tum ipsas ferri particulas exagitando faciet, ut totum denique ferrum candescere incipiat. Certe solo attritu corporum duriorum tantum excitari ignem, caloremque posse, cui calor flammæ cujusunque ne comparari quidem possit, vel ex eo patet, quod, dum silex, ac pyrites chalybe percutitur, abrafa ex silice & chalybe corpuscula calore illo penitus fusa, & in globulos vitreos versa appareant, si supposita charta excipiantur, & ope microscopii examinentur; ea autem ignis actio, qua saxa, & metalla in vitrum abeunt, censetur esse summa, & ultima.

II. Excitatur ignis collectione ejusdem materiæ igneæ

neæ in focus, idque vel speculo, vel vitro caustico; dum nimirum radii solares parallele ingressi in amplam superficiem speculi ferme omnes repercussi coeunt in unum veluti punctum, aut per refractionem pariter a via parallela colliguntur in spatium quoddam arctius, in quo igniculi frequentius, ac vehementius in se se mutuo impulsu vim tanto maiorem exerunt, quanto minor est focus, seu spatium, in quo radii colliguntur, relate ad superficiem corporis vel reflectentis, vel refringentis. Præ cæteris celebratur speculum Vilettianum, in quo focus ad superficiem reflectentem erat ut 1. ad 7396. ut adeo, si radii incidentes omnes in focus reflecterentur, in hoc septies millies trecenties nonagesies sexies major esset vis ignis, quam eadem sit in aere tunc calefacto a sole. Inter vitra vero caustica celeberrima sunt Tschirnhusiana, quorum illud, quo Auctor ipse usus fuerat, pro diametro orbis sui quatuor habebat pedes, radiosque in focus diametri sesquipollicis collegerat. Quia tamen focus speculi, seu area, in quam radii reflexi colliguntur, minor est relate ad superficiem speculi, quam focus vitri Tschirnhusiani relate ad hujus superficiem; insuper radii per refractionem magis debilitantur, quam per reflexionem, hinc vehementior etiam esse solet actio ignis in foco catoptrico, quam in dioptrico.

434. Flammam excitare dicit, igniculis similem motum communicare in tali materia, quæ apta sit ad illos diutius continendos, & simul ad eam partium suarum agitationem recipiendam, qua illæ vi ignis expansæ, & motu vehementissimo agitatae complexum lucens, & ardens efficiant. Nempe dum partes corporis inflammabilis incalescunt, incipiunt sensim agitari, aucta agitatione partes illæ solvuntur ab initio quidem (nisi pabulum ignis sit omnino desæcatissimum) in fluidum quoddam crassius, quod *Fumum* vocamus; hic a flamma non differt, nisi raritate, ac puritate, estque ipse iterum combustibilis: si enim flamma candelæ repente extinguatur, fumus ater ascendet; huic fumo si alia candelæ ardens admoveatur ita, ut ellychnium candelæ extinctæ non contingat, hæc denuo accendetur, flammaque manifeste per fumum ad ellychnium descendere conspicietur. Quodsi dein actio ignis evadat fortior, particulæ materiæ combustibilis solvuntur magis, magisque tum ipsæ, tum igniculi in ipsis agitantur, atque ita solutæ

lutæ & agitæ lucent, & a corpore separatæ flammam constituunt.

Ne autem particulæ tum igneæ, tum ipsius materiæ combustibilis ita a se invicem solutæ, & inter se agitæ, illico dissipentur, debet dari causa aliqua, quæ particulas has in loco flammæ collectas teneat, & unum in locum quasi comprimant, non quidem compressione tali, ut eæ in molem concrecant immobilem: sic enim illico sequeretur suffocatio flammæ, si motus omnis tolleretur; sed compressione tali, ut ea non obstante particulæ tum igneæ, tum materiæ combustibilis sufficienter agitari, & harum aliquæ jam magis attenuatæ succedentibus identidem novis avolare queant. Maxime apta ad finem hunc erit materia fluida quidem, sed igne crassior, quæ & ipsa motu reciproco agitari, sicque agitationem particularum flammam constituentium promovere valeat.

Atque causa hæc partes flammæ comprimens, collectasque tenens alia non est, quam atmosphæra aerea. Hæc flammam instar fornicis undique ambiens, partesque pabuli actione ignis versus flammæ peripheriam excussas toto pondere suo ad centrum repellens, partes has & collectas tenet, & motum earum, attritumque inter se plurimum auget, donec in illo quasi foco, sive spatio, quod flamma occupat, vel deficiat ignis elementaris agitans, vel partes crassiores agitandæ una cum pabulo subtrahantur, vel denique fornix ille aereus omnino tollatur, aut dissipetur: tunc enim flamma quoque deficiet, & extinguetur. Quod aer flammam ambiens etiam variis subsultibus agitetur, videre possumus, si pruna ardens soli exposita spectetur oculo versus solem supra prunam directo; varias enim tunc undulationes aeris observabimus.

435. Prout jam diversa est materia inflammabilis, etiam diversus erit modus, quo flamma excitatur. Ponamus candelam, vel ellychnium lampadis oleo repletæ ab alia candella jam ardente accendi. 1. Cum in flamma candelæ ardentis jam detur motus rapidissimus partium ignis, ac materiæ combustibilis, quamprimum flamma ellychnium contingit, motu simili concitantur partes tum materiæ igneæ intra & circa ellychnium existentis, tum pabuli, olei nimirum, & ellychnii; hoc modo excitata jam erit flamma tenuis, adhucdum non nihil obscura. 2. Partes pabuli actione ignis sensim magis ex-

U

pan-

panduntur, & rarefiunt; hinc & aer magis removetur, & in spatium ita rarefactum materia ignea vi æquilibrii ex ambiente aere in focus illum confluit, & simul aer remotior in oleum libere premens illud in ellychnium per tubulos illius capillares attollit, sicque novas supeditat partes pabuli ab actione ignis solvendas, & agitandas. 3. Aucta sic copia igniculorum & particularum pabuli augebitur flamma, & partibus pluribus jam valde attenuatis, fortiusque agitatis in medio, & apice flammæ augebitur ejusdem splendor; atque ita flamma subsistet plena, donec ob unam ex memoratis antea causis de novo deficiat.

436. Quæ porro de pabulo ignis, aut flammæ dicta subin sunt, non eo utique sensu accipi debent, ac si illud vere converteretur in ignem. Ideo partes materiæ combustibilis vocamus pabulum ignis, quod in iis diutius conservari, ac cum illis agitari queant particule igneæ, quin ob suam exilitatem, & motum concitatissimum illico dissipentur, quemadmodum id fit in foco speculi caustici, ubi ignis omnis mox dissipatur, ut primum vel speculum removetur, vel radii interposito corpore opaco intercipiuntur. Neque etiam ignis ille omnis, qui in flamma inest, ex ipso pabulo assurgere, & quasi ex carcerculis liberari censendus est: materia enim ignea undique diffusa locum flammæ haud secus ambit, ac aer, & in locum flammæ sensim magis expansum, & rarefactum ratione æquilibrii, quo contiguitatem partium fluida omnia quærunt, copiosissime affluit, ubi ad motum debitum concitata cum igniculis antea ibidem jam existentibus flammam constituit.

437. Hinc circa ignem colligi potest 1. Cur, si chalybs, aut pyrites sebo, vel oleo ungatur, ignis non excitetur: quia materia pinguis & fluida mobilitate sua attritum vehementiorem impedit. 2. Cur globus ferreus tormento bellico excussus, dum in terram decidit, totus, ut ajunt, ferveat. Hujus causa esse non potest pulvis pyrius, cum vix momento in igne hujus pulveris globus ille existat: erit igitur causa caloris vehementissimus ille attritus, quo motu rapidissimo radit latera ipsius tormenti, atque etiam impingit in aerem undique ambientem. 3. Quomodo tempore admodum sicco per solos ventos excitari incendia queant, quibus non raro sylvæ integræ conflagrent; dum nimirum vento

arbores¹ magis exsiccantur, earumque rami motu rapidissimo invicem atteruntur, primo calor, tum denique ignis excitabitur. 4. Quod per radios solis a montium jugis reflexos summe intendi calor queat, ferme ut sit a speculis causticis. Sic etiam a nubibus, haud procul terra distantibus, lumen sæpe intensissimum reflectitur. Quin si nubes in figuram quamdam sphericam, aut convexam coagulatae radios solis copiose excipiant, possunt, atque etiam debent eos instar vitri caustici colligere in focum, atque ita non calorem duntaxat, sed, si materiam combustibilem offendant, ignem etiam, ac flammam excitare.

438. Circa flammam intelligi potest x. Cur candelam ardens sub recipiente evacuato extinguatur; quia deest fornix ille aereus, seu causa collectas tenens flammæ partes, qua sublata actione ignis illæ omnes dissipantur. Atque hinc simul patet, cur flamma in aere semper feratur sursum, idque ita, ut figuram præferat acuminatam. Nempe aer pressione sua particulas flammam constituentes undique complexus, cum sit fluidum respectu gravius, quam particulae ita extenuatae, illas sursum urget; & quoniam flamma ibi, ubi pabulo suo insistit, plures & adhuc crassiores partes continet, quæ tamen, quo altior flamma jam est, eo pauciores, magisque extenuatae sunt, hinc ab aere superius magis comprimi potest, quam inferius, ex quo consequitur figura conica. 2. Flammam flatu quandoque extinguatur, dum nimirum aer vehementius impulsus partes flammæ dispergit, atque etiam fornicem aeris ambientis dissipat; quandoque flatu recens extincta iterum accenditur, dum nimirum flatus adversa manu prope candelam posita directus subito reflectitur, partes flammæ non nihil dissipatae colliguntur, & cum igniculis in ellychnio adhuc ardente agitatæ ad motum fortiorem denuo concitantur. Alias per ventos quoque flammæ vis augetur, si nimirum vel flamma sit amplior, ut non illico partes omnes dissipari, sed potius vehementiorem ad motum concitari valeant, vel si ignis sit in corpore solido, v.g. in prunis, cujus partes non tam facile dispergi, ignis vero in iis latens ad motum fortiorem concitari potest. 3. Cur partes heterogeneæ in pabulo, & flamma existentes augere vim flammæ possint; quia partes istæ, si admodum duræ, ac rigidae sint, motu rapidissimo agitatae similem mo-

tum etiam iis, in quæ impingunt, communicant. 4. Cur affuso fluido extinguatur flamma: fluida enim suo incursu partes flammæ dissipant, motum earum impediunt, affluxum pabuli sistunt, ac fornicem aereum tollunt.

ARTICULUS II.

PHÆNOMENA ELECTRICITATIS.

Nullæ hic expectandæ sunt evidentix; sufficient conjecturæ probabiles, ex quibus principium aliquod generale ad casus particulares subin applicandum deduci queat. Quodsi etiam applicatio isthæc haud adeo prompta semper futura sit, nihil inde de ipsius principii probabilitate decedet: possunt varix in variis casibus intervenire circumstantiæ, æque, ut sic dicam, tam delicatæ, ut, quid vel conferant, vel obsint, divinare illico haud semper liceat.

§. I.

STATUITUR PRINCIPIUM GENERALE.

439. **E**lectricitas dici potest vis, quæ in corporibus excitata attrahit, & repellit alia cujuscunque generis corpora levia, ac subin etiam lucem conspicuam, succussionemque efficit. Vis hæc dicitur *electrica*, quia in succino, quod græci ἤλεκτρον vocant, primum est observata. Excitari autem potest duplici modo; 1. per solam frictionem, aut calefactionem corporum; & quæ talia sunt, proprie dicuntur *electrica*, aut etiam *idioelectrica*, seu per se, & immediate *electrisabilia*. 2. Per hoc, quod corpus per se non *electricum* propius admoveatur corpori immediate *electrisato*; & quæ sunt ejusmodi, vocantur proprie *electrisabilia*, aut *derivative*, seu *symperielectrica*, eo quod vim electricam non nisi per communicationem acquirant.

Primi generis sunt ferme omnia corpora, quæ eam habent partium soliditatem, ut possint vehementius fricari, quin tamen per frictionem calefacta illico mollescant, uti sunt *gemmæ*, *crySTALLUS*, *vitrum*, *resina*, *sul-*

sulphur, pix &c. item ligna exsiccata. Neque tamen æqualem omnia electricitatis gradum recipiunt, etsi frictio sit æqualis. Vim præ cæteris, quæ adhiberi plerumque solent, efficacem hoc modo acquirit vitrum. Metalla porro, etsi fricari queant, quin illico evadant mollia, a classe idioelectricorum excipiuntur, quemadmodum etiam aqua, & fluida omnia. His tamen, quæ per se electrica non sunt, electricitas multo validior communicari potest, quam iis, quæ per se electrica sunt; vixque erit corpus aliquod, cui vis hæc communicari nequeat, cum ipsa etiam flamma laminæ electrificatæ imposita, teste Jallaberto, motum digiti quamcunque in partem sequatur. Atque hac communicatione vis electrica ad maximam distantiam ope fili metallici diffundi potest, idque ea celeritate, quæ celeritatem soni multum superet: sæpe enim ultra spatium quater, aut quinquies mille pedum diffunditur, quin temporis, quo ista diffusio peragitur, intervallum aliquod adverti queat.

440. Phænomena Electricitatis ad tres potissimum classes revocari possunt, in quarum prima sunt attractio, & repulsio, in altera Phosphorescentia, in tertia succussio. Et de attractione quidem constat, omnia corpora levia solida æque, ac fluida a corpore electrificato attrahi ad distantiam majorem, vel minorem pro majore, vel minore vi electrica in ipso excitata, proque diversitate illius materiæ, cui corpora isthæc levia incumbunt: si enim imponantur pici, aut resinæ, ex tanta distantia non attrahuntur, quam, dum imposita sunt corpori non electrico. Postquam autem hæc levia corpora versus corpus electrificatum fuere propulsa, ab illo sæpe iterum repelluntur, & interdum etiam, antequam illud contigerint; atque hi itus & reditus tamdiu non raro continuantur, quamdiu electrificatum corpus vim adhuc sat efficacem conservat. Attractio hæc, & repulsio interdum simul, ac in eodem instanti sensibili accidunt, non tamen semper utraque sit in eadem copia; imo attractio, & repulsio non semper conjunguntur, cum sæpe sola detur attractio, alias sola repulsio; quæcunque autem fiat, sit illa semper per lineas rectas, siquidem corpora attrahenda, aut repellenda sint levia: si enim aliquantum sint graviora, aut ob figuram, quam habent, ærem non æque dividere possint, moventur per lineas diversas, etiam curvas, ad quas determinantur tum vi

electrica, tum actione gravitatis, ac resistantia medii. Denique attractio hæc, & repulsio etiam contingit in recipiente evacuato.

Phosphorescentia notatur tum in corporibus idioelectricis, si in loco obscuro perfricentur, aut, si cessante frictione corpus non electricum iisdem admoveatur; tum etiam in iis, quibus vis electrica est communicata, saltem in plerisque: liquores enim oleosi, dum electrificantur, nihil luminis emittunt. Lumen porro istud quoad copiam perinde, ac quoad colorem in diversis diversum est; efficacia quoque ipsius sæpe tanta est, ut scintillæ erumpentes materias facile inflammabiles accendant, præcipue spiritum vini rectificatissimum. Quoties autem flammula electrica e corpore electrificato excitatur, sentitur aliqua succussio, eaque in variis experimentis, maxime in sic dicto Leydensi, admodum intensa, & vehemens.

441. Ut jam principium aliquod generale, ex quo phænomenum istorum ratio fluat, statui queat, supponi tanquam certum posse, existimo, motus istos attractionis, & repulsionis, item luminis, ac succussionis provenire a motu, aut nisu alicujus materiæ, quæ corpus electrificatum undique ambiat, suæque actione, quacunque demum illa, effectus electricos edat: ad qualitatem enim, aut vim occultam qui hac in materia confugeret, ego quidem neminem scio. Conveniunt Auctores passim omnes in eo, corpus electrificatum materia quadam fluida, tanquam atmosphæra aliqua, ad certam a corpore distantiam undique diffusa, cingi, quæ atmosphæra fons sit omnium phænomenum electricorum adeo, ut, quamdiu perdurat illa, aliqua vis electrica se semper prodatur, cesset autem illico, ubi illa penitus fuerit dissipata. Et vero si baculus electricus probe electrificatus ad distantiam unius aut duorum pollicum admoveatur genis, aut manui, sentitur materiæ alicujus motus, quæ faciem, aut manum non aliter afficit, ac tela araneæ, aut plumula leniter demulcens organum tactus.

Materiam autem atmosphære hujus non esse aerem, vel ex eo satis liquet, quod phænomena electrica eveniant etiam sub recipiente evacuato. Præterea si in mensa collocetur cereus accensus, & in distantia sesqui pedis circiter tenui e filo suspendatur auri bracteola, mox, ubi tubus electrificatus in medio istorum fuerit constitutus,

attra-

attrahetur quidem, ac repelletur auri bracteola; in flamma autem accessus aut recessus sensibilis nullus erit, indicio sat manifesto, aerem per atmosphæram electricam non agitari sensibilibiter, nisi forte vis electrica sit nimis vehemens. Atmosphæram igitur electricam potissimum constituet materia subtilis, quæ, ut dictum sæpius, per mundum hunc universum, perque omnium corporum poros copiosissime diffusa, semper in æquilibrio esse, & spatia forte vacua occupare nititur. Dixi: *potissimum*; quod enim aliæ etiam particulæ heterogeneæ eidem permixtæ plerumque sint, ostendunt tum flamma excitata, tum varius flammæ color, atque etiam odor a flamma relictus.

442. Atque in hoc quidem, quod per electrificationem alicujus corporis circa hoc ejusmodi atmosphæra formetur, conveniunt passim omnes. At modum, quo ista atmosphæra formetur, dum explicare conantur, denuo in diversa abeunt. D. Waiz volebat, atmosphæram istam formari ex sola illa materia subtili, quæ ad corpus electrificatum ex ambiente aere undique affluit. Verum sola materia affluens ægre sufficiet ad declaranda etiam prima duntaxat phænomena, quæ habemus de repulsione corporum. Adhæc frictio vehementior, ut mox dicetur, apta videtur ad causandum potius effluxum materiæ subtilis e corpore fricto, quam affluxum ejusdem ad hoc.

Cl. Nolletus eandem atmosphæram compositam esse docet e duplici velut torrente materiæ subtilis, quorum unum efficit materia e corpore electrificato in aerem ambientem effluens, alterum vero illa materia, quæ ex aere ad idem corpus affluit. At enim duo isti torrentes, e diametro sibi oppositi, fors deberent in se se mutuo impingere, atque ita alter alterius fluxum aut sistere, aut saltem turbare.

Cl. Wilfons Atmosphæram illam duplici modo formari posse existimat. 1. Si aliquanto plus materiæ electricæ, quæ antea in æquilibrio constituta detinebatur in corpore, ex isto expellatur, ut adeo minor jam in corpore hoc detur portio istius materiæ, quam structura, & densitas illius alias exigeret. Et hoc corpus dicit negative electrificatum. 2. Si plus ejusdem materiæ in corpus intrudatur, quam naturalis ejus densitas, & structura de se exigeret; quod dum fit, dicit corpus electrificari positive. In utroque casu cum aliqua materiæ

electricæ portio in aerem circumslum expellatur, & aer huic expulsiōni præ aliis corporibus magis resistat, materia sic expulsa circa corpus electrificatum condensabitur, atque ita formabit atmosphæram electricam. Sed illud fors difficultatem hic parit, cur ea atmosphæra maxime in primo casu diutius etiam perdurare queat; cum ratione æquilibrīi materia expulsa mox iterum in pristinum suum statum reverti debeat, atque etiam possit, nisi in ipso corpore aliquid sit, quod reversuram vel impediat, vel denuo expellat.

443. Alii putant, atmosphæram electricam componi per materiam subtilem e corpore electrificato effluentem, ac versus illud denuo resluentem. Nimirum dum corpus electricum cylindrus v. g. aut globus vitreus C (Fig. 57. Tab. VI.) in machina electrica fricatur, non modo partes materiæ subtilis in poris superficiēi existentes commoventur, sed fibræ elasticæ ipsius etiam globi vitrei aliquantum comprimuntur, atque ad tremorem concitantur haud absumilem vibrationibus chordæ vehementius percussæ. Dum fibræ ita comprimuntur, materia electrica e globo expellitur, & evibratur versus peripheriam. Hæc ita expulsa, & in contiguam circa globum materiam subtilem impingens, istam eodem modo impellet, idque pro ratione vibrationum in globo vel fortius, vel remissius. Unde fieri necesse est, ut materia subtilis in aere ab illa, quæ a globo undulatim recedit, impulsæ in certa ab eodem globo distantia evadat aliquanto densior, atque e statu æquilibrīi deturbetur. Igitur materia hæc in omnem partem premens illam antea expulsam denuo repellat versus globum; ista huc repulsa tum per vibrationes partium globi, tum per materiam in globi medio undique constipatam iterum expelletur, atque ita motus & undulationes reciprocae fient tamdiu, donec cessante fricōne partes globi ad quietem, materia vero subtilis, tum, quæ in globo, tum, quæ circa ipsum existit, ad statum æquilibrīi sensim reductæ fuerint. Et hoc quidem fit, dum corpus fricōne electrificatur.

Quando autem corpus aliquod electrificatur per communicationem, atque ideo propius admovetur corpori antea jam electrificato, atmosphæra hoc modo formabitur. Dum corpus per communicationem electrificandum v. g. pertica ferrea A B (Fig. 57.) versatur intra atmosphæ-

ram

jam globi C jam electrifati, materia subtilis in poris corporis electrifandi existens eodem modo impellitur, atque ad aliquod spatium propellitur, quo modo impellitur, ac movetur materia atmosphære ipsius globi jam electrifati. Si materia in corpore electrifando existens continuo ita impellitur, ipsa e poris corporis hujus undique expulsa etiam impellet materiam subtilem in aere, perticam ex omni parte ambiente, existentem; hæc impulsa, & ad aliquod spatium non nihil condensata materiam antea expulsam denuo versus axem perticæ repellet; atque ita dabuntur iidem itus, & reditus, eademque atmosphæra circa corpus electrifandum formabitur, quæ datur circa corpus antea jam electrifatum, perdurabitque illa, usque dum materia subtilis ad æquilibrium suum sensim iterum reducatur.

Equidem, qui hanc explicationem assumunt, non negant, fieri posse, ut subin etiam alia materia subtilis ex aere ad corpus electrifatum affluat, quam sit illa, quæ antea ex corpore per frictionem fuit expulsa; id solum negant, duos velut esse torrentes, quorum uno tantundem materiæ subtilis ex aere ad corpus electrifatum affluat, quantum ejusmodi materiæ in altero torrente ex corpore effluit in aerem. Isti itaque Auctores putant, solas materiæ subtilis e corpore electrifato effluentis, & ad illud denuo resurgentis undulationes valde verosimiliter assignari posse pro principio universali, quo assumpto pleraque phænomena electrica satis congrue explicentur; quod ut ostendatur, potissima istorum phænomenum expendenda nunc sunt.

§. II.

PHÆNOMENA ELECTRICA IN GENÈRE.

444. **S**I memorata hætenus rite expendantur, intelligi poterit I. cur materia electrica, licet per omnia plane corpora in copia majore, vel minore pro diversa illorum densitate sit diffusa, sensibilem tamen electricitatis effectum non edat, nisi a causa quadam extrinseca ad motum conciretur. A motu namque, ut mox uberius ostenditur, effectus ipsius omnes dependent. Ad motum autem concitatur immediate per calorem, & frictionem;

U 5

quia

quia hoc modo causatur motus intestinus, ac vibratorius partium corporis electrici; mediate vero excitatur motus ipsius, dum corpori immediate electrificato propius ad-movetur aliud mediate electrificabile, ut Num. præced. dictum.

II. Cur vis electrica semel excitata, aut communi-cata non duret perpetuo, sed sensim debilitetur, ac deni-que cesset; quia materia electrica ad motum concitata, ni novis identidem impulsibus urgeatur, sensim ad æqui-librium, ac respectivam quietem suam, ut cætera fluida. reducitur.

III. Cur calor nimius vim notabilem non exeat in quibusdam corporibus, præsertim resinosis, & bitumi-nosis. Nempe calor, si nimius sit, in quibusdam cor-poribus partes non nihil emollit, sicque earum rigidita-tem minuit; hac imminuta vibrationes quoque partium debiliores erunt.

IV. Cur corpora madefacta vix, ac ne vix quidem electrificari frictione queant; quia etiam humida in quibus-dam partes emolliunt, in aliis particulæ humidæ mobi-litate sua asfrictum fortiozem impediunt, in omnibus po-ros obstruunt atque ita tum motum partium, tum egres-sum materiæ electricæ non nihil intercipiunt. Qua de causa etiam aer nimis calidus, variisque vaporibus, ac halitibus infectus, itemque transpiratio spectatorum ver-sus globum electricum directæ vim electricam infringunt. Communicationem tamen virtutis electricæ nec calor, nec humiditas multum impediunt; quia ad virtutem hanc corpori communicandam non requiritur motus ela-sticus partium ipsius corporis, sed sufficit, quod materia electrica in poris ipsius contenta immediate impelli possit a materia e corpore frictio expulsa.

V. Cur aer in ipso globo, aut cylindro electrico ni-mium condensatus, aut rarefactus virtutem illorum ele-ctricam imminuat; quia inæqualitas pressionis externæ, ac internæ vibrationibus fibrarum elasticarum vitri, ac proin etiam formationi atmosphæræ electricæ obeft. Ob eandem rationem globi scobe ferrea, vel arena im-pleti non nisi debilem vim electricam produnt, dum fri-cantur.

445. Naturam corporum electricorum si spectemus, observamus, esse aliqua, quæ mediocri calore, ac modica frictione electrificentur, alia vero non, nisi postquam ve-he-

hementius calefacta, frictaque fuerint. Hujus ratio haud dubie ex diversa constructione, ac textura corporum, atque ex diverso densitatis gradu, quem materia electrica in eorum poris obtinet, repetenda erit: hæc enim textura corporis, ac materiae subtilis densitas facere poterit, ut tum partes corporis, tum ipsa materia electrica in uno facilius, difficilius in altero concitari ad motum queant. Sunt quoque corpora, quæ, quantumcunque calefiant, ac fricentur, nullam produnt vim electricam, ut patet in metallis, idque fors ideo, quod, cum in corporum istorum utpote densiorum poris materia electrica respectu admodum rara sit, frictio non possit eam materiae istius copiam expellere, quæ ad efformandam circa ipsa atmospheram sat efficacem sufficiat. Corpora mollia, & fluida, quæ modicæ pressioni illico cedunt, cum frictionis sufficientis capacia haud sint, immediate electricisari non possunt. Globi electrici, etsi diutissime fricetur, electricitas non minuitur; quia illa materia, quæ ex globo fricto effluit, denuo ad eundem refluit, &, si etiam non omnis iterum reslueret, defectum illius compensaret alia materia electrica ex ambiente aere juxta leges æquilibræ ad globum affluens, quæ in vitrum ingressa per partium vitri oscillationes ad eundem motum concitatur, quem materia prius expulsa conceperat. Hæc de natura corporum per se electricorum.

446. Ad communicationem electricitatis quod attinet, scimus, vim electricam non æqua facilitate corporibus omnibus posse communicari; quia non eadem in omnibus facilitate impelli, ac ad motum concitari potest materia electrica, cujus rationem potissimam hic repetunt a majore vel minore copia materiae electricæ in diversis corporibus contentæ. Nam materia electrica ex corpore fricto effluens facillime penetrat poros corporum etiam densissimorum, cumque in poris illis parum similis materiae contineatur, proin etiam minor ibi detur resistentia, liberrime in corpus admotum se se diffundit, atque illam, quæ in hujus poris est, ad motum concitans atmospheram electricam efficit. Quodsi vero multum materiae electricæ in corporibus contineatur, uti fit in rarioribus maxime in aere, major hæc copia magis resistet materiae e corpore fricto effluenti, neque ab hac satis commoveri poterit, proin difficilius formabitur atmosphaera electrica.

Hinc

Hinc colligitur I. cur corpora idioelectricæ cæteris paribus difficilius per communicationem electricentur, quam alia præcipue denſiora, quia in iis plerumque plus ineſt materiæ ſubtilis, quam in his; fors etiam ſtructuræ pororum in iis plus impedit motum materiæ ſubtilis, quam in aliis.

II. Cur corpora per communicationem electricanda imponi plerumque debeant aliis idioelectricis; quia per corpora originarie electrica ulterior motus materiæ electricæ ſiſtitur, ſicque hæc, in alia corpora ſe diffundere non valens, majorem circa corpus electricandum atmophæram conſtituit.

III. Cur homo inſiſtens pavimento, dum corpus electricatum manu tangit, iſtud ſua electricitate ordinarie privet, non vero, ſi inſiſtat fulcro idioelectrico. Materia nimirum electrica a corpore electricato in hominem, ab hoc in pavementum diffunditur, proin tollitur atmophæra electrica; fulcrum vero idioelectricum diffusionem impedit, atque ita manet prior atmophæra. Quodſi tamen vis electrica vehementior ſit, attactu hominis etiam pavimento inſiſtentis non illico tollitur.

IV. Cur fluxus materiæ electricæ ſequatur ſinuofos etiam virgæ, aut catenæ ferreæ ductus, & ambages; quia nimirum minor copia hujus materiæ in poris ferri exiſtens facilius impellitur, quam major illius copia, quæ in ambiente undique aere continetur; habetque ſe virga hæc ferrea inſtar canalis diverſimode inflexi, in quo exiſtens aqua ſi una canalis extremitate impellitur, mox impuſus per omnem aquam propagatur.

V. Corpora facile electricabilia per communicationem electricari etiam ſolent, ſi, dum tempeſtas aliqua, aut nubes fulgurans atmophæræ noſtræ incumbit, eidem libero in aere exponantur, quod inde fieri putant, quia materia electrica, ſi alicubi fuerit copioſius collecta, ac quaſi condensata, prout eſſe videtur in nube fulminante, ſe ſe dilatate, & in poros corporum facile electricabilium ſe inſinuare conatur eo fere modo, quo hæc materia ex globo friſto eſſuens in poros virgæ ferreæ penetrat. Certe experimenta electrica furente jam tempeſtate tentare velle, rem eſſe periculi plenam, docuit triſte fatum Profeſſoris cujuſdam Petropolitani, qui in tentamine ſimilis experimenti ſubito fulmine percuſus interiit.

§. III.

PHÆNOMENA ATTRACTIONIS, ET
REPULSIONIS.

447. **O**Mnia corpora levia, & libera a corpore electrifato attrahuntur ex distantia majore, vel minore, ut dictum supra. Nempe dum corpora hæc versantur in atmosphæra electrica, a materia hujus atmosphære versus corpus refluyente, ac oscillante versus idem corpus impelluntur: licet enim materia hæc sit subtilissima, tamen, cum partibus impenetrabilibus constet, ea, in quæ impingit, impellere, ac movere potest eo, quo ipsius impulsus & motus dirigitur, nisi vel nimia respectu atmosphære hujus sit massæ impellendæ quantitas, vel aliud quid impulsus hujus materiæ enervet. Attrahuntur autem ex distantia majore vel minore, prout major vel minor vis electrica in corpore excitata, proin etiam amplior, vel contractior fuerit atmosphæra. Cur alia facilius, alia difficilius attrahantur, ratio desumi debet ex ipsa talium corporum structura diversa, quia vel particulæ primigeniæ sunt majores aut minores, vel magis aut minus inter se conjunctæ, aut pluribus, paucioribusve poris instructæ, hinc foliola auri malleati cæteris facilius, efficaciusque attrahuntur, quia arctior est partium compages, & minor porositas.

448. Quando corpus leve, hoc modo attractum, ad corpus electricum pervenit, aut propius saltem ad illud accessit, ordinarie ab eodem iterum repellitur; quia nimirum materia electrica undulatim ad corpus electricum repulsa ab isto iterum versus peripheriam expellitur. Quandoque tamen leve ejusmodi corpus aliquamdiu adhæret corpori electrico, præsertim si sit baculus electricus ligneus, cujus ratio fors est ipsa scabrities corporis, in cujus particulis implicari non nihil potest corpus antea attractum. Si corpus leve post contactum electrici repulsum semel est, non illico iterum accedit ad idem corpus electrifatum, sed interdum non nisi post tempus longiusculum, vel postquam a corpore non electrico attractum fuit. Ratio hujus est, quia corpus leve per contactum corporis electrifati pariter electrifatur; dum autem electrifatur, etiam ipsum acquirit aliquam atmosphæram
ele-

electricam : hinc utriusque corporis atmosphæra tamdiu in se mutuo agit , donec illa levioris a prævalente altera dissipetur , vel admoto corpore non electrificato in istud se diffundat ; tum vero iterum attrahetur a corpore frictio. Quod autem corpus leve attactu corporis electrificati pariter electrifetur , ex eo patet , quia si aliud corpus non electrificatum eidem appropinquet , mox ad illud præcipiti cursu fertur , quod electricitatis indicium est : universim namque corpora electrificata , si facile mobilia sint , ad aliud non electrificatum accedunt , cujus ratio est , quod atmosphæra , quam habent , facillime irruat in corpus non electrificatum , utpote in quo modicam invenit resistantiam ; dum autem ita irruit , etiam corpora levia illuc secum abripit , ferme sicut aqua alicubi effluens natantia in se corpora secum vehit. His præmissis expendamus experimenta quædam peculiariora.

449. I. Frustulis auri malleati (Fig. 53. Tab VI.) insistat cribrum non electrificatum ; tubus frictus imponatur cribro , frustula non attrahuntur : si vero cribrum o filis sericis fuerit supra auri foliola suspensum , ista attrahuntur. In primo casu non attrahuntur ; quia fluxus materiæ electricæ est prorsus irregularis , & secundum diversas directiones : in partes enim ligneas cribri facilius , quam in aerem inter cribri foramina interceptum se fluxus ille diffundit , cumque cribrum nullo fulcro electrico sustentetur , tota atmosphæra electrica brevi dissipatur. Si cribrum filis sericis tanquam fulcro electrico sustentetur , ipsum quoque electrificatur , sicque atmosphæram electricam acquirens metalli frustula potest attrahere.

450. II. Si in globi electrici C (Fig. 57.) centro statuantur subtiliora aliquot fila linea , globo per frictionem electrificato fila peripheriam versus divergunt radiorum instar. Si globum eundem simul ambiat circulus similibus instructus filis lineis , hæc durante electrificatione convergent versus centrum globi. Qualis nimirum est effluxus , & refluxus materiæ electricæ , talis etiam est directio filorum ; effluxus est secundum lineas rectas a centro versus peripheriam , refluxus per similes rectas versus centrum : hinc talis etiam erit directio filorum. Si globus intra campanam aere evacuatam fricetur , fila circa globum suspensa ad hunc quidem se inclinant , minori tamen facilitate , quam idem fieret in aere libero. Ex quo id denuo patet , quod supra Diss. II. Art. II.

§. 7. diximus, motum difficilior communicari materiæ subtili in medio rariore, quam in densiore. Univerſim, inquit Jallabertus, corpora, ſive per frictionem electrifentur in vacuo, ſive prius in libero aere electrifata poſtmodum in recipiente mox evacuando collocentur, virtutem ſuam electricam ad ambitum multo minorem extendunt, eamque celerius deperdunt, quam utrumque fieret in aere densiore.

451. III. E filiſ non nihil longioribus (Fig. 59. Tab. VI.) ſuſpendantur duo globuli, aut lamellæ metallicæ in eadem linea horizontali modico intervallo a ſe diſtantes, ſi tubus electrifatus inferius circa medium iſtis admoveatur, mutuo ſe ſe repellent. Admoto nimirum tubo uterque globulus electrifatur, proin uterque ſit centrum atmoſphæræ undulantium inſtar circuloſum e quovis globulo effluentis, quæ atmoſphæræ in ſe mutuo impellentes corpora in earum centro collocata a ſe invicem removebunt. Quodſi tres globuli hoc modo dependeant, & globulo medio idem tubus admoveatur, extremis ob dictam rationem utrinque recedentibus globulus medius manebit immotus, quia utrinque premitur, aut impellitur æqualiter. Huc etiam pertinet ſequens experimentum. Perticæ electrifatæ A B (Fig. 57.) imponatur, aut ex eadem dependeat faſciculus filorum linearum, aut vitreorum *e m*, durante electrificatione fila prius conjuncta incipiunt a ſe invicem divergere; ſi divergentibus admoveatur corpus non electrifatum, ad hoc accedunt; admota candela ardente recidunt perpendiculariter. Electrifiata nimirum pertica electrifiantur etiam fila ſingula, & eorum quodlibet ſuam acquirit atmoſphæram, quæ atmoſphæræ in ſe mutuo agentes fila eo modo a ſe removeant, quo globuli, de quibus antea. Si admoveatur corpus non electrifatum, digitus v. g. materia electrica verſus hunc copioſius fluens etiam fila verſus digitum ſecum abripit. Eadem eſt ratio de candela, cum flamma, & fumus pariter ſint corpora non electrifata; præterea, cum in flamma, atque etiam ſupra illam, ubi calor eſt admodum intenſus, detur vehemens motus materiæ ſubtilis, motu iſto fluxus ordinatus, & refluxus materiæ electricæ, proin etiam atmoſphæræ electricæ turbantur, ac impediuntur, quibus impeditis fila gravitate ſua priſtinum in ſtatum recidunt.

452. IV. Si aqua vasculo contenta admoveatur corpori electrificato v. g. digito, in conum se se erigit, cuius vertex imminet digito, basis est in superficie aquæ; si tubus electrificatus situ horizontali gradatim moveatur super aquas, fluctus quodammodo surgent, & recident, prout erit motus tubi. Atmosphæra nimirum corporis electrificati etiam intra aquas penetrans, dum denuo refluit versus digitum, aut tubum, particulas aquæ huc impellit, & attollit. Sic etiam globulos aquæ innatantes digitus electrificatus huc illucque circumducet. Pariter si vasculum aqua plenum imponatur laminæ electrificatæ, tum aqua, tum etiam globuli eidem innatantes, sequentur ductum digiti non electrificati; quia hoc casu & aqua, & globuli electrificati suam habent atmosphæram, quæ in digitum non electrificatum liberrime affluens aquam & globulos ad eundem impellit. Ob eandem rationem si sponsa madefacta electrifetur, eidemque propius admoveatur manus, hanc tenui quasi pluvia aspergit. Huc revocari potest icuncula papyracea, digiti longitudinem adæquans, quæ, si imponatur laminæ electrificatæ, eique desuper immineat digitus non electrificatus, erigetur, & ad ductum digiti quodammodo saltabit.

453. V. Dum corpus leve suspensum hæret, ac fluctuat in aere supra tubum vitreum A electrificatum, quem prius tetigerat, si eidem propius admoveatur alius tubus vitreus B, recens & æqualiter electrificatus, recedet ab hoc non minus, quam a tubo A; si vero eidem admoveatur bacillus sulphuris, aut ceræ hispanicæ pariter electrificatus, ad istum mox accedet. Ratio prioris est, quia, dum ex utroque tubo materia electrica æquali vi & copia effluit, utriusque tubi atmosphæra erit æqualis: si ergo a primo recedit corpus, etiam recedet ab altero. Ratio posterioris est, quod, sicut minor est electricitas sulphuris, aut ceræ hispanicæ, quam sit vitri, minor quoque, aut debilior sit atmosphæra illorum, quam illa corporis a vitro electrificati: hoc igitur ad sulphur, aut ceram hispanicam haud secus, ac ad corpus non electrificatum accedet. Nempe quando duorum corporum atmosphære electricæ viribus sunt æquales, corpora mutuo se se repellunt, dum unius atmosphæra attingit atmosphæram alterius; quando autem alterius atmosphæra debilior est, tunc motus illius brevi debilitatur, habetque se tale corpus instar alterius corporis non electrificati. Hinc est, quod

quod vitrum electrificatum attrahat corpora, quibus electricitas communicata fuit per sulphur aut succinum, ea vero repellat, quæ per contactum vitri fuerant electrificata.

454. VI. E. filo serico suspenditur discus metallicus A (Fig. 60. Tab. VI.) qui ope catenæ ferreæ in eum demissæ electrificari possit; disco suspenso directe supponitur mensula, vel alius discus B: huic imponuntur foliola auri malleati variae magnitudinis; dum discus superior electrificatur, varii in his foliolis notantur motus: 1. omnium minima plerumque disperguntur, majora attrahuntur. Attractionis quidem causa habetur ex dictis; cur autem minora dispergantur, rationem esse putant, quod, dum materia electrica ex disco superiore versus inferiorem haud procul distantem majore vi effluit, foliola minima aliquantum elevata mox ipsa acquirant atmosphæram electricam ipsis in vicinia majorum alio dispergendis sufficientem. 2. Si unum duntaxat, aut duo foliola non nihil majora disco inferiori imponantur, ea inter utrumque discum hærent perpendiculariter suspensa, simul tamen celeres, & non interruptas oscillationes in his observamus, quales nimirum dantur in ipsa materia electrica. 3. Si duo ejusmodi folia quatuor circiter digitos longa, tres lata inferiori disco imponantur, ambo eriguntur, & subinde, dum unum insistit disco, alterum supra istud elevatur, & perpendiculariter suspensum hæret in aere. In hoc nimirum casu ipsa etiam folia electrificantur: hinc unum repellit alterum, & utriusque atmosphæra in se mutuo agens, ac ferme æqualis atmosphærae ipsius disci causare denique quietem foliorum ita hærentium poterit. Hæc tamen experimenta haud semper optato cum successu instituentur, maxime, si in vicinia mensulæ fors adsint corpora, quæ atmosphæras illas electricas vel modicum turbare queant.

455. VII. Cuspidi acus *c* (Fig. 61. Tab. VI.) ignitatur ad æquilibrium lamella metallica *a c b* digitum longitudine, latitudine duas ferme lineas adæquans, figura serpentina instar literæ S. Si cuspis cum lamella imponatur corpori electrificato, movebitur lamella in cuspide, tanquam polo suo rapidissime motu circulari. Nimirum materia subtilis ex lamella hoc modo electrificata effluens denuo ad polum illius tanquam centrum atmosphærae refluit; sic refluens materia non potest non impingere

In ambas extremitates lamellæ serpentinæ; cumque extremitates illæ diverfas plagas respiciant, quando una *b* a materia refluyente impellitur verfus ortum, altera *a* verfus occafum impelli debet; ex utroque impulfu in diverfa tendente fequitur motus circularis. Si globo ferreo *A* (Fig. 62.) non nihil majori, ac probe electrifato globulus *a* ex subere confectus, atque e filo ferico pendens admoveatur ita, ut inanus filum tenens in *c* fupra globi ferrei centrum, globulus autem subereus in eadem cum axe globi ferrei linea horizontali exiftat, globulus hic circuit globum ferreum nunc totum, nunc ex parte, etfi globum ferreum non contingat. Atmosphæra nempe electrica undique circa globum ferreum exiftens, & ubique æqualis, globulum ubique æquali vi a globo ferreo repellit, unde is oblique e filo ferico dependens circa hanc atmosphæram haud aliter volutari debebit, ac volutaretur circa globum ipfum, fi ejus peripheriam immediate contingeret.

456. VIII. Si fonticulus falienſ electrifetur, acceleratur fluxus liquidi; quia ipſa etiam materia electrica movetur celerrime, atque ita, ut non ſingulæ ipſius particulæ agant quaſi ſolæ, & ſeorſim, ſed omnes in unum veluti torrentem collectæ. Unde etiam colligitur, quomodo electricitas accelerare poſſit pulſus arteriæ, non ſolum accelerando motum ſanguinis, ſed etiam vim aliquam exercendo in ipſos nervos, & mufculos, quibus accelerari quoque poterit motus cordis. Præterea teſtatur Jallabertus, novellas plantas ſæpius, ac diutius electrifatas multo celerius crefcere, quam alias ſimiles non electrifatas: ad majus enim, & celerius plantæ augmentum alio opus non eſt, quam ut ſuccus nutritius copioſius, aut celerius per plantæ partes diſpenſetur, & verſus ramulorum, ac ſtirpium extremitates ugeatur. Cum jam vis electrica motum fluidorum in tubis præcipue anguſtioribus acceleret, ſuccus in plantæ electrifatæ fiſtulis velocius urgetur in omnes plantæ partes, & verſus extremitates expellitur, ſicque accreſcens fibris ante jam formatis plantæ augmentum accelerat.

457. Addi hic poſſunt ea, queis Nolletus probare contendit, attractionem fieri non per refluxum materiæ prius expulſæ, ſed ſolum per affluxum materiæ novæ.

I. Si in extremitate menſæ ponatur cumulus quidam pul-

veris scriptorii, eique admoveatur tubus electricus recens frictus, pars una pulveris attrahetur, altera eodem tempore repelletur. II. Si manui hominis imponatur charta crassior foliolis metallicis onerata, & sub ipsa manu alia fragmenta similia teneantur in distantia 5. aut 6. pollicum, dum homo electricatur, foliola inferiora attrahuntur, superiora repelluntur. III. Si virga electricata spiritu vini aspergatur, liquor ille in pluviam fere insensibilem abibit, simul tamen virga eadem attrahet alia corpora levia sibi propinqua. Sed enim non dicimus, quod nulla unquam materia electrica ex ambiente aere possit ad corpus electricatum affluere; id solum verosimile nobis non videtur, quod causa unica, ac immediata attractionis sit iste affluxus materię novę. Dein in primo experimento, dum appropinquat tubus electricus, exigui pulvisculi ferme omnes mox electricantur, cumque ad motum sint expeditissimi, in omnem partem dissipare se mutuo poterunt. In altero quoque sicut homo, ita etiam charta, ac foliola huic incumbentia eodem tempore suam acquirunt atmosphæram: hinc charta & folia superiora jam electricata se se repellunt; foliola autem inferiora nondum electricata ad manum electricatam accedunt. Et nunquid idem est effluxus, & affluxus infra, qui est supra manum? cur ergo non idem utrobique effectus? In tertio demum experimento guttulę spiritus pariter electricantur fors, antequam virgam contingant, hinc ut alia jam electricata ab hac virga repelluntur.

§. IV.

PHENOMENA PHOSPHORESCENTIÆ.

458. **C**orpus electricum, tubus v.g. aut globus vitreus in loco obscuro vehementius frictus multum luminis in iis maxime partibus, quę fricantur, emittit. Materia nimirum electrica, quę eadem est cum materia luminis, tum ob frictionem corporis electrici, tum ob mutuam, eamque vehementiorem collisionem secum ipsa, ad concisas, celerrimasque vibrationes concitatur, proin motum ad lumen requisitum concipit. Plus lucent tubi, ac globi vitrei, aut etiam baculi lignei, quam ex resina, aut sulphure confecti, quia illi fortius fricari, proin etiam ad vibrationes vehementiores concitari possunt.

sunt, quam isti, qui fortiori affricu illico mollescent. Quodsi corpori seu immediate, seu per communicationem electrifato admoveatur digitus, aut aliud corpus non electrifatum, præcipue metallicum, pariter scintilla aliqua etiam de die satis conspicua erumpit: nam & hic materia electrica, quæ in corpora animata ac metallica facillime irruit, e corpore electrifato erumpens, inque illam, quæ in digito aut metallo est, fortius illisa, eum, quem lumen exigit, motum acquirit. Universum itaque luminis electrici causam esse putant, quod materia subtilis tum ob frictionem corporis, tum ob vehementiorem collisionem cum alia materia subtili ad eum motum vibratorium concitetur, in quo lumen consistere supra Num. 169. diximus. Testatur quoque R. P. Hauser, in flammulis electricis, dum per prisma aspiciuntur, septem colores, eosque puriores distinguere posse, quam in aliis flammis. Addamus denuo phænomena quædam particularia.

459. I. Si globus vitreus aere vacuus celerius rotetur, fortiusque in loco tenebricoso fricetur, interius ferme totus lumine perfunditur; exterius tamen vix ullum electricitatis indicium præbet. Ratio secundi data est N. 444. sub finem. Primi ratio est, quia, cum in vase ab aere crassiore jam vacuo materia subtilis, seu luminosa ferme sola, sibi que vix non ubique contigua, nec ullis particulis heterogeneis interrupta existat, vibrationes, quas partes vitri frictione vehementius agitatae efficiunt, pluribus jam particulis materie luminosæ communicari possunt, quam antea, dum particulae istæ per interceptum aerem erant a se non nihil sejunctæ. Quodsi idem globus cera hispanica interius obducatur, & extracto aere rotetur, ac fricetur, per alterutrum illius polum cera non obductum insipienti splendentes apparent digiti, & manus illius, qui fricat, non obstante opacitate ceræ hispanicæ. Nimirum in iis partibus, in quibus fit ipsa frictio, fortiores etiam sunt vibrationes, proin etiam incursum, & impulsus materie electricæ in se mutuo erit vehementior: cum igitur crusta ceræ hispanicæ sit admodum tenuis, per hanc quoque vibrationes istæ propagari, ac materie subtili intra globum esistenti communicari poterunt.

460. II. Si ex pertica electrifata admoto digito elicitur scintilla, simul strepitus in aere, & dolor in digito per-

percipitur; dum enim partes materiæ electricæ inter se collisæ aliquam quasi flammam excitant, aer in spatio isto rarefit, subito impellitur, sicque in se mutuo alifus personat. Et quoniam materia electrica copiosius, & celerius versus digitum erumpens nerveas fibrillas fortius commovet, dolor abesse non potest. Simile quid fit, dum homo electrifatus manum admovet vesti alterius hominis, non electrifati, auro, vel argento liberalius intextæ: tunc enim hic scintillas varias emittet, simulque sat acerbis sentiet punctiones, quas etiam sentiet is, cujus brachio, aut pedi circumligatum fuerit filum ferreum electrifatum.

Si eadem pertica ferrea A B (Fig. 57. Tab. VI.) cætera non nihil crassior, desinat in acumen, dum fortius electrifatur, ex acumine B emicabit lucidus quasi penicillus, ex radiis divergentibus compositus: cum enim perticam ex omni parte ambiat aer, in quo plurimum est materiæ subtilis, materia electrica in ipsa virga ferrea facilins impellitur, ac commovetur secundum directionem virgæ, quam ex virga expellatur in ambientem aerem: proin in acumine quasi in focus aliquem colligitur, atque inde vehementius erumpens, & in ambientem impingens lumen causat, idque per radios divergentes, eoquod acumen sit quasi centrum, versus quod impulsus materiæ in ipsa virga celerius motæ diriguntur, & in quo velut decussati secundum directiones a se invicem divergentes materiam contiguam ad motum luminosum concitant. Si penicillo huic in distantia unius, aut duorum pollicum circa *b* opponatur digitus, aut metallum, apparent quasi duo coni lucidi, qui bases suas conjunctas, & apicem unus quidem in pertica ferrea, alter in digito, vel metallo habent. Istos Jallabertus oriri putat ex solis radiis materiæ e pertica effluentis, qui, cum versus digitum facilius impelli queant, hoc appropinquante incurvari, atque ad axem coni inclinari debebunt. Infert id ex eo, quod, dum digitus paulatim removetur a pertica, radii omnes, qui prius confluebant ad digitum, hunc paulatim deferant, & secundum priorem suam directionem se divaricati extendant.

46x. III. Papyro deauratæ & malleatæ imminet corpus electrifatum superficiiei aliquanto amplioris, mox scintillarum, ceu stellarum ingens copia per papyrum

discurret. Spectaculum fiet amœnissimum, si cylindrus, aut conus obducatur eadem papyro: tunc enim ferme in orbem se se diffundent stellulæ quæ plurimæ. Origo scintillarum ex dictis potest intelligi; augmentum vero splendoris debetur etiam lævigatæ superficiei ipsius papyri, lucem excitatam vivaciter reflectenti. Si plures annuli ænei in circulo ita collocati, ut singuli modico intervallo a se distent, electrifentur, & eorum uni admoveatur digitus non electrifatus, ex singulis promicabunt scintillulæ; quod idem fit in pluribus globulis metallicis in una serie sibi ferme contiguis, saltem si vis electrica paulo intensior fuerit excitata. Nimirum collisio illa subitanea, quæ fit in atmosphæra globi, aut annuli, cui digitus appropinquat, per reliquorum etiam atmosphæras sibi mutuo contiguas propagatur, ut adeo in quavis earum excitari flammula possit.

462. IV. Lumen electricum varios subin exhibet colores, quæ diversitas adscribenda est tum celeritati vibrationum corporis electrici, atque ipsius materiæ electricæ, tum variis particulis heterogeneis, quibus materia electrica permixta est, tum denique effluviis illis diversissimis, quæ ex corporibus vel fricantibus, vel electrifato corpori admotis continuo expirant. Jallabertus refert, quod globus vitreus intus cavus, cum sub recipiente evacuato ad pannum vehementius fricaretur, ab initio lumen vividum, ac non nihil purpureum emisserit; illud vero iterum amiserit, dum aer sub campanam admissus est; addit, quod, cum idem globus jam semel hoc modo frictus postea ad idem experimentum adhiberetur, lumen quidem emisserit semper, at non nisi albicans, nec ullo colore distinctum. In hoc experimento satis patet, cur lumen sub recipiente evacuato emittat globus: cum enim istum extracto aere ferme nihil ambiat nisi materia luminosa, particulæ globi frictione vehementi vibratæ eadem vehementia impellunt ambientes moléculas materiæ subtilis, quæ vibratæ, ac cum aliis collisæ lumen eo magis vividum dabunt, quo plures simul vibrari debebunt. Dum aer denuo in campanam admittitur, minus copiosa sub recipiente adest materia luminis, eaque particulis aereis non nihil interrupta, hinc pauciores illius moléculæ a particulis globi vibrantur, atque ideo splendor vividus disparet. Cur lumen ab initio apparuerit purpureum, ratio fuerint particulæ he-

te-

terogeneæ ex poris vitri per frictionem expulsæ, ac luminì permixtæ, cujus indiduum habetur ex eo, quod idem globus recens adhibitus non nisi semel lumen purpureum emisit; quia nimirum per repetitas frictiones exhausta est materia illa, quæ luminì intermixta hunc ei colorem conciliaverat.

463. V. Scintillæ electricæ, illæ inprimis, quæ ex corporibus animatis, & metallis electrificatis profiliunt, tantæ non raro sunt efficaciz, ut materias facilius inflammabiles accendant: materia enim ignea, qualis est in scintilla electrica, alicubi copiosius collecta, eoque motu repente agitata, quem ignis actio exigit, excitare etiam ignem, & flammam debet in ea materia, quæ huic concipiendæ magis idonea est. Ad augendam vim flaminæ præter alia servit etiam *lamina*, ut vocant, *magica*, seu tabula vitrea A B (Fig. 63. Tab. VI.) utrinque inaurata sic tamen, ut limbi ex omni latere ad digiti ferme latitudinem ab auro relinquuntur intacti. Lamina hæc, antea probe calefacta, imponitur alteri tabulæ metallinæ (*conductorem* appellant) cui ope fulcri ferrei *ce* adaptatus est vectis recurvus D *m* grandiori globo D in ea extremitate, quæ laminam magicam respicit, armatus. Si jam tabula inaurata ope catenæ electrificatæ fortius non nihil electrifetur, & apprehenso vecte globus istius celeriter in laminam demittatur, flamma admodum ampla excitabitur, eaque tam efficax, ut plura non raro chartæ etiam densioris folia perforet. Huc etiam facit, quod habet R. P. Hauser. Duabus lamellis vitreis politis, digitum circiter latis, duos longis, inferre auri malleati zonulam duas lineas latam, sed per vitrum prominentem utrinque, lamellas filo serico valide constrictas impone laminæ magicæ electrificatæ, ac ope conductoris aliquot scintillas ex lamellis evoca; hac methodo metallum inclusum liquefit, & altissime in vitrum penetrat haud secus, ac si opere caustico effet immissum; ægre cedit ferro radenti, cedit tamen aquæ stygiæ, qua solvitur.



X 4

§. V

§. V.

PHÆNOMENA SUCCUSSIONIS.

464. **S**I quis una manu, inferius applicata, teneat vas vitreum *c a d* (Fig. 57. Tab. VI.) non nimis crassum, aqua semiplenum, cui extremitas virgæ metallicæ immergitur, altera vero manu scintillam ex eadem virga jam fortius electrifata, aut ex pertica ferrea, ex qua dependet virga, eliciat, subitam violentamque commotionem, sive succussionem sentiet in utroque brachio præcipue circa cubitos, sæpe etiam in pectore, cæterisque partibus corporis. Experimenti hujus periculum primus fecit Cl. Musschenbroekius, qui aucta plus æquo vi electrica dolorem ex eo tam vehementem sensit, ut gravi in discrimine versari se crederet: hinc ab Auctore suo Leydæ olim Professore experimentum hoc dicitur Leydense. Isti non multum absumile est, quod ope conductoris, & laminæ magicæ instituitur; dum enim quis globum conductoris manu altera firmiter tenet, altera scintillam ex lamina magica elicit, parem ferme succussionem toto in corpore experitur maxime, si vehementior vis electrica sit excitata.

Hujus ut rationem dent, notant 1. Cum materia electrica, seu subtilis, ubique sit diffusa, ea etiam in corpore nostro existit, & quidem, ut facile credi potest, tam copiosa, ut unum fluidum quasi continuum, ac nullibi interruptum constituat. 2. Quando ex pertica electrifata digito scintilla elicitur, materia electrica in magna copia, magnaque cum vi ex pertica erumpens in digitum irrumpit, atque illam materiam subtilem, quæ per totum corpus diffusa est, pari cum vehementia impellit. 3. Quando homo vas illud manu tenet, pariter certa materiæ electricæ quantitas ex vase in manum, & corpus hominis transit: nam vas illud actu electricum esse, ex eo patet, quia appropinquante manu lucere incipit; quod autem effluvia electrica in manum, ac corpus hominis vas tangentis transeant, inde colligitur, quod homo ille, si corpori resinoso, aut alteri scabbello electrico insistat, ipse quoque electricitatem contrahat.

Itaque dum experimentum Leydense instituitur, simul

mul eodemque tempore duo effluvia, seu torrentes materiæ electricæ viis plane contrariis, unus videlicet per manum dextram, alter per sinistram magna vi in corpus hominis irruunt, ac materiam subtilem, in corpore contentam, oppositis simul directionibus eadem cum vehementia impellunt: hinc gemini isti torrentes mutuo occurſu inter se collisi, reciproca percussione sua in diverſis partibus corporis cauſant ſubitam, violentamque condenſationem, ac compreſſionem materiæ electricæ, in corpore reſidentis, qua ex condenſatione non oriri non poteſt ſubita, ac vehemens nervorum, ac fibrillarum tenſio, proinde etiam dolor ſatis acerbus. Addit Jallabertus, vehementiam ſuccuſſionis adſcribi ex parte etiam debere reactioni materiæ electricæ in aqua vaſis conſtipatæ: cum enim materia electrica in aqua vaſis contenta ab illa, quæ in pertica continuo impellitur, prematur, & propellatur, hoc ipſo ſemper nititur per poros vitri ulterius ſe ſe diffundere, ac propterea debet adverſus materiam, quæ, admoto ad perticam digito, verſus vitrum repercutitur, vehementer exercere reactionem. Explicatio hæc haud difficile applicabitur alteri, quod ope conductoris, & laminæ magicæ inſtituitur.

465. Varii porro ſunt, quibus intendi vis electrica poteſt, modi. Eorum aliquos recenſet R. P. Hauſer Phyf. Part. P. V. Q. 3. Art. 6. Præ cæteris opportunus mihi videtur is, quem in Muſeo noſtro experimentalis uſitatum exhibet Figura 64. Tab. VI. Tres potiſſimum partes hæc in figura ſunt ſpectandæ. Prima eſt tubus metallinus A B M. Hic ex parte anteriore A deſinit in acumen, ex quo dependent catenulæ ferreæ globo electrico, dum hic fricatur, applicandæ; ex parte altera circa B inflexus eſt, & annexum ſibi inferius habet globum ſolenter politum M; in medio tubi applicatus eſt tubulus minor C c, cui ſuperinducitur alius adhuc tubulus metallinus a b tantæ amplitudinis, ut inſtar thecæ commodè ſupra tubulum C c moveri ſurſum ac deorſum poſſit. Pars altera eſt vas vitreum cylindricum D E F non nihil amplius, cujus tum fundus, tum latera a fundo ſurſum v. g. uſque in m n interius exteriusque auro malleato probe ſint incruſtata. Tertia pars eſt infundibulum d e f pariter metallinum, quod ita vaſi vitreo immittitur, ut amplior ejus apertura e. f

fundum vasis undique contegat, tubulus vero aliquanto longior ultra os vasis in *d* protendatur. Tubulo huic longiori inferitur bacillus ligneus (præ aliis serviet et tilia confectus) interiorē ipsius cavitatem exacte implens, & supra tubulum assurgens usque in *C*. Bacillus autem iste probe antea ad ignem exsiccandus est eo modo, quo parari alias solet baculus electricus. Dum infundibulum dicto modo in vas vitreum immissum jam est, in idem vas injicitur scobs ferrea, aut limatura ferri ita, ut massa isthæc ferme in *r s* intra vas ascendat; huic vero massæ superinfunditur usque in *t v* pix liquata subtili pulvere lateritio permixta.

Vasi hunc in modum præparato tubus *A B M* sic imponitur, ut tubulus *C c* supra bacillum ligneum demissus ipsum infundibulum non attingat, sed ferme spatium *d c* ab eodem adhuc distet, idque ideo, ut pro diversitate experimentorum, quæ instituuntur, vis electrica vel soli tubo ampliori *A B M*, vel simul etiam vasi *D E F* pro libitu communicari possit: si enim tubulus ille mobilis *a b* attollatur versus *C* ita, ut tubulus *C c* cum infundibulo jam non communicet nisi mediante bacillo ligneo, corpore idioelectrico, vis electrica tota remanebit in tubo *A B M*, nec quidquam virtutis istius diffundetur in vas vitreum: proin si in *B* applicetur catena, aut filum ferreum, ope hujus vis electrica in quemcunque locum derivari poterit; si vero tubulus *a b* eousque deprimatur, donec & infundibulum, & tubulum *C c* simul contingat, vis electrica copiosissime descendet etiam in vas vitreum, & siquidem huic in parte inferiore, ubi auro est incrustatum, circumligetur catena ferrea, serviet vas hoc ad miros virtutis electricæ effectus edendos. Paucos attingam.

466. I. Si annulus *S* manu prehensus admoveatur tubo *A B*, flamma admodum ampla, atque ingenti cum strepitu excitatur, dum materia electrica inde ex tubo, hinc ex annulo erumpens mutuo occurſu vehementer inter se colliditur. II. Si manu sinistra teneas annulum, dextera vero scintillam e tubo elicias, eandem, quam in experimento Leydensi, ac multo adhuc fortioſorem senties in brachiis, ac circa pectus succussionem, cujus ratio hic quoque sunt duo quasi torrentes materiæ electricæ ex oppositis partibus sibi invicem occurrentes. III. Si annulum inferas digito, & hoc ipso digito scintil-

tillam elicias e tubo, succussionem non senties, nisi in digito; in solo autem brachio eandem experieris, si catena illi duntaxat brachio, quo scintillam elicis, fuerit circumducta. Si anulum filo serico prehensum imponas humero sinistro, & manu dextera scintillam elicias, percussio quidem transversa fiet per brachium dextrum versus humerum sinistram, reliquum tamen corpus, atque adeo brachium sinistram hac ex succussione nihil participabunt. Horum ratio ex antea dictis fluit. IV. Infra globum M constituitur alius tubus metallinus N G, superius expansus in globum N; dum uterque hic globus durante vi electrica modico intervallo a se distat, spatium inter utrumque interceptum pene totum lucidum apparet, quin & margines in utroque globo non nihil prominentes lucidum quodammodo circulum efformant, id quod ex Num. 459. & 460. intelligi poterit.

467. Ad eosdem effectus servire poterit alterum vas vitreum H L in Fig. 64., quod eodem modo, quo prius, auro est incrustatum, cætera vacuum penitus, & catena ferrea in parte inferiore cinctum. Huic communicatur vis electrica ope stili ferrei k I, qui a fundo vasis ascendens ad tubum electrificatum A B reclinatur. Si vas hoc exterius quidem obducatur auro, fundus vero & latera interiora succo ceparum inungantur, & vasi dein infundatur aqua, ad pares denuo effectus aptum vas istud erit. Fusius equidem hæc pertractata videri possent; at pro materiæ amplitudine sunt pauca admodum. Sat erit, dedisse principia quædam generalia, quorum ad alia quoque, quantum sperare in re necdum satis perspecta licet, fieri applicatio poterit.

ARTICULUS III. METEORA IGNEA.

§. I.

DE FULGURE, AC FULMINE.

468. *Fulguris* nomine intelligi solet flamma admodum lucida, quæ repente in sublimi emicans, ac plerumque latius diffusa velut in momento iterum desinit. *Fulmen* vocant flammam illam fulgentissimam, quæ subito

bito orta, ingentique cum celeritate per aerem variis ductibus errans, stupendo sæpe cum fragore obvia corpora vel accendit, vel disjicit, vel enecat, aliosve effectus mirandos edit. Naturam horum dum inquirunt Philosophi, communius censent, fulgur esse exhalationem potissimum sulphuream, in sublimi ope fermentationis, aut mutue collisionis repente accensam, moxque iterum evanescentem. Fulgura, quæ interdum oriuntur, provenire etiam possunt a simili materia radiis solaribus accensa, dum isti vel per nubem quodammodo convexam refracti, vel per concavam reflexi in focum coeunt. Fulgur plerumque sequitur *Tonitru*, quod aliud non est, quam fragor ortus ex vehementi aeris, per flammam subito erumpentem fortius ex uno loco expulsi, ac celerrime in se iterum recurrentis collisione. Fragor hic tum a nubibus, tum ab aliis obstaculis varie repercussus longo sæpe murmure valles præcipue, ac montes percurrit. Quod cælum etiam serenum quandoque tonet, ratio erit, quia exhalationes sulphureo-nitrosæ in aere nunquam desunt: hinc effervesce ibidem, & flammam cum crepitu concipere etiam sereno, ut nobis videtur, aere possunt. Si tamen cælo nubibus obducto tonet, raro dabitur tonitru, quin sequantur pluvix; quia nubibus per accensos halitus ex una parte disruptis, ex altera compressis, vapores in guttulas condensari, necesse est.

469. Fulmen censetur esse densior quædam exhalatio sulphureo-nitrosa, ac bituminosa, plerumque in nubibus a mutua collisione, & attritu, vel etiam a radiis solaribus accensa, motuque vehementissimo e nubibus evibrata. Inter materias fulminis esse sulphur, ex odore, qui delapso fulmine sentitur, inferunt; nitrum vero etiam inter has materias esse colligunt ex immani impetu, & fragore, quo excutiantur fulmina, qui effectus quod nitro potissimum sint adscribendi, ex pulvere pyrio intelligi potest: hic enim, quo plus nitri cum proportionem admixtum habet, eo fortior esse deprehenditur; denique nec bitumen esse excludendum, inde potissimum inferunt, quod flamma a fulmine excitata plerumque aquis extinguere nequeat, sed vel aceto, vel lacte restinguenda sit. Et quoniam tractus ejusmodi exhalationum vario situ per aerem sunt dispersi, ideo fulmen, alimentum suum sequens, per varias lineas, & angu-

angulos discurrere cernitur. Dum autem flamma, quæ ab una tractus fulminei parte incipit, tractum hunc rapidissime percurrit, inquit Musschenbroekius, & propterea non omnes illius particulas tam cito potest accendere, ideo illas secum provolvit ita, ut hæ plus accumulatae, subitoque accensæ, ac maxima demum vi displosæ fragores horribicos excitent. Imo si major fuerit horum halituum copia, possunt ex illis fieri quasi glomera quædam fulminea, quæ undique excussa, ac denique diffracta obvia quæque pervadunt, diffringunt, ac etiam in cineres redigunt. De his videri potest Nolletus.

470. Quoniam autem nec satis certum est, quæis determinate e materiis fulmina passim omnia componantur; neque etiam constat, quam diversos materiæ istæ habere effectus possint, nemo facile certam effectuum fulminis omnium causam assignaverit. Quorundam tamen causam admodum verisimilem reddi posse existimant. Sic x. quod homines, & animalia a fulmine enecentur, quin vulneris vestigium appareat, ratio esse poterit vel suffocatio ob præsentiam halituum sulphureorum, vel ob aerem undique ab homine dimotum, ut sic velut in vacuo ex defectu respirationis intereat. Cæterum homines sæpe vi fulminis suffocatos apparuisse, quin re ipsa fuerint, fatali experientia constare ajunt; dum tales præmaturo tumulo inclusi reperti post aliquot dies sunt capite undique contuso, quin & digitis, manibusque arrosis. 2. Cur fulmen non raro consumat gladium illæsa vagina, aut pecunias bursa intacta, putant rationem esse diversas fulmineæ materiæ particulas, quæ tum ob propriam suam indolem, tum ob variam pororum dispositionem, in hanc potius, quam aliam materiam liquationis, aut inflammationis capacem agant, sicut aqua regia dissolvit aurum, non item argentum. Universim dicunt, varios fulminis effectus oriri nunc a nimio fragore omnia vehementius concutiente, nunc a materia incensa, seu flamma perniciosissime mota, nunc ab aeris violenta commotione, subitanea compressione, aut etiam dissipatione &c. Denique quod etiam prope superficiem telluris subin generentur fulmina, jam non dubitatur; imo ex ipsis etiam fodinis, ac montibus ignivomis erupisse fulmina observatum est, quæ propterea fulmina subterranea nuncupantur. Potest nimirum etiam his in locis dari sufficiens copia halituum, ex quibus

bus gigni fulmina queant. Atque ita quidem communius de fulgure, & fulmine discurrunt Philosophi.

471. Recentiorum tamen non pauci sunt, qui cum Cl. Nolletto, ac D. Punsenio ob analogiam, quam isthæc meteora cum phænomenis electricis habent, ea etiam ex principiis Electricitatis explicanda esse existiment. Et sane si quocunque demum ex capite in atmosphæra nostra oriatur vehemens collisio materiæ subtilis, dabitur coruscatio, seu fulgur haud secus, ac fieri videmus in phænomenis electricis, quin opus sit adeo multis halitibus, qui accensi ejusmodi coruscationem efficiant. Dum collisio est vehemens, eaque talis, quæ major materiæ subtilis portio in se mutuo impingit, vel ex hoc solo sequi fragor aliquis debet, qui ab aere prius e loco collisionis expulso, & nunc iterum illuc recurrente auctus tonitru causabit. Dum eadem materia subtilis alicubi vehementius impulsæ certum aliquem exhalationum tractum reperit, juxta quem eo fere modo, quo impulsus electrici in virga, aut catena ferrea propagantur, propelli facilius queat, ductum exhalationis sequens fulmen erit, aptum ad effectus multo magis horribiles edendos, quam sint illi a machina electrica causati.

Atque hac ratione multo facilius capitur summa illa celeritas, quæ fulmen e nubibus ad terram usque defertur, quæque ipsius adeo luminis celeritatem vix non assequitur: Si enim fulmen non est coagulum quoddam exhalationum e nubibus terram versus motu translato excussum, sed potius impulsus vehementissimus juxta ductum exhalationis, tanquam per conductorem aliquem, continuatus, in momento per spatium ingens propagari poterit, sicut vis electrica velut in momento per catenam longissimam diffunditur. 2. Facile intelligitur, cur fulmen in terras excussum, dum forte catenam aut filum ferreum offendit, ductum catenæ aut fili sequens, juxta hujus ambages sæpe longissime serpat; sequitur nimirum viam, secundum quam materia subtilis impelli facilius potest. Inde etiam erit, cur fulmina præaltas turres, aut arbores petant frequentius. 3. Cur fulmina sæpe diffringant muros, ac arbores, animalia enecent, quin vestigium flammæ, aut nota adustionis observetur; quia dari utique potest vehementissima materiæ subtilis succussio, quin illico, & semper sequatur flamma. 4. Cur fundere metalla possit intacto, quo clau-

clauduntur, involucro: si nimirum hoc vel magis pervium sit materiæ subtili copiosissime irruenti, vel fusio-
nis minus capax. 5. Cur post fulmen excussum sentiri
tamen possit odor sulphureus; quia in aere præcipue,
dum tempestas fulminea incumbit, innumeri sunt halitus
sulphurei, qui succussione fulminea vel accensi, vel in
particulas tenuissimas dispersi sulphureum odorem spar-
gunt. Et quia sæpe major sulphuris, ac bituminis co-
pia alicubi collecta esse potest, dum tractus fulminis
illuc pertingit, poterit etiam istud halituum coagulum
propelli ulterius, vel succensum diffringi, ac in auras
dispergi. Quia tamen causa, materiam subtilem ad mo-
tus electricis similes in atmosphæra nostra impellens,
fatis perspecta non est, isthæc indicasse sufficiet.

§. II.

DE AURORA BOREALI.

472. [Nter celebriora phænomena locum sibi vindicat
lux illa, quæ post solis occasum Boream versus
non nunquam spectatur, unde etiam nomen Auroræ bo-
realis habet. Talis nostra in Germania anno 1749. Men-
se Septembri visa est adeo notabilis, ut complurium op-
pidorum incolæ, rati, in proximis grassari incendia, iis
opitulatum accurrerint. Quæ phænomenon hoc comi-
tari plerumque solent, sunt sequentia. 1. Apparet in bo-
reali cœli plaga nubes quædam, aut pars obscurior,
horizonti vicina, sæpe limbo albicante atque circulari,
vel ad ellipsin accedente cincta, quæ ipsa pars ambitur
non nunquam arcibus binis, aut ternis, alternatim lu-
cidis, & obscuris, subin coalescentibus in unum, dein
iterum interruptis. 2. Ex parte obscura assurgunt co-
lumnæ, seu virgæ luminosæ luce vibrante aut quasi
fulgurante, subin etiam tranquilla satis. Columnæ hæ
non diu persistant; sæpius iterum recurrunt, idque fi-
tu ad horizontem perpendiculari, quandoque etiam cum
angulo quodam obliquo, interdum non nihil divergen-
tes; quandoque etiam virgarum loco observantur unde
quasi aut fluctus lucidi ab una plaga in aliam transcur-
rentes. 3. Circa finem phænomeni observantur nubecu-
læ lucentes versus Austrum emissæ, separatæ a reliquis,
subin iterum revertentes ad Boream, nunc fulgidæ,
nunc

nunc denuo obscuratæ. 4. Columnæ, ubi repentina luce effulserunt, ac nubeculæ lucidæ sæpe in fumum quodammodo, atrosque vapores definunt, qui cælum ad Austrum obtegunt. 5. Situs phænomeni raro est exacte directus ad Boream; sæpius aliquantum versus occasum aut ortum declinat. 6. Aurora hæc quandoque durat per integram noctem, imo duabus non raro, aut tribus consequentibus se noctibus cernitur; aliæ sunt paucarum horarum. 7. Extensio earum est ad arcum Horizontis 20. 60. quin 100. etiam graduum; versus Zenith assurgit varie. 8. Non nunquam in uno loco apparet, cum in vicino paucis milliaribus distito non observetur; aliquando eodem tempore per amplissimos terræ tractus, imo ferine per totam Europam visam esse ajunt.

473. Quis jam phænomeni hujus ortus, quæ causa sit, admodum incertum. Et locum quidem, in quo illud existat, si indagemus, sunt, qui istud ultra 160. mill. germ. a terra assurgere, adeoque non supra atmosphæram duntaxat terrestrem, sed fors etiam supra omnem aerem existere putent. Verum locus Auroræ hujus aliis haud esse videtur, quam atmosphæra terrestris: apparere enim illa solet sub forma nubis, &, ut observat Cl. Majerus, interdum leni vento aliarum ad instar nubium ex una in aliam plagam defertur; quin, eodem teste, non nunquam nubes aliquæ apparent altiores aurora boreali. Adhæc, dum columnæ illæ assurgunt, auditur non raro strepitus aliquis, qui sonus plane non audiretur, si ultra omnem aerem aurora hæc esset elevata. Demum si tanta esset lucis istius altitudo, cur nunc in uno loco videtur, in alio haud procul distito tunc non conspicua?

Neque hic dictis obesse videtur, quod quandoque ejusmodi aurora per amplissimos terræ tractus, ac per omnem ferme Europam fuerit eodem tempore observata: opus enim non est, ut dicamus, unam eandemque, nulli interruptam, sed ubique continuam fuisse nubem illam auroriferam, cujus unius lux per omnes has terras fuerit conspicua; nam utique non intra solos circulos polares erumpere e terra potest materia hujusmodi nubi formandæ idonea; sed circa alios quoque latitudinis terrestris circulos dari, atque in atmosphæram nostram assurgere talis materia poterit, ut adeo plures, eæque diversæ in diversis terræ tractibus datæ
simul

Simul fuerint nubes auroriferæ, proin etiam distinctæ auroræ boreales ita, ut alia visa fuerit Berolini v. g. Ingolstadii alia, atque alia iterum Romæ &c.

474. De materia autem hujus auroræ si quæra-
tur, putat Musschenbroekius, illam talis esse indolis,
ut accedente fermentatione accendi queat, & accensa
languidam lucem spargat: cum enim experimentis chi-
micis comprobatum sit, innumeras in rerum natura da-
ri materias inflammabiles, quæ arte extrahi e mixtis pos-
sint, nemo dubitaverit, quin multo plures ejusmodi ma-
teriæ telluris gremio contineantur, quæ subin expiran-
tes in altum eleventur, ibique in nubes velut congre-
gatæ, ac demum quocunque modo accensæ luceant, do-
nec massa omnis vel conflagarit, vel interveniente alia
causa denuo fuerit extincta. Accendi porro hæc mate-
ria poterit, quando in altum elevata, inque nubes con-
juncta in alias materias, causandæ fermentationi ac ef-
fervescentiæ idoneas, offendit; & quoniam in hujusmo-
di materias potissimum offendit ex parte australi, ex hac
etiam parte accensa lumen emittet. Quodsi una nube-
cula aurorifera incumbat alteri, istæ accensæ arcus luci-
dos dabunt; si quid autem materiæ ardentis explodatur,
& quasi evibretur, columnæ seu virgæ lucentes appa-
rebunt; his extinctis prout diversa fuerit materia, rema-
nebunt vel nubeculæ lucidæ, vel vapores non nihil cras-
siores. Ita quidem non pauci cum Musschenbroekio dis-
currunt; alii tamen verosimilius esse existimant, materiam,
qua aurora hæc constat, re ipsa non ardere, sed varia
fermentatione agitatam duntaxat lucere; quoad situm
vero, & reliqua hujus phænomeni adjuncta isti quoque
Auctores consentiunt Musschenbroekio.

475. Præter lumen boreale notari etiam debet lux,
ut vocant, Zodiacalis, cujus nomine intelligitur tractus
quidam lucidus, caudam Cometæ, aut viam lacteam
nitore suo æmulari solitus, figura vero referens hastile
lanceæ, cujus basis Solem, apex autem, etiam extra
Zodiacum protensus, fixam aliquam subinde respicit.
Longitudo hujus luminis varia est; nunquam tamen ma-
jor, quam 100. aut 130. graduum, neque minor 50. gra-
dibus. Quoniam lux hæc motui Solis semper se se ac-
commodat, jure inferitur, illam a sole profinere, atque,
ut plerique existimant, a materia ab æthere diversa, &
causandæ reflexioni apta, nempe a solari atmosphæra ad

nos reflecti. Quaternis ferme horis ante solis ortum, & totidem post occafum lumen iftud apparere folet; & in noftris quidem regionibus verno tempore fub vefperum maxime, autumnio ante diluculum, in aliis regionibus pro diverfa harum latitudine aliis temporibus videtur diftinctius.

§. III.

DE RELIQUIS METEORIS IGNEIS.

476. [Nter hæc, quibus ex eorum maxime figura varia funt indita nomina, eminent globi ignei (*Bolides* vocant) quandoque in aere confpiciui, quorum aliqui teſte Muſſichenbroekio, arferunt ſplendore ingenti, quique nitorem lunæ excedens prope æquarit lucem ſolis orientis, dum noctu conſpecti illi ſunt. Rupti ſubinde maximo cum fragore odorem ſparſerunt ſulphure gravem. Alii ſtare ſunt viſi; alii ingenti celeritate per aerem tranſverſim rapti. Globi iſti aliud haud eſſe videntur, quam nubes ex ſulphureis, aliisque inflammabilibus exhalationibus conſtata, nimia efferveſcentia demum accenſa, atque a circumambiente aere in figuram globofam compreſſa. Simili ferme materia conſtabunt globuli illi exiles, qui de nocte ceu ſtellulæ quædam ex alto quandoque delabi, aut per aerem diſcurrere videntur, dicti propterea *Stelle cadentes*, aut *tranſcurrentes*. Nempe dum halitus ſulphurei e terra aſſurgentes ſubito accenduntur, flamina pabuli ſui ductum ſequens vel deorſum ferri, vel ad latus excurrere cernitur. Si camphora, inquit Muſſichenbroekius, cum nitro, limoque terreſtri, ſpiritu vini irrigata in globum compingatur, globus hic incenſus, projectusque per aera ſtellam cadentem referet. Eadem materia conſtant *Capræ ſaltantes*, *Trabs*, *Draco*, *Clypeus* &c. quæ nomina, ut dictum, a figura, quam halitus accenſi præferunt, ſunt deſumpta: ſi enim ſpeciem globi floccis quodammodo veſtiti ille halitus referat, & in aere natans ſubſultet, caprea ſaltans; ſi in longum æquali ubique denſitate protendatur, trabs; ſi in medio denſior, gracilior in extremitatibus ſit, draco nuncupatur, & ſic de cæteris.

477. *Caſtor*, & *Pollux*, vel *Helena* dicuntur flammulæ illæ, quæ navigantibus apparere ſolent in antennis,

nis, aliisque navigii partibus, ingruente potissimum tempestate conspicuæ. Si duæ sint, dicuntur Castor, & Pollux, si una, Helena vocatur. Flammulas has non esse, verum ignem, seu materiam ardentem, ex eo colligunt, quod diutius etiam adhærentes malo vel funibus nullum ignis vestigium relinquant. Hinc censent, eas esse exhalationes quasdam duntaxat lucentes, quæ vel ex mari, vel ex navigiis ipsis exurgant, & accedente fermentatione lucere incipiant. Quandoque etiam flammulæ istæ aliud non esse sunt deprehensæ, quam pisciculi a mari in antennas ejecti, quique tamdiu lucent, donec emorerentur.

478. *Ambulones* dicuntur illæ flammæ, quæ nocturno tempore prope terram exortæ huc illuc varie discurrunt, prout est motus aeris, quem sequuntur. Alij sunt *ignes fatui*, qui solum lucent, nec quidquam accendunt; alij dicuntur *ambulones incendiarii*, qui tecta straminea, aliasque materias facile inflammabiles etiam accendunt. Illorum proin materia erunt exhalationes quædam crassiores, magis viscosæ, quæ solum luceant, quin inflammentur; incendiarii vero constabunt exhalationibus sulphure permixtis, ac re ipsa accensis. Quod *ambulones* isti viatores quandoque in avia, & paludes, aut cœmeteria deducant, inde est, quod ex hisce locis copiosiores assurgere soleant ejusmodi exhalationes: hinc noctu iter facientes, dum rati, in domo aliqua candelam ardere, ignes hos fatuos sequuntur, in loca isthæc devenire necesse est. Illa quoque lux, quæ ex animalium crinibus aut frictis aut pexis emicat, & *Ignis lambens* dicitur, proprie flamma ardens non est, sed lux eo ferme modo excitata, quo fieri id diximus frictione electrica.

DISSERTATIO II.

DE ELEMENTO AERIS.

EXpensa breviter natura Aeris, ejusque circa terram assurgentis altitudine, declaranda sunt meteora aerea, additis etiam iis, quæ Emphatica dicuntur, eoquod tantum appareant, in ipsis autem rebus non existant.

ARTICULUS I.

NATURA, & ALTITUDO AERIS.

479. **A**erem corpus eſſe fluidum, admodum ſubtile, poroſum, valde pellucidum, grave item ac elatiſcum, tum ex dictis in Phyſica Generali maxime Diſſert. V. Artic. III. tum ex hic uberius jam declaratis abunde poteſt intelligi. Certum pariter eſt, aerem eſſe elementum peculiare diverſum a vaporibus & exhalationibus in eo copioſe natantibus: vapores enim, qui ex maſſa aliqua humida in vaſe concluſa quandoque aſcendunt, dum frigore condenſantur, elatiſcitatem ſuam amittunt, ad latera vaſis adhærent, demum deſlui in maſſam recidunt, dum aer vaſe aliquo contentus idem ſemper, nihilque immutatus perſiſtit. Ut vapores, ſic etiam exhalationes reliquorum corporum ſucceſſu temporis quaſi intereunt, nunc diſſipantur, nunc in maſſam vel fluidam vel ſolidam conjunguntur, ut pluribus experimentis oſtendit Cl. Boyle, & vel ex eo ſatis liquet, quod poſt tempeſtatem fulmineam aer remaneat, iſque purior, quam fuerit antea, vaporibus ſcilicet, ac exhalationibus in pluvias, tonitrua, aut fulmina abſumptis, vel in terram dejectis. Interim cum in aere noſtro ſemper lateant corpuscula heterogenea innumera, ac pro diverſitate corporum, & locorum, e quibus expirant, diverſiſſima, cumque iſtis animalium corpora varie affici poſſint, ac debeant, patet, cur unum clima poſſit eſſe ſalubrius altero.

480. Tota aeris terram undique ambientis maſſa una cum heterogeneis in ea natantibus dicitur *Atmoſphæra terreſtris*. Alii tamen nomen iſtud tanquam ab *atomorum ſphæra* deductum preſſius ſumunt, & per atmoſphæram terreſtrem intelligunt illud duntaxat ſpatium circa terram, ad quod halitus & vapores e terra erumpentes ſolent aſſurgere: quare cum iſti ad ſupremam aeris, identidem magis rareſcentis, ſuperficiem eniti nequeant, tota maſſa aerea multo altior erit, quam ſit atmoſphæra terreſtris. Sed de hoc non eſt, cur litigetur. Quæſtio eſt, quanta ſit altitudo totius atmoſphære terreſtris, ſeu columnæ aeræ. Hac in re Auctores in diverſiſſi-

mas abeunt sententias. Cardinalis Ptolemæi cum Ty-chone, & P. Clavio hæc altitudini tribuit 52. milliaria Italica; Hallejus, De la Hire 45. aut 48. Wolfius 49. Keillius altitudinem atmosphæræ, solares radios reflectentis, statuit 44. milliarium. Nolletus totam columnam aeream ultra 15. aut 20. leucas haud elevatam esse existimat.

481. Differentiæ hujus ratio potissima est, quod non eadem omnes usi sint methodo altitudinem istam determinandi. Clavius, Hallejus, Wolfius, & alii illam ex crepusculis definire conati sunt. Verum cum nec satis comperta sit magnitudo semidiametri terrestris, & hoc modo solum innotescat altitudo atmosphæræ crassioris, quæ nimirum solis radios in tanta copia, quantam exigunt crepuscula, possit reflectere, patet, hac methodo certi nihil definiri posse. Maraldus, Cassinus & alii altitudinem istam ope Barometri determinandam sibi sumpserunt. Supposito nimirum, quod media altitudo mercurii in superficie oceani nostri climatis sit 28. dig. Paris. cum ex observatione multiplici constet, ad hoc, ut mercurius una linea descendat, requiri locum, qui mari sit altior 10. hexapedis cum 1. pede; ut descendat duabus lineis, locum requiri altiore mari 20. hexapedis cum 3. pedibus; ut descendat lineis tribus, locum mari altiore 30. hexap. cum 6. ped. five 31. hexapedis, putarunt hi Auctores, servata hac progressionem erui demum posse totius aeris altitudinem. At enim cum aer non sit fluidum ubique æqualiter densum; neque supponi jure possit, densitatem, ac gravitatem aeris ea proportionem decrescere, qua crescit ipse a tellure distantia, idque ob innumeras particulas heterogeneas aeri inferiori constanter immixtas, quales in supremis etiam aeris regionibus dari, & quidem debita cum proportionem identidem vel pauciores vel rariores, nemo facile asseruerit, etiam ista methodo aeris altitudo certo definiri non poterit.

482. Aliam igitur methodum aeris altitudinem fors exactius determinandi noster in hujate Universitate Mathematicum Professor desumi posse existimat ab Eclipsi Lunari. Eam paucis indicare juvat in Fig. 65. Tab. VI. in qua C centrum terræ, E G via Lunæ. In Eclipsi Lunari duplex attendi umbra potest, una, quam projiceret terra, si nullo aere, nulla atmosphæra cingeretur, & hanc deinceps vocare liceat *umbram terræ*; altera,

quam eadem terra projicit, prout illa ab aere undique cinâta est, quamque habere possumus ex observatione Eclipsæos lunaris: proin istam vocabimus *umbram observatam*. Sic in citata Figura *umbra terra* esset conus AFB , utpote quem definiunt radii ipsam terram tangentes $A F$, & $B F$. *Umbra observata*, seu proveniens a terra simul & istius atmosphæra, foret conus $a f b$, quem definiunt radii atmosphæram ipsam tangentes, videlicet radii $a f$, & $b f$. Cum enim tangentes isti absque ulla refractione recta pergant in f , si per aerem ambientem nulli radii penetrare possent, in toto spatio $a f b$ nil nisi umbra foret.

At quoniam radii, qui intra tangentes istos in aerem ambientem incidunt, per eundem utpote diaphanum penetrare possunt, in memorato spatio $a f b$ mera umbra esse non poterit. Considerandum proin adhuc est, quomodo radii hi intermedii per aerem transcant, atque ex hoc ulterius propagentur. Sint in eadem Figura 65. radii r & t tangentibus $a f$, & $b f$ propinqui. Isti duplicem patientur refractionem, nimirum in ingressu in aerem versus perpendiculum, & in egressu a perpendiculo: proin se mutuo secantes v. g. in X pergant versus s & v . Cæteri radii, qui intra extremos tangentes comprehensi in aerem incidunt, pariter bis refracti, quemadmodum radii $r v$, & $t s$, a se divergentes pergant versus $D G E$ &c. ut adeo umbra pura danda non sit nisi intra spatium $A X B$; in spatio autem $H X L f$ danda sit umbra permixta aliquo saltem lumine, licet tenuissimo, utpote quod provenit a radiis respectu corporis lunaris prorsus paucis, iisque ob duplicem refractionem omnino debilitatis, multumque a se invicem divergentibus.

483. His positis cum jam aliunde constet, semidiametrum *umbræ solius terra* $D e$ esse æqualem summæ parallaxeos Solis & Lunæ dempta semidiametro solari; semidiameter vero *umbræ observata* $D E$ habeatur ex observatione Eclipsæos, haud difficulter inveniri poterit altitudo aeris, si nimirum semidiameter umbræ terræ subtrahatur a semidiametro umbræ observatæ: hujus enim supra illam excessus in partibus circuli, sive in gradibus & minutis, ostendet altitudinem aeris. Ut jam hæc mensura excessus reducatur etiam ad mensuram aliquam

quam determinatam v. g. in milliaribus, resolvantur triangula $E C D$, & $e C D$, & investigetur in milliaribus mensura cruris $D e$, ac cruris $D E$. Sic, cum in triangulo rectangulo $E D C$ habeatur crus $C D =$ distantiae lunæ a centro terræ, & angulus semidiametri umbræ ex observatione deductus $D C E$, nec non angulus $D C e$ per computum datus, nimirum æqualis summæ parallaxeos lunæ & solis dempta semidiametro solari, invenietur in eadem ratione mensuræ, in qua datur $C D$, etiam crus $D e$, & $D E$; quibus dein ab invicem subductis residuum $e E$, æquale $b B$, erit ipsa proxima mensura altitudinis aeris; eoquod pro ea terræ & lunæ a sole distantia radii solares $b f$, & $B F$ pro parallelis haberi possint. Methodum hanc pluribus abhinc annis supra laudatus Mathematicum Professor excogitaverat; at, cum ab eo tempore cælum nunquam ita faveret, ut exactam integræ alicujus eclipseos lunaris observationem posset instituere, aeris altitudinem hæc methodo determinare hucusque nondum potuit.

ARTICULUS II.

METEORA AEREA, ET EMPHATICA.

§. I.

DE VENTIS.

484. **V**entus aliud non est, quam sensibilis fluxus aeris ex uno in alium locum propulsi adeo, ut ad mentem Senecæ aerem inter & ventum nihil intersit, quam inter lacum & fluvium, quod nimirum aqua fluminis fluat, & illa lacus stagnet. Stupenda ventorum vis, qua sæpe domos integras subvertunt, aut etiam alio transferunt, potissimum ab eorum celeritate dependet. Ea quandoque tanta est, ut teste Mariotto ventus intra unum minutum secundum 32. pedes Parisinos conficiat; imo Musschenbroekius ex observationibus Derhami infert, ventos admodum impetuosos non raro intra unum minutum secundum ultra 60. pedes Britannicos percurrisse. Plurimum augetur ventorum vis, si duo di-

rectionibus aliquantum oppositis sibi mutuo occurrunt : tunc enim viribus in loco concursus quodammodo junctis obvia quæque sternunt , ac sylvas non raro , pagosque sat amplios subvertunt , quemadmodum anno hujus sæculi decimo septimo 26. Maij in campo Lycio haud procul Augusta accidisse constat.

485. Pro ratione plagarum , unde spirant venti , isti a Geographis , reique nauticæ peritis distinguuntur imprimis in 4. *Cardinales* , nimirum Borealem vulgo NORD , Australem SUD , Orientalem OST , & Occidentalem WEST. Inter hos æquali utrinque distantia inserti sunt alii quatuor , *Collaterales* dicti , nempe NORD-OST , qui inter Borealem & Orientalem interest ; NORD-WEST , qui æquali spatio a Borea & Occidente abest ; SUD - OST , qui inter Austrum & Ortum , ac SUD - WEST , qui inter Austrum & Occasum æquali spatio interjacet. His rursus alii octo inserti sunt ita , ut quivis medium inter unum cardinalem & proximum huic collateralem teneat , nomenque ab utroque trahat , quæ nomina in sic dicta Rosa Nautica , passim obvia , legi poterunt. Aliæ divisiones videri possunt apud Cl. Muschenbroekium , & P. Jos. Mangold.

486. Generalis , & immediata causa ventorum est æquilibrium aeris turbatum : dum enim aliquæ columnæ aeræ sunt vel altiores , vel magis compressæ , necessario premere , atque etiam diffuere debent versus illas partes , in quibus minor est resistentia , quas proinde impellent , commovebunt , sicque fluxum aeris causabunt. Causæ vero mediatae ventorum , quibus nimirum aeris æquilibrium turbatur , variæ sunt. 1. Si aer in uno loco sit admodum rarefactus : tunc enim aer in locis vicinis densior graviorque versus rariorem irruens motum causabit. Sic aer tempore hyberno frigidus per fenestram , aliasque rimas spirat in cubiculum calefactum. 2. Ventus oritur per aeris in uno loco condensationem : dum enim iste per condensationem in minus spatium sensim redigitur , aer vicinus isthoc in spatium debet affluere : hinc lenis auræ flatus sentitur , quando post æstus diurnos occidente sole aer refrigeratur , & condensatur. 3. Si aer in uno loco vaporibus , & exhalationibus impleatur ; hinc plerumque spirant venti , ubi sunt maria , & flumina. Accedit , quod ipse cursus fluminis incumbentem sibi , ac vicinum huic aerem ad motum

tum concitet. 4. Si aer cum vaporibus, ac halitibus nimium dissipetur; hinc ubi terra & montes sulphurei frequentiores halitus evomunt, venti sunt frequentissimi.

487. Ex his intelligi poterit, ex quibus speciatim causis venti oriri soleant. Inter istas, ut observat Varrenius, agmen ducit sol, dum vel aerem pro diverso ad terram situ rarefacit, vel vapores & exhalationes in aere natantes attenuat, dum nubes disjicit, aut nivem, & glaciem in locis montanis solvit, unde motum aliquem aeris oriri necesse est. 2. Huc pertinent halitus sulphurei in nubibus conspissati, ac postea vi magna erumpentes. 3. Nubes, quæ vel solis radios intercipiunt, ut hinc aer in umbra condensetur, vel, ut fieri solet in fractura nubium, ex alto descendunt, atque ita aerem subiectum impellunt. 4. Nimbi cadentes, terræ motus, exspirationes ex specubus subterraneis, tanquam ex *Æoli* pilis emissæ: nam æquilibrio inter aerem subterraneum, & eum, qui terram exterius ambit, sublato motus plurimos in atmosphæra fieri necesse est.

488. Affectiones ventorum, quales sunt calor, frigus, humiditas, siccitas, ex ipso aere, diversis halitibus aut vaporibus referto, proin etiam ex natura regionum, e quibus venti adveniunt, sunt repetendæ. Sic ventus Australis, cum aerem ex Zona torrida, aut locis eidem vicinis, ac proin innumeris exhalationibus plenum ad nos deferat, calidus est; &, quoniam mare mediterraneum transit, ex quo vapores varios recipit, etiam humidus. Ventus Borealis, cum ex locis frigidioribus adveniat, ipse quoque frigidus, & siccus est; cumque nubes, ne ab Austro ad nos propellantur, impediat, venientes vero ab Occasu Austrum versus abripiat, si sensim in Ortum inclinet, venturæ serenitatis est nuncius. Humidi sunt venti, qui aut per mare spirant, aut per terram stagnis, lacubus, fluviisque abundantem transeunt. Talis respectu nostri est Occidentalis, eoquod ex mari Atlantico vapores secum ferat innumeros; at vero Orientalis, ex vasto terrarum orientalium tractu veniens, siccus est, advectas antea nubes dissipat, serenitatemque inducit.

489. Plures porro ob causas Divina Providentia spirare ventos voluit. 1. Venti in diversas regiones deferunt nubes pluviosas ad terram ubique irrigandam. 2. Plantarum vegetationem, & succi nutritii circulationem

impulſu , & ſuccuſſione arborum ramorumque promovent. 3. Cuſtodiant cœli, marisque temperiem, caloriſque exceſſum mitigant. 4. Aſſidua agitatione ſitum & ſqualorem atmophæræ impediunt : hinc putant, ventos, tonitrua ac fulmina præcipuum eſſe adverſus lues peſtiferas præſidium : per ventos enim purgatur aer, contagioſis particulis plenus ; per tonitrua quoque & fulmina eædem particulæ abſumuntur adeo, ut nihil citius peſtem inducere poſſe exiſtiment aliqui, quam ventorum, tonitruumque ſilentium ; unde invaluit illud de Anglia præcipue proverbium : aut ventofa, aut venenofa.

§. II.

DE IRIDE.

490. **P**rinſipem emphatica inter meteora locum obtinet *Iris*, arcus ille diverſicolor, in aere roſcido a ſpectatore ſolem lucentem a tergo habente conſpiciendus. Hujus explicatio per annos plurimos Philoſophiam multum exagitavit, donec Antonius de Dominis Spalatri Archiepiſcopus ejus originem intimius perſpexit, & poſt hunc Cl. Newtonus præcipue eam ex Optices legibus ita demonſtravit, nullum ut hac de re ſuperſeſſe jam dubium poſſit. Phænomena Iridis potiſſima hæc ſunt,

I. Non apparet tempore ſereno, ſed pluvio. II. Semper eſt in plaga ſoli ita oppoſita, ut ſpectator inter illam & ſolem quaſi medius exiſtat. III. Arcus Iridis adeo ad ſenſum rotundus eſt, ut ſegmentum circuli exhibeat ; & ſiquidem *Iris* appareat ſole horizontem jam ſtringente, exhibet integrum ſemicirculum, tumque arcus ille videtur horizonti perpendiculariter inſiſtere. IV. Arcus non ſemper eſt integer, ſed quandoque interruptus ita, ut nunc crura ſine vertice, nunc hic ſine illis appareat. V. *Iris* ordinarie duplex eſt, interior ſeu primaria, & exterior ſeu ſecundaria, multumque debilior prima. VI. Si altitudo ſolis ſupra horizontem major fuerit 42. grad. 2. min. apparere non poteſt *Iris* interior ; neque exterior, ſi altitudo ſolis major fuerit 54. gr. 7. min. VII. Colores in *Iride* numerantur 7. & in *Iride* primaria quidem, ſi a parte concava ducatur initium, hoc ordine ſe ſe excipiunt : violaceus, purpureus, cæruleus, viridis, flavus, aurantius, ruber ; *Iris* vero ſe-

secundaria eosdem, sed debiliores, ac inverso ordine vitendos colores exhibet.

491. Phænomena isthæc ut rite declarentur, sit in Fig. 66. Tab. VII. Sphærule pellucida D E F, quales nimirum sunt stillæ, aut guttulæ pluviales. In hujus partem superiorem circa D incidat radius solaris A D. Iste in medium hoc densius incidens circa D refringetur ad perpendicularum C b, atque ita pertinget in E. Hinc partim egrediens in aerem, ac propterea a perpendicularo C d refractus, perget versus n; partim ex eodem puncto E reflectetur in F; unde partim reflectetur in m, partim in aerem egrediens a perpendicularo C e refringetur, atque ita refractus perget versus O.

492. Igitur I. Si in O constitutus fuerit oculus spectatoris, & radius iste solaris post duplicem illam refractionem in D & F, & unam reflexionem in E, adhuc sit satis efficax, oculus radium A D videbit per lineam O F. Et siquidem tum radius incidens A D, tum radius refractus O F producantur in S, oculus in O consistens radium A D videbit sub angulo A S O, aut, si radio A D ducatur parallela O L, sub angulo S O L, qui prior est æqualis (Præcog. N. 57.)

493. II. Cum sensibilis quisque radius solaris per refractionem diversos in colores separatur ex Num. 269. & seq. si facta duplici ista refractione radii aliqui, ab aliis jam separati, ad oculum in O constitutum pertingant, sique satis efficaces sint, oculus in O eum colorem percipiet, cujus sunt radii illi, qui ab aliis sic separati, in oculum incurrunt.

494. III. Quoniam autem, ut ex iisdem Numeris constet, diversa est diversorum radiorum refrangibilitas ita, ut alii minus, alii magis refrangibiles sint, patet, servatis eadem incidentia radii A D, eodemque situ tum sphæræ pellucidæ, tum oculi in O, fieri non posse, ut omnium colorum radii, qui per refractionem in D separati a se invicem sunt, simul in oculum incident, id quod uberius declaratur in Fig. 67. Tab. VII. Sit hic idem situs sphæræ pellucidæ, & oculi, eademque incidentia radii sensibilis A D, quæ erant in Figura priore; si radii per refractionem in D a se mutuo separentur, & rubri v. g. omnium minime refrangibiles post hanc refractionem perveniant in E, inde reflexi in F, atque ibi in egressu iterum refracti pertingant in O, oculus ibi constitutus.

stitutus videbit colorem rubrum; radii vero violacei in eodem radio sensibili $A D$ contenti, cum sint omnium maxime refrangibiles, post refractionem in D pervenient in e inde reflexi in m , atque in egressu refracti pergent in r ; similiter radii virides, qui spectata refrangibilitate sua sunt inter rubros, ac violaceos medii, refracti in e , hinc reflexi in s pervenient demum in o : igitur oculus constitutus in O hoc casu viridem, aut violaceum colorem videre non poterit, neque alium ex intermediis, ut ex iisdem principiis liquet, sed solum colorem rubrum conspiciet.

495. Vidimus hucusque, quid fiat, si radius aliquis in partem superiorem sphaerae pellucidæ incidat. Nunc considerandum quoque, quid fiat, si idem radius in punctum aliquod inferius ejusdem sphaerae incidat. Igitur (Fig. 68. Tab. VII.) in sphaerulae $D E F G$ punctum inferius D incidat radius $A D$. Hic in ingressu ad perpendicularum $C d$ refractus perget in E ; inde reflexus in F , atque iterum in G , demum in egressu a perpendicularo $C b$ refractus perget versus O . Si itaque oculus fuerit in O , is radius $A D$ videbit per lineam $O G$, sub angulo $G A D$, sive ob lineam $O L$ parallelam radio $A D$, sub angulo isti æquali $G O L$. Et siquidem radii, qui per refractionem ab aliis separati hoc modo perveniunt in O , adhuc sint satis efficaces, videbit oculus colorem illum, cujus radii spectata eorum refrangibilitate hoc modo, & sub hoc angulo pervenire ad oculum possunt; alios vero colores, servatis eadem incidentia radii, eodemque situ sphaerae, & oculi videre non poterit, ut ex Numeris præcedentibus haud difficulter quivis intelliget.

496. Ut jam isthæc propius applicemus ad phænomena Iridis, in qua oculus in eodem etiam situ perseverans omnes septem colores simul conspiciet, expendenda adhuc, quæ hanc in rem maxime a Newtono instituta sunt experimenta. I. Si bulla vitrea $D E F$ (Fig. 66. Tab. VII.) repleatur aqua, atque ita suspendatur, ut radius $A D$ post duplicem refractionem in D & F , unamque reflexionem in E , ad oculum solem inter & bullam constitutum in O perveniat, faciatque angulum $A S O$, vel $S O L$ æqualem 42. grad. 2. min. oculus per radius $O F$ circa F videbit colorem rubrum admodum vivacem: manente eodem situ oculi si bulla demittatur, atque ita angulus $S O L$ evadat minor 42. grad. 2. min. oculus
per

per radium $O F$ videbit colorem aurantium; tum bulla magis adhuc demissa, ficque angulo $S O L$ iterum imminuto, per radium $O F$ apparebit color flavus; eodem angulo identidem per demissionem bullæ imminuto fistent se etiam colores reliqui, viridis, cæruleus, purpureus, ac demum, quando angulus $S O L$ habuerit 40. gr. 17. min. etiam violaceus.

497. II. Si eadem bulla vitrea aquis repleta altius attollatur ita, ut radius $A D$ incidat in partem bullæ inferiorem, prout fit in Fig. 68. Tab. VII., ficque radius iste post duplicem refractionem, ac reflexionem, circa G e bulla egressus ad oculum in O constitutum pertingat sub angulo $G A D$, aut $G O L$, qui sit æqualis 54. grad. 7. min. oculus in O per radium $O G$ videbit colorem violaceum; si bulla eadem aliquantum demissa angulus $G O L$ minuatur; apparebit color purpureus; tum eodem angulo sensim magis, magisque imminuto fistent se colores cæteri, cæruleus, viridis, flavus, aurantius, ac tandem, si angulus $G O L$ fuerit 50. grad. 57. min. per radium $O G$ videbitur color ruber. Cur autem tam in primo, quam in altero experimento sub his determinate angulis radii tum rubri tum violacei ad oculum in O pertingere debeant, ratio ex diversa radiorum refrangibilitate petenda est, id quod *Neuwtonus* demonstrat ex ipsa ratione, quam in radiis luminis ex aere in aquam illapsis habet sinus anguli incidentiæ $C r$ (Fig. 66. & 68.) ad sinum anguli refractionis $C s$, quæ ratio in radiis rubris est ut 108. ad 81.; in violaceis ut 109. ad 81.

498. Porro, siue una eademque bulla aquea sensim attollatur vel deprimatur ita, ut anguli, sub quibus radii in oculum incident, vel augeantur, vel minuantur, siue fuerint plures ejusmodi bullulæ in serie quadam continua sibi superimpositæ eo modo, ut radii ex superioribus sub angulo majore, ex inferioribus sub angulo minore in oculum incurrant, plane perinde est. Proin si fuerint in Fig. 69. Tab. VII. plures bullulæ aqueæ $A, B, C, D, E.$ sibi recta impositæ, atque in has incident radii inter se paralleli $a e, a c, a m, a n$, si radii isti in bullis his debito modo refracti & reflexi sub determinatis angulis in oculum in O perveniant, determinatum etiam colorem oculo præsentabunt. Duos non nisi colores, vio-
la-

laceum nempe & rubrum, quorum ille maxime, hic omnium minime refrangibilis est, consideremus.

Si radius $a m$ incidens in bullulam D post duplicem refractionem, unamque reflexionem perveniat ad oculum in O ita, ut angulus $t O L$ sit 42. grad. 2. min. radius hic oculo sistet colorem rubrum; radius $a n$, si incidens in bullulam E post duplicem refractionem; unamque reflexionem ad oculum in O pertingat sub angulo $v O L$ æquali 40. grad. 17. min. exhibet colorem violaceum ex Num. 496., ex quo ipso Numero patet, colores intermedios sub angulis sibi propriis intra bullulam D & E ad oculum perventuros. Hæc de radiis in superiorem bullæ partem incidentibus.

Si in bullæ A partem inferiorem incidat radius $a c$, isque post duplicem tum refractionem tum reflexionem ad oculum in O pertingat ita, ut angulus $r O L$ sit 54. grad. 7. min. radius iste exhibebit oculo colorem violaceum; si vero radius $a e$, incidens in bullæ B partem inferiorem, post geminam refractionem & reflexionem ad oculum in O perveniat sub angulo $s O L$, qui sit 50. gr. 57. min. oculus per radium O s videbit colorem rubrum, colores quoque cæteri, sub proprio sibi quisque angulo, ad oculum pervenient, ut ex Numero præcedente colligitur.

499. Fors dicet quis: dum bulla D E F (Fig. 66. Tab. VII.) soli libere est exposita, omnium colorum radii in omnes bullæ partes incident: cur igitur non omnium etiam colorum radii ad oculum in O concurrunt? Quæsito huic ut satisfiat, notandum est discrimen inter radios *efficaces*, & *inefficaces*. Efficaces dicimus eos, qui sibi paralleli ac satis vicini oculum vivaciter possunt afficere; inefficaces eos, qui a se divergentes ac admodum rari sensibilem in oculo impressionem non faciunt. Declaratur. In Bullam D E m (Fig. 70. Tab. VII.) incident plures radii A D, $a d$, B b. Isti pro diversa obliquitate incidentiæ refracti in E, e , & c, atque hinc reflexi in m , n , & o, a se divergentes exhibunt in O, L, S: proin, si essent etiam ejusdem coloris, oculum satis afficere non possent, atque adeo erunt radii *inefficaces*.

Si vero in bulla D E n (Fig. 71. Tab. VII.) ex ignumeris radiis aliqui valde sibi vicini, uti hic sunt in fasciculo A D $e c$, incident in exiguum arcum D e, isti, si etiam sint ejusdem coloris, pro obliquitate incidentiæ

tiae suae refracti convenient in aliquo puncto E; inde reflectentur in exiguum pariter arcum $m n$, atque hinc denuo exhibunt paralleli, sibi admodum vicini, proin apti ad sensibilem impressionem in oculo faciendam; & isti erunt radii *efficaces*. Quod de radiis efficacibus pro casu, quo radii in superiorem bullae partem incidunt, dictum nunc est, facile in Fig. 72. Tab. VII. applicari etiam poterit radiis efficacibus pro casu, quo radii incidunt in partem bullae inferiorem.

500. Assumpta jam diversa radiorum refrangibilitate patet ratio, cur, licet omnium colorum radii in singulas bullae partes incendant, tamen non omnium colorum, sed determinati duntaxat coloris radii efficaces ad oculum sub determinato angulo possint pervenire. Incidunt in bullam D E F (Fig. 73. Tab. VII.) omnium colorum radii A D, $a d$ inter se paralleli; si omnium minime refrangibiles, videlicet rubri, qui cum aliis permixti per lineas A D, $a d$ bullam ingrediuntur, post primam refractionem convenient in E, inde reflexi in F post alteram refractionem egrediantur paralleli in O, ex ipsa natura diversae refrangibilitatis sequitur, radios alios magis refrangibiles, v. g. violaceos non conjungendos in E; sed, dum violacei illi, qui per lineam A D incidunt, post refractionem primam pertingunt in c, illi, qui per lineam $a d$ incidunt, perveniunt in e; inde reflexi, & in egressu iterum refracti, a se divergentes pergunt versus o & l. Et quoniam eadem est ratio de aliis quoque radiis a rubro & violaceo diversis, ex bulla D E F ad oculum in O soli rubri efficaces perveniunt.

501. Quia tamen etiam radii violacei talem possunt habere incidentiam, ut post geminam refractionem, & unam reflexionem, ex bulla egrediantur paralleli, ac magis sibi vicini, ex eadem bulla egredi etiam possunt radii violacei efficaces, non tamen in idem punctum, in quod pertingunt rubri efficaces. Patet hoc in Fig. 74. Tab. VII. In hac si ex fasciculo radiorum A D radii rubri efficaces egrediuntur in O sub angulo S O L æquali 42. grad. 2. min. ex fasciculo $a d$ radii violacei pro hac obliquitate incidentiae convenient in e, inde reflexi in f paralleli ac sibi admodum vicini, proin efficaces perveniunt in o sub angulo s o L æquali 40. grad. 17. min. quorum ratio ex dictis, maxime N. 496. &

497. patet, & applicari facile potest etiam radiis in inferiore bullæ partem incidentibus in Fig. 72. His ipsis ex principiis, & ex Num. 498. habetur ratio, cur ex singulis bullulis A, B, D, E, (Fig. 69.) non nisi determinati coloris radii efficaces ad oculum in O perveniant, quia nimirum radii isti ob diversam luminis refrangibilitatem non nisi sub determinato, suæque refrangibilitati proprio angulo e bullulis egrediuntur; sic si etiam ex bullula E ver. gr. efficaces radii rubri egrediantur, isti exhibunt sub angulo ν O L 42. gr. 2. min.; non autem sub angulo ν O L 40. gr. 17. min. proin non pervenient in O, ubi oculus ponitur esse constitutus, sed pergent in o locum ab oculo aliquanto remotum.

502. His præmissis satis liquet, Iridem formari in nube roscida per radios solares debito modo refractos & reflexos ita, ut Iris primaria habeatur duplici refractione, & una reflexione; Iris secundaria oriatur ex duplici refractione, duplicique reflexione; ratio autem, & ordo colorum in diversa lucis refrangibilitate fundetur. Et quidem Iridem formari in nube roscida, seu in guttulis pluviae, inde patet, quod nunquam appareat, nisi tempore pluvio; dein illam formari a radiis solaribus (etsi quandoque fiat per radios lunares, ut infra dicetur) ex eo intelligimus, quod non conspiciatur, nisi nubes roscida, soli e regione obversa, actu illuminetur, ac spectator Iridem inter, & solem fuerit constitutus.

Formari autem Iridem per radios debito modo refractos, & reflexos, quamquam ex dictis, & ex Fig. 69. id abunde constet, uberius declaratur in Fig. 75. Tab. VII. Sit in spatio F M N G nubes roscida illuminata a radiis a, a, a , &c. inter se parallelis; in lineæ O L, radiis his parallelæ, ac a centro solis per oculum spectatoris ductæ puncto O sit oculus spectatoris. Si radii $a m$, & $a n$ incidunt in bullulas D, & E, ac post geminam refractionem, unamque reflexionem ad oculum O ita pertingant, ut angulus t O L sit 42. grad. 2. min. angulus vero ν O L 40. grad. 17. min. radius O t dabit colorem rubrum, radius O ν colorem violaceum, colores cæteros fistent radii ex bullulis inter D & E comprehensis sub proprio cuivis angulo ad O reflexi. Quodsi dein radius O ν concipiatur circa lineam O L tanquam axin suam moveri ita, ut

eun-

eundem semper angulum faciat 40. gr. 17. min. describet is superficiem conicam, cujus basis est circularis $H E I$, ut adeo ex toto illo circulo radii violacei ad oculum in O sint perventuri; cumque eadem si ratio de radio $O t$, cæterisque intermediis, totum spatium circulare $H D I E$ coloribus, qui determinatis angulis respondent, distinctum erit, atque ita habebitur Iris primaria.

Similiter si radii $a c$, & $a e$ in bullulis A & B bis refracti, & bis reflexi ad oculum in O perveniant, prior quidem sub angulo $r O L$ 54. gr. 7. min. alter sub angulo $s O L$ 50. gr. 57. min. primus colorem violaceum, secundus rubrum, radii inter A & B medii sub propriis sibi angulis colores intermedios dabunt; sique etiam isti radii circa axem suum $O L$ quodammodo rotari concipiantur ita, ut angulos sibi proprios respectu oculi ubique servant, etiam spatium circulare $C A S B$ colores istis angulis respondentes exhibebit, dabiturque Iris secundaria. Denique quod ratio, & ordo colorum in diversa luminis refrangibilitate fundetur, inde patet, quod ex hac diversa refrangibilitate oriatur diversitas angulorum, sub quibus determinati coloris radii efficaces ad oculum deferuntur.

503. Ex Iridis genesi hoc modo declarata sequitur I. In nostris regionibus Iridem videri nunquam posse Austrum versus: Iris enim nunquam conspicitur, nisi in regione soli sic opposita, ut spectator medius sit solem inter ac Iridem, qui situs nostris in regionibus Austrum versus nobis nunquam obtingit.

II. Quoniam linea $O L$, radiis incidentibus parallela, est axis conici, in cujus basi Iris apparet, si sol in ipso horizonte fuerit, etiam centrum Iridis erit in horizonte; proin hæc semicirculum dabit. Sole sensim ascendente centrum Iridis magis identidem infra horizontem descendet, atque ideo minor semper circuli portio ab Iride præsentabitur, donec sole ultra 42. gr. & 2. min. supra horizontem elevato, & propterea Iridis centro totidem gradibus infra horizontem depressio Iris interior penitus evanescat, quod ipsum fiet de Iride exteriore, dum sole ultra 54. gr. 57. min. elevato centrum Iridis totidem gradibus infra horizontem fuerit. Unde etiam patet, cur in æstate circa meridiem nunquam appareat Iris Boream versus, quia nimirum sol ul-

tra 54. gradus supra horizontem tunc existit. Denique, cum mutato situ spectatoris simul etiam mutetur axis, & centrum Iridis, spectatorum quilibet aliam Iridem, si-ve ex aliis guttulis provenientes videbit.

III. Cum Iris apparere nequeat, nisi in nube ros-
cida, si nubes hæc, aut potius pluvia ex nube decedens
totum spatium $F M A N G$ impleat, Iris utraque inte-
grum arcum sistet; si nubes ista sit quidem superius circa
 $A B D E$, sed non sufficienter extendatur etiam ad la-
tera $T M, N V$, apparebunt Iridis vertex, non tamen
crura; si demum nubes solum sit in spatio inferiori $F T$
 $V G$, crura videbimus, non vertex; & quoniam plu-
via ex nube in terram usque decedit, spectator aperta
in planitie crura Iridis horizonti insistere videbit. Quod
in guttulis pluviae, id ipsam fieri potest in guttulis ro-
ris, virenti alicui prato insidentis, aut fontis salientis,
dum hujus guttulæ dispersæ ex alto decidunt, & sol
debito situ suos in istas radios vibrat.

IV. Iris multo erit vivacior, si obscura quædam nubes
post pluviam consistat: si enim nubes hæc esset lucidior,
per guttulas pluviae translucens ipsius splendor Iridem vel
extingueret, vel debilitaret. Hinc tamen inferri haud
potest, colores Iridis ab ipsa illa nube obscura proveni-
re; si enim arcus horizonti insit, & post illius crura
urbes sint, aut sylvæ, etiam hæc per Iridis colores tra-
lucent, nulla hic nube obscura præsentē.

V. Quoniam Iris secundaria præter duplicem refra-
ctionem etiam exigit duas reflexiones, in gemina autem
hac reflexione radii non pauci e guttulis pluviae egrediun-
tur, fieri necesse est, ut radii plus debilitentur, quam in
Iride primaria: unde etiam colores in Iride secundaria
cæteris paribus semper minus vivaces sunt, quam sint in
primaria; imo si jam in hac colores fuerint debiliores, se-
cundaria sæpe ne apparet quidem, quod tunc maxime fit,
quando nubes per pluviam translucens sat obscura non est.
Ex quo ipso patet, cur rarissimo appareat Iris tertia:
hæc enim ut videri queat, debent in gutta fieri tres re-
flexiones, & duæ refractiones, proin lumen magis etiam,
quam in cæteris, debilitari.

VI. Quandoque etiam formatur Iris a radiis lunari-
bus eo modo, quo de radiis solaribus dictum hucusque
est, in nubem rosicidam de nocte incidentibus. At, quia
lumen a luna reflexum per se jam satis debile magis ad-
hue

huc debilitatur per reflexionem & refractiones ad efficiendam Iridem requisitas, colores hujus Iridis sunt admodum debiles, & vix in plenilunio sufficiunt ad oculum ita afficiendum, ut hic colores satis distinguere queat.

§. II.

DE HALONE, PARELIIS, ALIISQUE.

504. *Halo* vox græca latinis significat coronam, seu circulum quemdam lucidum, qui noctu circa Lunam, aliaque sidera illustriora, de die quandoque etiam circa Solem conspicitur. Interdum Halo unius tantum coloris albicantis nimirum est, quandoque etiam multicolor ferme, ut arcus Iridis. Nunc unus, nunc plures circa idem astrum apparent halones, nunquam tamen, nisi cælum tenui aliqua nube, aut nebula potius, aliisve vaporibus fuerit obductum. Unde satis liquet, quæ sit meteoris istius origo; nempe dum radii ab astro, quod halone cingitur, emissi *sa, sb* (Fig. 76. Tab. VIII. incident in bullulas *a, b* aeris vaporosi *AB*, in istis bis refracti sub certo angulo ad oculum in *O* perveniunt. Idem est de radiis, qui in proximas his bullulas incident. Et quoniam similes bullulæ in toto spatio circuli, radio *Ca*, aut *Cb*, describendi, ubique existunt, radii undique ad oculum sub eo angulo refracti exhibebunt isti circulum lucidum, jataque ita habebitur halo simplex.

Quodsi in bullulas remotiores *c, d*, incident radii *sc, sd*, atque isti, dum post duplicem refractionem, & triplicem reflexionem ad oculum in *O* pertingunt, adhuc sat efficaces sint, alter jam circa idem astrum apparebit halo. Si fors plures ejusmodi nubes rariores a se separatæ sibi quodammodo incumbant, ex qualibet oriri halo poterit aut simplex per duplicem refractionem, aut etiam duplex accedente in aliis bullulis triplici reflexione. Esse hanc halonum originem, inde etiam inferri potest, quod, dum noctu vapor aquæ calidæ candelam inter, & oculum ascendit, flamma candelæ eleganti halone cinctâ compareat; quin etiam vitrum oris halitu obnubilatum eidem flammæ halonem conciliat. Major vel minor halonum amplitudo dependet tum a majore vel minore distantia nobis ab oculo, tum etiam a majore vel minore densitate bullularum: si enim istæ sunt densiores, radii luminis in

his magis refringuntur, sicque ex ampliori spatio ad oculum pervenire poterunt. Cur autem astrum halone cinctum, licet vel ipsum, vel nubes ulterius progrediatur, semper tamen in halonis centro existat, ratio est, quia progrediente vel astro, vel nube aliæ atque aliæ continuo adsunt vaporis bullulæ, æque dispositæ ad lucidos halonis circulos efficiendos.

505. Diverfos colores quod concernit, isti ex principiis de iride datis facile deducuntur. Nempe dum radii in transitu per bullulas refringuntur, hoc ipso etiam, siquidem refractione aliquanto major sit, in colores suos separantur: proin si ex bullulis *a, b* post refractionem ad oculum in *O* perveniant radii rubri v. g. omnium minime refrangibiles, ad eundem oculum ex bullulis *m, n* non nihil remotioribus pervenire poterunt radii alii magis refrangibiles. Et, si ex bullulis *c, d* facta triplici reflexione & debita refractione ad *O* pertingant radii violacei, radii rubri minus refrangibiles illuc pertingere poterunt ex bullulis *r, t*. Quodsi jam undique astrum aliquod ringatur ejusmodi bullulis, ex omnibus æqualiter ab astro distantibus similes radii instar coni ad oculum pervenient, atque ita dabunt halones rubro, ac violaceo colore lucentes. Si bullulæ sint majores, aut magis ab oculo remotæ, aut tantæ densitatis, ut debita colorum omnium separatio fieri queat, halo, saltem qui a sole provenit, omnes colores iridis præsentabit; si vero bullulæ sint vel nimis exiles, vel oculo propiores, aut talis densitatis, ut modica refractione, proin neque debita colorum separatio fiat, halo quidem lucidus, at nullo distinctus colore erit.

506. *Parelia* est spuria solis imago, juxta solem verum quandoque conspicua. Numerus illorum non idem semper; sæpe unum duntaxat, alias plura simul comparant adeo, ut teste Scheinero Romæ aliquando septem ejusmodi soles spurii sint observati. Plerumque, dum isthæc Parelia apparent, sol pluribus circulis, seu halonibus cinctus est, cælum vero pellucida quadam nebula obductum. Hinc inferunt, circulos illos, in quibus tum sol verus, tum parelia existunt, oriri ex radiis solis in vaporibus nebulae varie refractis, & reflexis. Quin etiam parelia, quæ plerumque videntur in concursu seu sectione halonum, a radiis tum refractis tum reflexis provenire censent, dum in loco sectionis copiosius lumen concurrat,

currit, proin etiam copiosius ad oculum, imo etiam in alias adhuc circuli ambientis partes reflecti potest, ut adeo ex partibus ita copiosius illuminatis imago aliqua solis regeri ad oculum debeat. Quia vero parcella plerumque tempore hyberno apparent, putant non pauci, quod vaporum particulæ, ex quibus imago solis reflectitur, saltem ex parte sint glaciatae, ex parte autem jam eliquatae, atque ita aptissimæ ad solis radios copiosius reflectendos. Cum parelliis conveniunt *Paraselenæ*, quæ sunt lunæ spuria præter veram in cælo subin conspicuæ.

507. Hic dicta uberius declarantur in Figura 77. Tab. VIII., quæ exhibet celeberrimam illam parelii apparitionem, ab Hevelio anno 1661. 20. Februarii sub horam 11. observatam, atque sex spuriiis solibus illustrem. Solem verum existentem in A circumdabat halo *b c d e*, 45. circiter graduum, atque iridis colores referens. Circa minorem hunc halonem erat alter amplior *n s m*, diametri duplæ. Punctum Zenith C erat centrum alterius circuli lucidi *e t c*, horizonti paralleli, transeuntisque per verum solem in A, qui tunc totidem gradibus supra horizontem erat elevatus, quot gradibus circulus ille lucidus undique distabat ab horizonte, videlicet 25. gradibus; hic tamen circulus non videbatur intra aream *e A c*, sed solum in punctis, quibus halonem hunc minorem intersectabat, nempe in *e* & *c*, in quorum quolibet sol spurius, seu parelion videbatur candis quodammodo longioribus instructum, quæ per lucidum illum circulum horizontalem porrigebantur hinc versus *m*, illinc versus *n*. Idem hic circulus horizontalis intersectabatur a duobus arcibus alterius circuli *p o* & *q r*; & in quovis sectionis puncto *o*, & *r* denuo sol spurius apparuit. Quintus sol his similis videbatur in *t e* regione veri solis septentrionem versus. Sextus denique sol, isque coloratus existerat in *b*, ubi halonem interiorum *b c d e* contingebat arcus *f b g*. Demum exteriorum quoque halonem in *s* secabat alius arcus *h s i*, quin tamen in *s* notata fuerit imago solis.

508. Quod jam hoc in phænomeno attinet ad circulos soli concentricos, ii aliud non sunt, quam halones eo modo geniti, quo istos generari diximus Num. 504. Halo tamen ille remotissimus *p o r q* fors ex radiis reflexis potius, quam refractis ortus fuerit. Circulus lucidus *e t c* inter halones numerari non potest; quia halo astrum suum ita cingit, ut hoc in medio, seu centro illius existat

stat. Iste itaque circulus a radiis reflexis ortum habuerit, dum radii solares in corpuscula vaporis, quo cælum circa verticem tunc obtegebatur, ita inciderint, ut ex illis tanquam globulis minutissimis radii sat copiosi, ac inter se commixti ad oculum potuerint reflecti, sicque ea cæli pars præ cæteris lucida apparere debuerit. Ea ipsa cæli pars instar annuli, circa nostrum Zenith veluti centrum suum efformati, lucida apparuit, quia ex iis duntaxat vaporum corpusculis, quæ certo intervallo a vertice nostro undique æqualiter distant, incidentes solis radii ita ad nos reflecti poterant, ut angulus reflexionis fuerit æqualis angulo incidentiæ. Reliqui etiam arcus *f b g*, & *h s i* ex radiis tum reflexis tum refractis orti fuerint. Hoc supposito putant non pauci, parelia seu soles spurios non aliunde provenire, quam ex intersectionibus halonum maxime per circulum illum lucidum factis, confusisque radiis ita, ut ob geminatum lucem spatia illa sectionum aliquanto splendidiora, ceu imago soli similis, appareant. Rationem dant, 1. quia parelia nunquam, aut vix unquam comparere constat, nisi una, aut pluribus coronis sol cinctus sit, æque ab aliis circulis intersecantur. 2. Quia parelia videntur in intersectionibus arcuum, ut data Figura ostendit. 4. Quia figura parelii minus rotunda, sed veluti lacera apparere solet.

509. Verum cur in puncto *t* sol spurius apparuit, etsi ibi circulus a nullo alio fuerit intersectus? Respondent, cum alia parelia ostendant, in intersectionibus illis oriri soles spurios, etiam hic merito supponi posse, datam fuisse aliquam intersectionem ab alio circulo, etsi is forte ob distantiam satis discerni haud potuerit, quod confirmant ex observatione paraselenarum facta Lipsiæ 1684. 24. Januarii, ubi in superiore annuli parte spurix duæ lunæ comparuerunt sine arcu interfecante; quia tamen inferius positus semicirculus suis curibus aptissime congruebat illis punctis, in quibus paraselenæ istæ apparuerant, conjectura utique verosimillima est, halonis ejusmodi obscurioris continuationem usque ad puncta illa pertigisse. 2. Cur in puncto *s* nullus apparuit sol spurius, etsi ibidem data fuerit intersectio gemini circuli? Respondetur, quod, cum & circulus *n s m*, & arcus *h s i* minus lucidi fuerint, quam cæteri, ob nimiam tum solis veri, tum etiam spuriorum vicinitatem parelii in illo puncto re ipsa existentis lux modica fuerit quasi absorpta. 3. Cur in puncto *n*, & *m*, in quibus

quibus pariter data fuit intersectio, nulli apparere soles spurii? Dicunt, quod imago solis ibidem efformanda, aut etiam efformata, absorberi debuerit a lucidis illis caudis, quas parelia in *c* & *c* existentia illucemiserunt. Undenam autem gemina isthæc canda lucida sit exorta, difficulter determinabitur. Putant aliqui, causam esse, quod radii solares per quosdam nubis hiatus trajecti diversimode reflectantur. Quæ de pareliis dicta hic sunt, applicari facile possunt ad paraselenas, seu lunas spurias.

570. *Aurora* lux illa, quæ solis octodecim adhuc gradibus infra horizontem existentis ortum prævertit, provenit a radiis solis in atmosphæram terræ emissis, in qua illi varie refracti & reflexi ad oculum perveniunt. Crescit lux hæc eo magis, quo sol horizonti sit propinquior, donec sol horizontem jam prope stringens plenum nobis diem asserat. Sic etiam tempore vespertino, sole infra horizontem jam depresso, iidem solis radii pari modo in atmosphæra refracti & reflexi ad oculum illam lucem efficiunt, quæ *Crepusculum* dicitur, quæque, quo altius sol descendit, eo magis sensim minuitur, ac demum omnis evanescit, quando sol ultra octodecim gradus infra horizontem existit. Hinc quoniam respectu nostri, ut ex ipso situ sphæræ intelligi facile potest, sol occidens ad altitudinem 18 graduum citius pervenit, dum est in æquatore aut infra hunc, quam dum est in tropico canceri, patet, cur tempore æstivo crepuscula sint diuturniora, quam tempore hyberno; qui vero circa polos habitant, cum ea ipsis sit sphæræ obliquitas, ut per aliquod hebdomadas, aut etiam menses sol infra horizontem eorum ad 18. gradus nunquam descendat, per integras hebdomadas ac menses auras & crepuscula continuo sibi succedentia habere debebunt.

DISSERTATIO III.

DE ELEMENTO AQUÆ.

Naturam inprimis aquæ in genere, tum diversas quasdam aquas in specie, marinam præcipue, & fontium ac demum meteora aquea hic expendemus.

ARTICULUS I.

NATURA AQUÆ IN GENERE.

511. **D**E hac optime Cl. Boerhaavius, vix quemquam esse, inquit, qui ex ipso usu quotidiano non judicet, aquæ naturam probe sibi esse perspectam; at, si aquæ indolem altius scrutari libeat, vix esse in rerum natura rem ullam, cujus indolem difficiliter agnoscamus, idque eo potissimum ex capite, quod adeo difficulter aquam a cæteris corporibus, aut hæc ab illa possumus separare. Ex iis tamen, quas aqua communiter exhibet, notis sic illa definiri potest: Aqua est corpus fluidum & humidum, diaphanum, saporis, odoris, colorisque expers, terra levius, aere gravius. Quodsi igitur aqua opacitatem aliquam, saporem, odorem, caloremve interdum præferat, id particulis heterogeneis aquæ immixtis est adscribendum: ut enim nihil dicam de aere, & igne, quos aqua semper in se continet, ut antlia pneumatica, machina electrica, atque etiam aquæ fluiditas ostendit, plerumque etiam alia substantia extranea aquæ inest, e. g. metallica, vitriolica, salina, oleosa, sulphurea &c., id quod subinde sapor, aut odor, semper autem operationes chemicæ abunde demonstrant.

512. Potest tamen aqua ab inquinamentis, quæ habet, purgari variis modis; 1. Percolatione, dum per arenam puram, aut filices transmittitur. Percolatur etiam per chartam bibulam, aut lapides arenosos. 2. Si aqua percolata putrescere sinatur, ut salia volatilia in auras abeant, ac dein destilletur, purior evadit. 3. Purior etiam evadit evaporatione, eoquod calore mediocri crassiora non attollantur. Hinc nautæ maris salis vapores, spongiis ac linteis exceptos, dulces experiuntur. 4. Purgatur præcipitatione, qua efficitur, ut particulæ peregrinæ ad fundum subsidant.

513. Indicia aquæ puritatem cognoscendi communiora hæc sunt. Si aqua sit pellucida, omni colore, sapore, ac odore destituta; si cibis coquendis, linteis dealbandis, & saponi æquabiliter dissolvendo sit idonea. Ad hæc experimenta a Cl. Nolletto, Hoffmanno aliisque instituta docent, quod, si aquæ parum quid de infusione gallarum admisceas, eaque ad colorem rubeum aut violaceum

lacenm declinet, aquæ isti vitriolum Martis, aut particulæ ferreæ immistæ sint; si vero aqua ab infuso oleo Tartari per deliquium assumat colorem & spissitudinem lactis, signum id est, latitare in aqua particulas terreas, ac salinas; sic etiam ferri, aluminis, aut etiam salis in aqua latentis indicium est, si ea colorem mutet affusa ipsi solutione argenti, quæ in spiritu salis petreæ facta sit.

514. Quoniam autem aqua ob immixta sibi heterogenea subin etiam putrescere incipit, atque hujus corruptionis causa potissima sunt insecta, aut vermiculi, quorum femina sensim in aqua excluduntur, aqua pura, & a corruptione immunis præstabitur, si vermiculi enecentur, insectorumque succrescentium occasio tollatur; deprehensum autem est, illam genesim impediri, si vasa, antequam aqua usui servitura repleantur, probe eluantur aqua calida, accensique sulphuris fumo inficiantur, dein vero ipsi aquæ aliquid de oleo vitrioli affundatur. Idem præstitit Hallesius olei sulphuris uncia singulis dollis affusa. Imo si aqua jam computruit, facili emendatione, inquit Boerhaavius pag. 598. salubris iterum redditur, & sine nausea potabilis; quippe unica ad ignem ebullitione intereant, quæ in illa convivunt, animalcula, dein quiete subsidat sex, denique pauci, at meraci, acidi inpersu modice aceat.

515. In sex porro classes dividi aqua solet, quæ sunt 1. aqua *pluvialis*, ex aere nimirum in terram sub forma pluvie delapsa, quo pertinet etiam aqua ex grandine ac nive solutis. 2. *Fontana*, quæ in scaturigine ex terra prorumpit. 3. *Fluviatilis*, quam flumina vehunt. 4. *Putealis*, quæ ex profundis puteis hauritur. 5. *Paludosa*, quæ in paludibus stagnat. 6. *Marina*, quam maria complectuntur. De his nunc aliqua.

ARTICULUS II.

AQUA MARIS, ET FONTIUM.

§. I.

DE AFFECTIONIBUS AQUÆ MARINÆ.

516. **M**are est ingens illa, & profunda aquarum terram nostram ambientium, aut interfecantium moles,

moles, a DEO ipfo collecta, falſa, & amara, variis hinc inde coloribus diſtincta, variisque motibus agitata. Quanta ſit profunditas maris, certo definiri non poteſt; variam illam eſſe, ex bolide conſtat. Salfam autem eſſe aquam maris, experientia teſtatur, eos ſi excipias tractus, qui a fluviis irruentibus, aut a ſcaturigine aliqua alicubi fors erumpente dulces redduntur. Eadem experientia oſtendit, aquas marinas in quibusdam locis magis eſſe ſalfas, quam in aliis; ſic teſte Kircherō mare ſalfum magis eſt ſub Zona torrida, quam in Zonis temperatis, aut frigidis; imo in eodem etiam tractu magis ſalfæ ſunt aquæ inferiores, quam ſuperiores. Neque ſalfum duntaxat, ſed & amarum eſt mare, ac guſtū valde repugnans, naſeamque & vomitum provocans.

517. Salfedinis porro, quæ mari ineſt, cauſa ſunt particulæ ſalinæ mari permixtæ, quod vel ex eo patet, quod, ſi aqua marina deſtilletur, & ope caloris in vaporem abeat, ſal in fundo vaſis remaneat, vapores vero collecti in aquam coeant, aquæ communi non multum abſimilem. Unde ſimul patet, cur pluvia, etſi formetur ex aqua oceani, ſalfa tamen non ſit; quia levi ſolis calore in vapores attenuatur aqua pura, quin ſalia, aliæque particulæ craſſiores attollantur. Multæ præterea regiones ſunt, in quarum littoribus magna ſalis copia colligitur, ſuntque populi complures, qui ſalem e mari repetunt, dum in foſſas ingentes derivant aquam marinam, quæ dum calore ſolis aliquot intra dies in vapores attenuatur, optimi ſalis maſſam relinquit. Amaritiem maris ex ſulphure & bitumine aquis ſimul permixto provenire exiſtunt. Aqua namque ſalfa ſine bitumine amara non eſt, eſt autem cum bitumine; ſic ſi ſpiritus carbonum terreſtrium, qui ſunt ſpecies quædam bituminis, & ſal marinus in aqua e cisternis collecta commiſceantur, aqua hæc ſaporem induit ſapori aquæ marinæ prorſus ſimilem. Putant non pauci, materiam hanc bituminofam potiffimum in cauſa eſſe, cur aqua marina adeo difficulter converti in dulcem poſſit: a ſale enim liberari facile poſſet.

518. In hac jam opinione explicatur I. cur aqua marina inferior ſalſior ſit, quam ſuperior; quia particulæ ſalis craſſiores & aqua gravioreſ magna ex parte petunt fundum: tenuiores tamen aſcendere, atque in poris, & inter moleculas aquæ hærere poſſunt præcipue, quia aqua ſemper agitur. II. Cur eadem ſit magis

gis salſa ſub Zona torrida, quam alibi; quia ſol ibidem ardentior plures vapores dulces identidem expellit, & inſuper ſal in aqua calida fortius afficit guſtum, quam in frigida; præterea in locis ſeptentrionalibus major eſt pluviarum, ac nivium frequentia, plurimorum quoque fluminum perpetua in mare exoneratio. III. Cur navigantibus in mari, eidemque necdum aſſuetis, plerumque gravis cieatur naufea, atque etiam vomitus ſæpe admodum periculofus; poteſt nimirum id provenire a particulis bituminofis cum aere inſpirato attractis, quibus ſi accedat perpetua agitatio, aliaque corpuscula, partim ex fundo maris, partim ex computreſcentibus in mari corporibus exhalata, naufeam iſta, vomitumque ciere poterunt. Utrum particulæ ſalinæ in prima jam creatione mari ſint inſperſæ, an vero ex ſubterraneis ſalium fodinis, minerisque per undarum aſſiſtrum ſint abraſæ, atque in dies abradantur, incertum eſt.

§. II.

DE ÆSTU MARIS.

519. **V**arii equidem ſunt motus, quibus agitur mare; præcipua tamen conſideratione dignus omnibus ſemper viſus eſt ille, quo mare ſtato tempore fluit ad littora, & denuo ab iisdem refluit. Motus hic vocatur *Æſtus maris*, qui deſinitur intumeſcentia, ac detumeſcentia maris ſtatis temporum periodis evenire ſolita, ut proin fluxus ſit intumeſcentia, refluxus vero detumeſcentia maris. Hæc maris intumeſcentia pro varietate regionum & locorum admodum diverſa eſt. Sic in Oceano Atlantico circa Luſitaniam, Hiſpaniam, Galliam, Angliam &c. mare valde intumeſcit adeo, ut ad Londinum 30. pedibus, ad Fanum S. Michaelis ultra 40. dicatur aſſurgere. Circa alia quædam littora aut nullus, aut perexiguus notari æſtus ſolet.

520. Æſtus porro hujus tres ſunt periodi, diurna, menſtrua, annua. *Diurna* conſiſtit in hoc, quod mare intra 24. horas & 50. circiter minuta, ſive intra diem lunarem quibusdam in littoribus bis creſcat, & bis decreſcat. Scilicet dum Luna aliquanto altius ſupra horizontem loci, in quo datur æſtus, jam aſcendit, mare in

incipit intumescere, sicque pergit per 6. plerumque horas, usque dum Luna attigerit Meridianum istius loci; tum per aliquot minuta manet quasi suspensum; elapsis illis denuo incipit detumescere, atque a littore refluit, donec Luna aliquanto propius iterum ad horizontem accesserit. Posito jam tumore suo mare in hoc statu tamdiu consistit, donec Luna uno signo infra horizontem descenderit; tum vero rursus incipit intumescencia, atque augetur, usque dum Luna Meridianum oppositum attigerit; ab hoc digrediente Luna maris tumor decrescit, poniturque omnis, dum Luna uno circiter signo ab horizonte ortivo distat. Quoniam autem Luna intra 24. horas cursum suum diurnum non penitus absolvit, sed quotidie 50. circiter minutis tardius oritur, ideo etiam æstus maris quotidie tot minutis serius incipit, seque Lunæ assurgentis aut descendents vicissitudini ita plerisque in locis accommodat, ut collatis tum motus lunaris, tum æstus marini observationibus constitutæ sint regulæ quædam generales, ac conscriptæ tabulæ, quarum ope in plurimis portubus initium marini æstus intra paucorum sæpe minutorum limites prænuntiari queat.

Periodus *mensstrua* in eo consistit, quod æstus singulis mensibus aliquoties variet: observantur enim æstus maximi in plenilunio, ac novilunio, aut etiam uno vel altero die post; minimi in quadraturis, vel potius uno aut altero die post quadraturas. Et hæc quidem ita contingunt, ut æstus a pleniluniis vel noviluniis usque ad quadraturas decrescant, & vicissim a quadraturis crescant usque ad plenilunium aut novilunium. Denique periodus *annua* in eo sita est, quod æstus cæteris paribus sint maximi circa æquinoctia, minimi circa solstitia.

521. Quæritur jam, quænam sit æstus marini causa. Ad hoc pridem sapientissime respondit P. Caussin noster, æstum marinum esse sepulchrum curiositatis humanæ. Et sane æstus hujus ratio physica tam incerta semper, dubique visa hucusque omnibus est, ut, licet jam tempore P. Ricciolii decem & octo diversæ hac super re opiniones extiterint, eæque multis aliis postmodum fuerint auctæ, nemo tamen facile futurus sit, qui vel suæ, vel alterius opinioni notam certitudinis ausit adscribere. Quæ hoc adhuc ævo celebriores videntur opiniones, tres potissimum.

tiſſimum ſunt. Prima æſtus marini cauſam e cœlo quodammodo repetit, nimirum ab actione aliqua Lunæ; altera eam in terra inquit, dum cauſam æſtus vult eſſe ſubterraneas cavernas & cryptas, quibus aqua nunc abſorbeatur, nunc denuo evomatur; tertia eandem cauſam in ipſo mari reponendam exiſtimat, dum docet æſtum maris provenire a fermentatione maris, ex permixtione, accumulatione certarum materiarum, ſpiruum, ſalium &c. ſtatis temporibus orta. Opiniones has, cum multigenæ eruditionis feraces ſint, ethi ſcopum ſuum fors nulla earum aſſequatur, juverit tamen hic expendiſſe.

EXPENDITUR SENTENTIA PRIMA.

522. Hujus ſententiæ Patroni, ut dictum, æſtus marini cauſam a Luna repetunt; at, dum modum, quo Luna æſtum hunc cauſet, inquirunt, Ipſi denuo in diverſa abeunt. Aliqui cum Cartelio æſtum cauſari volunt a Luna in aquas maris *premente*. In eodem nimirum vortice, cui terra innatat, quique motu velociffimo ab occidente in orientem circumagitur, movetur etiam Luna; moveri autem in hoc vortice non poteſt, quin ampla corporis ſui mole imminuat, ſeu anguſtius reddat ſpatium Lunam inter & terram, per quod materia vorticis fluxu continuo circa terram revolvitur. Spatio illo ſic imminuto æther, ſeu materia vorticis, non ſecus ac fluvius intra ripas ſuas coarctatus, per ſpatium iſtud anguſtius jam majore cum velocitate movebitur, fortioremque tum verſus Lunam, tum verſus terram exeret preſſionem; preſſioni huic cum promptius cedant corpora fluida, aqua maris hunc in modum preſſa in medio quaſi dehifcet, ad latera autem, ſive verſus littora attolletur.

523. Alii cum Newtono maris æſtum repetunt a Luna aquas maris *attrahente*. Suppoſita nimirum mutua corporum in ſe ſe gravitatione, ſeu mutua attractione, eaque diſtantiis proportionata, dum Luna ſupra horizontem elevata jam eſt, vim ſuam in aquas ſibi nunc propiores exeret: aquæ igitur verſus Lunam aſſurgere incipient, eoque amplius ſenſim aſſurgent, quo propius ad Meridianum Luna acceſſerit; hunc ubi attigerit, cum, ut ex globosa terræ marisque ſuperficie ſequitur, ea terræ ac maris pars, quæ ſub iſto Meridiano poſita eſt, præ aliis

Lu-

Lunæ vicinior sit, summa erit aquarum intumescencia, sensim iterum minuenda, quo longius a Meridiano horizontem versus Luna recesserit. Dum autem in hemisphærio superiore aquæ hoc modo intumescant, ob eandem mutuum corporum attractionem etiam in hemisphærio opposito ea aquarum pars, quæ inferiori Meridiano vicinior est, debet intumescere: cum enim aquæ istæ cæteris omnibus longius a Luna distent, etiam minus cæteris a Luna attrahentur, proin minus cæteris ad Lunam accedent, adeoque in partem oppositam attollentur. Fusius hæc pertractat, atque ad phænomena particularia applicat P. Boscovich Dissert. de Maris Æstu, Romæ edita 1747.

524. Alii demum eundem maris æstum putant causari a Luna *intercipiente radios materie gravificæ*, undique in terram & aquas prementis. Opinionis hujus prima quasi fundamenta jecit P. Honoratus Fabri; eam dein excoluerunt P. Franz, ac P. Zanchius Philosophiæ hic, prior etiam Matheseos Viennæ Professor, de orbe literato uterque præclare meritis. Eandem opinionem Philosophia P. Hauser Tom. VI. §. 398. his propemodum verbis sic declarat. Sit in Fig. 78. Tab. VIII. T centrum terræ, Luna in L; circulus O P Q R denotet superficiem maris ubique ad æquilibrium compositi. Æther tellurem ambiens sua vi motrice ad centrum ejus tendit, conaturque ubique se se expandere, utpote in quodam violento compressionis statu constitutus. Quamdiu Oceanus & alia maria, præcipue communicantia, vi ætheris æqualiter ubique comprimuntur, tuentur æquilibrium, & partes, fluidi superficiem constituentes, eadem gaudent altitudine, eadem a centro suo distantia, ac quiete: proin portiones aquæ, R, C, O, P, E, Q, circulum vel sphæram exhibent.

Oriatur jam Luna, & supra horizontem elevata æthereum telluris systema ingrediatur in G H; mox columna æthereæ I K actio versus B intercipitur a corpore lunari: hujus enim moles utut ponatur quinquagies minor tellure, continebit adhuc 53251200. milliaria germanica cubica. Accedit Lunæ densitas tanta, ut ipsos radios solares transmittere nequeat. Item motus rapidissimus ejusdem turbat æquilibrantes ætheris vicini columnas fere, sicut navis stagnantia æquoris strata suo cursu exagitat. Igitur materie gravificæ actio circa Q & R, C & E, aliaque puncta intermedia integro suo vigore prævalebit, urgebitque aquas versus locum, ubi minor renisus,

& destructa reactionis prioris activitas, nempe ad B Lunæ verticali proximum; proinde circulus aqueus contrahetur in ellipsin aliquam O R B Q P, & mare asurget ad B, ubi æstus maximus, deprimetur in F & D.

Quodsi hæc æthereæ pressio inæqualitas augeatur, vel minuatur ex Lunæ distantia, declinatione, aspectibus, item ex Solis æthereum terræ systema prementis, alternantis, aut interpolantis accessu, & situ vario, dabitur æstus varietas viribus hic & nunc agentibus proportionata, nisi per causas alias accidentales ponatur obstaculum, quales esse solent venti, fluentia marina, situs littorum.

Itaque æstus marini causa immediata erit æquilibrium aquarum itatis temporibus immutatum, mediata ætheris mari incumbentis actio inæqualis; occasionalis Luna, ac Sol tum sui corporis objectu, tum motu immutans vires ætheris sibi subjecti, aut obvii. His quoque accenseri valent causæ per accidens variæ, actionem ætheris vel promoventes, ac adjuvantes, vel retardantes, aut regulari effectui obnitentes e. g. Oceani situs, aut littorum dispositio circa altitudinem e. g. gurgites, meatus subterraneos. Item attendi meretur gravitas & libratio aquarum &c. Atmosphæræ tellurem ambientis vicissitudines in gravitate, elaterio &c.

525. Explicatis dein §. 400. & 401. illis, quæ in æstus periodo diurna notantur, varietatibus, sequente §. 402. declarat, cur eodem die æstus bis recurat, sive, cur aqua intumescit in B, simul intumescat in hemisphærio opposito circa A. Nempe sive Luna occupet Meridianum loci B superiorem L, sive inferiorem N datur ætheris actio liberrima & minus impedita in C & E, quam in O & P, vel Q & R: hinc aqua vehementer depressa urgebitur utrinque simul versus B & A, ceu locum, ubi occurrit minor resistantia; in A quidem ob Lunæ in N præsentiam, in O & P, hunc virium defectum participantibus ex vicinia: item ex renisu aquarum affluentium ad O & P columnæ æthereæ jam languentes infringuntur ibi ita, ut actio gravifica versus C & E magis, magisque dominetur, utpote in minorem aquæ residuæ molem distrahenda. Pariter dominabitur versus Q & R, quorsum protrusi copiosius maris tum gravitas, tum impetus sensim elidit ætheris vires gravificas, ac ita versus B imminuit, ut magna ibi fiat

c/c.

elevatio maris, quæ tandem in æstum maximum auge-
tur tum a mutuo occurſu ex R & Q, tum ab excessu
virium collateralium, qui tandem ſolitariæ ætheris ac-
tioni circa B prævalebit; cum ibidem reniſus & moles
aquæ ſucceſſive magis augeſcat, quam ad latera, adeo-
que preſſio ex L verſus B eadem fere proportionem de-
bilitetur, qua fieri amat ex Lunæ præſentia in A. Com-
penſatio nempe utrinque aliqua fit; minori enim circa
A preſſioni æthereæ minor reſpondet circa O P reſi-
ſtentia, & majori circa B preſſioni major circa R Q re-
ſiſtentia.

526. Argumentum porro præcipuum, quo Aucto-
res iſti clariffimi ad ſtabiliendam ſuam opinionem u-
tuntur, hoc eſt: Datur maxima inter phaſes motusque
Lunæ, ac æſtus marinos conſenſio: ergo dicendum,
quod æſtus marini re ipſa cauſentur a Luna, maxime,
cum aſſumpta actione aliqua Lunæ æſtum huiusmodi
ratio ſatis plana reddatur, quæ actione ea non aſſump-
ta reddi nullo modo poteſt. Antecedens patere putant
vel ex eo, quod certæ etiam regulæ a Caſſino præci-
pue ſint ex obſervationibus æſtum erutæ, atque in
tabulas digeſtæ, quarum ope in ſingulis portibus ini-
tium marini æſtus intra paucorum ſæpe minorum li-
mites prænuntiari, quin magnitudo etiam ſingulorum
æſtum prædici queat. Et ſane perpenſa triplici illa pe-
riodo æſtus marini, de qua N. 520. argumento huic viſ
magna ineſſe, videri jure poterit. Sunt tamen, quibus
illud convincens haud eſſe videtur: iſti igitur cum P.
Jos. Khell Phys. Spec. Diſp. II. Art. IV.

527. Reſpondent I. Ex conſenſione duorum inferri
non illico poteſt, unum eſſe effectum alterius. Sic in E-
phemer. Acad. Nat. curioſ. Cent. I. & II. teſtatur D.
Lanzoni, fuiſſe puerum, qui a quarto ætatis anno ad
nonum uſque periodicam quovis menſe diarrhæam paſſus
ſit; ibidem Cent. V. & VI. refert D. Mayerus, labo-
raſſe hominem feбри per annum octavo quoque die ad
Lunæ phaſes redeunte. Fors etiam hic ex habitis antea
obſervationibus potuiſſet quis conficere tabulas, ex qui-
bus morborum periodi ſat certo potuiſſent prædici, id-
que conſtanter, ſi tam conſtans fuiſſet habitudo ægroti,
quam conſtans & ſtabilis eſt mechanismus globi terra-
quei. Dein noctambulorum phænomena, etſi Lunæ
phaſibus exactius quandoque conſentiant, quam æſtus
quo-

quorundam saltem marium, nemo jam Physicorum aut Medicorum adscribit Lunæ, sed periodo incrementis eousque sanguinis, aliorumque humorum copię, ut ea naturę oneri esse incipiat, atque cerebrum præcipue ita aggravet, ut fluidę in illo ac solidę partes æqua & pari libra subsistere nequeant, id quod fufius declarat Cl. Verdries in *Æquilibrio Mentis & Corporis* pag. 87. Et cur non astrum aliquod inquiritur, cujus actioni febris tertianę aut quartanę paroxysmi certa periodo se se excipientes attribuantur? Potuit Sapientissimus orbis Conditor ad emolumenta hominum velle, ut phasēs Lunę essent signa quędam, & indicia, ex quibus navigantes cursum suum dirigendi regulas aliquas desumerent, quin etiam voluerit, has ipsas Lunę phasēs esse causam istorum maris motuum.

528. Respondent II. Tanta non est inter phasēs Lunę ac æstus maris consensio, quanta deberet esse, si illa horum esset causa; si enim Luna esset causa horum æstuum, admitti omnino deberet, 1. quod, ubi & quando est eadem causa, idem etiam debeat esse effectus; proin cum Luna sit causa universalis, eaque necessaria, etiam ubique, & universim debeat dari æstus marinus; 2. quod in locis, in quibus Luna est æqualiter applicata, æqualis etiam debeat esse hic æstus; 3. aut si Luna est uni loco magis applicata, etiam major ibidem debeat esse æstus; 4. quod æstus debeat inchoari, quando incipit actio Lunę, ea cessante etiam ipse cessare debeat ita, ut motus Lunę sese omnino accommodet, & quę sunt alia hujusmodi, quę in causis necessariis passim eveniunt. Utrum autem tanta sit æstus marini cum motu Lunę consensio, ex observationibus, quas Viri Eruditissimi instituerunt, ex laudato superius P. Jos. Khell mox adducendis intelligi poterit. Observationes istę duplicis generis sunt; alię versantur circa fluxum & refluxum maris *regularem*, alię circa æstus maris *irregulares*.

529. De irregularibus habentur sequentia I. Teste Sanderō 1550. æstus maris tota die sex parte Flandrię cessavit, in ostio autem Tamesis, ex adverso nimirum Anglię littore, ter intra novem horas accidit. II. Anno 1669. mare intra tres horas septies circa Weymuthum affluxit, & refluxit. III. Ex observationibus D. Baertii Dunckerckę 27. Febr. 1702. summus æstus sub vespere accidit; verum mare mox iterum aliquot digitis de-

tumuit, denuo tamen intra 49. minuta prima ad eandem altitudinem, in qua prius fuerat, excrevit. IV. In inferiore Normannia 1716. horrenda maris exundatio accidit ab ultima Novembris usque ad 2. Decembris, neque omni hoc tempore ullus refluxus est observatus. V. Ad portum Villæ Flaminiae in Normannia ex adverso Insularum Grenezejæ 1725. 13. Julii insolens maris ad littora motus, & toto in sinu, tres leucas lato, a Villa Flaminia usque Jobur sentiebatur. Summa enim malacia mare cæperat elevari hora tertia pomeridiana, quæ elevatio alias hisce in oris, dum maxima est, solet esse 10. pedum; at hic inter sextam & septimam 5. pedes jam excreverat, cum quasi momento attigit 10. pedes, dein intra 12. aut 14. minuta prima ad 15. omnino pedes ascendit; post 7. circiter minuta denuo decrevit 5. pedibus, atque in hac altitudine duas cum dimidia horas perstitit. Ubi illud adhuc notandum, nihil insolentis hujus motus observatum fuisse Cherburgi 10. leucis ad dextram, aut Cartereti 6. leucis ad sinistram, imo nec Rozeliis tribus duntaxat leucis a memorato portu dissitis, ita Acta Hist. Acad. Reg. 1725. Similis huic æstus insolens eodem anno 29. Junii, quatuordecim non nisi diebus ante, accidit Massiliæ, teste eadem Historia Acad. Reg. V. Tembyi 1749. 13. Julii circa 11. matutinam mari valde humili & tam pacato, ut speculum referret, cœlo sereno accolæ portus repente formidandum tumultum exaudierunt, cumque ad littus properarent, obstupuerunt mare intra unum minutum primum adeo affluxisse, ut in æstu majori solet, atque intra idem tempus refluxisse, septies continua reciprocatione phænomeno repetito. VI. P. Gouye retulit, nautam in freto Caletano bolide observasse maris affluxum durante refluxu. eoquod bolis fuerit repulsa ab erumpente ex fundo aqua. Hæc inquirunt, si a Luna provenire dicantur, diversa omnino, ac irregularis debet esse actio Lunæ, ubi nulla hujus diversitatis ratio adest.

530. De æstibus regularibus habetur I. quod æstus magnitudo non sit ubique æqualis: in Mediterraneo enim, præterquam circa Venetias, Scyllam item, & Charybdim, fere non observatur. In parte septentrionali maris Pacifici nullus æstus accidit, quamvis in parte meridionali sat magnus deprehendatur. Circa Caput Virginis Mariæ ad initium Freti Magellanici 4. orgyis mare assurgit, & descendit regulari æstu intra sex horas, etsi in eodem

eodem freto ad promontorium seu Cap Munday aut nullus, aut vix sensibilis æstus notetur. In aliquibus littoribus mare tanta præcipitatione ingruit, ut ferme momento totum littus occupet, in aliis intumescit lente. II. Ex observationibus Cassinorum tardior est refluxus, quam affluxus; sic in nova Francia mare 5. horis intumescit, detumescit per 7.; sed hoc non ubique fit: nam ad ripas Cambayæ utrumque intra duas horas peragitur. In quodam Indico mari quindecim dies mare crescit, totidemque decrescit. Versus polum Arcticum fluxus & refluxus bis diurno tempore, nunquam nocturno; in mari Indico semper nocturno tempore accidit. In portu Macaensi fluxus & refluxus est valde heteroclitus: hic enim 9. ille 3. horis peragitur. Ad ostia Garumnæ mare 7. horis crescit, 5. decrescit. In Nigro Africæ fluvio fluxus quatuor, refluxus octo horas durat. In regno Tunquin ad Batsham mare intra 24. horas semel refluit; bis in mense nullus est æstus. III. Teste Cl. Kühnio in littoribus Suffexiæ & Cantii, Dunes dictis, affluxus & refluxus tribus horis citius accidit, quam in proximo alto Oceano; cum tamen actio Lunæ prius exerenda esse videatur in Oceanum, & ab hoc primum canali Britannico, in quo memorata littora sunt, communicanda.

531. His addunt I. Ipse Cassinus in Hist. Acad. Reg. 1713. fatetur, magnitudinem æstus propinquitati Lunæ non semper respondere: nam observavit ipse, quod Brestæ 24. Martii 1712. æstus fuerit 19. pedum, & unius digiti, qui pede integro, & 5. digitis superat æstum summum observatum 21. Junii, dum Luna propior erat Perigeo. II. Si in Æquinoctiis ideo major est æstus, quia Luna propior est Æquatori, & magis recta agit in Oceanum, majores in Europæ partibus, iis nimirum, quæ magis ad polos accedunt, deberent æstus causari, dum Luna est in Tropico Cancræ, quod experientiæ refragatur. III. Si in noviluniis, ut vult Cassinus junior, ideo majores sunt æstus, quia tunc præter Lunam etiam Sol agit in mare, deberet ob actionem Solis semper, etiam in absentia Lunæ fieri æstus, quod denuo est contra experientiam. IV. Majores æstus non ipsis novi- aut pleniluniis, sed una, duabus, aut tribus etiam diebus post illa accidunt; quandoque etiam maximi sunt die novilunium præcedente. Quin ipse iterum Cassinus fatetur, supponi quidem, maximos æstus ferme accidere in novi- ac pleni-

luniis æquinoctio propioribus, id tamen non conſtanter fieri. Addit conſiderata retardatione ab æſtu unius diei ad æſtum alterius deprehendi multas anomalias, ac retardationis loco dari quandoque anticipationem.

532. Denique huc faciunt obſervationes noſtri P. Babinii, quas intra biennium inſtituit circa æſtus Euripi ad Negropontum celebratiſſimi. Euripi hujus motus aliqui cum æſtu Oceani conveniunt, alii diſcordes omnino ſunt. Per dies 18. aut 19. æſtus ipſius omnino regulares ſunt ita, ut intra 24. aut 25. horas una cum Oceano, aut mari Adriatico bis affluat, & bis reſſuat; duratque affluxus horas 6., totidemque reſſuxus, æſtate & hyeme, ſeu venti ſpirent, ſeu tranquillum ſit pelagus. Undecim vero dies ſunt, quibus æſtus omnino irregularis eſt ita, ut intra diem naturalem undecies, quandoque etiam decies quater fluxum & reſſuxum patiatur. Id præterea notandum, quod mare in his æſtibus ferme ultra pedem non aſcendat, raro ad duos, dum Oceanus ſæpe ad 50. pedes elevatur; item, quod inter fluxum & reſſuxum aliquod temporis intervallum intercedat, quo aqua tranquille adeo ſtagnat, ut plumæ & paleæ in eadem immotæ quieſcant; denique quod in ſoliſtitiiſ & æquinoctiis æſtus Euripi hujus nullam mutationem ſubeant.

533. His omnibus ſimul ſpectatis, putant, non eam omnino inter motus Lunæ, ac æſtus maris, ſive horum magnitudo, ſive tempus initii, ſinis, & durationis, ſive demum illorum ad Lunæ phaſes relatio attendatur, dari conſenſionem, quæ evincat, Lunam æſtum hujusmodi cauſam eſſe. Addunt adhuc argumenta quædam peculiaria. I. Si ab actione Lunæ cauſarentur periodici hi æſtus maris, ab eadem etiam cauſari deberent venti proſus regulares, motui ac phaſibus Lunæ conſentientes: ſi enim Luna vel premento, vel attrahendo, vel radios gravificos interceptiendo maris, fluidi denſioris, æquilibrium ita turbare poteſt, ut illud ad motus tam ordinatos concitetur, poterit, ac debet etiam aeris, fluidi rarioris, ac Lunæ ipſi propinquiore æquilibrium turbare, quo turbato ordinati motus aeris, proin venti regulares ciebuntur. II. In ſyſtemate Cartefii, omiſſis iis, quibus Cl. Newtonus vortices Cartefianos pridem diſjecit, ſi etiam Luna in aquas premeret, aquæ tamen non in ea parte, quæ Lunæ ſubjicitur, ſed utrinque ab illa in diſtantia quadrantis circuli deberent intumeſcere; experientia autem oſtendit,

Sit, aquas sub ipso corpore lunari assurgere, majoresque in Oceano dari æstus, dum Luna Meridiano est propior. III. In systemate Newtoni, inquit Clar. Eulerus Inquis. in causam Fluxus &c. §. 5. 15., non assignari causam physicam, sed recurri ad vires occultas. Neque satis intelligitur, cur non universum Oceanus alius intumescat sub Æquatore, quam sub plagis inde remotioribus; eoquod Luna illi directe, his tantum oblique incumbat &c. At videri poterit Dissertatio P. Bosceovich, de qua Num. 523. IV. In systemate Lunæ radios gravificos intercipientis, si per hoc sit aliqua imminutio pressionis materiæ gravificæ, fors illa notari etiam deberet in pendulis. Difficilis videtur esse explicatio ejus, quod, dum in superiore hemisphærio ingruit æstus, idem fieri debeat in inferiore, de quo N. 525. Videatur tamen Philosophia P. Hauser Tom. VI. §. 418. & seqq.

EXPENDITUR SENTENTIA SECUNDA.

534. **E**st hæc P. Josephi Khell, de quo jam supra. Ponit is, dari meatus subterraneos, gurgites, & canales diversæ amplitudinis, in quorum plurimis aquæ unius maris communicent cum aquis maris alterius. Isti dum aquas maris ingurgitant, dabitur refluxus; dum easdem iterum regurgitant, & quodammodo evomunt, dabitur affluxus, atque ita ex perpetua reciprocatione ingurgitationum, & regurgitationum nascentur æstus marini. Et quidem dari ejusmodi meatus, & canales subterraneos, nemo erit, qui neget, probaturque id variis observationibus.

I. Charybdis Norwegica bis quotidie per sex horas cum refluxu Oceani aquas sorbet, cum ejusdem affluxu ingentibus jactibus eructat. Canalem hunc, cujus vortex ad 5. milliaria diffunditur, tantæ capacitatis esse ostendit Cl. Kühnius, ut, si unicum, & non divisum in plures credamus, diameter illius mille ad minimum pedes complecti debeat. Huic similes erunt Charybdis & Scylla Siciliæ; Euripus ad insulam Negroponte. In Nordlandia quoque plures esse vortices, refert D. Frankenau. Ad ostia Gangis mare gurgitibus abundat, quos ægre peritissimi Nautæ devitant. In sinu Magellanico, ac illo Maris Guineæ, quem Fernando Pao dicunt, vortices sunt profundissimi.

II. In infulam S. Helenæ feu ex Africa, a qua 17. gradibus abeft, feu ex Brailia, a qua diftat 26. gradibus, per 300. & amplius milliaria aquæ ductus fubterraneus procurrit. Sic etiam mare Cafpium ad Ferebath cum finu Perfico ad Balfaram plus quam 11. gradibus, adeoque 175. milliaribus germanicis diftante, tefto canali communicat teftè P. Avril in itinere per diverfas Europæ & Afiz regiones pag. 73. Idem mare Cafpium cum Euxino communicare oftendit Paradia in libello fuo, quem de mari Cafpio infcripfit. Communicationem Mediterranei cum mari Rubro probat Delphinus in mari Rubro notis quibusdam infignitus, ac poftmodum teftè Abulhaffeno in mari Mediterraneo captus.

III. In Stellæ montis Hispaniæ cacumine locus eft, e quo sæpius naufragarum navium tabulæ extrahuntur, etfi 12. leucis a mari diftet; æftum quoque idem lacus cum mari participat. Similem cum mari Lufitanico communicationem habere lacum a *Lucis* dictum in Tyroli, peramæno dialogo 1761. edito oftendit P. Jof. Unterrichter Philofophiæ tum Oeniponti Profeffor ex iis maxime phænomenis, quæ in lacu ifto eveniøre, dum Lufitania paucis abhinc annis horrendo terræ motu bis concuteretur.

IV. Refert D. Mairan in Hift. Acad. Reg. 1717. 16. Junii inter horam 8. & 9. matutinam Agathæ, quæ urbs eft Languedociæ, Araurarim fluvium velut momento ita detumuiſſe, ut pons navalis in arena confideret. Perſiſtentes hac in deſiſſione per horæ quadrantem aquæ velociter admodum per tantundem temporis ita intumuerunt, ut uno pede confuetam alias 22. pedum altitudinem ſuperarent, ſed mox ordinario fuo in ſitu conquieverunt. A meridie ſemel iterum, haud tamen adeo multum ſubfederunt aquæ. In utroque autem caſu, ubi aquæ regurgitatæ fuerant, falſas illas fuiſſe compertum eſt. Breſtam inter, & Landernaviam fons eſt, qui tempore affluxus decreſcit, intumeſcit autem tempore refluxus. Hift. Ac. Reg. 1717. Alios ejusmodi fontes alibi eſſe teſtatur Plinius L. 2. c. 6. Plura de his P. Khell l. c. cap. 3.

535. Suppoſito jam, canales ac gurgites hujusmodi complures per totum globum terreſqueum eſſe diviſos, Patroni ſententiæ hujus ex ſolo hoc mechanifmo conſentur phænomena æſtus marini declarare, dum nimirum æſtus ſolitos aliud non eſſe affirmant, quam ingurgitationes & regurgitationes aquarum ſtatis periodis,

dis, nisi causa per accidens aliquid turbet, peractas; æstus vero insolitos esse similes in - & regurgitationes per canales & gurgites, in quibus certæ periodi varias ob causas non servantur, atque ut systema suum probent, sic discurrunt. I. Systema hoc est simplicissimum, dum ab unica causa phænomena æstus omnia repetuntur, ubi tamen alii ab alia causa repetunt æstus solitos, ab alia insolitos; imo etiam ad explicandos æstus ordinarios plures sæpe causas agglomerant.

II. Juxta alios mare Adriaticum, & huic similia, lacus item & fontes nullum habent æstum, quia sunt portiones aquarum minores, in quibus actio Lunæ, aut interceptio radiorum gravificorum sensibilis esse nequit: igitur si in quibusdam maribus angustioribus, aut in lacubus & fontibus æstus observantur, quemadmodum in non paucis eos observari ex Numero præcedente constat, illi fient ob communicationem per canales & gurgites subterraneos cum mari, cujus aquæ ingurgitatæ in canali, qui ad fontes istos aut lacus pertingit, aquas istorum attollent, dum iterum regurgitantur aquæ maris, aquas fontium & lacuum subidere facient. Si autem isti æstus tribui debent ingurgitationi & regurgitationi per canales subterraneos factæ, cur non & cæteri istis omnino similes?

III. Aqua tempore affluxus ex imo movetur: igitur æstus a regurgitatione proveniunt. Ant. probant 1. Tempore fluxus exauditur tumultus maris, & quidem ex collisione concharum, quod auribus percepisse testatur Kircherus L. 3. Mundi subterr. c. 4. In Actis etiam Hassnienfibus observ. 6. legere est, in insula Hammeroen Provinciæ Norwegiæ Salten rivum esse, de quo Christianus Jani oculatus testis ad Bartholinum retulit, eum crescente Oceano tanto cum strepitu crescere, ut fragorem machinarum bellicarum æmuletur. De hujusmodi fragoribus tempore affluxus audiri solitis multi alii testantur. 2. Cl. Kühnius ait, in vicinia littorum Suffexiæ observatum esse experimentis non dubiis, prope ad fundum maris jam refluxum esse, dum affluxus adhuc superiori in mari perdurat, & vicissim, dum superiori in aqua adhuc refluxus videtur, prope fundum maris jam denuo incipere affluxum; quo pertinet etiam id, quod supra Num. 529. observ. VI. est indica-

tum. Confirmationis loco addunt obſervationes illas medicas, de quibus N. 527.

536. Sententia ſic probata etiam phænomena æſtuum ſatis convenienter explicari poſſe exiſtimant. Et quidem circa æſtus ſolitos, ſeu regulares, ſic diſcunt. I. *Æſtus magnitudo non ubique eſt æqualis*; quibusdam in maribus nullus eſt. Nempe ubi vel nulli, vel ſaltem non tam ampli ſunt canales, & gurgites, ex quorum ingurgitatione & regurgitatione oriri poſſet in- aut detumefcentia maris admodum ſenſibilis, ibi etiam nulli ſunt æſtus; majores ſunt, ubi vel plures vel ampliores ejusmodi gurgites & canales natura effodit; ubi vero hi minores aut pauciores, ibi etiam minores ſunt æſtus. Aut ſi mare, in quo nullus ſentitur æſtus, ponatur tamen habere aliquas voragineſ, ac canales, fieri poſſeſt, ut iſti vel tantum ſint ſorbentes, qui aquas in fluviis, aut aliunde advectas alio devehant; vel totidem erunt ſorbentes, quot ſunt exurgitantes, ut adeo exurgitantes tantundem aquæ mari inferant, idque continuo, quantum per ſorbentes perpetuo alio derivatur, quod dum ſit, mare nunquam intumeſcit. Verosimilius ſaltem hoc eſſe cenſent, quam quod Luna in partem meridionalem v. g. maris Pacifici, quod ordinatim æſtuat, actionem ſuam exerat, non vero in ejusdem maris partem ſeptentrionalem, ubi nullus eſt æſtus.

II. Cur reſluxus ſit tardior, ſaltem plerumque, quam affluxus, varia poſſeſt eſſe ratio, vel quod aer ſub terræ cryptis latens per calores ſubterraneos vehementer expaſus ingurgitationi fortius reſiſtat, regurgitationem vero promoveat; vel quia, dum reſluxus in aliquibus canalibus incipit, in aliis adhuc perdurat affluxus; vel quia aquæ inferiores, utpote magis ſalſæ, gravioreſ ſunt, quam ſint ſuperioreſ, hinc etiam difficilius ſuis in canalibus promovendæ. Cæteras quoque irregularitateſ inter affluxum & reſluxum aptius ex ſtructura canalium, eorumque cum aliis communicatione, quam ab actione Lunæ in eadem diſtancia conſtanter æquali repeti poſſe exiſtimant.

III. Quod detur conſenſio aliqua inter æſtus maris, & motus, ac phaſeſ Lunæ, id equidem oſtendere, a-
ſunt, quod aliqua æſtus phænomena & motus Lunæ ſint effectus ſimultanei, quin tamen ſequatur, unum eſſe effectum, aut cauſam alterius: ſi enim ſtructura
gur-

gurgitum ac canalium talis sit, ut ii sex horis recipere aquas possint, donec vel per agglomerationem aquarum, vel per compressionem aeris in gurgitibus simul latentis, vel per ignes subterraneos denuo urgeantur ad egressum, eumque iterum per sex horas continuandum, habebitur debita periodus æstuum, & illa, quam notamus, eorum cum motibus Lunæ consensio. Si structura canalium alia sit, periodus æstuum alia erit, quemadmodum est in mari illo Indico, in quo 15. diebus durat affluxus, totidemque refluxus. Sic etiam in noviluniis aut pleniluniis majores esse possunt æstus, quia præter memoratas mox causas universales aquæ per alios etiam canales minores intra septem, octove dies ad gurgitem aut canalem ampliorem delatæ majorem causare intumescantiam poterunt.

IV. Cur, dum est affluxus in nostro hemisphærio, etiam affluxus sit in hemisphærio sub eodem Meridiano directe opposito, rationem dant, quod eodem tempore voragines in opposito hemisphærio aquas regurgitent, quo id faciunt in nostro, ferme, sicut eodem tempore, quo per Aortæ truncum ascendentem sanguis in superiores humani corporis partes agitur, per ejusdem truncum descendentem in inferiores dispensatur. Hac ratione æstus in utroque hemisphærio erit isochronus.

537. Multo adhuc facilius explicari a se posse existimant æstus irregulares. Sic I. de Euripo dicunt, ejus irregularitates dari posse, si præter gurgitem, ex quo oriuntur æstus soliti, alii adhuc dentur gurgites, qui aut simul, aut per vices eo instructi sint siphonismo, qualem in fontibus statò tempore intermittentibus omnes admittunt, ut ex §. sequente N. 556. intelligi poterit. II. Ad ea, quæ N. 529. allata sunt, ajunt, varias ibi causas per accidens potuisse intervenire; & de primo quidem dicunt, in canalibus, quorum regurgitatione alias mare ad littora Flandriæ æstuat, turbatum tunc aliquid esse casu alicujus rupis, cujus ruina, donec rupes vel perrupta, vel ignibus subterraneis calcinata fuerit, vel alio quocunque modo obstructum ad tempus fuisset os canalis; quod autem in adverso littore Angliæ intra novem horas æstus tunc ter acciderit, ex cavernarum communicatione, variisque aquæ ab ordinato fluxu præpeditæ impulsibus provenisse. Ad secundum putant denuo, id factum, quod vel in canalibus aliquid turbatum ad

tempus fuerit, vel quod ex aliis canalibus aut cavernis in canalem ordinarium undarum aliquid a causa accidentali fuisset intrusum. Luna certe, inquiunt, intra tres horas non septies ad eundem Meridianum accesserit. Ad tertium. Vespere æstus erat maximus, quia tunc aer subterraneus quacunq̃ue ex causa vehementius expansus, aut aquæ adverso e canali copiosius affluentes maris illius undas ad exitum urgebant; hæc altius non nihil elatæ reprimebant urgentes, atque ita aliquas quasi oscillationes causabant. Universim, quando æstuum periodi vel mutantur, vel ad tempus interrumpuntur, ratio esse poterit, quod in canalibus communicantibus quandoque accumulentur variz materie, quibus ordinatus fluxus impediatur; istæ dum repetitis fluxibus sublatæ fuerint, denuo ordinatæ erunt æstuum periodi. Similia certe in variis morbis, atque in corpore humano sæpius observare est.

538. Verum, quamvis non diffitear, multo certius esse, quod in globo terraqueo dentur gurgites, & canales subterranei quamplurimi, quam quod Luna agere in terras possit; quamvis præterea sat certum esse videatur, aliquos saltem maris, & lacuum æstus ob ejusmodi gurgites & canales dari, tamen ego quidem satis perspicere hucusque non potui, quæ demum sit causa illa, quæ aquas his canalibus conclusas ad motus ita saltem ordinatos concitet, ut æstus plerique motui atque etiam phasibus Lunæ admodum exacte, idque constanter per tot jam sæcula semper consentiant. Certe statas æstuum maris periodos tum terræ motibus, tum aliis causis per accidens non raro per plures etiam horas fuisse interruptas, multumque turbatas, constat; neque tamen propterea aut citius, aut tardius postmodum advenere hi æstus, quam venerint ante, quod tamen ordine semel turbato hoc in systemate omnino fieri debuisse existimo: si enim aquæ serius ingurgitantur, serius etiam eadem regurgitari debent, atque ita ordo æstuum a motu Lunæ semel deflectens cur ad hunc mox iterum reverti debeat, aut etiam possit, haud intelligo. Iisdem terræ motibus quosdam canales subterraneos hic ruinis fuisse oppletos, alibi novos fors apertos, suspicari pronum est; neque tamen scimus, æstus iis in locis, in quibus notati antea fuerant, unquam cessasse, aut illos alibi, ubi observati antehac nulli unquam fuerant, sese prodidisse.

EXPENDITUR SENTENTIA TERTIA.

539. **H**Æc, ut dictum N. 521., æstus marini causam potissimam in ipso mari repositam esse existimat, dum ait, aquæ marinæ, prope fundum maxime, permixtos ubique esse spiritus nitri, vitrioli, sulphuris, salis, ac bituminis; spiritus isti dum fermentare inter se, atque ideo effervesce incipiunt, simul effervescent aquæ maris, atque ita intumescences causabunt affluxum; cessante fermentatione spirituum cessabit etiam effervescencia maris, atque aquæ antea ad littus propulsæ denuo in altum resluent. Undenam autem ista fermentatio ac effervescencia statis temporibus oriatur, si determinandum hujus sententiæ Patronis sit, haud satis inter se conveniunt; plerique tamen eorum putant, eam oriri a Luna, cuæ luminis sui tepore particulas spirituum illorum resolvat, dilatet, sicque eas in spatium amplius extendens ipsas simul aquas intumescere cogat. Alii fors dicent, ipsam hanc esse spirituum istorum naturam, ut in debita quantitate invicem confusi & permixti statis temporibus fermentare incipiant.

540. Atque hinc reddunt rationem, cur in uno mari notetur æstus admodum magnus, dum in alio aut nullus, aut vix sensibilis est; quia nimirum in illo magna admodum copia est illorum spirituum, dum in mari altero spirituum hujusmodi vix quidquam inest; cunctque isti spiritus in his locis facilius, in aliis difficilius ad fermentationem concitentur, patere putant, cur æstus non ubi vis locorum eodem tempore incipiant; & quoniam istis semel excitatis, fermentatio eorum, & orta hinc aquarum commotio, diutius conservatur, atque etiam aliquo tempore augetur, usque dum pars aliqua spirituum evaporaverit, fieri debere existimant, ut æstus maximi non in ipsa conjunctione aut oppositione Lunæ, sed una, alterave die post illam eveniant. Demum cur, dum æstus ingruit in nostro hemisphærio, idem etiam in opposito incipiat, dicunt fieri ex ipsa periodica spirituum fermentatione, quæ stato tempore ex lege naturali redeat.

541. Atenim nemo non videt, nullam hoc in systemate vel verosimilem assignari posse rationem physicam, cur spiritus isti ad Lunæ præsentiam debeant fermentescere, multo minus, cur eodem tempore fermentare

tare incipiant in hemisphærio opposito, a quo Luna integro semicirculo distat. Si dicant, hanc esse naturam hujusmodi spirituum, æquo fors jure dici posset, hanc esse naturam aquæ marinæ copiosius collectæ, ut stato tempore incipiat intumescere; at per hoc quid tandem diceretur? Adhæc in locis sæpe admodum vicinis maxima non raro notatur æstuum diversitas, neque tamen ulla apprehenditur aquæ marinæ varietas. Sunt quoque maria, quorum aquæ spiritibus nitrosis, ac sulphureis sunt referatæ, quin ullus in iis unquam observetur æstus. Demum cur in Noviluniis ac Pleniluniis majores, quam alias, evenire æstus soleant, quis hac in sententia causam aliquam divinare possit? His de æstu marino opinionibus rite perpensis per me quisque sibi feligat eam, quam vefimiliorem esse censuerit.

§. III.

DE ORIGINE FLUMINUM, AC FONTIUM.

342. **H**anc a mari vel immediate, vel mediate repetunt Philosophi. Qui immediate illam a mari repetunt, dicunt, aquas marinas per varios canales subterraneos diffusas demum versus terræ superficiem, ad montium etiam altissimorum cacumina evehi, sic evectas per alios canaliculos ad fontium scaturigines decurrere. Cur autem aquæ marinæ de se salsæ & amaræ per fontium scaturigines non jam salsæ sed dulces emanent, rationem alii dant hanc, quod aquæ, dum per arenam, variosque terræ meatus longiori tempore fluunt, quodammodo percolentur ita, ut deposita nativa falsedine ex terræ poris haud secus ac ex poris filtri puræ jam ac dulces exeant. Alii cum Cartesio censent, aquam marinam per amplissimos terræ meatus diffusam ope caloris subterranei vehementer rarefieri, sicque in vapores, rejectis particulis heterogeneis, extenuari, qui vapores, dum ingenti copia versus terræ superficiem elewantur, occursum rupium, terræ argillofæ, aliorumque corporum, quæ penetrare nequeunt, atque etiam ope frigoris, quod in altioribus terræ locis plerumque dominatur, in guttas, ac varia hydrophylacia collecti demum ad fontium, fluminumque origines deriventur.

543. At neutra opinio omnibus probatur : si enim aquæ marinæ, ut vult prima sententia, salem, cæteraque heterogenea in angustis terræ meatibus deponerent, meatus isti denique omnes obstruerentur, ut sit in vasis percollatoriis, quorum, nisi identidem purgentur, post repetita sæpius filtratione occluduntur, præsertim, si cum Cl. Mariotto uni pedi cubico aquæ marinæ inesse dicamus duas saltem libras salis : inde enim conficietur, quod aqua Sequanæ v. g., cujus ducenti circiter & octoginta octo milliones pedum cubicorum intra 24. horas per pontem regium eodem Mariotto teste transeunt, quod, inquam, aqua Sequanæ singulis diebus, priusquam e mari ad scaturiginem suam pertingeret, quingentos & septuaginta sex milliones librarum salis in illis terræ meatibus debeat deponere; tanta autem copia salis quorsum deveniret? aut si in meatibus istis remaneret, quis non videt, eos debere demum penitus obstrui, atque ita fontium omnium origines suffocari. Adhæc per solam filtrationem aquæ marinæ nunquam a sale & bitumine suo purgatæ hucusque fuere, etsi centies etiam, ut fecit Cl. Valisnerius, fuerint per varia filtra percolatæ. Denique prope ipsa maris littora effodiuntur sæpe putei aquis dulcibus repleti; quis vero credat, aquam marinam intra tam breve temporis, terræque spatium ab omni sua salsedine ac amaritie fuisse purgatam? Imo hos, aliosque, qui in insulis sæpe inveniuntur, fontes ac puteos originem suam non mari, sed pluviis debere, inde etiam inferunt, quod exarescant, si siccitas, pluviarumque inopia diutius perduret.

544. Contra opinionem Cartesii opponi præterea solet 1. Non est credibile, calorem subterraneum tam intensum, qui ad aquas in vaporem extenuandas sufficiat, dari in locis iis omnibus, e quibus fontes scaturiunt. 2. Si aqua maris per terræ poros ad tantam altitudinem potest ascendere, cur non per poros similes iterum descendere queat, quin in fontem extra terræ viscera erumpat? Detecti quidem sunt fontes, ac fluvii quidam subterranei; at hi ipsi aquas jam dulces vehunt, neque ex mari in terram, sed ex hac versus mare fluere sunt comprehensi. 4. In Cartesii sententia non foret ulla ratio, cur, dum siccitas perdurat diutius, fluminum, fontiumque aquæ decrescant, imo fontes non pauci penitus emoriantur: calores enim subterranei eo tempore plus vaporum possent

sent attollere, ut adeo augeri potius, quam minui aquarum in fontibus copia deberet.

545. Alii itaque fontes, & flumina mediate solum a mari repetunt, dum immediatam eorum originem adscribunt pluviis, nivibus, condensatisque vaporibus, quorum pars maxima e mari assurgit. Pluviae nimirum per exiguos, quos passim ubique reperiunt, meatus in terram penetrant; huc penetrantes dum in paratam ad id fossam confluunt, eamque ad aliquod spatium replent, habetur aqua in puteo; dum vero pluviae, in montes & colles delapsae, terrae praesertim arenosae, & silicibus mixtae, aut arborum radicibus distinctae superficiem penetrarunt, saepe offendunt terram argillosam, & viscosam, aut rupes continuas, per quas altius jam descendere nequeunt: unde si terra haec viscosa, aut rupes intus non nihil cava fuerit, aquae in cavitates istas, tanquam in hydrophylacia confluent, iisque jam exundantibus supra argillam aut rupem secundum longum defluent, donec vel ad pedem montis, vel ad notabilem a vertice illius distantiam denuo in apertum prorumpant, atque ita fontem, aut scaturiginem fluminis constituent. Opinionem hanc suam his potissimum rationibus firman. 1. Aqua pluvialis (quo revocantur etiam nives, grandines &c.) in tanta per annum copia decidit, quanta ad flumina, fontesque alendos requiri potest. 2. Experientia docet, fontes vel crescere, vel minui, prout vel major vel minor est pluviarum copia. 3. Caetera, quae circa fontes observantur, omnia explicari hac in sententia optime possunt.

546. Primum membrum ostendit calculus, quem circa Sequanam Galliae fluvium instituit Cl. Mariottus. Hic alio adhuc Viro, ut ait, experientissimo in subsidium adlecto deprehendit, quod intra anni unius spatium tantum aquae pluviae ordinarie decidat, ut ejus altitudo ad 17. circiter digitos supra terrae superficiem, nisi nimirum ad interiora penetraret, deberet assurgere. Assumpto dein numero adhuc minore, videlicet 15. duntaxat digitorum, & tum Sequanae a fonte suo distantia, alvei amplitudine, ac profunditate, tum fluxus aquarum celeritate, aliisque huc pertinentibus rite computatis ostendit, totam illam aquarum molem, quam Sequana per pontem regium anni unius spatio devehit, ne sextam quidem esse partem illius aquae pluviae, quae intra annum in solum fluvio huic vicinum decidit. Et siquidem altitudo ordinaria aquae pluviae

pluviae assumatur esse 18. digitorum, octies plus erit aquae pluviae, quam Sequana suo in alveo devehat.

His consentiunt Cl. le Pluche, ac Cl. P. Fortun. a Brixia. Et hic quidem testatur, Pisis in Italia per 16. omnino annos observatum esse, aquam pluviam, intra anni unius spatium decidentem, ordinarie ad 33. digitos, Mutinae vero etiam ultra 47. ascendere. Similem observationem septem abhinc annis Monachii in Calendario, ut vocant, Aulico legi, institutam haud dubie, ut ex circumstantiis temporis, aliisque indiciis inferbam, a P. Jos. Falck. In ea deprehensum est, quod a 22. Nov. 1734. usque ad 19. Nov. anni 1735. aqua ex nivibus, ac pluviis collecta ascenderit ad 40. digitos, & 4. lineas. De mari Mediterraneo testatur Cl. Hallejus, tantam ex illo vaporum copiam quotidie assurgere, ut dubitet, num aqua illa, quam flumina omnia in mare hoc se se exonerantia quotidie in illud invehunt, vel tertiam adaequet partem illius, quae singulis diebus per vapores ex solo hoc mari elevatur; cui si accedant vapores alii, aliis ex locis copiosissime assurgentes, indubitatum esse existimant, tantum aquae quot annis per pluvias, nivesque decidere, quantum sufficit ad fontes & flumina ubivis terrarum alenda, ac continuanda.

547. Membrum alterum probatione haud indiget; cum id satis constet ab experientia. Refert certe Cl. Mariottus, anno prioris saeculi octogesimo primo, cum aestas in Galliis esset ficcissima, puteorum ac fontium partem maximam fuisse penitus exsiccatam; per ficitatem autem non obstruuntur canales subterranei advehendis, ut vult sententia prima, aquis marinis destinati.

548. Tertium denique membrum sic declarant. I. Aliae regiones abundant fluviis ac fontibus; aliae, ut Arabia deserta, summam eorum patiuntur inopiam: nimirum in his rarissimae cadunt pluviae, ut constat, in illis pluviae sunt frequentissimae. 2. Plerique fontes in montibus, aut ad pedem montis oriuntur; quia pluviae ac nives copiosius ibi collectae, dum terram ad aliquod spatium penetraverunt, suis e receptaculis tandem prorumpunt; & quia canales, per quos erumpunt, plerumque sunt admodum angusti, diutius etiam fluere possunt, etsi pluviae ad aliquod tempus deficient; hinc etiam est, quod fontes aliqui vi magna sua e scaturigine

gine erumpant, & aquas ad aliquot pedum altitudinem fursum expellant. Sunt tamen montes, e quibus, licet pluvias valde copioſas excipiant, nulli fontes ſcaturiunt, vel, quia ipſorum ſtrutura interior talis eſt, ut nulla in illos penetrare aqua poſſit, ſed, antequam ad interiora pertingat, exterius deſluat, vel, quia nulla interius habent ſtrata lapidea aut argillacea, quibus contineri penetrans aqua poſſit, ut proin aqua verticaliter ſemper ulterius, ulteriusque deſcendens denique omnis abſorbeatur. Quod confirmatur ex eo, quia, ſi ſupra ſtratum argillaceum aut lapideum projiciatur notabilis quantitas lapidum, arenæ, ruderum terra inixtorum, in loco humiliori naſcetur fonticulus jugiter manans, ſiquidem ſtratum hoc unum, aut duo jugera occupet.

549. His omnibus rite expenſis cenſeo equidem, fontes potiſſimum ex pluviis, nivibus ſolutis immediate criſi, quin tamen exiſtitem vapores ſubterraneos ab origine fontium penitus excludi aut poſſe, aut debere. Ea certe, quæ adverſus hanc Carteſii ſententiam ſupra N. 544. ſunt allata, momenti adeo magni haud eſſe videntur. Ad primum namque reſpondetur, opus non eſſe, ut calor ſubterraneus tam intenſus detur iis ipſis in locis, e quibus fontes ſcaturiunt; modo calor aquas ſubterraneas in vapores extenuans detur in locis profundioribus, & ſcaturigini adhuc ſat propinquis. Ad 2. Eſſi aqua deſcendere etiam poſſit per poros terræ, tamen ſi alicubi collecti vapores deſluant in ſtrata aliqua aquis impervia, ibi eodem modo formari debebunt hydrophylacia, quo modo formantur ex aquis pluviis. Ad 3. Licet fontes aliqui ſubterranei jam dulces reperiuntur, plures tamen per totum globum terraqueum canales eſſe aquis marinis plenos, ex ſ. præcedente N. 534. patet. Hinc tum ex his, tum etiam ex illis aſcendere intra terram vapores copioſiſſimi debebunt. Ad 4. Conſtat inprimis, non paucos reperiſſe fontes, qui quacunque anni tempeſtate eandem ſemper aquarum copiam profundunt, quemadmodum de ſcaturigine illa Mutinenſi apud Ramazzini, & de fonte alio prope Upmiſter apud Derhamum legere eſt; quod vero aliqui ſiccitatis tempore imminuantur, alii omnino exareſcant, inde erit, quod cum illis etiam communicent fontes ex pluviis orti, iſti vero tales ſint, qui ex ſolis aquis pluviis ortum trahant.

Dicen-

Dicendum itaque cenſeo, non unam, eandemque fontium omnium originem eſſe, ſed alios e pluviis, nivibusque ſolutis, alios ex his, ſimulque e vaporibus, qui ex aquis ſubterraneis ſurſum elati alicubi in fontem colliguntur, enaſci. Aut, ſi cui forte diſpliceat, diverſas fontium origines ſtatui, poterit per me dicere, unicam illam eſſe, vapores nimirum tum intra terræ viſcera, tum extra terram ſurſum elatos, & alicubi in hydrophylacia dandis fontibus idonea congregatos.

550. Ob. I. Scriptura ſacra videtur aſſerere, flumina omnia oriri e mari: ſic enim habet Eccleſiaſtiſtis c. I. *Omnia flumina intrant in mare, & mare non redundat; ad locum, unde exeunt flumina, revertuntur, ut iterum fluant.* R. D. A. Hoc ſenſu, quod flumina omnia immediate oriantur e mari, N. A. quod mediate ex iſto originem trahant, C. A. Aqua maris ſive intra terræ viſcera, ſive extra hæc in vapores extenuata, ſurſum attollitur; inde in hydrophylacia, atque ex his in fontes, ac fluminum alveos excurrens denno ad mare revertitur. Et utique etiam juxta primæ opinionis Patronos non integra flumina e mari exeunt. Dum alibi in Scriptura dicitur, mundo recens creato aſcendiſſe fontem de terra, qui irrigaverit univerſam faciẽm terræ, haud ſatis conſentiunt Interpretes, quid nomine fontis hic intelligatur. Aliqui intelligendum putant vaporem, aut nubem, quæ poſtea in rorem, & guttas reſoluta terram irrigaverit. Unum tantum fuiſſe fontem, qui omnes terræ plantas ſuis aquis nutriiſſet, fidem excedit, inquit Pererius. Fuerint itaque plures fontes, qui condito recens mundo aquam non habuerint a pluviis, ſed ab ea, cujus ingens copia poſt peractam die tertia aquarum collectionem in terræ viſceribus, atque in iis montium cavernis remanſerat, e quibus nunc cadentibus ubertim pluviis, ac vaporibus ibidem congregatis enaſci fontes dicimus.

551. Ob. II. Aqua ex pluviis, nivibus &c. collecta non ſufficit tot tantisque fontibus ac fluviis; utrum autem vapores ſubterranei etiam colligantur in fontes & flumina, haud adeo certum eſt: ergo dicendum, quod fontes & flumina immediate oriantur a mari. R. Tranſ. x. membrum, nego ſecundum: quod enim aquæ ſubterraneæ plurimis in canalibus dentur, certum eſt; quod per calorem ſubterraneum in vapores poſſint extenuari, atque ita ſurſum promoveri, pariter dubium eſſe non po-

teft. Sic autem elati vapores cur non poffint colligi in aliqua hydrophylacia, ex quibus egressæ dein aquæ fontem perennem efficiant? Dixi: transf. 1. membr. quia si verus est Mariotti aliorumque calculus tanta solertia initus, ne sexta quidem pars illius aquæ pluviz, quæ circa Sequanam fluvium decedit, in alimentum hujus fluminis cedit: quanta igitur aquæ copia adhuc reliqua est, quæ tum in vapores abire, tum plantis & animalibus in nutrimentum cedere, tum etiam subsidere in terram possit?

Hic etiam observa, 1. non utique aquam illam, quam fluvius per longiorem jam terræ tractum fluens secum vehit, omnem immediate ex ipso fonte fluvii provenire: innumeræ enim scaturigines, rivi, ac torrentes passim in flumina sese exonerant, molemque undarum augent. 2. Vapores plurimos ex ipsis fluviis, stagnis, ac paludibus affurgere, ut propterea fontium perenniter manantium venæ non multum debeant imminui. 3. Humoris, quo plantæ nutriuntur, plurimum e plantarum poris iterum expirat, inque novos vapores & aquas abit. Hinc, spectando solam copiam aquæ ad fontes & flumina requisitæ, possent fors isthæc omnia ex solis aquis pluviis &c. provenire. Quia tamen aquas, & vapores subterraneos dari, sat certum est, origo fluminum his quoque adscribi debet, quo facto nulla esse formido poterit, ne aquæ tot fontibus fluviisque alendis non sufficient.

552. Dices 1. Aquæ pluviz non possunt tam alte intra terram descendere, ut fontem queant efficere: ergo ex aquis pluviis nulli omnino fontes nascentur. Ant. probatur ex eo, quod pluvia vix unquam ultra 10. pedes intra terræ viscera penetrasse deprehensa sit. R. D. A. Non potest tam alte descendere, si terra sit nimium tenax, arcte constipata, uti est argilla, aut si occurrat rupes aliqua continua, C. A. Si terra sit arenosa, ex crassiore sabulo, aut silicibus composita, vel rimis etiam ac meatibus non nihil profundioribus distincta, N. A. & Conf. Prout diversa est vel densitas, vel tenacitas terræ, sic etiam diversa est altitudo, ad quam aqua intra terram potest descendere; certe quod aqua pluvia etiam ultra 100. passus in terræ crustam descendat, experti testantur metallorum fossiores, atque etiam putei profundissimi, in quibus cadente largiore pluvia aqua multum affurgit, pluviis vero diutius cessantibus denuo descendit.

Habet

Habet nimirum terra præcipue non exculsa, qualis est in montibus, sylvis &c., fissuras plurimas, canaliculos innumeros, & ipsæ partes interiores teste Cl. le Pluche e crustis diversissimis componuntur, quæ crustæ plenæ sunt poris sat amplis, & rimis quamplurimis: per has igitur aquæ penetrant, usque dum stratum argillaceum, vel lapideum, quod ulteriorem descensum prohibeat, occurrerit, ubi guttulæ jam junctæ efformant rivulum, qui per interiora serpens in perennem denique fontem erumpat; illæ porro aquæ, quæ non nisi ad aliquot pedes infra terram penetrant, dabunt subin rivulos minores, quorum accessu flumina augeantur.

553. Dices 2. Si aquæ pluviz hoc modo in sua hydrophylacia descenderent per rimas & meatus terræ, hæc rimæ & meatus deberent denique per sæces pluviis immixtas obstrui: ergo vel non ita descendunt, vel etiam non obstruuntur meatus terræ per aquam marinam, & volebat prima sententia, sursum evectam, & in meatibus istis quodammodo filtratam. R. N. A. Quamquam aquæ pluviz puræ nunquam sint, sæces tamen, quæ in iis reperiuntur, si comparentur cum sæcibus aquæ marinæ, vix ullæ sunt: aquæ enim pluviz per solis calorem naturali quasi destillatione purgantur. Vid. N. 543. Præterea meatus, per quos aqua pluvia penetrat, plerumque sunt capaciores, & continuo attritu aquæ defluentis magis adhuc excavantur, ut colligi potest ex eo, quod aquæ fontium non raro particulas petrosas, aliasque secum vebant; at vero meatus, per quos aqua marina juxta primam sententiam sursum eluctaretur, deberent esse angustissimi, alias non posset aqua hæc in istis veluti filtris percolari, atque a falsedine & amaritie sua depurgari.

554. Dices 3. Sæpe etiam in montibus altissimis oriuntur fontes, & tamen ibi vix erunt cavernæ aquis pluvialis, aut vaporibus subterraneis rite colligendis aptæ. R. N. 2. membr. In ipso montis cacumine nunquam oritur fons, nisi montes alli, ilque altiores circumstent, e quibus aqua derivetur in jugum montis humilioris; quod autem orientur fontes in præaltis etiam jugis ad distantiam 60. aut 70. pedum a vertice, mirum non est: si enim mons ejusmodi amplum habeat jugum, &, ut plerumque fit, plurimis hinc inde vallibus distinguatur, sat magna pluviz copia penetrare terram potest, ex quo fons il-

le emanet. Vapores quoque subterranei consueque elevati ad perennem ejusmodi scaturiginem possunt concurrere. Certe etiam in montibus non raro terra altius effossa ingens vaporum copia instar densæ alicujus nebulae sursum eluctari visa est.

555. Ob III. Dantur fontes, & putei, qui æstui maris se se accommodant ita, ut cum illo aquæ fontium affurgant, ac denuo subsident: ergo isti saltem fontes immediate oriuntur e mari. R. Transeat totum: dari namque fontes aliquos, qui cum mari immediate communicant, non negatur; & isti salsam etiam aquam propinant. Hinc autem inferri haud quaquam potest, fontes omnes immediate ex ipso mari exoriri. Imo neque illi fontes, ac putei, qui maris æstibus se se aliquo modo accommodant, omnes immediate e mari profluunt præcipue, si putei isti, & fontes aquam habeant dulcem: dum enim in æstu maris tactus ad littora & fluminum ostia affluunt, hoc ipso egressum aquarum dulcium retardant, & impediunt ita, ut flumina suis in alveis intumescant, & aquas in puteos & fontes secum communicantes exonerent. Mari iterum resfluente liber denuo fluminibus in mare exitus datur: hinc etiam aquæ puteorum in flumina, quibuscum communicant, rursus se possunt diffundere. Præterea cum ejusmodi fontes & putei esse haud soleant nisi in vicinis maris, fieri potest, ut, licet ipsius fontis origo non sit immediate ex mari, tamen hoc æstuante aqua marina per angustos terræ meatus se in fontes illos inhnuet, & mari recedente per eosdem meatus denuo egrediatur, quod ex eo colligi potest, quia hujusmodi fontes plerumque aquam satis salsam continent. Hinc responderi potest 2. D. A. ita, ut hujus reciprocationis occasio aliqua sit æstus marinus, C. A. ut sit causa illius immediata, & quidem in omnibus, N. A.

556. Quod reperire sit fontes aliquos, qui ad tempus aquam emittunt, alio tempore iterum retinent, datis hic de fontium origine principiis haud obest: quamdiu enim in fonte aliquo sufficiens est aquæ pluviae, aut e vaporibus collectæ copia, fons fluet; deficiente aqua fluxum sistet. Imo etsi aqua in fontis hujusmodi receptaculum ponatur jugiter destillare, contingere tamen potest, ut nunc fluat, nunc fluxum intermittat, si nimirum os fontis sit instar siphonis, & siphon iste sit non nihil capacior: tunc enim utprimum altitudo aquæ in receptaculo fontis

fontis tanta fuerit, ut hæc ultra libellam, & verticem siphonis existat, incipiet fluere, sique siphon hic capaxior sit, poterit quovis tempore plus aquæ per os fontis effluere, quam ex venis in receptaculum eodem tempore defluat; quando igitur per siphonem ampliorem tantum aquæ jam effluxit, ut crus illud, quod in receptaculum protenditur, inferius extra aquam existat, hoc ipso cessabit fluxus tamdiu, donec aquæ, per venas sensim delapsæ in receptaculum, denuo ultra verticem siphonis ascendant.

557. Quæres, undenam diversi fontes diversas habeant qualitates, virtutesque seu nocendi, seu etiam medendi? R. Prout fontium quisque per varios terrarum tractus, aut meatus subterraneos fluit, ita diversas qualitates, virtutesque potest recipere: quando enim aquæ per metallorum, salium, aliorumque fossilium mineras, vel juxta illas diutius decurrunt, innumeras istorum fossilium particulas imbibunt, ac vaporibus mineralibus inficiuntur. Quemadmodum igitur istæ mineralium, aliorumque fossilium particulae qualitates, ac virtutes habent diversissimas, ita iisdem virtutibus præditas esse necesse est aquas hisce particulis infectas.

Præ cæteris ejusmodi fontibus notæ sunt Thermæ, & Acidulæ. *Therma* sunt fontes calidi variis in locis terra prorumpentes, qui calor provenire videtur a canalibus, intra quos aqua fluit, bituminoso & sulphureo halitu, ac vaporum fermentatione calefactis: hinc thermæ sulphureum plerumque odorem, ac saporem referunt, quin ipsis fontium parietibus non modica sæpe sulphuris copia adhærescit. Calor autem hoc modo excitari poterit. Aqua dum per Pyritas, & Marchasitas (qui lapides sunt metallici ex sulphure & ferro potissimum compositi, quorumque copia major in thermarum fontibus esse solet) dum, inquam, aqua per hos lapides decurrit, humor aqueus in eorum poros sese insinuans nexum sulphuris & ferri solvit, eoque soluto sulphur jam agere in ferrum potest: hinc oriri fermentatio, ac calor debet, sicut fermentatio ac calor exoritur, si flori sulphuris, ac limaturæ chalybis frigida affundatur. Quod si jam aquæ thermarum, his halitibus refertæ, sub ipsa terra per alias adhuc venas ulterius fluant, magnam sulphuris pinguioris portionem, halitusque acres amittunt, & deperdito sensim calore suo erumpentes *Acidulas* exhibent.

Sunt præterea aquæ, quæ sæpius potæ dentes in orē vacillantes reddunt, aliæ, quæ potantes non nihil hebetes faciunt &c. quorum ratio alia non erit, quam admixtæ particulæ, quæ vel cerebri meatus aliquos, ac fibras obstruunt, aut obsident, vel fibrillas alias vi sua corrosiva debilitant. Sic etiam in Sicilia fons esse perhibetur adeo acidus, ut illius aquas accollæ aceti loco adhibeant. Alius in Epiro, qui tanta sulphuris, ac bituminis copia abundet, ut fax recens extincta, dum eidem immergitur, denuo accendatur.

ARTICULUS III.

METEORA AQUEA.

558. **H**Æc ex vaporibus, & exhalationibus in aera sursum elatis provenire, dubium non est; at valde dubium videri jure potest, qua demum ratione vapores aquei, aliæque exhalationes in aere ad eam, quam meteora isthæc requirunt, altitudinem promoveantur. Communior opinio est, vapores ab aere ambiente trudi sursum, eoquod inter quamlibet vaporis bullulam tantum lateat aeris summe rarefacti, quantum requiritur, ut bullula sic expansa, & sub hoc volumine constituta fiat respective levior aere inferiore magis denso. Verum huic opinioni inter alia opponitur, quod bulla vaporis non possit fieri respective levior aere, nisi volumen ejus evadat ferme millies majus, quam sit volumen guttulæ in vaporem nondum extenuatæ; hoc autem fieri haud posse existimant, eoquod experimentis Halleyi & Nolleti comprobatum sit, aerem in aqua etiam ebulliente non nisi una tertia, calore autem æstivo solum una septima parte magis, quam antea fuerit, posse dilatari. Undenam vero in ascensu vaporum tantus, tamque intensus calor, qui aerem in bulla aquea latentem ad spatium ferme millies majus expandat? Dein aer in bulla vaporis contentus non erit utique rarior, quam aer exterius ambiens, quia in hunc eadem est actio caloris in ea regione, ex qua ascendit bulla vaporis, quæ caloris actio est in aerem intus in bulla contentum; si autem eadem est aeris bullam ambientis raritas, quæ est in

In bulla conclusi, hæc etiam expansa sursum trudi non poterit ob levitatem respectivam.

559. Alii itaque cum Nolletto censent, moleculas aeris esse quasi spongas quasdam subtilissimas, intra quas veluti in tubulis capillaribus particulae aquae exilissimæ, atque etiam aliæ heterogeneæ illis innatantes sursum ascendant, ascensum hunc plurimum promovente perpetuo motu aeris. Et quidem quod moleculæ aquæ, æthi aereis sint specificè graviores, tamen in moleculis spongiosis aeris hæerere possint, quin illico iis excidant, capi facile potest, & ostendit id etiam spongia alia aquas, quas semel imbibit, diu retinens. At simul candide fateor, illud satis nondum mihi perspectum esse, quomodo eadem particulae aquæ magis identidem, magisque urgeantur sursum. Poterunt aliquid conferre latera, seu filamenta molecularum aeris, item perpetua, ut dictum, ipsius aeris agitatio, ac repetiti impulsus a particulis aqueis continuo succedentibus; plus forte poterit conferre alterna illa constrictio, & dilatatio pororum aeris, quæ tum ex motu perpetuo molecularum in se impingentium, tum ex alternante calore & frigore consequetur; utrum autem isthæc sufficiant, definire non ausim. Interim supposita hac sententia redditur ratio, cur tempestate humida pauciores ascendant vapores, quam flante vento sicciore; quia tempestate humida moleculæ aeris spongiosæ jam quodammodo saturatæ nihil amplius imbibunt; cumque fluida pro diversa amplitudine tubulorum, habita simul ratione densitatis ac viscositatis ipsius fluidi, ad diversam altitudinem in tubulis istis suspendantur, patet, cur vapores nunc altius, nunc minus alte eleventur. Et quoniam media aeris regio, ad quam ordinariè vapores pertingunt, juxta communem Philosophorum opinionem hyeme ferme eadem est, quæ æstate, ideo utroque anni tempore eadem ferme est vaporum altitudo.

560. Ut jam ad ipsa meteora aquea progrediamur, *Nebula* est congeries exhalationum, ac vaporum, qui vel e terra lentius assurgentes, vel ex alto leniter demissi, ac prope ipsam terræ superficiem copiosius suspensi aerem solito opacorem reddunt. Si nebula non nisi vaporibus, seu humidis particulis constet, nec plantis, nec animalibus noxia erit, quin irrigandis etiam plantis servire poterit; at si potissimam partem constet

exhalationibus, seu particulis, quæ non ex humido corpore affurgunt, & plantis & animalibus esse noxia potest, id quod vel ipso factore suo quandoque satis prodit. Quod vero nebulæ non aqueas duntaxat, sed alias etiam particulas secum ferant, inde etiam intelligi potest, quod nebulis in terram delapsis non raro aquæ superficies pellicula quadam pingui ac rubicunda contegatur haud abfimili illi, quam Chymici, dum sulphur auratum Antimonii præparant, teste Muschenbroekio observare solent. Cur nebula aerem reddat minus pellucidum, ratio est, quod in ea hæreant particulæ irregularis figuræ, quæ densitate tum inter se, tum ab aere plurimum differunt; hinc innumeræ, ac inordinatæ prorsus erunt luminis refractiones, ac reflexiones, ac proin minor aeris adeo impuri diaphaneitas. Vid. N. 197.

Nebulæ porro non oriuntur, nisi ære tranquillo: a vento enim paulo fortiore disjiciuntur vapores, quo minus in unam quasi massam colligi queant, nisi is ipse ventus nebulam alibi jam collectam fors secum vehat. Frequentiores sunt in locis humidioribus, ac supra urbes & oppida maxime, si hæc in vallibus, aut ad flumen aliquod sita sint; hinc enim copiosiores identidem vapores affurgunt, qui in valle magis collecti manent, quam in patenti planitie. Quodsi vapores isti sint aliquanto crassiores, sole oriente, cujus calore aer sensim rarefit, nebulæ decidunt, ac serenum plerumque diem pollicentur. At si vapores sint subtiliores, ac solis jam exorti calore vel magis attenuentur, vel quocunque ex capite ad ulteriorem ascensum disponantur, nebulæ altius elewantur, & secuturas eo die pluvias plerumque præfagiunt.

56r. *Nubes* aliud non est, quam nebula altior, sive congeries exhalationum & vaporum in sublime jam elevata, quod inde etiam patet, quia, quotquot in montes altiores eluctati nubibus inambulant, nil nisi nebulas circa se observant. Figura nubium ob continuum motum aeris, cui innatant, est summe mutabilis. Quod non eadem omnium sit a terra distantia, tum ex eo colligimus, quod earum altiores aliquæ a sole infra horizontem jam existente adhuc illuminentur, non item inferiores, tum etiam ex motu nubium: videmus enim, eas sæpe in partes omnino contrarias moveri. Summa porro, ad quam nubes in aere suspenduntur, altitudo vix assequi videtur altissimorum montium cacumina; hæc certe plerumque

que supra nubes eminere procul intuentibus apparent. Serviunt nubes tum ad hoc, ut æstus solis temperent, tum & præcipue, ut pluvias, terræ irrigandæ opportunas, in varias regiones deferant.

562. Quando ex adunatione, & concretione vaporum oriuntur guttulæ non nihil majores, quæ ob acquisitam hac concretionem majorem gravitatem sustentari jam ab aere nequeunt, nubes in aquam soluta & guttatim decidens dat *Pluviam*. Præcipua pluviarum causa sunt venti; dnm enim ventus nubem pluvix sæcundam condensat, particulæ vaporum propriiores sibi factæ in guttulas aere graviores conflunt; vel dum molculæ aeræ ventis contrariis in se mutuo impactæ comprimuntur, istæ in morem spongiæ compressæ aquam diuittent, quod præcipue apparet in quibusdam pluviis cœlo fulgurante cadentibus, quæ per intervalla, prout venti incurrunt, effunduntur, uti fit, dnm spongia alterna pressione aquas nunc dimittit, nunc iterum retinet. Si duo venti contrarii ab alto spirantes nubem veluti mediam prehendant, eamque subito deorsum urgeant, magna aquarum vis simul in terram effunditur, diciturque fieri *Exhydria*, seu nubium fractura. Si vero duo venti directionibus parallelis, sed adversis parumque a se distantibus nubem intermediam comprimant, simulque circumagant, ut vortex quidam aqueus oriatur, dabitur sic dictus *Presser*, columna, vel turbo aqueus, qui intus aqua vacuus est, partibus per vim centrifugam a centro recedentibus. Columna hæc ex nube sua aliquando suspensa videtur ad altitudinem 300. pedum, ac supra terram & mare discurrens omnia prosternt, & diluvio quasi inuadat. Quod tritico, ferro, lapidibus &c. aliquando pluerit, vel ad fabulas pertinet, vel dicendum, corpora hujusmodi ventorum turbine hinc abrepta illic postmodum iterum decidisse.

563. Quodsi vapores aquei sensim ex nube decedentes in filamenta oblonga frigore concrecant, *Nivem* dabant. Filamenta hæc in ipso descensu variis modis sibi sociata formant floccos, quorum diversissima est figura; interdum stellulam nunc 6. 8. nunc 12. radiorum, alias quasi lilium exhibent. Nix agris fertilitatem asferre censetur, tum quod obstructis terræ poris sæcundos halitus avolare non sinat, simulque frigus nimium arceat, tum quod magnam salis, ac nitri copiam terræ communicet.

564. Dum autem vapores aquei in guttulas jam abituri repentino ac vehementi frigore in glaciem vertuntur, vel dum flocci nivei liquefactis inter decidendum floccorum extremitatibus subito congelantur, & in grana vel sphaerica vel angulosa concresecunt, datur *Grando*. Quodsi globulis jam congelatis in descensu novi identidem vapores, & guttulæ adhærescant, grandinis grana satis magna sæpe decident adeo, ut teste Musschenbroekio non nunquam granum unicum ad 6. libras ascendat. Inveniuntur subin pili, paleæ, aliæque hujusmodi quisquilæ in granis grandine delapsis, quas vulgus certum velut indicium prædicat, grandinem a maleficis esse causatam, quasvero ejusmodi corpora levia non quolibet vento attolli in altum, ibique vaporibus, ac grandini implicari possent. Plerumque meteoron hoc comitatur fragor, aliquis, aut crepitus in aere etiam, antequam grando adveniat, exaudiendus: nam grana durissima actione venti in se mutuo impulsa sonum edunt. Imo ferme nulla est grando, quæ conjunctam non habeat tempestatem fulmineam: tunc enim exhalationes inflammationi obnoxie consumuntur, & effervescentia quodammodo sedata aer refrigeratur, atque densis subinde nubibus intercepti solis radii minus efficaciter agere possunt; aer quoque ab exortis fulminibus spiritu nitri repletur, qui augendo frigori, ac causandæ congelationi aptissimus est.

565. Ros ex vaporibus tenuissimis in nebulam crassorem necdum collectis, oritur; & sicut vapores isti vel ex terra & aquis ascendunt, vel prius evecti nunc iterum recidunt, vel ex ipsis plantis solummodo exsulant, ita triplex roris species distinguitur, nimirum e terra assurgens, in terram decidentis, & e planta exstillantis. Primam roris speciem ostendit lamina metallina non polita, aut vitrea vel terræ imposita, vel paululum supra eam elevata; ista namque etiam in parte inferiore innumeras roris guttulas exhibebit. Species altera datur, quando tenuissimi vapores per diem elevati, & nocturno frigore in minimas guttulas collecti, in terram plantarumque folia copiose delabuntur. Tertiam denique roris speciem pluribus observationibus demonstrat Musschenbroekius, dum 1. ostendit, guttulas plantis inhærentes pro diversitate plantarum etiam differre numero, ac magnitudine, tum etiam locis, quibus adhærere solent; 2. plantam aliquam ita undique contexit, ut nec primi,
nec

nec secundi generis ros pertingere ad illam potuerit, & tamen plantam iisdem in partibus rore perfusam deprehendit, in quibus ea aeri libero alias exposita madere solebat.

566. Quodsi tennes ejusmodi vapores diurno solis æstu ad modicam altitudinem elevati ingruente vespertino frigore in subtiles guttulas condensentur, & instar pluviae vix sensibilis decidant, dicitur dari *Aura ferotina*. Hæc nociva esse potest animalibus æque, ac plantis; cum variae particulæ noxiæ cum ea delabi in ista queant. Si vero materia roris antelucano frigore in tennes quasdam lamellas glaciales constringitur, eris *Pruina*, quæ molliores herbas adurit, crudioribus vero, ac durioribus molliem conciliat. Pruinæ quoque species conspicitur sæpe in parietibus ædificiorum, ad quos valde frigidos dum vapores aquei per ventos adferuntur, illi frigore hoc constricti pruinam mentientur. Sic etiam frigus barbas virorum, ac capillos cana aspergine vestit, dum exhalationes continua respiratione emittuntur, & in barbam, capillosque rejectæ vi frigoris in glaciem coguntur.

DISSERTATIO IV.

DE ELEMENTO TERRÆ.

NON Terram solum elementarem, sed ipsum Globum terraqueum, &, quæ in isto attentione Philosophi præ cæteris digna occurrent, hic expendemus.

ARTICULUS I.

DE TERRA, VARIISQUE FOSSILIBUS.

§. I.

DE TERRA ELEMENTARI, AC FOSSILI.

567. *Terra* nomine illam plerumque molem, quam pedes terimus, denotare solemus, ast ea, tantum abest, ut elementum dici possit, ut omnium potius ele-

men-

mentorum, & conflatorum ex iis corporum Chaos esse cognoscatur. Elementum igitur terræ a Chymicis recentioribus dicitur. Corpus fossile, simplex, durum, friabile in igne fixum, in igne non fluens, in aqua, alcohole, oleo, aere dissolvi non potens. Sic descripta corpus est purum, omnis fere varietatis expers, adeoque simplex, ut teste Cl. Boerhaavio in omni rerum natura simplicius vix invenias; obtinetur autem hoc modo. Lapsam cœlo pluviam si destillare feceris, fæces illa in fundo relinquet; hæ siccatae, & ignibus omnino exustæ cineres dabunt, qui ab omni prorsus sale exquisitè depurati terram demum tenuem & puram, quam virginem vocant, exhibebunt. Præstantia elementi hujus, & utilitas inde patet, quod illud corporibus omnibus firmam quasi basin det, cæteraque principia, ut Chymici loquuntur, & sibi, & inter se uniat.

568. Alias terrarum species, utpote corpora jam composita, terræ elementaris classe expunctas volunt Chymici. Dicuntur communi nomine fossiles, quod e terra eruuntur; & particulis constant opacis ac friabilibus, quæ nec igni dissolvi possunt nec aqua, hac tamen affusa in tumidam, & ductilem pastam subiguntur. Miram harum varietatem aliqui cum Auctore novæ idæe de formatione fossilium (Acta Trivolt. 1751. Mens. Octobr. Art. 112.) ab universali Cataclysmo repetunt, ubi cineres & pulvisculi vegetabilium destructorum, mineralia, metalla &c. varie invicem commixta fuerint. Sic terras flavas, rubescentes &c. colores suos salii volatili, dissolutioni ferri, bituminis, sulphuris, & tincturis vitriolicis debere existimant; iisdem adscribunt odorem, quem omnibus prorsus terris inesse Cl. Reaumurius defendit, atque adeo quidem, ut eo nulla arte privari possint. Quod in terris siccioribus non sentiatur is odor, inde esse affirmat, quod particulæ odoriferae, quæ utpote graviore simplici aeris calore elevari non possent, tunc primum organum afficiant, cum aquis dissolutæ fuerint.

569. Divisio terrarum fossilium ab analysi Chymica peti potest: aliæ enim nullo acido dissolvendæ majorem in igne duritiem induunt; aliæ acidis solvi, & igne calcinari possunt. Illæ dicuntur argillose, hæ vero alcalinæ. Ad argillosas pertinet I. ipsa *Argilla*, quæ
pro

pro varia partium structura, colore ac sapore varia quoque est ac multiplex.

II. Terræ *Medica*, ab eo, quod medendi virtute polleant, nomen sortitæ. Harum 1. geminæ reperiuntur in Insula Samo; *Collyris*, unde Collyrion præstans adversus oculorum morbos remedium conficiunt; & *Aster*, quæ figuram & lucem stellularum imitatur. 2. Una in Lemno Archipelagi Insula, quæ *Lemnia*, ac, uti plures adhuc aliæ, etiam *Sigillata* dicitur, quod illi lunula falcata cum tribus stellulis, aut literæ Turcicæ; aliis alia signa impressa cernuntur. 3. Alia ex Armenia advehitur, & lapidis speciem referens terra *Armena*, vel bolus Armenus appellatur. 4. Rursus alia effoditur in Insula Melita, & terra *Melitenfis*, vel etiam S. Pauli nominatur. Omnes hæ præsentissima adversus venenum pharmaca præbent. Innumeris aliis, quas vel recensere longum foret, variz aut adstringendi, aut discutiendi, aut abstergendi, & quocunque demum modo medendi vis inest, quam propius nosse Medicorum interest.

III. Terræ *Pictoria*, ex quibus Pictores varios colores præparare norunt, uti sunt terra Anglicana rubra, cærulea, viridis &c. Montana varia, rubrum, luteum, fuscum &c.

IV. Terræ *Mechanica*, ut 1. *Tripolitana*, cujus affricu ablata rubigine prior metallis splendor redditur. 2. *Argilla communis*, ex qua vasa quotidianis usibus inventia effingunt figuli. Hi, quod Cl. Reaumur observasse se ait, minime ignorant, terras mixtas, quo minus fabuli contineant, eo se magis contrahere, & puriores, ubi exsiccatae fuerint, volumen 6. etiam pollicum minus ac antea occupare: hinc lente admodum exsiccant vasa sua, quo rimas ac fissuras, ex inæquali partium pariter inæqualium contractione certo secuturas, impediant. 3. *Argilla tenuis*, quæ *Porcellana* dicitur. Ex hac miræ pulchritudinis vasa primi elaborarunt Chineses & Japones, quorum dexteritatem postea Galli, Saxones, Bavari maxima sane felicitate æmulati sunt. 4. Terra *Fullonum*, & aliæ, quarum usum nullibi melius, ac in officinis mechanicorum addisces.

V. *Humus*, cujus novem species uti facie externa, ita fertilitate vel maxime differunt; & quæ aliis seminibus aptissima, eadem aliis non raro fatalis est, ut agricola

colæ & olitores constanti experientia edocti apprime norunt.

570. Terras inter Alcalinas referuntur I. *Creta*. Hujus plures equidem species distinguunt mechanici, quarum aliæ ad poliendum, & mundandum, aliæ ad colorandum inserviunt; omnium tamen optima in Cretenfi Insula eruitur, unde suum quoque nomen traxisse aliquibus videtur. II. *Marga*, durior una, altera mollior; utraque, quod sale & sulphure abundat, ad fœcundandos agros cum fructu adhibetur; hæc tamen siccis, illa humidis aptissima reperitur.

571. Terris hisce *Arenam* nostram vulgarem annumerari non posse, ex allatis jam descriptionibus patet: hæc enim, siue fossilis sit, siue fluviatilis ac marina, particulis constat duris, aquæ impenetrabilibus, quæ si microscopio inspiciantur, totidem veluti pellucida crystallia variæ magnitudinis & figuræ exhibebunt. Præterea aquis imprægnata non distenditur, caret ductilitate, terra gravior est, & quæ sunt plura ejusmodi, quibus Cl. Reaumur (Act. Acad. Reg. 1730. pag. 349.) fabuli & terræ diversitatem probat in erudita dissertatione, quam de natura terræ in genere, & diversarum ejus specierum characteribus 23. Junii 1730. habuit. Interim arena præter alia, quæ cuivis obvia sunt, id quoque commodi affert, quod aquam frugiferam per capillares quasi canales terræ advehat, qua deficiente illa nimirum induresceret summo mortalium damno.

§. II.

DE SALIBUS, ET SUCCIS MINERALIBUS.

572. **S**ucci minerales alii sunt macri, alii pingues, & oleosi, qui igne solvuntur & inflammantur. Priores inter principatum tenet *Sal*, quod Chymicis vocatur corpus aqua diluendum, igne, nisi prius in auras avolet, fundendum, quodque gustum eo, quem saporis dicimus, sensu afficere queat. Figuram verorum salis elementorum determinare haud licet, cum ea usque adeo minuta sint, ut oculum quantumvis armatum effugiant. Neque nisi rarissime, ait, Cl. Boerhaavius, vasis capi queunt, cum resoluta subito in aera avolent. Quæ igitur

tur nostris se sensibus exploranda offerunt, composita sunt corpuscula ex aqua inprimis & terra; hæc, aqua aut spiritu vini soluta, quodsi microscopio vel solari, vel manuali consideraveris, miras illa, diversissimasque figuras exhibebunt, quarum plurimas æri incisas ostendit Cl. Bakerus in suo de Adjumentis microscopiciis libro.

573. De origine salium tum elementaris, tum compositorum Trivoltiensis ad annum 1751. opinionem recensent Auctoris libri de nova idea fossilium supra citati, quam ipsi vocant curiosam, &, ut videtur, novam. Auctor iste anonymus censet, salia non ab ipsis mundi incunabulis existere, sed postea per solis actionem in atmosphæra fuisse efformata. Partes nimirum subtiles terræ & aquæ in aere disseminatæ, varie agitatæ, & a particulis igneis penetratæ figuras induere acutas, & angulares, cumque his vellendi ac pungendi virtutem acquirere debuerunt, quæ salibus omnibus communis ac propria est. Nam, inquit, ignis salium omnium principium est, & ipsa calx, priusquam igne exurit, omni vi corrosiva caret. Acidum hoc primarium, seu sal principale, per aquas terram omnem inundantes abreptum, variisque corporibus terrestribus commixtum varie quoque ab his modificatum fuit. Atque hæc causa est & origo tantæ salium diversitatis.

574. Quidquid sit de hac conjectura, dicam, an sententia, Salsa, quorum tam multitudo, quam diversitas sane maxima est, ad tres revocari classes possunt. 1. Ad *Alcalina*, quibus plus terræ, quam aquæ inesse deprehendunt; 2. ad *Acida*, quæ vicissim plus aquæ, quam terræ habent. 3. ad *Neutra*, quibus æqua utriusque portio obtigit. Sal Alkali fixum est, vel volatile. Utrumque nomen habet a planta Kali, ad ripas maris & Nili, atque ad Belum celebrem Syriæ fluvium crescente. De ortu primi ita fere loquitur Cl. Boerhaavius. Quodsi planta hæc jam matura flammis exuratur, cineres relinquit acri, & salso sapore præditos. Hi aqua ebulliente cocti dant lixivium pariter acre, salsum &c., quod igne inspissatum ita, ut exsicceat penitus, in lebetæ ferreo massam relinquit albam, solidam, saporis urentissimi, acerrimique, in aqua prorsus solubilem, quæ omnia salibus conveniunt. Sal ejusmodi Alcalinum ex omni equidem recenti vegetabili in cineres exusto educi potest, optimum tamen ex *Ægypto*, & *Tripoli* hodie ad

nos defertur. Paratur etiam aliquod in Russia, Polonia &c. ex lignis variarum arborum in clavas sectarum, & Alkali cinerum clavellatorum vocatur. Aliud fit ex vini fæcibus, aut ipso etiam ex vino; iterum alia ex nitro, ex tartaro & nitro &c.

575. Proprietates, quibus Alkali ex herbæ combustæ cineribus natum se manifestat, sunt sequentes. 1. Ut in igne satis diu perstat, ita in aere humidioris penitus deliquescit, fæces ponit, siccitatis diuturnæ etiam in vase probe clauso prorsus impatiens. 2. Si gustatur, linguæ saporem imprimit cum acrimonie urentis aut igneæ sensu conjunctum, atque urinæ non abfimilem. 3. Purum odore caret, quia in ipso adeo igne fixissimum nullas, queis nares afficiat, particulas emittit. Acido commixtum ebullit, & fervet, dein cum ipso in unum corpus concrevit, in quo facta rite saturatione nil acidi aut Alkali deprehenditur, sed sal quoddam tertium, quod neutrum dicitur. 5. Si purum succo rosarum violarum &c. commisceatur, viridescens antea colorem in cæruleum mutat. 6. Corpori calido applicatum per aliquod temporis spatium inflammationem creat valde acutam. 7. Virtute detergendi atque emaculandi fortissima pollet &c. Usus Alkali Chymicis frequentissimus est, utpote quo ad paranda præstantissima medicamenta, ad tincturas præcipue velut instrumento utuntur. Alkali volatile an unquam extiterit, quod neque putrefactione, neque destillatione animalium aut vegetantium productum sit, certant chymici. Viribus præditum est iisdem ferme, quibus Alcalina fixa.

576. Acidorum alia sunt vegetantia, alia fossilia. Et vegetantium quidem, quæ nativa sunt, ex succo, quem plantæ e terra attrahunt, nutritio oriri videntur; cætera parantur fermentatione, combustionem, & destillationem. Acida fossilia, quæ nobis cognita sunt, auro, argento, mercurio, aliisque fossilibus solvendis apta reperiuntur. Nativa raro admodum, fixata vero crebro parantur per ignem, & destillationem ex sulphure, alumine, vitriolo viridi seu ferri, & cæruleo, seu Chalcantho, nitro, etiam ex sale marino, si rite tractetur. Quodsi acido vitriolico modicum phlegmatis misceas, oleum vitriolicum habebis; privatum denuo phlegmate adeo, ut fluiditatem amiserit, dabit oleum vitrioli glaciale; spiritum vero vitrioli obtinebis, si multum aquæ affuderis. Idem terræ ab-

torbenti, aut cretæ, quæ in igne perstitit, commixtum Alumen format; addito sale Alkali fixo Tartarum vitriolicum &c. Inter salia neutra memoratur maxime sal Ammoniacum, Borax, Sal Marinum, & Sal Nitri, de quorum, aliorumque tum origine, tum proprietatibus alii ex instituto uberius tractant.

577. Salibus pauca jungamus de succis. Hi, communi nomine bitumina dicti, in fluidos & solidos dividuntur. Ad fluidos pertinet 1. *Petroleum* a Petris, per quas transudat, dictum. Celeberrimum, quod in Ducatu Mutinensi fluit, odorem tam fortem spargere dicitur, ut is ultra duas leucas percipiatur. Quod perfectius est, accenditur a flamma etiam remota, effervescebat in aqua, supernatat omnibus liquoribus, ipsi etiam spiritui rectificato, nec unquam congelatur. 2. Bitumina varia, inter quæ celebratur *Asphaltum*, seu bitumen *Judaicum*, cui si admisceatur portio picis, myrrhæ, & aloes, dabitur *Pissa Asphaltum*, ab Ægyptiis olim ad condienda & a corruptione conservanda mortuorum corpora adhiberi solitum; vocatur id etiam *Mumia*, & corpora hoc modo condita *Mumia* nuncupantur.

Inter solidos eminent *Ambra* pretiosissimum bituminis genus, odoreque fragrans, ut nullum magis, amæno, & *Succinum* diversi coloris. Ambra non ex succo animalium, in quibus subin reperitur, sed ex terra ortum habere plerorumque nunc opinio est; Succinum fluidum adhuc e fundo aquarum, maxime ad littora maris Balthici, ascendit, postea in littusejectum, aut retibus etiam extractum, tum aere, tum solis calore induratur. Præ cæteris copiosius in terra est *Sulphur*, corpus fossile in frigore durum, conterendum facile in pollinem, in calore moderato fluens, vase clauso totum, & immutatam ab igne elevandum, in igne fluens, admissio aere deflagrans cum flamma cærulea, & vapore volatili, qui animalibus lethalis est. Ita fufius descriptum non nisi raro, & minore copia e terra erui affirmat Cl. Boerhaavius. Si pellucidum rubet, & flavescit, *sulphur aurum* vocatur; si non pellucidum viridem, flavum aut subcinericeum colorem præferat, *sulphur virgo* appellatur; utrumque communi nomine *nativum* dicitur. Quod plerumque venale exponitur, *falsitium* est, & ex aquis sulphureis, vel ex sulphuris non depurati mineris & lapide pyrite excoquitur. Succus hic nutriendo, & propagando igni,

C c

pannis

pannis insuper dealbandis, ac cœlo ab halitibus pestiferis purgando aptus reperitur. Succis terrestribus adduntur, qui non immediate ex terra proveniunt, suam tamen inde originem habent. Tales sunt Balsamum, Myrrha, Thus, Mastyx, Camphora, Resina, varizæ Gummi species &c. quos ex terra cum succo alimentitio attractos per sudorem reddunt arbores & frutices. Huc etiam Mel, & spissior Mannæ succus referri potest.

§. III.

DE LAPIDIBUS.

578. **L**apides sunt corpora firma, dura, rigida, non ductilia, nec oleo, nec aqua solubilia, igne per se non liquabilia, sed in calcem abeuntia. Horum plurima, aut pleraque cum ipso mundo a DEo producta fuisse, vix est, qui neget. Ast, qua ex materia, quove modo hodie adhuc generentur, inter Physicos non adeo convenit. Fuere, qui lapides plantarum instar ex semine sibi proprio nasci contendebant: sed alii omnes, quod nec ullum vitæ vegetativæ signum, nec structuram vere organicam in lapidibus oculus etiam armatus unquam detexerit, merito contradixerunt. Hos inter Cl. Verdries lapidum generationem ita explicat. Dum partes terrestres fixiores ac duriores, item arenosæ & saxæ in aqua aut alio fluido minutim solvuntur, ac variis de causis vel præcipitantur, vel humido vi caloris sublato in limum coeunt, eæ sic consociatæ, atque pro varia molecularum figura & superficierum minorum configuratione varie inter se implicatæ in corpus lapideum concrefcunt. Opinionem suam citatus Auctor pluribus etiam observationibus confirmat, quibus sat magna corporum heterogeneorum frustra in medio diffracti lapidis detecta non raro sunt.

579. Materia igitur, ex qua lapides per meram quasi accretionem, aut juxtapositionem formantur, sunt dictæ primum particulæ, aqua vero his particulis imprægnata vehiculum materiæ. Atque sic in lapidum generatione, ut Cl. le Pluche Spect. Nat. Tom. III. Disc. 25. notat, eundem operandi modum natura observat, quo in extruendo ædificio hodiedum ars utitur, ubi materiam la-
teres

terres aut alii lapides præbent, qui tunc primum continuum, firmumque murum efficiunt, cum aqua sabulo & calce permixta excluso aere poros eorum implevit. Qui cum his Auctoribus sentiunt, etsi non negent, salia præcipue nitrosa lapidum coagulationem promovere, dum vel præcipitationem causant, vel fluidas expellunt particulas, spiritum tamen, aut succum lapidificum specialem admittere, opus haud esse judicant. Idem Cl. le Pluche tres modos, quæ lapidum genesis, seu petrificatio perficiatur, nobis cognitos esse asserit: nam vel aqua materiam lapidificam bene attritam, & ad pulverem minutum redactam ita deponit, ut stratum strato perinde, ac cæmentarius lapidem lapidi, imponat; vel eadem aqua non nisi granula relinquit sine ordine conjungenda; vel denique dictam materiam in alieni corporis poros expulso aere intrudit.

540. Primo modo formari videtur Stalactites, Amiantus, Ardesia, CrySTALLUS &c. in quibus varias quasi contignationes sibi impositas cernimus. Altero modo lapidum vulgare, quin etiam pretiosorum generatio contingit. Suadent id ipsæ eorum cunæ, quæ præaltæ rupium cavernæ sunt: vix enim his aliam invehere materiam aqua poterit, quam sabulum purius, aliquid salis, bituminis terrestris, atque particularum metallinarum, ex quibus postremis venæ aureæ & argenteæ, quæ subin lapides distinguunt, ortum habent. Colores eorum quandoque ipsi sabulo, sæpe, ut observatur, colorato, subin aliis materiis metallicis adscribendi sunt. Tertio demum modo produci hic Auctor putat Marmor; item petrefacta omnia tum animalium, tum lignorum; testacea quoque, conchilia, & varia fossilia; Glossopetras, quæ non tam pro linguis serpentum, quam dentibus piscium petrificatis hodie habentur. Nempe dum lignum v. g. in loco, in quo succus lapidificus est, incipit putrescere, vel alias ob causas sensim deficere, in partium absumptarum locum succus arenosis particulis refertus succedit, & siquidem subtilior sit, omnes corporis poros pervadens, ac denique concrescens lignum istud in lapidem vertit, cujus rei analogiam habemus in fructibus saccharo conditis: quando enim succus sacchari particulis plenus totum v. g. pyrum permeavit, ita demum concrescit, ut pyri substantia in saccharum transiisse videatur.

581. Huc etiam pertinent lapides *figurati*, in quibus varias plantarum animalium, aliarumque rerum figuras deprehendimus. De his a veritate non omnino aliena videtur opinio eorum, qui putant, casu factum esse, ut plantæ, pisces, cancri, aliæ animalculæ tenaciori quadam terræ aut luti massa fuerint involuta; quæ massa, cum successu temporis induraretur, corporum inclusorum figuras intra cavitatem suam retinuit, cumque succus petrificus subin in massam ejusmodi esset delatus, per hunc vel corpora intus conclusa fuere petrificata, vel iis penitus corruptis & absumptis ipse succus hic sensim concrescens figuram plantæ, vel piscis induit. Interim Cl. le Pluche plantarum imagines, quæ quandoque in lapide dissecto videntur, variis etiam succis oleosis lapidis poros permeantibus adscribi posse existimat. Et sane in fenestris tempore hyemali observamus strias & ductus, plantarum ramis ac venulis quam simillimos, quos tamen sine ullius plantæ adminiculo efformatos esse scimus.

582. Lapidēs communius dividi solent in vulgares & pretiosos. Ad vulgares præter eos, de quibus N. 580., pertinent Magnes, de quo §. 5. uberius differemus, Tophus, Saxum arenarium, Lapidēs calcarii, Pyrites, Spathum &c. Pretiosorum classem faciunt gemmæ, seu lapides, qui vel insigni perspicitate, vel amœniore colore, vel rara duritie, vel omnibus simul sumptis commendantur. Atque hisce proprietatibus varias gemmarum species bene distingui posse, creditum hucusque est. At omnibus, quotquot ante ipsum vixerunt, contradixit D. Daubenton, qui, cum per plures annos singulis fere, ut ait, horis pretiosam illam gemmarum collectionem in aula Regis Franciæ inspexisset, pluribus demum experimentis se convictum fatetur, quod neque durities, neque gravitas specifica, aut quæcunque alia proprietas tam certum ac evidens lapides distinguendi medium sint, quam sit ipse eorum color. Hunc igitur ut prorsus determinaret, varios pretiosorum lapidum colores cum illis comparavit, quos radius solis in obscurum cubiculum immissus, & per prismata refractus in opposito pariete exhibet; factaque hac comparatione deprehendit ex septem primariis Newtoni coloribus rubrum Rubino, aurantium Hyacintho, flavum Topazio, viridem Smaragdo, cæruleum Saphiro, violaceum Amethysto com-

venire.

venire. Observavit etiam, colores lapidum mixtos coloribus radii solaris intermediis congruere. Modus observandi, quem tenuit Auctor, pluribus ab ipso in peculiari dissertatione eleganter describitur (Act. Acad. Reg. 1750. pag. 42.) Gemmarum catalogum ordine alphabetico exhibet P. Kircherus Mund. Subterr. L. VIII. Sect. III. c. 6. De Margaritis, quæ huc revocari ab aliis quibus solent, actum est Psychol. Diff. III. Art. III. N. 101.

583. Panca annectere juvat de arte Vitriaria. Materia Vitri sunt cineres & arena; hanc offerunt lapides aliquantum diaphani, & ad Crytalli speciem propius accedentes, vel alii etiam succi concreti, qui in pulverem minutissimum redigendi sunt. Cineres suppeditant plantæ combustæ, ejusmodi tamen, quæ nitrum continent. Ex ambobus igne fufis vitrum obtinetur, seu corpus fragile, diaphanum, ductile, & valde elasticum, quodque præstantissimis in Physica, Mathematica ac communi vita usibus inservit. Id adhuc notandum, quod Anton. Neri in Op. de arte vitriaria observat, crystal- lum nempe per artem confici, quæ variis imbuta coloribus Rubinos, Saphiros &c. egregie mentiatur. Fraudem detegit affusa spuriiis hisce artis partibus gutta aquæ fortis, quæ producta subito macula fictum splendorem obscurat.

§. IV.

DE METALLIS, ET SEMIMETALLIS.

584. Metallum nomine intelligitur corpus fossile, durum, igne liquabile, & ductile, ut cum Kirchero alii passim loquuntur. Nimirum actione ignis metallum fit liquidum; hac vero cessante ad priorem iterum duritiem sensim redit, in quo statu mallei percussione complanari & extendi potest. Metallorum simplicium ab omni ævo, ait Cl. Boerhaavius, non nisi sex numerabantur, nempe ☉ Aurum, ☾ Argentum, ♀ Æs, ♂ Ferrum, ♄ Plumbum, ♁ Stannum. His præscorum Philosophorum quidam septimum addidere ☿ Hydrargyrum seu Mercurium, etsi a metallis natura sua maxime alienum: nam fixum non est, &, licet arte indurari possit.

possit, hæc illi durities minime naturalis est, neque una cum ea ductilitatem acquirit. Philosophi posteriores illud a statione sua deturbare noluerunt, quod iisdem natalibus, simplicitate, pondere, queis metalla cætera, gauderet, quod insuper aut facile cum metallis conjungeretur, aut omnino præcipuam eorum materiam constitueret. Quænam inter metalla sit diversitas ac proportio gravitatis specificæ, dictum Phys. Gen. Diss. II. Art. IV. §. I.

585. Quænam metallorum origo sit, ad hunc usque diem Philosophi æque, ac Chymici certant, &, quod ego quidem scio, adhuc sub iudice lis est. Aliqui metalla omnia mundo coæva esse, & nullum aut generari a natura, aut produci per artem posse contendunt. Alii vero metalla quidem ab initio mundi cum venis & matricibus suis creata fuisse non negant, hodie tamen ea de novo ex materia cuivis metallo debita renasci asserunt. A posteriorum partibus major numerus, atque ipsa etiam ratio experientiis suffulta stare videtur. Ita arguunt: Ex una parte certum est, mixta omnia ex simplicibus elementaribus, seu homogenea illa sint, seu heterogenea, hodiedum componi; ex altera parte constat, terræ interiora iis abundare partibus, in quas per artem metalla resolvi possunt; neque deest calor subterraneus partibus his miscendis, figendis, conjungendis necessarius: ergo negari non posse videtur, metalla perinde ac alia corpora hodiedum quasi renasci posse.

586. Materiam metallorum esse fluidum quoddam, in vapores halituosos resolutum, terræ ac lapidum meatus pervadens, in matricibus convenientibus collectum, & pro harum diversitate diversa quoque metalla constituens, Cl. Verdries, & cum eo plurimi alii censent. Vaporem hunc ex Sulphure potissimum, & Mercurio, atque etiam sale, seu sicco terrestri, tanquam communi corporum basi, constare, experimentis evincere conantur. I. Metallorum fossiores, coctoresque eos plerumque morbos contrahunt, qui a Mercurio & Sulphure alias oriri solent. II. In metallis omnibus Mercurii ac Sulphuris nitor, ruborque deprehenditur. III. Circa ipsa metalla plerumque Sulphuris aut Mercurii reliquias reperiri ajunt, quæ metallicæ venæ jam efformatæ superfuerint. IV. Aquæ, quæ metalli venas alluunt, ordinarie

dinarie Mercurio inficiuntur. V. Omnis materia metallica, si, ut ex mineris est extracta, comburatur, aut excoquatur, sulphureum odorem spargit.

587. De causa, qua metallorum genesis perficiatur, si antiquos, Persarum maxime, Astrologos interrogemus, dicent, Planetas singulos speciales qualitates aut effluxus ad terræ penetralia emittere, quorum activitate metalla generentur, quod signis, quæ metallo cuivis N. 584. adjecta sunt, indicare volebant. At effluxus hos quivis jam ad fabulas hac præcipue in materia haud ægre ablegabit. Profecto ipsius etiam solis calor, cujus alioquin summa vis, ad paucos intra terræ superficiem pedes vix quidquam efficit. Et tamen calor ad metallorum generationem summè necessarius est, illo nimirum subterraneus, qui materiam metallorum remotam, quæ in ipsa demum elementa resolvitur, agit, & agitando illius particulas separat. separatasque ac attenuatas varie iterum inter se confundit, dum denique materia eorundem metallorum proxima formetur. Hæc si in loca idonea confluat, calore movente commiscetur, nec antea quiescit, donec secundum eam, quam habent inter se partes, & moleculæ exilissimæ, convenientiam copulentur. Unde materia illa metallorum proximior vocari non inepte potest semen metallorum: ex ipsa enim convenienter mista, & unita velut ex semine metalla emergunt, non tamen eo modo, quo plantæ; nam istæ alimentum ab extrinseco acceptum interius præparant, & singulis partibus convenienti proportionem ad incrementum distribuunt, metallis autem exterius tantum adjicitur, quod molem auget.

588. Ex his facile colligitur, cur non in omnibus terris generentur metalla, nec in omnibus fodinis omnes metallorum species reperiantur. Nempe non ubique necessarius calor, aut debita, quæ a Creatore primum efformanda fuerat, matrix, aut conveniens materiæ requisitæ quantitas ac proportio, unde materiam proximam elaborari necesse est, invenitur, prout eodem ferme ex capite, debiti scilicet nutrimenti defectu non omnes plantæ ubivis germinant secundum tritum illud: non omnis fert omnia tellus.

589. Censebant olim plures, & fortassis hodieum aliqui censent; metalla invicem non nisi solo maturitatis gradu differre ita, ut ex ignobilioribus nobiliora tan-

dem exfurgerent, modo illa a natura ad debitum maturitatis gradum perducerentur, quo ab arte etiam tanquam naturæ finia perveniri poffe, non tam ratione, quam auri fame inducti non nulli fibi perfuadebant. Sed hæc metallorum transformatio Chimæra eft, ait Cl. Lehman (Aët. Trivolt. 1759. Menf. Jul. Art. 77.) nec metallum unum ad alterius perfectionem unquam elevari poterit, cum propriis quodlibet elementis gaudeat, quæ fola unione diverfas conftituunt fpecies. Academia Parifienfis (Aët. Acad. Reg. 1760. Tom. C.) de Chryfurgis ita inter alia diflerit. Viri Clariffimi Geoffroy, Boerhaave, aliaque Academiæ Membra nec labori, nec tempori, nec fumptibus etiam pepercere, ut infelices (Alchymiftas) a tanti operis molitione dehortarentur. Una plane fufficere deberet meditatio, quod omnes, quotquot rem viribus majorem aggreffi funt, fua fe fpe turpiter delufos doluerint, quodque, etfi demum quis (quod fieri non poffe demonftratum quidem necdum eft) aurum excoqueret ac confequeretur, expenfæ in operationem faciendæ illius pretium multum fane excederent. Eadem (Aët. Ac. Reg. 1722. pag. 52.) cum de fraudibus Lapidis philofophici, quo fe metalla transmutare poffe in aurum jactabant aliqui, loquitur, hæc ferme habet: Eos, qui deceptoribus ejusmodi credunt, ut ab infania proxime, ita a fpe lucri abeffe quam longiffime. His confonant verba Cl. Purchot *Phyf. Part. II. Sect. V. c. 5. Artis Alchymifticæ principium eft mentiri, medium laborare, finis mendicatum ire.*

590. Indicia metallorum in terræ visceribus latentium funt I. Sterilitas montium, quæ inde provenire poteft, quod venæ minerales humores abfumant alendis plantis neceffarios. II. Livor in foliis arborum adultarum etiam verno tempore notatus, nigredo etiam in ramis, qui fpirituum feu effluviis metallicorum effectus funt. III. Conftans pruinaeolutio, quæ fumis mineralibus calore congelationem impredientibus adfcribi poteft. IV. Scaturigo aquarum metallicos fpiritus vehementium. V. Ignes per intervalla noctu præfertim erumpentes, quod in Anglicis ftanni fodinis frequens effe Boyle teftatur &c. Interim negari non poteft, aliqua faltem ejusmodi indicia aliquibus in locis fubin fallere omnino, fubin non metalla, fed foßilia alia, falia, fulphura &c. prodere; certiora tamen funt, quam virgulæ divinatoriæ inclinatio.

No , quæ etfi ab effluviis metallicis tanquam a causa physica repeti me non invito queat, præsertim, cum ex ligno magis poroso, Corylo v. g. & aliis, parari soleat, frequentius tamen teste experientia decipit. Quid quod ea ad usus alios, quibus proportionata non est, ad furta v. g. detegenda, vel securius committenda a simplicibus aut nefandis hominibus adhibita sæpe fuerit? Hæc de metallis in genere; nunc de singulis aliqua.

591. *Aurum* metalla reliqua uti pretio, ita & pondere, densitate, ac subtilitate particularum multum superat. Igne quantumvis intenso non depravatur, atque ideo Cl. Hombergium, qui aurum in foco speculi caustici vitrificasse sibi visus erat, deceptum fuisse, declaravit & ostendit Academia Regia. Colorem sulphuri purissimo debere creditur. Nullo fluido, nisi aqua regia, solvitur; quodsi aurum jam solutum præcipites per sal Alkali fixum vel volatile, & præcipitatum lente exsiccet, gradus caloris satis moderatus illud in auras dissipabit cum ingenti strepitu; & sic paraveris aurum, quod *fulminans* appellant. De ductilitate & divisibilitate Auri, de qua Phys. Gen. Diff. II. Art. I. §. 1., præterea asserit D. de Bomare (Act. Trivolt. 1762. Mens. Maio Art. 82.) ex institutis rite calculis constare, quod unicus aureus equit una cum equo, ac omni ejus ornatu obducendo sufficiat. Ut aurum a reliquis metallis separent, Antimonio utuntur, quod illud, aliis in scoriam reductis, purum ac desecatum sistit.

592. Regna Mexicanum & Peruanum præ aliis abundant mineris aureis, quas etiam in aliquibus Germaniæ locis reperire est. Præter mineras magna quoque fluminum auriferorum copia datur. Cl. Reaumur examinavit micas aureas ex pluribus Galliæ fluviis ad ipsum delatas, & omnes figuræ valde irregularis esseprehendit; planas tamen notavit singulas & in extremitatibus circulares, quam figuram inde provenisse putat, quod frequens collisio aquarum vi causata prominentias abstulerit. Sabuli, cui commixtæ fluebant dictæ auri micæ, tres erant species. Primum album fuit, & commune; alterum in rubrum desinebat colorem, & microscopio inspectum divitem Rubinorum, Saphirorum, Hyacinthorum &c. collectionem ostentabat; Tertium erat nigrum, & totum veluti ferreum a Magnete non minus ac feramenta attrahebatur. Aureas hæc micæ Cl. Lehmann

fragmenta esse judicat, a venis metallicis aquarum v. avulsa, atque eas in fluviis formari non posse inde colligit, quod in his primo calor dilatandis elementis metallicis, ac efformando auro perquam necessarius desit, ac dein nimia quoque commotio quietem impediret, qua elementa satis minuta ac levia figerentur, unirentur, ac crassiores demum moleculas efficerent.

593. *Argentum* pretio ab Auro secundum, pondere, densitate, puritate, ac subtilitate particularum multum illo inferius est; præstat tamen elasticitate; lævigari etiam ac liquari præ auro potest. Solvitur non nisi aqua forti; Antimonio in scorias redigitur, & volatile efficitur. E matricibus erutum fere semper aliquid auri admixtum habet, & quo plus habet metalli hujus, eo melius, quo vero plus metalli alterius complectitur, eo deterius comperitur. Fluvios, qui argenteas trahunt arenas, non nisi rarissimos videre est.

594. Notari hic meretur vegetatio metallica, quam *Arborem Diana*, vel etiam *Philosophicam* appellant, quæque est solutio argenti ordinarie spiritu nitri facta. Modus operandi brevissimus, cujus inventionem Academia Regia Tomo 100. pag. 189. Cl. Hombergio cum laude tribuit, est sequens. Quatuor drachmæ argenti puri ad scobem redacti cum duabus Mercurii drachmis permixtæ, non adhibito igne, dissolvantur in quatuor aquæ fortis uncis; tum massæ solutæ, & probe commixtæ uncia immitatur parvæ phialæ una cum exigua portione (pisi v. g. magnitudinem æquante) malagmatis ordinarii ex auro aut argento valde tractabili. Post intervallum trium minutorum videbis ex massula primum dicta egredi filamenta perpendicularia, quæ sensim aucta, ac in brachia ramosque divisa, arbusculam repræsentabunt splendentis argenti colore conspicuam. D. de Condamine non solum argenti, uti DD. Lemery, & Petit, sed aliorum insuper metallorum, cupri v. g. plumbi &c. vegetationem obtinuit.

595. *Æs cyprium*, seu *Cuprum* est metallum valde ductile, malleabile, & elasticum, multum sulphuris & vitrioli continens. Erutum ex fodinis primo per lotionem depuratur a materiis terreis, & per ignem a sulphure & arsenico; tunc catillo cum certa quantitate salpetri, & salis marini injicitur, sicque ignis ope obtinetur corpus metallicum non malleabile, quod cuprum, sed non purum

Cuprum, & aliis materiis commixtum continet; cuprum nigrum vocant. Malleabile redditur fusura secunda, & addita plumbi portione. Aufertur ei materia phlogistica, & forma metallica, quando igni moderato, & uniformiter ardenti exponitur. Et si metalla omnia, quæ funduntur, volumen minus acquirant, majus tamen voluminis decrementum in cupro, quam in argento & Stanno Cl. Reaumurius advertit. Metallo hoc & optimo quidem maxime dives est Suecia.

596. Color cupri alias rufus, siquid mineralium admiscueris, subito alius evadit. Terræ Cadmiæ, aut lapidi Calaminari admistum flavescit, & Orichalcum dat; in bracteolas extenuatum, & felle tauri imbutum æs coronarium efficit; acido vitriolico junctum dat vitriolum cæruleum; æs insuper viride seu ærugo ex illo educitur. Metallum, quod princeps vocant, fit ex cupro rubro & Zinco seu marcasita metallica. Metallum hoc compositum DD. la Croix, & le Blanc artifices Galli ad summam perfectionem evexerunt: aucto enim splendore, & colore ita mutato, ut ad aureum proxime accedat, tractabilius insuper reddiderunt, novoque nomine Tombacum, vel Tambacum appellarunt. D. Geoffroy junior varie etiam cuprum rubrum & flavum cum Zinco commiscuit ita, ut nunc metallum tam fragile quam vitrum, nec minus, quam speculum, resplendens; alias striatum prodiret maximo auri fulgore oculos perstringens &c.

597. *Ferrum*, ut e mineris educitur, est materia dura, fragilis, facile fundenda, & nullo modo malleabilis, quas proprietates, excepta duritie, per alteram fusuram omnes amittit, earumque loco ductilitatem induit. Cum acido vitriolico vitriolum viride producit, quod etiam Martis, vel Calchantum dicitur. Quam late pateat usus metalli hujus, neminem latere potest, & pluribus explicat Cl. le Pluche (Spect. Nat. Tom. III. Disc. 26.) qui ipse præ aliis commendat insigne Opus Agricolæ et si Auctoris minime recentis. Ejusdem in Medicina quoque præstantiam Cl. Boorhaave. Oper. Chym. P. III. iterato demonstrat. Cl. Reaumur Galliam inprimis, tum exteris etiam gentes sibi devinxit, dum varias invenit methodos ferrum præparandi, tractandi, & variis aptandi usibus, quibus hodie in rem suam strenue utuntur.

598. *Plumbum* e fodinis purum non eruitur, fed multis heterogeneis particulis, & maxime sulphure abundat, quod ipsum efficit, ut facilius ac metalla cætera flecti, ac fundi possit. Semivitrificatum *Lythargyrium* appellatur. *Minium*, quo pictores utuntur, ex calce plumbi paratur. Plumbum facile vitrificatur ipsum, & hanc proprietatem aliis quoque, quibus commiscetur, metallis tribuit. Separationem insuper auri & argenti ab aliis metallis causat hoc modo: mistura metallorum catillo (Cupellam Chymici vocant) immittitur addita magna plumbi quantitate; plumbum & cum eo omnia metalla heterogenea vitrificantur, & per transversum cupellæ abrepta aurum relinquunt, ac argentum purum, & defæcatum, Acad. Reg. Tom. 100. pag. 167. D. Grosse ex plumbo per spiritum nitri soluto pulverem cinereum præparavit primus, quo aurum albescat.

599. *Stannum* metallum est album, quod facile adhæret metallis aliis, facile etiam ab iis, si a fæcibus, aut rubigine, non omnino expurgata fuerint, avellitur. Superficie ferri superinductum *Ferrum album* efficit. Elasticitatem, qua purum vix præditum est, dum cupro miscetur, maximam acquirit, & *Æs campanum* dat. Ex calce stanni materiæ facile vitriabili immisto illud pigmenti genus nascitur, quod *Encaustum* dicunt. Naturam metalli hujus determinaturus D. Geoffroy, stannum Anglicanum (virgineum vocant) duodecies omnino calcinavit, & 1. detexit magnam sulphuris copiam, quod facile inflammabatur, & a partibus ipsius stanni in vapores albos abeuntibus separabatur; 2. exiguum plumbi portionem, quam maculæ nigræ in alba metalli superficie apparentes indicarunt; 3. denique misturam arsenici. Calcinatio postrema modicum calcis reliquit, in quo granula metalli tenuissima, & illis, quæ stanni esse solent, duriora sunt inventa. Id ægre tulit, quod granula, ut in catino rite examinari possent, non suffecerint.

600. *Mercurius*, *Argentum vivum*, *Hydrargyrum* prout e tellure effoditur, semper sulphuri conjunctus reperitur; igne exagitatus mox evaporat; frigori etiam intensissimo expositus fluidus tamen semper manet, omnibus ex metallis minime fixus. Adhibetur, ut aurum & argentum a terris separetur, quibus constricta hærent. Dissolutus in spiritu salis *Sublimatum corrosivum* dicitur; quod hoc de novo per Mercurium sublimetur, prodit *Sublimatum dulce*.

Asule, seu *Panacea mercurialis*, quæ ad purgandum sumitur. Alias etiam venenum est longe perniciosissimum, quod Aurifabrorum non pauci experti jam sunt. Quid Physicæ præstet Mercurius, alibi dictum, ubi de Tubo Torricelliano, & Phosphoris actum.

601. Metalla imperfecta, seu semimetalla a perfectis in eo maxime differunt, quod ductilitate careant: unde ex sententia Cl. Lehman & elementis constabunt non adeo minutis, & sulphure puriore, quod ignis actionem sustinet, erunt destituta. Plurima horum aliqui numerant, & totidem, quot fossilia crystallina, faxea, terrea reperiuntur, quæ verum in se metallum complectuntur. Nos ea, quæ magis celebrantur, strictim recenserebimus.

I. *Antimonium* videtur D. Geoffroy esse compositum ex sulphure communis, seu crassiore, quod igne auferitur, & terra metallica alba, ac splendenti, quam *Regulum antimonii* vocant. *Regulus* hic vi ignis ad quamdam farinæ speciem, seu flores antimonii redigitur. Solvendis metallis, & facilius fundendis aptum est. Quod si ebullire feceris antimonium in Alkali fixo liquefacto, liquor hic turbidus, & rufus evadet, atque refrigeratus rufum deponet pulverem, qui decantato nomine *Chermes mineralis* appellatur.

II. *Bismutum* substantia albicans, rigida, fragilis, facillime fundenda, igni vehementiori subito in auras agitatur. Solvi potest acido salis marini, & aqua regia; feliciter tamen acido nitri. Solutum si quid Alkali aut fixi aut volatilis, vel etiam aquæ admiscueris, pulverem obtinebis valde candidum, seu Magisterium Bismuti, quo fæminæ ad ornatum suum utuntur. D. Hellot ex Bismuto per acidum nitri soluto atramentum sympatheticum paravit.

III. *Zincum* Bismuti species est. Aliud ex India advehitur, aliud ipsa nobis Germania suppeditat, & melius quidem, ac purius, ut testatur in Historia Academiæ Regiæ D. Malouin. Ferrum & cuprum eo dealbant ferme ut stanno, sed non nisi tenuiter; cupro & stanno adparandum æs campanum misceri quoque solet.

IV. *Arsenicum* album in maxima copia e minerali dicto *Cobalt*, vel *Cobolt* educitur. Flavum, quod *Auripigmentum* dicitur, & rubrum, quod *Sandaraca* vocatur, ejusdem cum albo substantiæ sunt, atque diversum colorem non nisi diversæ sulphuris mixturæ debent. Ven-

ni penetrantis vim quodvis habet; rubro etiam pictores in rem suam uti norunt.

V. *Cinnabaris*, quæ vel nativa est, vel factitia; illa in ipsis fodinis ex Mercurio & sulphure ope ignis subterranei coalescit; hæc a chymicis per artem producitur.

VI. *Cadmia*, quæ aliud nil est, quam fuligo fornacum cameris adhærens.

VII, *Pompholix* pariter fuligo est, & subtilior quidem fornacum mineralium, velleris speciem præferens.

§. V.

DE MAGNETE.

602. *M*agnes lapis esse censetur ferro prægnans, satisque ponderosus, in ferri præsertim fodinis reperiendus; atque ob miram, quam exerit vim, præ alio lapide peculiari consideratione dignus. Vis isthæc ad tria potissimum capita revocatur; ad Directionem, Attractionem, & Communicationem. *Directio* in eo sita est, quod Magnes, in aere suspensus, aut suberi aquis innatanti impositus sese ad Meridianum loci componat, ac polum suum australem ad polum terræ borealem convertat. Duos nimirum in ipso Magnete polos distinguere solemus; pars illa, qua magnes adhuc in fodina latens respiciebat Austrum, polus dicitur australis; illa vero, qua Boream respexerat, borealis dicitur. Hos in Magnete adhucdum rudi deprehendimus, si is in limatura ferri reponatur, attendaturque, quibus partibus copiosius adhæreant particulæ ferreæ, & ista major copia ostendet utrumque polum. Notatis polis si suspendatur Magnes, polus ipsius australis ad Boream, alter se ad Austrum vertet; id ipsum contingit in *acu magnetica*, seu, ut etiam vocant, *nautica*.

603. Attamen hæc versus polum directio non est ubivis constans; nunc quippe pluribus, nunc paucioribus gradibus pro regionum diversitate constanter declinant acus nauticæ, hic quidem ad Orientem, alibi ad Occidentem; quin in eodem etiam loco post aliquod tempus directionem orientalem quandoque mutant in occidentalem, ac vicissim. Hæc directionis variatio vocari solet *Declinatio*. Præter hanc notari etiam debet *Inclinatio*

600. vi cujus acus magnetica in æquilibrio libere suspensa ex una parte præponderat, & deorsum inclinatur, in nostro quidem hemisphærio versus plagam borealem, in altero australem versus ea lege, ut inclinatio sit magis vel minus notabilis, quo locus, in quo Magnes est, vel remotior ab Æquatore, vel eidem vicinior est; sub ipso Æquatore exactum servat æquilibrium.

604. Attractio Magnetis est, qua is vel alterum Magnetem, vel ferrum ad se trahit hoc tamen discrimine, quod ferrum ex utraque sui parte ad se trahat, Magnetem vero alterum ex una parte attrahat, ex altera repellat. Si scilicet duo Magnetes ita sibi obvertantur, ut poli cognomines, scilicet duo boreales, aut duo australes se se respiciant, mutuo se repellunt, ut apparet, si uterque Magnes hoc situ imponatur geminæ naviculæ facile mobili: hinc poli isti vocantur inimici. Si vero Magnetes diversis polis se se respiciant, mutuo se attrahunt: inde poli diversæ denominationis vocantur amici. Vis hæc attractiva non in omni Magnete æqualis est; plerumque eo agit fortius, quo est gravior. Aliqui ad minorem quidem distantiam agunt, plus tamen ferri sustinent, quam qui ad majorem agunt distantiam. Utrum autem hæc actio Magnetis certas observet leges, determinari non potest ob nimiam experimentorum diversitatem. Illud ajunt, majorem esse ipsius actionem hyeme, quam æstate; majorem quoque in ferrum frigidum, quam ignitum; uti etiam in ferrum purum, quam in rubiginosum.

605. Vis attractiva Magnetis multum adjuvatur per armaturam, ut loquimur; sit hæc sequenti modo. Geminæ Magnetis facies, in quibus sunt puncta polaria, lævigentur, & applanentur ita, ut superficies sibi parallelas, & ad axem perpendiculares obtineant. Tum binæ ex ferro recente, & molliore laminæ æquales pedunculis instructæ alligentur ad geminas facies polares, quas eæ laminæ totas obtegant. Pedunculis aliud ferrum, superne planum & politum, applicetur; ex hujus foramine aut unco medio suspendatur pondus, quod successive potest augeri, eoquod vires in Magnete hoc crescant, donec debitum denique gradum obtineant.

606. Tertia Magnetis proprietas est communicatio virtutis tum directivæ, tum attractivæ, qua utraque
fer,

ferrum, aut chalybem imbuat: Virtus hæc ut communice-
 tur, chalybs aut ferrum admoveatur alterutri pe-
 dunculo Magnetis armati. Ubi observandum 1. ut vis
 directiva communicetur acui nauticæ, qua hæc Boream
 respiciat, cuspis lingulæ admovenda est polo australi;
 secus si fiat, cuspis respiciet Austrum. 2. Cuspis vel
 simplici attactu cum aliqua tamen mora applicari po-
 test polo, vel potest pedunculus a medio lingulæ versus
 cuspidem aliquanto lentius cum aliquo affrictu duci,
 idque etiam sæpius; si autem ductus fiat finistrorsum
 v. g., cavendum, ne iterum retro aut dextrorsum tra-
 hatur; alias vis directiva antea communicata denuo ex-
 tinguitur. Eadem ratione ferro aut chalybi communica-
 tur etiam vis attractiva, qua in communicatione caven-
 di sunt ductus retrogradi. Quamvis porro Magnes for-
 tiori vi trahat ferrum, quam chalybem, huic tamen
 vim majorem trahendi communicat, quam ferro. Sæpe
 Magnes alias debilior majores communicat vires, quam
 alius, qui in se fortior est. Si annulus ferreus alterutri
 Magnetis polo admoveatur, punctum annuli, quod im-
 mediate contigerat Magnetem, vim polo isti contrariam
 acquirit: illud vero annuli punctum, quod priori e dia-
 metro oppositum est, acquirit vim polo attacto propriam.
 Quodsi lamina ferrea, vi magnetica rite imbuta, in in-
 cude aliquamdiu malleo tundatur, vires omnes amittet;
 quas perdet etiam, si igni imposita candesciat.

607. Rationem physicam hujusmodi effectuum quod
 concernit, olim multi cum Cardano dicebant, vim dire-
 ctivam provenire a vi quadam sympathetica, quam acus
 magnetica habeat cum stella polari, aut alio Coeli puncto.
 Peripateticorum aliqui docebant, Magnetem peculiari
 quadam forma substantiali esse præditum, quæ effectus
 istos edat; aut saltem instructum eum esse tali qualitate
 absoluta, quæ his phænomenis proportionatas habeat
 proprietates, sive dein illa forma, aut qualitas in toto
 Magnete sit homogenea, sive etiam heterogenea. Ali-
 qui, qui se Newtonianos profitentur, hic denuo ad vim
 suam attractivam confugiunt, at ab ipso Cl. Musschenbroe-
 kio acerrimo alias attractionis defensore inde revocan-
 tur. „Magnes, inquit hic Auctor in Differt. de Magnete,
 cap. 2. experim. 22. non attrahit ferrum vi legis gene-
 ralis attractionis, qua omnia corpora sese trahunt: nam
 ponamus particulis ferri æqualibus innatam esse eandem
 vim

Vim attrahendi Magnetem, tum erit magnitudo attractionis in massa ferrea, uti est magnitudo massæ, & idcirco massa major a Magnete fortius deberet attrahi, quam minor; verum longe quid aliud experientia evincit, & massa major debilius attrahitur minore: quam ob rem Magnetis actio ab alia causa, quam a lege universalis attractionis pendeat, . Dein recensitis experimentis P. Schotti, quibus constat, quod Magnes fortiter malleo percussus, in pulverem contritus, rubigine obductus, aeri humido expositus virtute sua destituatur, subjungit idem Auctor. „ Lapidis manet eadem substantia, eadem magnitudo, adeoque vi legis innatæ non minorem attractionem exerceret: quam ob rem hanc non esse causam magneticorum effectuum, liquido patet, . Ita Musschenbroekius. Siquis forte peculiarem esse dicat vim attractivam Magnetis, is caveat, ne cum antiquioris Peripati forma substantiali, aut qualitate absoluta aliquam contrahat affinitatem; quod autem debeat esse peculiaris, tum ex dictis, tum ex eo patet, quod eadem particulæ Magnetis manente eadem distantia jam hanc vim, jam illam, jam neutram vel in Magnete, vel in ferro exerant, prout est diversa axium Magnetis, ac polorum constitutio.

608. Omisissis itaque his opinionibus, breviter recensito hypothesin eorum, qui modo sat frequentes per effluvia magnetica memoratos supra effectus verosimiliter explicari posse existimant. Isti supponunt I., quod vel ipse totus globus terraqueus sit ingens quidam Magnes, vel quod saltem nucleus telluris sit verus Magnes, quam ob rem frustum Magnetis extra fodinas existens *Terrellam* vocant. Suppositum hoc suum deducunt ex eo, quod ferramenta ex solo contactu & applicatione ad terram vim magneticam sortiantur, præsertim si erecta super terram diutius constiterint: unde forcipes, & similia instrumenta ferrea, per plures annos verticaliter suspensa, attrahunt aciculas ferreas; virgæ ferreæ, quæ diuturno tempore in lineæ meridianæ plano constitutæ hæserunt, vim conversivam ad polum acquirunt; præterea acus nauticæ inclinantur versus terram perinde, ac versus Magnetem iisdem admotum.

609. Supponunt II. quod effluvia quædam ab uno polo telluris egressa versus alterum ejus polum circa tellurem motu continuo ferantur, ibique per polum istum denuo in terram ingressa per alterum terræ polum iterum

egrediantur, sicque perpetua detur in tellure effluvia hujusmodi circulatio, quamquam causa, qua fiat, ut fluidum e terræ visceribus erumpens feratur ab uno polo versus alterum, satis cognita necdum sit. Effluvia isthæc communicantur quidem etiam aliis corporibus in globo terraqueo existentibus, sed præcipue iis, quæ cum terræ nucleo maxime congruunt, uti sunt Magnes & ferrum, in quibus apta particularum, & pororum dispositio tum ad recipienda, tum ad emittenda ista effluvia reperitur.

610. Supponunt III. quemadmodum in ipso globo terraqueo memorata effluvia ab uno polo constanter egrediuntur, & circum tellurem lata in alterum polum denuo ingrediuntur, sic etiam terrellam, seu Magnetem sua habere effluvia, quæ pariter ex uno illius polo egressa instar vorticis Magnetem circumeant, & per alterum polum denuo ingrediuntur, atque ita atmosphæram quamdam vorticofam circa Magnetem efforment. Deducunt id inprimis ex hoc experimento: ex charta crassiore ita excindatur medium, ut huic foramini apte inferi Magnes possit eousque, ut poli Magnetis in chartæ hujus plano jaceant horizontaliter. Chartæ circa Magnetem imponatur subtilis, ac rite purgata scobis ferri, & charta leniter percutiatur. Mox scobis particulæ sua velut sponte in arcus se se circa Magnetem disponent, quorum crura utrique polo insistant. Hinc inferunt, effluvia magnetica, quorum impulsu particulæ scobis ad motum hunc, & figuram arcus determinantur, ab uno polo Magnetis ferri versus alterum.

611. Supponunt IV. poros, & fibras corporum magneticorum situ ad axem parallelo ita esse dispositos, & formatos, ut effluvia magnetica ex una parte, seu polo liberius possint subire, & ex altera facilius iterum erumpere; ex polo autem adverso difficilior subire queant, nec tam libere per totum Magnetem promoveri: hinc ponunt poros non lævigatos, sed quasi villosos, & ramentis quibusdam undique prominentibus, & in unam partem aliquantulum depressis vestitos, ut adeo in eam partem liberrime moveantur effluvia, in quam ramenta hæc sunt depressa; directione vero contraria, obstantibus nimirum his ramentis, difficillime moveantur.

612. His suppositis inprimis directionem Magnetis versus polos mundi explicant per subtilissima effluvia e tellu-

telluris polo uno erumpentia, &, peragrata terræ superficie, in polum alterum denuo ingredientia. Si enim Magnes in aere liber pendeat ita, ut pori ad axem paralleli a polo ad polum excurrant, effluvia e polo australi egressa, dum terræ superficiem recta versus Boream permeant, impingunt in Magnetem; sique hic faciem effluviis hisce minus perviam torrenti isti obvertat, torrens hic repetitis impulsibus Magnetem facillime mobilem ad eum denique situm determinabit, in quo effluvia hæc secundum directionem suam liberrime possint pergere, quod fiet, si eam faciem aut polum obvertat torrenti magnetico, in quem ob dispositionem pororum facile ingredi effluvia queant. Hinc apparet, cur Magnes sibi relictus situm contrarium illi, quem in fodina obtinebat, extra fodinam in superficie terræ semper habeat ita, ut polus Magnetis borealis respiciat polum mundi australem, & vicissim: si enim effluvia magnetica ponantur ingredi in polum terræ borealem, & ab hoc secundum axem terræ deinceps intra telluris viscera fluant versus polum australem, patet, poros & fibras Magnetis in terra adhuc latentis ita esse dispositos, ut effluvia magnetica faciem seu polum Magnetis borealem facillime subeant. Quodsi jam Magnes e visceribus terræ erutus in hujus superficie constituitur, cum in hujus superficie effluvia magnetica moveantur directione contraria, nimirum ab Austro versus Boream, non poterunt hæc libere moveri per Magnetis hic constituti poros, nisi is faciem borealem nunc obvertat Austro, unde ista effluvia adveniunt.

613. Declinationis magneticæ phænomena inde repetunt, quod partes globi terraquei plurimum sint heterogeneæ, & in diversis partibus diversæ occurrant venæ aut ferreæ, aut magneticæ. Venæ magneticæ etiam ipsæ sua emittunt effluvia; hinc si sint non nihil propinquiores, ista quoque agere in Magnetem vel acum nauticam poterunt, sique illam a linea meridiana detorquere. Cumque partes terræ continuæ mutationi obnoxie sint, poterit per terræ motus, per ignes subterraneos, per affluentem humorem metallicum, pluresque alias causas in venis his magneticis mutatio aliqua intervenire, quam mutationem alia etiam Magnetis declinatio eodem in loco consequetur. Alii, ut declinationem explicant, docent, polum magneticum a terræ po-

lo distinctum esse ; alii nucleum magneticum moveri ajunt una cum polis suis ; alii quatuor omnino polos magneticos statuunt, duos Boream versus , & totidem versus Austrum ; ex his eum prædominari , qui acui proximus est ; nucleum quoque magneticum , in terræ gremio contentum , perpetuo moveri ajunt , prout declinatio ferme semper progreditur. Inclinationem acus nauticæ ut explicant , dicunt , positis magneticis effluviis , e terra prorumpentibus , mirum non esse , quod acus inclinetur versus globum terrestrem secundum eam partem , secundum quam copiosiora tendunt effluvia , nimirum in partibus borealibus versus partem Boreæ proximiorē , in australibus versus Austrum. Ita loquuntur de directione.

614. De attractione hunc ferme in modum discunt. Vis Magnetis attractiva non ab aeris retro subeuntis impulsu , sed a motu & nisu atmosphæræ Magnetem ambientis derivatur. Primum ex eo patet , quod attractio ferri , & ejus ad Magnetem adhesio contingat etiam in vacuo ; imo citius ferrum a Magnete arripitur sub recipiente exhausto. Alterum sic declarant. Ad explicandam vim attractricem necesse est , ut ratio reddatur , cur poli cognomines se invicem repellant tum in Magnete , tum in acu magnetica , poli vero amici ad se accedant ; item , cur ferrum a Magnete ex utraque parte rapiatur : horum autem ratio posita atmosphæra Magnetem ambiente sic redditur. Si Magnetis configuratio interna , & pororum structura talis est , ut molecule minimæ villorum instar prostratæ , & inflexæ vergant suis apicibus versus unum magnetici corporis polum v. g. borealem , fiet , ut fluidum magneticum , incurrens in polum australem , hunc liberrime pervadere , & super villorum inclinata superficie moveri possit , quin ipsis impulsu fortiolem communicet ; at vero in polum borealem illabens idem fluidum obnitentibus villorum , qui poros interius vestiunt , apicibus impulsu communicabit : quare si Magnes eo modo alteri obvertatur , ut polus borealis unius respiciat polum australem alterius , fluidum atmosphæricum , ex hoc egressum , liberrime ingreditur , & permeabit polum alterius , quin notabilem impressionem , seu impulsu in latera pororum alterius faciat , cumque ita inter utrumque Magnetem rarior intercepta sit materia subtilis , hæc ex utraque parte pre-
mens

mens Magnetes conjunget. Fors etiam ex gemina atmosphæra utriusque Magnetis fit tantum unica, ut adeo fluidum atmosphæricum ex anteriore egressum revertatur ad tergum posterioris, sicque aliquid ad conjunctionem conferat.

Quando autem illi Magnetum poli sibi obvertuntur, e quibus prorumpit subtilior atmosphære torrens, tum quidem fluidi hujus particulæ ex unius polo effluentes poli cognominis poros subire non poterunt, eoquod in porrectos villorum apices impingant; sicque Magnetes mutuo a se recedere cogent. Quodsi autem haud longe a se invicem locentur illi Magnetum poli, in quorum utrumque circumfusum fluidum irrumpit, præterquam, quod fluidi magnetici directiones sibi adversentur, repulsio etiam ideo consequetur, quod utriusque Magnetis atmosphære non ita in unam coalescant, ut fluidum aliud interfusum omne removeatur, quo remoto fieri accessus posset.

Ferrum denique nondum magnetica virtute imbutum, cuicunque polo admoveatur, ad Magnetem rapi ideo putant, quod ferri structura & pororum conformatio videatur prorsus accommodata ad magnetica effluvia recipienda ac transmittenda, eo quidem pacto, ut hæc effluvia per interiorem ferri superficiem liberius penetrare, nulla vi ipsius pororum parietibus illata, possint; quo efficietur, ut e spatio Magnetem inter & ferrum fluida cætera interfusa removeantur, quibus remotis, quoniam fluido subtilissimo corporibus circumfuso secundum eam partem nihil obnititur, necesse est, ut pressione ejus ferrum ad Magnetem urgeatur.

615. Hinc porro reddunt rationem, 1. cur præter ferrum aut chalybem non alia etiam corpora Magnes attrahat; quia nimirum in aliis non ea datur pororum dispositio, quæ effluviis magneticis liberum transitum permittat, qualis tamen dispositio datur in ferro, corpore Magneti vix non homogeneo. 2. Cur Magnes chalybe, aut ferro armatus longe validius attrahat corpus, attractumque sustineat; quia effluvia magnetica liberius fluere per ferrum, quam aerem possunt, adeoque uberior eorum copia in ferrum attrahendum tunc irrumpit, quæ antea circa latera Magnetis evagabatur, minusque collecta fuerat. 3. Cur minores non nunquam Magnetes majora pondera sustineant, ubi majores sæpe sunt infirmiores. Magnē

tes nempe non raro constant partibus heterogeneis, per quas effluvia tam copiose non trajiciuntur; hinc evenire potest, ut Magnes quantumvis exiguus purioribus compactus partibus grandem pro mole sua circum se habeat atmosphæram.

616. Vim magneticam ferro aut chalybi communicatam pariter a profluviiis magneticis repetunt: tunc enim magnetica vis ferro aut chalybi communicatur, quando hæc corpora vel Magnetis polo, vel ipsius armaturæ affricantur, aut applicantur, quæ vis in eo consistit, quod ferrum & chalybs se ad mundi polos dirigat, aliudque ferrum trahat; at vis hæc a magneticis profluviiis haud dubie proficiscitur: nam, dum ferrum aut acus nautica polo Magnetis, vel ejus armaturæ affricatur, profluvia illa in acum irruunt, fibrillasque seu villos in unam partem, prout ferri vel acus juxta Magnetem ductus sit, inclinant, atque ita duos sibi polos alterum ingressus, egressus alterum in ferro vel acu non secus, ac in ipso Magnete sunt, efformant, id quod ex eo verisimilitudinem aliquam nanciscitur, quod pori hi contrario magnetis ductu denuo mutantur. Profecto fieri hoc effluviarum ope posse, ex eo inprimis inferri potest, quod molliores sint ferri, quam Magnetis fibrillæ, magisque flexiles; deinde analogia Mercurii subeuntis in virgam auream id ipsum explicatur: tam facile enim intelligitur, effluviu Magnetis subire in ferrum, eique magnetisimum conferre, quam effluviu Mercurii subire in aurum, illudque inalbare. Quid? quod sicut per ignem Mercurius separatur ab auro, ita a ferro magnetico per ignem vis magnetica tollatur. Ita hi Auctores, qui tamen ipsi fatentur candide, hanc suam de Magnete opinionem eam non esse, ut non exceptionibus sat multis pateat.

617. Et sane, quam incertum inprimis sit ipsum suppositum de effluvio illo universali, eoque copię vix non immensæ, nemo non videt. Dein, quæ verisimilis causa effluviu istud determinans ad eum motum, quo ab uno terræ polo versus alterum continua circulatione feratur? Quæ causa, idem effluviu ex terrella, seu Magnete egressum determinans ad similem motum vortiosum? Cur non potius hoc terrellæ effluviu versus mundi polu abripitur a torrente illo universali? Sed admissio etiam hoc supposito gemino neutiquam tamen omnia Magnetis phænomena

phænomena ita declarari poterunt, ut intellectus acquiescere illico possit, aut debeat.

Nam primo de directione ex observationibus plurimis plane evinci videtur, incrementa declinationis, quæ Magnes in eodem loco acquirit, esse admodum regularia, quemadmodum ex observationibus Academiæ Regiæ Parisinæ colligitur, ex quibus habetur, quod ab anno 1666. quo lingula magnetica cum Meridiano congruebat, usque ad annum 1752. septendecim gradibus a Meridiano Occidentem versus aucta successive declinatio fit. Id de tota ferme Europa sat certum, quod a medio prioris sæculi declinatio ex orientali in occidentalem transierit, atque identidem creverit. Quis autem suspicetur, venarum ferri ac Magnetis mutationes adeo regulares interim accidisse? Reliqua vero pro explicanda declinatione ab aliis assumpta utique nil nisi conjecturæ sunt. Præterea in locis quibusdam observare est perpetuum motum acus nauticæ in quamlibet plagam ita, ut nulla constans ejus directio notari possit. Prope insulam Alboranam vero in mari mediterraneo ad oram Barbariæ tantata est acus agitatio, ut etiam ex stilo exiliat.

Secundo circa attractionem incerta etiam multa sunt, illud præcipue, cur se se repellant duo Magnetes, dum eos sibi polos obvertunt, in quorum utrumque effluvia magnetica penetrare facillime possunt. Dubium etiam multis movebit maxima illa vis, qua ferrum trahit, & retinet, etsi plana, in quibus se contingunt Magnes & ferrum, haud admodum magna sint. Testatur certe P. Schottus, Lugduni Magnetem fuisse tantarum virium, ut ferrum eidem propius admotum duo aut tres viri retinere non potuerint, adhærens vero avellere ne decem quidem.

Tertio magis adhuc incerta sunt, quæ de communicatione virtutis dicuntur, ut consideranti haud difficulter patebit præcipue circa annulum alterutri polo admotum, & huic similia, quibus omnibus rite expensis etsi non negem, assumpto effluvio magnetico, quod circa terram, & terrellam ab uno polo versus alterum motu continuo gyretur, phænomena aliqua satis convenienter explicari, censeo tamen, id quod censent plerique, nullam hucusque excogitatam esse hypothesin, quæ phænomenis plane omnibus ita satisfaciat, ut pro vera, ac genuina haberi mereatur.

Quæ porro de Magnete naturali dicta hic sunt, intelligi etiam debent de Magnete *artificiali*, five eo, qui per artem præparatur ex ferro vel ope Magnetis naturalis, vel etiam sine hujus subsidio. Modum Magnetes hos parandi fufius non nihil descriptum legere est in Philosophia R. P. Hauser Tom. VI. Quæst. V. Art. V. In iis parandis peculiari dexteritate pollet jam alias laudatus D. Brander celebris Mechanicus Augustanus. Vienna austriacæ peritissimum quoque artificem habet, D. Philippum Ganfer, qui dirigente R. P. Maximiliano Hell Soc. JESU, Cæsar. Reg. in Universit. Viennensi Astronomo varios conficit magnetes artificiales, cum simplices, tum compositos. Atque horum quidem unum ex lamellis decem longitudine non nisi duos pollices, pondere vero uncias duas & quartam unius partem æquantibus compaginavit, qui attollendo trium librarum ponderi par erat. Inde concludens, (ait laudatus primum celeberrimus Astronomus in libello, quem de usu magnetis artificialis lingua patria Viennæ 1762. edidit) quanta, quamque stupenda attrahendi vis magneti majoris molis conciliari posset. Is ipse, de causa effectuum magneticorum forte differens, semel iterumque ac tertio affirmat, sibi ex experimentis cum magnete artificiali non semel, nec obiter & perfunctorie institutis certum esse, eam a materia electrica in certo motus gradu constituta haud differre. Plura non sine magna animi voluptate in citato jam libello leges, ubi Auctor Clarissimus spem nobis facit, fore, ut a se denique etiam aliis communicetur parandi id genus magnetes mysterium, quod ipse quidem nec libris, nec hominis institutioni, nec alteri, præterquam institutis a se experimentis, factisque observationibus deberet.

ARTICULUS II. DE GLOBO TERRAQUEO.

§. I.

DE FIGURA GLOBI TERRAQUEI.

618. **V**eterum de figura terræ opiniones recensuisse fatebitur. Fuere, qui superficiem terræ planum circulare esse fidenter asseriebant parum solliciti, qua

qua demum figura terra tota terminaretur; alii hanc quoque sed minus feliciter determinarunt, dum modo conum, modo cylindrum, alias tympanum, tum discum concavum, denique cymbulam a terra formari contendebant. Alii nisi proxime, certe propius ad veritatem accedere, ubi terram rotundam esse divinarunt potius quam definierunt, quos inter jam Zeno, Aristoteles & alii magni eo tempore nominis fuere. Quod isti invenerunt, alii postea ex certis Optices & Astronomiæ principiiis veluti demonstratum ad sæculum usque decimum septimum constanter tenuere, terram nimirum corpus esse *physice* rotundum, quam limitationem ea solum de causa addebant, quod veræ, & mathematicæ rotunditati hinc præaltos, in quos terra assurgeret, montes, illinc profundas, in quas ea subsideret, valles obesse non ignorarent; quamvis eæ inæqualitates cum tanta superficiei terrestri magnitudine comparatæ sensibus nostris adverti jam non possent.

Sic autem arguebant. Observatur, & Solem, & stellas, Syrium v. g. populis, qui 15. gradibus Orienti propiores sunt, integra hora citius semper & ubique oriri, quam iis, qui totidem gradibus ab Oriente ad Occasum recedunt: Atqui hæc fieri non posse, nisi terræ superficies ab Ortum ad Occasum rotunda fuerit, vel obiter consideranti patet. Sed eadem superficies rotunda quoque est a Septentrione ad Meridiem usque; nam iis, qui ab Æquatore versus polum utrumlibet sub eodem Meridiano progrediuntur, polus, & Syrius, qui supra horizontem sunt, continuo ascendere, alter vero polus, & stellæ oppositi hemisphærii continuo deprimi, ac tandem occultari notabuntur: ergo denique omnis terræ superficies rotunda erit. Addebant umbram terræ in Lunam eclipsatam projectam, quæ cum constanter conica esset, ab alio, quam sphærico corpore, profluere non posset.

619. Verum annus supra millesimum sexcentessimus septuagesimus secundus opinioni huic civitate jamjam donatæ diem indixit. Totam rei actæ seriem paulo altius ex Actis Academiæ Regiæ Parisinæ velut ex fonte ipso repetere juvat. Dicto primum anno D. Richer ab Academia in Insulam Cayennam, quatuor ab æquatore gradibus distantem, missus ibidem repetitis semel iterumque observationibus deprehendit, pendulum, quo intra determinatum tempus obtineretur idem, qui Parisiis,

oscillationum numerus , integra linea & $\frac{1}{4}$. debuisse decurtari. Ex his concludebant cum Richerio mox plures , aliam sub Æquatore , sub Polis aliam esse ejusdem corporis gravitatem , & ibi quidem minorem , hic vero majorem , ut dictum Phys. Gen. Diss. II. Art. IV. §. 3.

620. Cl. Hugenius suo de gravitate , & diurno terræ circa axem suum motu systemati inhærens sequēlam inde deduxit non cuivis obviam. Sic ferme arguebat Cum vis centrifuga in circulis inæqualibus , quæ æquali tempore percurruntur , sit in ratione diametrorum , illa sub Æquatore , circularum omnium maximò , maxima quoque erit ; & ideo eadem vis sub Æquatore nisu suo , gravitati e diametro opposito , hujus vim ad centrum maxime elidet : ergo , ut hæc gravitatis jactura resarciatur , mare & terram ad Æquatorem elevari , ad Polos vero deprimi ex ipsis æquilibrii legibus necessarium est haud secus , ac in tubis communicantibus , ut liquor levior cum graviore æquilibret , illius altitudo augenda est. Igitur terra non jam sphaera , sed sphæroïdis , eaque ad Polos compressa , ad Æquatorem vero protuberans est , ita quidem , ut axis per Polos transiens ad diametrum Æquatoris sit ut 577. ad 578. Huc quoque licet via non nihil diversa delatus est Cl. Newtonus. Is ex suis pariter principiis , ex gravitate nimirum ipsius terræ , & attractiva particularum ejus vi , terram sphæroidem esse demonstravit ita ad Polos compressam , ut axis ad diametrum esset ut 229. ad 230. Atque in has tantorum Virorum sententias tunc quidem omnis fere ibat Academia , sentiens & ipsa , terram sphæroidem esse ut ad Polos compressam , ita ad Æquatorem elevatam.

621. Verum observationes novæ LUDOVICI XIV. Galliarum Regis jussu factæ novam , & priori omnino contrariam invehebant sententiam. Cl. Picardus 1672. inchoavit decumanum laborem mensurandi Meridianum per omnem Galliam transeuntem , quem postea Cl. Cassinus senior , ex Italia a Rege Christianissimo Parisios ad novi observatorii curam evocatus , continuavit , & denique 1718. Jacobus ejus filius , cum Cl. Maraldi & dela Hire juniore perfecit. Ductus , & mensuratus per 130. milliaria Germanica Meridianus , collatæ mensurationes , & observationes cum Viris Geometriæ & Astro-

nomiæ

nomiæ peritissimis, & denique gradus Meridiani ab Æquatore ad Polos continuo decreſcere, ac proin terram ſphæroidem quidem, ſed ad Polos prolongatam, ad Æquatorem vero depreſſam eſſe, concluſum fuit.

622. Atque hic ortum eſt ſchiſma illud literarium, dum alii Hugenum & Newtonum, qui viſis licet Caſſini obſervationibus in ſua ſententia ne lababat quidem, ſecuti; alii vero Caſſini partes amplexi ſunt, quos inter quoque fuit Cl. Mairanus, qui anno 1720. ſecundum leges Geometriæ diſquiſivit illud graduum in Meridiano terreſtri ab Æquatore verſus Polos decrementum, & cum eo neceſſariam pendulorum decurtationem conciliavit. Ab hoc tempore ad annum uſque 1733. altum in Academia hac ſuper quæſtione ſilentium erat; dum ea iterum reſuſcitata fuit per literas Marchionis Poleni, qui Academiae mentem ſuam aperuit de menſurando arcu Paralleli terreſtris, Pariſienſis e. g., eoque comparando menſuræ, quæ illi ex perfecta terræ rotunditate, aut ſphæroide vel compreſſa vel oblongata competeret; cum differentia menſurarum magis notari poſſet & deberet in arcu Paralleli, quam in æquali arcu Meridiani. Novam hanc methodum, quæ, ut Hiſtoria Academiae habet, Aſtronomis Gallicis jam antea cognita erat, in praxin reduxit Cl. Jacobus Caſſini adhibitis viæ & laborum ſociis Caſſino Filio, Cl. Cl. Maraldi, Chevalier &c. Perfecto opere eam, quam prius, tenuit ſententiam Cl. Caſſinus, terram ſcilicet ſphæroidem eſſe ad Polos prolongatam.

623. Aſt hæc quoque operatio quoad obſervationes maxime Aſtronicas in dubium vocata a pluribus, ſpem omnem ac animos compreſſæ ſphæroidis Fautoribus eripere non potuit: hinc annis illis a Viris clariffimis Maupertuis, Pilot, Godin, de la Condamine, Clairant, Bouguer & frequenter, & maxima cum contentione ea de re diſputatum fuit. LUDOVICUS XV. literato bello finem denique facturus alios Academicorum ad Æquatorem, alios ad circulum polarem ire voluit, ut ex diverſis adeo arcus Meridiani gradibus, quæ demum terræ figura eſſet, obſervationibus accuratiſſimis determinarent. Academici, quæ pridem non niſi impatientes expectaverant, Regis juſſa continuo perficere aggreſſi ſunt. Et ad Æquatorem quidem primi anno 1735. menſe Majo proſecti ſunt Cl. Cl. Godin, Bouguer, de la Condamine, de
Juſ.

Juffieu, & Couplet, quibus in Hispania Regis fui juffu accedere Georg. Jvam, & Anton. Ulloa, ambo navium bellicarum Vice-Præfecti, & Matheſeos peritiſſimi. Ejusdem anni menſe Aprili verſus circulum polarem iter ingreſſi ſunt Cl. Maupertuis, Clairaut, Camus, le Monier Filius, Ouchier, quibus comitem ſe junxit Cl. Celſius Upſaleniſis Aſtronomiæ Profeſſor. Laborum, quos ſuſceperunt, breve compendium pertexere, non abs re erit.

624. Prima pars operis, quod mox dicti Academici ad Polos aggreſſi ſunt, in eo erat, ut magnam valde in linea meridiana diſtantiā metirentur. Et in hunc finem ſeries triangulorum confici debuit, quæ cum baſi per perticas menſuranda cohærent. Baſis hæc erat ſpatium A B (Fig. 79. Tab. VIII.) ad duo fere milliaria germanica extenſum, quod in fluvio Tengliæ congelato per perticas, large impinguatas, & iterato ad exactam menſuram examinatas, bis menſurarunt. Et prima quidem vice illud invenerunt = 7406. hexap. 5. ped. altera vice = 7406. hexap. 5. ped. 4. dig., ut adeo duæ menſuræ a ſe invicem non niſi 4. digitis diſſerrent, id quod, niſi a tantæ auctoritatis Viris aſſertum fuiſſet, plane fidem ſuperaret. Triangulorum ſeriem exhibet eadem Figura 79. Angulos eorum omnes quo accuratius obſervarent, præalta in montibus D Niva, E Kakama, F Cuitaperi, G Avafaxa, H Püllingi, I Kittis, K Niemi, L Horrilakero ſigna erexerunt, conos nimium excavatos, qui arboribus pluribus ad ſe inclinatis conſtabant, & ad 10, vel 12. etiam horarum ſpatium oculo armato videri poterant. Neque illo Trigonometrarum commodo, quo ex cognitis duobus trianguli angulis tertium computare poſſunt, & ſolent, uſi ſunt, ſed triangulorum angulos omnes pro ſe quiſque obſervavit Quadrante, qui micrometro inſtructus ſemidiаметrum habuit = 2. ped. Ex his jam triangulorum lateribus, & poſtea geminato iterum labore ex aliis triangulorum lateribus arcum Meridiani Kittis inter & Torneam interceptum determinarunt = 54942⁵⁷. & denique addita nova correctione propter inæqualem obſervatoriorum O, & I a linea meridiana diſtantiā eundem arcum determinarunt = 55023⁴⁷.

625. Pars operationis altera eo tendebat, ut arcus Meridiani, quem circuli paralleli per Kittis & Torneam tran-

transeuntes definiunt, amplitudo determinaretur observando, quanto altior, aut depressior appareret stella quædam Torneæ, quam in Kittis, dum per Meridianum transit: differentia enim harum altitudinum; seu, quod idem est, distantia a Zenith, erat amplitudo arcus Meridiani terrestris. Igitur sectore, cujus semidiameter novem fere pedum erat, geminas in Dracone stellas proxime verticales iterato Torneæ, & in Kittis observarunt ea felicitate, ut inter repetitas sæpius observationes hic discrimen nunquam majus quam 3. minut. sec., ibi unius tantum minuti secundi deprehensum sit. Ex observationibus his tum propter aberrationem luminis, tum propter alias minutias rite emendatis demum arcum determinarunt = 57. minut. prim. 28. sec. 67. tert. qui cum amplitudine arcus mensurati comparatus dat pro gradu Meridiani circulum polarem X Z intersecantis $57437\frac{9}{100}$. hexap. simulque ostendit, gradum hunc illo, quem in medio galliæ Picardus mensuravit, quemque nova correctione ad $56925\frac{7}{100}$. hexapedas reduxerunt, majorem esse $512\frac{1}{100}$. hexap.

626. Qui in Zonam torridam abiere, in Regno Peruviano latitudinis australis 10. graduum dimensionibus Geometricis, ac Trigonometricis distantiam inter loca Cochesqui, & Manatarqui definire = 176940. hexap. Basis primo mensurata inveniebatur = 6272. hex. 4. ped. 5. dig. ab aliis rursus explorata non nisi 3. dig. major deprehensa fuit. Series triangulorum numero triginta duorum ultra 45. mill. germ. protendebatur. Trianguli ultimi basin per tot triangulorum resolutiones obtentam invenere = $5259\frac{21}{100}$. hexap. quæ eadem postea perticis mensurata $1\frac{31}{100}$. seu ne duobus quidem pedibus major fuit. Distantia huic respondebat arcus = 3. grad. 7. min. prim. 1. sec. prout ex accuratissimis observationibus eruebatur. Denique habitâ quoque ratione dilatationis, quam nimius calor in instrumentis causare poterat, neque contemptis minutiis aliis gradum Meridiani terrestris prope Æquatorem statuerunt = 56658. hexapedis. Atque hoc demum erat, quod tot clarissimis Viris immensis fere laboribus, ac tanto temporis dispendio stetit, quanto olim Græcis urbis Trojane expugnatio, ipso nimirum decennio.

627. Ex his jure videtur inferri posse, terræ non stræ figuram non sphæram, sed sphæroidem repræsentare, eamque compressam, seu talem, cujus axis sit minor, quam diameter. Et profecto observationes primum recensitæ tanta diligentia, tamque miro consensu fuerunt institutæ, ut iis fides denegari haud queat: atqui hæc ostendunt, gradus Meridiani terrestris ab Æquatore ad Polos usque continuo crescere, &, quod ex evidentibus Geometriæ principiis sequitur, telluris peripheriam ad Polos compressam, ad Æquatorem vero elevatam, seu protuberantem esse: ergo. Accedunt observationes speciales per totam Galliæ latitudinem, & in circularis parallelis summa pariter diligentia, & conformitate factæ. Quæ omnia, credo, permoverint Academiam Regiam, ut ipsissima Cl. dela Condamine verba commentariis suis inseruerit, quibus asserit, evidens omnino esse, 1. quod terra non sit sphærica, 2. quod gradus Meridiani ab Æquatore versus Polos crescant, 3. quod terra sit sphærois ad Polos complanata. Noster quoque in hujate Universitate Mathematicum Professor in sua de distantia Lunæ a terra, ejusque gravitate dissertatione, quam Academiæ Scientiarum Monacensi ad quæstionem hac super re ab Ista propositam obtulit, hæc habet: vix dubio locus relinquitur, quin figura terræ ea ipsa sit, quæ per dimensiones Geometricas & Astronomicas (a Gallis) fuit determinata, dum scilicet gravitas corporum per superficiem terræ cum eadem eousque congruit, ut hæc vel ex ipsa corporum gravitate definiri possit, ac vicissim.

628. Addunt aliqui argumentum ab analogia peti- tum. Aliorum Planetarum globos non sphæricos, sed sphæroidicos esse Newtonus, & cum eo Cassinus, Pouldus, Maupertuis &c. defendunt. Cl. dela Caille Sect. III. P. II. Astron. Terrestr. C. I. Art. VII. ita loquitur: Planetæ sunt corpora globosa non perfecte rotunda, sed aliquantum compressa, ut eorum axis rotationis sit paulo minor diametro eorum æquatoris. Hæc, pergit, figura non observatur, nisi in Jove, & terra: reliqui enim planetæ sub angulis minoribus videntur, quam ut inæqualitas eorum diametrorum discerni possit sensu.

629. At enim quid sentiendum de observationibus Cassini, Picardi, Schnellii aliorumque, de quibus N.

621. ? Ego quidem istis posteriores has minime extendas puto. Et I. quidem Cassinus usus ad observandum erat Quadrante ex pluribus & distinctis partibus composito : quam pronus igitur error, si partes non semper exacte fuerint conjunctæ ? Dein ad observandos triangulorum angulos non signa, quæ facile distinguî poterant, adhibuit, sed montium apices tantum observavit, qui ex latere opposito utique quam diversissimi apparere intuentibus potuerunt. II. Picardus nullam ad aberrationem luminis in stellis rationem habuit, aliosque insuper commisit errores, quos Cl. Maupertuis detexit, & Commentatores in Cl. Newtonum referunt Phil. Nat. L. III. Propos. 19. Ipsus quoque Picardus fatetur Dissert. de Magnit. Terræ Probl. 46. non obstante quacunque cura adhibita se respondere non posse de duobus minutis secundis, & idcirco de quantitate circiter 32. hexap. in *qualibet* observatione. III. Cl. Schnellii hallucinationes ostendit Cassinus in Act. Acad. Paris. ad annum 1718.

630. Obijciunt aliqui novissimas observationes PP. Boscovich & Maire, qui ex mandato SS. D. BENEDICTI XIV. ad detegendam telluris curvaturam gradum Meridiani Romam inter, & Ariminum medium a gradu 42. cum dimidio ad gradum 43. cum dimidio mensurarunt, eumqueprehenderunt = 56979. hexap. adeoque majorem illo, quem Academici Parisienses sub eadem fere latitudine observarunt. Alii ipsam Cl. de la Caille, quem supra pro sphæroide compressa adduximus, auctoritatem opponunt. Hic, ut refert Historia Acad. Reg. ad annum 1751., anno 1750. navein conscendit ad Promontorium Bonæ spei tendentem, ibique appulit 19. Aprilis anni sequentis. Finis itineris erat, ut exactum stellarum australium iniret computum, & Parallaxin Planetarum, ac denique longitudinem Promontorii exacte determinaret. His omnibus jam confectis reliquum adhuc tempus metiendo gradui Meridiani terrestri sub latitudine australi 33. grad. 18. min. impendit, quem absoluto labore 57037. hexapedis æqualem esseprehendit.

Objectioni utrique respondet Academia Regia ad annum jam memoratum his verbis : Gradus a Cl. de la Caille (addo ego, & ille a PP. Boscovich & Maire) determinatus cum illis, quos Academici Parisienses de-

finie-

finierunt, in eo convenit, quod major reperiatur, quam gradus ad Æquatorem, & minor, quam gradus ad Polos observatus. At vero is ipse major quoque est, quam dimensionibus antea factis comparatus esse deberet, ex quo sequi videtur, terram sphæroidem quidem esse compressam, non tamen regulariter compressam. Atque ipse Caillius in Lect. Astron. nuper admodum rursus editis suam hac super re mentem explicat, dum de methodo calculandi parallaxin tractans Num. 659. ita loquitur: quando parallaxis horizontalis syderis plurium minorum est (id quod in Luna tantum locum habet) ut nihil accuratioris in calculis desideretur, etiam figuræ telluris ratio habenda est, quæ, cum aliquantum a sphærica aberret, & proxime elliptica sit, efficit, ut linea verticalis observatoris non transeat per centrum terræ, nisi is in Æquatore illius, aut Polis sit constitutus. Item de correctione pro altitudine, & Azimutho differens Num. 665. hæc habet: licet variæ hypotheses dimensionum figuræ telluris e mensurationibus institutis deductæ sint, in usu tamen supponi potest terra sphæroides ellipticum, in quo diameter Æquatoris excedit axem per Polos transeuntem $\frac{1}{215}$.

631. Contemplandæ telluris figuræ sat diu immorati, ejusdem magnitudinem currente oculo intueamur. Quodsi terra supponatur esse perfecte sphærica, dato unico circuli maximi, Meridiani v. g. gradu, facile invenitur tota ejus circumferentia, si nimirum dati gradus mensura ducatur in 360., qui numerus graduum circuli est; sic posito, unum gradum circuli maximi comprehendere 15. miliaria germanica, erit Meridiani circumferentia $= 15 \times 360.$ seu 5400. mill. germ. Cognita peripheria invenitur circuli, aut globi diameter, si fiat: $6283 : 2000 = 5400 : 1718\frac{2}{3}.$ seu numero rotundo 1720. mill. germ. Si porro externam & convexam totius globi terraquei superficiem nosse cupis, maximi circuli semiperipheriam per semidiametrum multiplica, & factum rursus ductum in 4. dabit quæsitum, sic: $2700 \times 860 = 2322000 \times 4 = 9288000.$ mill. germ. quadrat. Semidiameter ducta in semiperipheriam dat aream planam circularem hemisphærii per Meridianum secti. Si denique globi soliditatem scire velis, superficiem duc in diametrum, & factum divide

per

per 6. Quotus dabit soliditatem globi; sic : $9288000 \times 1720 = 15975360000$. Hoc diviso per 6. quotus $= 2662560000$. mill. cubicis dat soliditatem globi terraquei.

At quoniam terra, ut ex dictis patet, non sphaera, sed sphaeroïdis ad Polos compressa est, isthæc aliis longe problematibus, non cujusvis captui accommodatis, aliter determinat Geometria sublimior. Id notari potest, in hypothefi terræ sphaeroidicæ pro semidiametro Æquatoris communiter assumi 3281013. hexap. seu 860. mill. germ. pro semidiametro axis proxime 3262688. hexap. seu 855. mill. germ. ut adeo terra circa Æquatorem 5. milliariibus germanicis altior sit, quam circa Polos. Hinc quoque patet, globum terraqueum in se & absolute spectatum valde magnum esse; tanta tamen moles si immensæ quodammodo cœli stelliferi amplitudini comparetur, non nisi puncti ad instar esse, Astronomis demonstratum est: unde optime dixit Seneca terram indigitans: *hoc est illud punctum, quod inter tot gentes igne, & ferro dividitur.*

§. II.

DE ORIGINE MONTIUM.

622. **M**Ontes præcipuos jam sub ipsum mundi exordium formatos fuisse, dubitari non potest. Certe ante tempora diluvii universalis, a quo unus aut alter montium passim omnium originem repetere voluit, montes extitisse, ipsa Scriptura satis indicat, dum ait, aquis diluvii opertos fuisse omnes montes excelsos sub universo cœlo. Accedit ratio: ea enim est montium utilitas, ac cœva rerum ordini necessitas, ut eorum origo non ex fortuita, & multis post mundi creationem sæculis tandem facta partium congerie, sed potius ex destinato Creatoris Sapientissimi consilio repeti possit. Nam 1. montes ponunt aquis, ne late nimium exundent, repagula; 2. fontes & flumina ad irrigandam terram emittunt; 3. sunt conditoria divitiarum, in quibus metalla, gemmæ, aliaque mortalibus pretiosa subnascuntur; 4. caloris & frigoris intemperiem pro regionum diversitate moderantur; 5. herbas & plantas hominibus æque, ac pecoribus utilissimas proferunt; 6. sunt quasi ossatura, aut

compages globi terraſque, dum varia montium iuga, in continuas quodammodo catenas exporrecta, ſibiſque mutuo conjuncta, totam telluris molem, ex partibus diverſiſſimis compoſitam, firmo ſtabiliſque nexu complectuntur.

633. Eſſe nihilominus montes, qui decurſu temporis primum prodierint, pariter ſat certum eſt. Poterat enim terra diſſolutis per illud univerſale diluvium, aliasque inundationes hinc inde rerum compagibus varias ſubire mutationes, & hinc in valles ſubſidere, alibi in aggeſtos aquarum vi præaltos cumulos elevari, quorum materia ſubſeque concreſcens novos jam montes daret. Simile quid fieri per inſolitos terræ motus potuit, per quos conſtat terram inde a ſua creatione mutationes diverſiſſimas paſſam jam eſſe, ut oſtendunt Inſulæ hic ſubito abſorptæ, ibi aliæ de novo enatæ, ut de Inſula Theraſia ſuo tempore emari elevata teſtatur Seneca, de aliis Plinius, alique. Adhæc varia in terræ altius eſſoſcæ gremio ſubſeque inveniuntur, quæ, niſi grandis præceſſiſſet mutatio, ea in loca nec devenire, nec in iis jam reperiri poſſent.

634. De Montium altitudine perpendiculari, quanta ea in eminentioribus ſit, haud ſatis inter Auctores convenit. Veteres ſi conſulamus, ea iſti de Olympo, Atlante aliisque memorant, quæ Poetam, non Geographum aut Historicum ſapiunt. Sed neque Recentiorum omnium eadem hac ſuper re ſententia eſt: dum enim aliqui putant, montium nullum eſſe, qui ultra bis mille paſſus aſſurgat, alii aſſerunt, Africæ, ac Americæ montes aliquos ad octo etiam paſſuum millia attolli. Moderni Geometræ viam quaſi mediam hic ineunt, dum ajunt, eſſe montes, quorum altitudo perpendicularis quatuor paſſuum millia attingat, vix ullum vero, qui ea excedat. De iis, qui omnium totius Americæ altiſſimi creduntur, quosque *Catenas Andium*, aut *Cordilleres* nuncupant, ajunt, eorum aliquos ad 3000. hexapedas pertingere; eorum vero, qui in Helvetia aut Tyroli ſupra cæteros eminent, altitudinem perpendicularem 1300. hexap. majorem non eſſe.

635. Dantur inter montes non pauci, qui non raro flammam, cineres, ſaxa calcinata, ac integros materiæ ardentis torrentes eructant, atque eam ob cauſam *Ignivomi*, aut *Vulcani* nuncupantur. Horum 80. numerant Auctores per orbem varie diſpoſitos. Inter celebrior

ſunt

sunt *Ætna* in *Sicilia*, *Vesuvius* haud procul *Neapoli*, *Hecla* in *Islandia*, e quo, dum sua jactat incendia, horrendi fremitus, interdum veluti ululatus exaudiuntur adeo, ut vulgus ibi credat esse inferni spiraculum, e quo miserorum gemitus superas referantur in auras. De *Vesuvio* memorat *Plinius Junior*, eum anno primo *Titi Imperatoris* horrida adeo eructasse incendia, ut fumi sulphurei ac cineres solem obscurarint, ac *Romam* usque, quin per *Mediterraneum* in *Africam*, *Syriam* & *Ægyptum* fuerint deportati. Ajunt, *Plinium* dum alio tempore *Montis hujus* interiora explorare vellet, fumo fuisse suffocatum. Fato tamen istius non absteritus noster *P. Kircherus* tum *Vesuvii*, tum *Ætnæ* quoque examen oculare tentavit, ac mira de utroque refert *Mund. Subterr. Præf. c. 3. & L. 4. c. 8.*

In his jam montibus ingentem nitri, bituminis, ac præcipue sulphuris, aliarumque ejusmodi materiarum pinguum copiam delitescere, dubitari non potest; istæ namque sunt materiæ fovendis, alendisque tantis incendiis aptæ, easque non solum fumus sulphureo odore gravis, sed & cineres e montibus ejecti satis produnt, in quibus laudatus antea *Kircherus* magnam adhuc salis, nitri, aluminis, sulphuris &c. quantitatem se deprehendisse testatur. Massa hisce e materiis conflata dum vel mutuo conflictu ac fermentatione, vel ex ignibus subterraneis flammam concipit, cuniculi militaris instar per montis viscera serpit, ac immani tandem violentia erumpens, per disfractos terræ sinus fumos, flammæ, & succensos, metallisque liquatis, salibus quoque ac lapidibus refertos ignis torrentes formidando spectaculo ejaculatur, donec fomes aut pabulum flammæ vel minuatur, vel penitus deficiat.

§. III.

DE TERRÆ MOTIBUS.

636. **P**ER terræ motus aliud hic non intelligitur, quam ejusdem concussio, & agitatio, quæ fit vel per pulsus, vel per tremorem, vel per inclinationem. Pulsus est, quo terra, sive ejus fornix aliquoties evibratur sursum, & iterum subsidit, ferme ut fit in pulsu arteriæ. Tremor est, quo pars terræ velociter modo in hanc

modo in illam partem agitur. Inclinatio, qua pars terræ in modum navigii quasi nutat, & hinc attollitur, dum pars propinquior manet depressa, quo fit, ut turres & parietes e linea directionis emoti facillime corruant, vasti in terra hiatus aperiantur, alti montes, domus, ac urbes contumulentur, quandoque aer etiam pestilenti odore inficiatur. Expertum id paucis abhinc annis est Lusitania, ac præcipue urbs Ulyssipponensis, in qua ultra viginti hominum millia inter collapsa ædium ac templorum rudera consépulta fuisse narrant.

637. De causa terræ motuum duæ potissimum sunt sententiæ. Prima vult, causam eorum esse aerem subterraneum per intima telluris viscera passim diffusum, qui, dum vel venti externi in canales subterraneos vehementius irruunt, vel aquæ in eosdem majore vi intruduntur, violenter compressus viribus omnibus se se conetur expandere; quod dum facit, ad latera cavernarum allisus, atque inde iterum repercussus repetitis pulsibus latera isthæc concutit, quæ concussio, dum fortior est, ad usque terræ superficiem propagabitur. Sed inprimis satis credibile haud est, ventos tanta rabie in imas cavernas impelli posse, ut aerem interiorē ea vehementia comprimant, qua opus foret ad ingentes rupium moles in altum ejiciendas, atque integra etiam regna succutienda. Dein aqua etiam possit aerem inclusum comprimere, compressio tamen ista semper erit proportionata tum gravitati aut massæ, tum celeritati aquæ in cavernas irruentis; neutra autem tanta esse videtur, ut effectus adeo horribilos causare queat. Denique, quamvis constet, expansionē aeris compressi motus vehementissimos effici posse, isti tamen non efficientur unquam, nisi adsint aliæ causæ, quibus vehementissima aeris compressio possit adscribi; causæ vero istæ haud dubie erunt ignes subterranei, quibus aer in cavernis terræ conclusus ad exerendam tantam vim determinatur.

638. Hinc altera sententia verosimilius docet, terræ motuum causam primariam, ac potissimam esse subitanam quamdam materiæ sulphureæ, bituminosæ, ac nitrosæ inflammationem in cryptis subterraneis factam, id quod variis rationibus probatur. I. Materia hæc, cujus maxima in terræ meatibus copia est, vel ipso attritu & consuetu mutuo, vel fermentatione, vel ignibus subterraneis facile inflammatur; sic inflammata rarefit, ac validissime

lidissime explosa cavernarum repagula concutit, seque violenter expandens eam telluris partem, quæ cedere facilius potest, superiorem nimirum, valido tremore saccutit, & quandoque non sine fremitu aut mugitu horrifico disrumpit, ferme ut fit in cuniculis militaribus accenso pulvere pyrio vehementi cum fragore disjectis.

II. Frequentiores terræ motus solent esse iis in regionibus, in quibus major est sulphuris, nitri, ac bituminis copia, quales sunt, quæ montes metalliferos, aut ignivomos alunt, quæque mari sunt viciniore. Hinc etiam factum non raro est, ut furente terræ motu integri flammæ, cinerumque torrentes e terræ diffractæ matibus eruperint, mare vicinum quasi ebullierit, quin aquæ etiam puteales, ac vina doliis conclusa odorem sulphureum contraxerint.

III. Montes ignivomi plerumque longiori tempore ante adventum terræ motus silent, transacto autem isto denuo furunt, & ardent; neque ullum in vicina est terræ motus periculum, quamdiu illi flammæ eructant, cuius ratio conveniens reddi vix poterit, nisi dicatur, potissimam terræ motuum causam esse halitus intra terræ viscera accensos, quibus si liber alicubi pateat exitus, motum nullum causare poterunt.

639. Interim non negatur, aerem subterraneum per ventos externos, aut aquarum irruptionem vehementer compressum posse subin causare motus terræ minus violentos; imo assumpta etiam hac altera sententia potest aer calore ignium subterraneorum subito rarefactus multum ad terræ motus conferre. Quodsi cavernæ illæ, in quibus ignes hi subterranei accenduntur, sint terræ superficie proximiores, motus terræ intra angustiores limites plerumque consistit, nisi nimirum cavernæ hæ communicent cum aliis longius porrectis, in quibus eadem fieri inflammatio potest. Si vero cavernæ & cryptæ istæ centro telluris sint propinquiore, facta subita inflammatione ingens terræ tractus concuti debet, quemadmodum ex structura corporis sphaerici facile intelligitur.

640. Non raro sæviante, aut imminente terræ motu aquæ maris in abyssum velut subsidunt, alias vehementer intumescunt. Subsident, quando in terræ gremio per materiæ inflammatæ violentiam aperiuntur cavitates quædam amplores, quas mare primo subire copiosius potest; tum vero relapsa forte telluris mole aliqua

denuo expellitur, ac intumescit; intumescet pariter, si per inflammationem halituum aer vehementius expansus omni vi sua premat in canalem quemdam subterraneum cum mari communicantem. Pariter terræ motibus sistuntur quandoque fluentia fontium, alii penitus exsiccantur, alii oriuntur de novo. Nempe vehementi terræ succussione vel canales aliqui obstruuntur per delapsam materiam aquæ minus perviam, vel hydrophilacia disrumpuntur, vel alii canales ad inferiora terræ aperiuntur, vel novæ alicubi fontium venæ aperiuntur.

641. Signa porro, quæ terræ motum plerumque solent præcedere, hæc interim observata sunt: 1. sulphurei halitus, & odores færentes; 2. ebullitio aquæ tum maris, tum fluminum; 3. mugitus vehemens ex terræ gremio resonans; 4. subitus adventus insolitorum animalculorum, e terra prorepentium, quæ nimirum ignis intestini vehementiam, & materiæ accensæ fætorem declinare conantur, & similia. Etsi autem signa hæc non præcesserint, sequi tamen terræ motus poterunt, si nempe subito, ac simul ingens ejusmodi materiæ copia accendatur; quemadmodum etiam, præcedentibus licet signis, materia inflammabilis, si modica sit, consumi potest, quin oriatur vehementior terræ succussio.



PHYSICÆ PARTICULARIS PARS TERTIA

DE MUNDO SIDEREO.

EA hic, quæ de variis Mundi Systematibus, de Cœ-
lis, &, quæ in istis sunt, Sideribus nosse Philo-
sopho non oberit, breviter exponemus, fusiore
illorum examine Astronomis relicto.

DISSERTATIO I.

DE MUNDI SYSTEMATIBUS.

PER Systema Mundi intelligitur ordo, ac dispositio
hujus Universi, ac præcipuarum illius partium, ex-
plicandis motibus ac phænomenis cælestibus accom-
modata. His explicandis num systema aliquod rite de-
serviat, ut promptius intelligatur, aliqua de Sphæra
Armillari, Siderumque motu & aspectibus sunt præ-
mittenda.

ARTICULUS I.

PRÆNOTANDA.

642. *Sphæra Armillaris*, quam exhibet Figura 80.
Tab. VIII. instrumentum est ex variis circulis,
armillarum instar inter se inflexis, compositum, cœlum
simul, terramque referens. In puncto sphæræ hujus
medio concipi potest esse terra; eoquod ista in quocun-
que demum systemate saltem quoad sensum occupet cen-
trum Universi. Præter punctum istud medium gemina

adhuc potiffimum notanda veniunt puncta, videlicet O & P, quæ *Poli* feu cardines Terræ; aut Mundi dicuntur, in quibus omnis cœli machina circumagi ponitur. Punctum P polus dicitur *Borealis* vel *Arcticus*, O vero *Australis* & *Antarcticus* nuncupatur. Recta porro O P ab uno polo ad alterum per Univerfi centrum ducta vocatur *Axis* mundi. Si concipiatur recta a puncto, quod vertici nostro in cœlo respondet, per centrum terræ ad oppositam cœli partem ducta, extremum illud lineæ hujus punctum, quod vertici respondet, dicitur *Zenith*, extremum alterum ejusdem lineæ, puncto priori e diametro oppositum, *Nadir* appellatur.

643. E circulis maximis, quorum quovis totum hoc Universum in duas partes æquales dividi concipitur; notandi præcipue sunt *Æquator*, *Horizon*, *Ecliptica* cum *Zodiaco* & *Meridianus*. *Æquator* A B est circulus maximus ab utroque polo æqualiter, 90. videlicet gradibus distans, ac proin sectione ad axem perpendiculari Universum in duo hemisphæria *Australe*, ac *Boreale* dividens. Hujus usus præcipuus est I. quod indicet gemina anni æquinoctia, vernum circa 21. Martii, & autumnale circa 23. Septembris, quibus nempe diebus Sol bis in anno *Æquatorem* transit. II. Quod metiatur dies, & horas; illius quippe 360. gradus spatio 24. horarum decurrantur, proin 15. gradus unam intra horam. III. Quod fit terminus, a quo Solis, Lunæ, cæterorumque astrorum declinationes metimur: declinatio namque sideris est hujus ab *Æquatore* versus alterutrum polum distantia. IV. Quod *Orientis*, & *Occidentis* cardines in *Horizonte* definiat.

644. *Horizon Rationalis* seu *Verus* est circulus maximus H I, a punctis *Zenith*, & *Nadir* undique æqualiter distans, atque ita Universum in duo hemisphæria, *Supernum*, ac *Infernum* dividens. *Horizon sensibilis*, seu *apparens* est circulus minor, priori parallelus, qui ex superficie Terræ visum Cœlum inter, & Terram, ni aliud quid obftet, terminat. I. Hic definit ortum & occasum siderum. II. Quantitatem diei civilis & noctis determinat: illud namque temporis intervalum, quo Sol supra *Horizontem* moratur, dies civilis nuncupatur. III. Est terminus, a quo altitudo sideris mensuratur: altitudo enim sideris est circuli, per utrumque *Horizontis* polum, & ipsum sideris centrum ducti, arcus inter idem centrum, & punctum

etum Horizontis comprehensus. Altitudo hæc duplex est, una apparens, altera vera; hæc est, quæ computatur ex arcu memorati circuli, inter centrum sideris, & punctum Horizontis rationalis comprehenso; apparens, quæ comprehenditur inter Horizontem apparentem, & centrum sideris. Prout jam varius est tum Axis mundi tum Æquatoris ad Horizontem situs, varia etiam est denominatio sphaeræ. Quando Axis mundi ad planum Horizontis est perpendicularis, ac proin Æquator cum eodem Horizonte parallelus, ut in Fig. 81. Tab. VIII. dicitur sphaera *parallela*; si vero Axis utrinque incumbat Horizonti, & Æquator Horizontem ad angulos rectos interfecet, ut in Fig. 82. dicetur sphaera *recta*; si demum tum Axis, tum Æquator ad Horizontem angulum efficiat obliquum, sphaera erit *obliqua*, qualis est in Figura 80. Arcus Meridiani P I dicitur *altitudo poli*.

645. *Meridianus* est circulus maximus A P B. O, qui per utrumque polum transiens Æquatorem recta intersectat, ac orbem in duo hemisphaeria, Orientale, & Occidentale dividit. Dicitur Meridianus, eoquod Sol ab ortu in occasum tendens utprimum attigerit hunc circulum, omnibus sub eodem Meridiano Boream vel Austrum versus positus meridiem afferat: unde facile intelligitur, tot concipi posse Meridianos, quot puncta sunt in Æquatore. Porro Meridianus maximam astrorum supra horizontem altitudinem metitur: tamdiu enim sidus in sphaera recta aut obliqua supra horizontem attollitur, donec ad Meridianum pervenerit; hunc ubi attigit, culminare dicitur, ac tum iterum versus horizontem descendit.

646. *Ecliptica*, quæ etiam via Solis dicitur, est circulus maximus D C (Fig. 80.) Æquatorem sub angulo 23. graduum, & 28. circiter minorum bis intersectans, & ex una parte Boream versus usque ad *Tropicum Cancræ* D F, ex altera versus Austrum usque ad *Tropicum Capricorni* E C declinans. Via Solis dicitur, quod in ea Sol motum suum annum (seu verum, seu apparentem) peragens quotidie uno prope gradu ab Occidente Orientem versus progrediatur, donec cursum hunc suum trecentis sexaginta quinque diebus & sex ferme horis absolvat. Ecliptica vero dicitur ex eo, quod in ipsa, aut prope ipsam accendant Eclipses Solis & Lunæ, quoties isthæc sidera in eadem, aut prope illam sibi vel occurrunt, vel opponuntur. Eclipticam mediam complectitur alia quæ-

dam fascia latior *a b c d*, sub eodem angulo, sub quo Ecliptica, Æquatorem bis interfecans, quam *Zodiacum* dicunt, atque in duodecim signa dividunt, attributis cuiusvis signo 30. gradibus. Signa isthæc sunt

♈ ♉ ♊ ♋ ♌ ♍
Aries, Taurus, Gemini, Cancer, Leo, Virgo.

♎ ♏ ♐ ♑ ♒ ♓
Libra, Scorpius, Arcitenens, Capræ, Amphora, Pisces.

Horum prima sex dicuntur *Borealia*, sex posteriora *Australia* vocantur. Ex Borealibus prima tria dicuntur *Verna*, eoquod Sole signum Arietis ingresso in nostram sphaeram incipiat Ver, duretque, usque dum Sole ad signum Cancræ delato incipiat Æstas; unde sequentia tria signa dicuntur *Æstiva*. Sex posteriorum prima tria ob similem rationem dicuntur *Autumnalia*, ultima tria vero *Hyemalia* nuncupantur.

I. Porro ex Eclipticæ ad Æquatorem inclinatione sequitur dierum, sc noctium inæqualitas; tempestatum quoque, Veris, Æstatis &c. vicissitudo constans. II. Eadem Ecliptica periodicum Astrorum, & Solis præcipue cursum metitur: tunc enim motus periodicus absolvi dicitur, cum revolutio integra ab Astris relate ad Eclipticam completur. III. Est etiam terminus Latitudinis Astrorum, cum latitudo sideris sit arcus circuli, ducti per polos Eclipticæ, ac centrum sideris, (qui circulus *latitudinis* dicitur) interceptus inter hoc centrum ipsamque Eclipticam. IV. Longitudines quoque siderum in eadem mensurantur: arcus enim Eclipticæ a principio Arietis in *Consequentia*, ut loquimur, seu secundum seriem signorum progrediendo usque ad circulum latitudinis, cui fidus substat, comprehensus, est longitudo sideris. Tunc autem secundum seriem signorum (quod ita scribi solet *S S S*) progredimur, si a puncto Arietis numeramus versus Taurum, Geminos &c. si ordine contrario numeremus, *C S S*, id est contra seriem signorum, aut in *Antecedentia* progredi dicimur.

647. Orbitam Sideris aut Planetæ dicimus curvam in se redeuntem, quam Planeta motu suo periodico describit, uti in Fig. 83. Tab. IX. est curva *A D B E*. Orbita hæc Soli aut Terræ *concentrica* est, si ipsius orbitæ centrum *C* cum centro Solis aut Terræ coincidit; si non coincidat, orbita est *excentrica*. Sic si orbita sideris sit Ellipsis, & in hujus foco alterutro *S* sit Sol, orbi-

ta fideris respectu Solis erit excentrica, & orbitæ punctum B, in quo dum Planeta versatur, a Sole est remotissimus, dicetur *Aphelium*, huic oppositum punctum A *Perihelium*, quia ibi constitutus Planeta in orbita sua Soli proximus est; Puncta D & E ostendunt Planetæ distantiam *Mediam*, quæ nimirum inter maximam & minimam æquali discrimine interest. Si Solis loco in S ponatur consistere terra, punctum B *Apogæum*, punctum A *Perigæum* dicetur. Puncta hæc maximæ & minimæ distantie *Auges*, vel *Absides* uno nomine compellantur, B quidem summa Absis, A vero ima Absis, linea A B hæc puncta conjungens linea Absidum nuncupatur.

648. Ad motum Planetarum si attendamus, Planetæ dicuntur *conjuncti*, quando sub eodem Eclipticæ puncto, aut saltem ejusdem longitudinis sub eodem circulo latitudinis existunt; si autem integro semicirculo a se invicem distent, dicuntur *oppositi*. Conjunctio Planetarum ab Astronomis *Synodus* appellatur; communi vero vocabulo conjunctio, & oppositio *Syzygia* dicuntur. Planeta vocatur *directus*, quando secundum seriem signorum progreditur; si contra seriem signorum moveatur, *retrogradus* appellatur; *stationarius* vero, cum veluti stare in eodem loco nobis videtur. De Saturno, Jove, Marte, Venere, & Mercurio ex observationibus constat, motum eorum periodicum non semper apparere directum, sed eos quandoque stationarios, tum retrogrados, ac dein iterum stationarios videri; motus vero Solis ac Lunæ semper apparet directus.

649. *Parallaxis* nomine intelligitur differentia inter locum, cui in cœlo responderet astrum e terræ centro visum, & illum locum, cui astrum respondet, dum ex aliquo superficiæ terrestris puncto aspicitur. Sic in Figura 84. Tab. IX. dum sidus B ex superficiæ terrestris puncto A videtur secundum lineam A B D, apparebit illud esse in D; si idem sidus B ex terræ centro T aspiceretur, appareret in F. Angulus proin F B D erit angulus parallaxicus fideris B. Si idem sidus existens in M dicto modo aspiceretur, angulus ejus parallaxicus foret N M O, minor angulo F B D. Ex quo apparet, parallaxin eo esse majorem, quo longius sidus a vertice recedit, in ipso autem vertice parallaxin esse nullam, quia ibi utraque linea visualis T R, & A R coincidit. Si aliud sidus C ex eodem superficiæ puncto A aspiciatur,

tur, apparebit in D; afpectum ex terræ centro T apparet in E; ex quo fequitur, parallaxin pariter minorem eſſe, quo longius aſtrum a terra remotum eſt. Si iſtud tanto intervallo diſtaret, ut totus globus terraqueus relate ad eam diſtantiā inſtar puncti foret, nulla omnino eſſet parallaxis. Locum, in quo apparet ſidus e centro terræ viſum, vocant *locum opticum verum*; illum vero, in quo ſpectatori in terræ ſuperficie conſiſtenti apparet, *locum opticum apparentem* dicunt; qui ipſe locus etiam ob refractionem luminis a loco ſideris vero diſſerre poteſt.

650. Ut *Systemata* ſingula rite expendi queant, notandum præterea I. In omni *Systemate* poni debere, molem terraqueam ſaltem quoad ſenſum eſſe in medio Univerſi; ſecus non ubique terrarum ac marium dimidia coeli pars a nobis conſpiceretur. II. Lunam eſſe viciniorem nobis, quam cæteri quique Planetæ, & Terram, non vero Solem intra illius orbitam contineri. III. Venerem & Mercurium moveri circa Solem ita quidem, ut orbita Mercurii, Soli proximior, ſit intra orbitam Veneris, neutra tamen Tellurem includat. Saturnum, Jovem, & Martem verſari ſupra reliquos Planetas; illorum orbitas Terram atque etiam Solem complecti, idque ita, ut orbita Saturni magis ſit a Tellure remota, quam orbita Jovis, & hæc magis, quam orbita Martis. IV. Supra omnes Planetas poſitum eſſe cælum Fixarum, ac proinde totum Planetarum ſystema intra illud unum comprehendī. V. Explicandum, quomodo aſtra omnia duplici ſaltem motu ſimul cieri videantur, nimirum diurno ab Ortū in Occaſum 24. horarum ſpatio per circulos Æquatori ferme parallelos, & periodico ſub Zodiaco, adeoque oblique ultra citraque Æquatorem ab Occaſu in Ortum ſecundum ſeriem ſignorum, inæquali tamen celeritate; & quomodo Planetarum aliqui modo videantur directi, modo retrogradi, nunc etiam ſtationarii.

ARTICULUS II.

VARIA MUNDI SYSTEMATA.

TRia potiffimum ſunt, ad quæ revocari cætera poſſunt. *Ptolemaicum* ſic dictum a Claudio Ptolemæo Philoſopho Alexandrino. *Copernicanum* a Nicolao Copernico

rico Canonico Variniensi, qui illud a Philolao Crotoniense, & Aristarcho Samio acceptum post Cardinalem Cusanum observationibus astronomicis ita illustravit, ut a Viris præstantissimis passim fuerit receptum. *Tychonicum* inventum a Tychone Brahe Nobili Dano, qui, cum videret, systema Ptolemaicum observationibus repugnare, Copernicanum vero Scripturæ Sacræ non omnino consentire crederet, astronomicis observationibus totus intentus systema novum longo studio elaboravit. Singula breviter expendamus.

§. I.

SYSTEMA PTOLEMAICUM.

651. Juxta hoc systema in medio Universi immobilis stat Terra, ex qua tanquam centro ducti sint plures circuli concentrici, qui sint orbitæ Planetarum ita, ut prima, Terræ proxima, sit orbita Lunæ; post hanc orbita Mercurii, quam excipiat orbita Veneris, tum Solis, dein Martis, Jovis, ac Saturni. Post istas in octavo, ut ajebant, cœlo ponebatur orbis stellarum fixarum, ac denique orbis ille, quem Primum Mobile vocabant, eoquod is circa terram immobilem raptus cæteras siderum orbitas omnes ab ortu in occasum simul secum abriperet, sicque motum eorum diurnum efficeret, dum interea Planetæ in orbitis suis motu contrario ab occasu in ortum secundum Eclipticæ ductum abriperentur, quem motum vocabant secundum, aut etiam periodicum.

652. At enim Systema istud vel ex eo, quod orbitas Planetarum omnes & Terræ, & sibimetipsis concentricas esse statuatur, satis refellitur; cum observationes certæ ostendant, Planetas nunc esse apogeos, nunc perigeos, quod in orbitis Terræ concentricis fieri haud posse, quivis perspiciet. Præterea in hoc Systemate Venus ac Mercurius semper infra Solem moveri deberent, cum tamen constet, eos non raro esse supra Solem. Denique Planetæ omnes in hoc systemate semper deberent esse directi, nullus unquam foret aut retrogradus, aut stationarius, quod denuo manifestis observationibus refragatur. Quodsi vero Planetarum orbitis insuper imponant

nant epicyclos , seu circellos , in quibus , dum eorum centra in Planetæ orbita moverentur , simul ipse Planeta volveretur , Systema planetarium non explicant , sed magis involvunt.

653. Illud etiam obiter hic observandum , ex Antiquioribus fuisse non paucos , qui docerent , cœlos ac orbes Planetarum solidos esse , pellucida veluti crystallo fusos ita , ut intra excavatos in iis tramites circulares corpora Planetarum motum suum periodicum peragerent. Verum , ut absint alia , constat , Venerem ac Mercurium circa Solem tanquam centrum suum motos nunc supra , nunc infra Solem existere ; Solem ipsum nunc apogœum , nunc perigœum esse , dum interim circa Solem reliqui etiam Planetæ motus suos ellipticos nunc aphelii , nunc perihelii peragunt ; circa Jovem & Saturnum cursu ordinato gyrari eorum satellites ; Cometas demum plerosque etiam ultra Saturnum assurgere , ac tramites diversissimos percurrere &c. His jam motibus omnibus quis in cœlo solido constanter proportionatos , satisque tortuosos canales effinget ?

§. II.

SYSTEMA COPERNICANUM.

654. [N hoc , ut ostendit Figura 86. Tab. IX. centrum Universi est Sol S , equidem in eodem ferme loco consistens semper , proin hoc sensu immobilis , motu tamen vertiginis circa axem suum proprium intra 27. dies , ut ex maculis solaribus inferunt , revolvendus. Circa Solem proxime movetur Mercurius ; hunc excipit Venus ; dein sequitur orbita Telluris , quam vocant *orbitam magnam* ; circa Tellurem tanquam centrum suum visitur orbita Lunæ. Post orbitam Terræ sequuntur orbitæ Martis , Jovis & Saturni. Ultra omnes Planetas , & quidem ad immensam prope distantiam , ponitur sphaera , in qua sunt stellæ fixæ , eaque omni penitus motu destituta. Planetis singulis Sole excepto , quem propterea e Planetarum numero expungit , Systema hoc tribuit motum periodicum in Zodiaco secundum seriem signorum. Telluri quidem imprimis tribuunt *motum vertiginis circa axem proprium ex Occasu in Ortum* , quem

motum etiam diurnum vocant; dein motum lationis in orbita sua magna pariter secundum seriem signorum, quem periodicum aut annum dicunt; denique etiam motum parallelismi, vi cuius, dum terra orbitam suam percurrit, ipse axis telluris sibi ipsi semper parallelus existat.

655. Atque in hoc Systemate ea, quæ in quovis explicanda esse Num. 650. diximus, per solas ferme leges Opticæ mira felicitate declarantur. Primo enim motus diurnus terræ circa axem suum, quo intra 24. horas ab Occasu in Ortum revolvitur, efficit, ut Sol, Planetæ, ac Stellæ fixæ nobis, una cum terra motis, ab Ortum in Occasum moveri videantur, ut omnibus, qui motus ac Opticæ leges norunt, manifestum est: inde diei noctisque vicissitudo.

656. Secundo. Ex motu terræ periodico in orbita sua magna efficitur, ut Sol, quamvis immobilis in Universi centro consistere ponatur, nobis tamen appareat, ac si re ipsa in Ecliptica secundum seriem signorum moveretur. Dum enim terra circa proprium axem gyra- tur, simul in Ecliptica secundum seriem signorum progreditur ita, ut unum ferme gradum singulis diebus, omnemque periodum unius anni spatio conficiat: unde nobis Sol ipse per eadem signa moveri videtur, ut patet in Fig. 86. Tab. IX. Sit Terra in T in signo Arietis, Sol apparebit in puncto directe opposito, videlicet in signo Libræ. Si Terra motu suo pervenerit in a in signura Tauri, Sol videbitur esse in signo Scorpionis, & sic ulterius. Vicissim dum Terra in orbita sua pervenerit ad d in signum Libræ, Sol apparebit in opposito signo Arietis, uti denuo ex legibus Optices sequitur. Hinc patet, Tellurem initium Libræ occupare tunc, quando est æquinoctium vernal, Arietis vero principium tenere, quando est æquinoctium autumnale; eam in Cancris signo versari, ubi solstitium hybernū est, in Capricorno autem, dum est solstitium æstivum. Denique cur Sol in signis borealibus commoretur diutius, quam in australibus, inde est, quod, ut Recentiores passim volunt, Terra moveatur in ellipsi, in cuius foco alterutro Sol existat: si igitur major orbitæ aut ellipsis portio respondeat signis australibus, in ea percurrente longiore tempore Terra indigebit, & Sol diutius videbitur existere in signis oppositis, nimirum borealibus; eritque tunc Sol apogæus, qualis est tempore æsti-

vo; perigeus vero tempore hyberno, dum Terra eff in signis borealibus, Sol vero in australibus.

657. Tertio. Quoniam Terra circa Solem motu periodico ita fertur, ut axis ipsius semper, & ubique sibi maneat parallelus; simul tamen planum Eclipticæ per ejus centrum transeat, & axis Terræ ad axin Eclipticæ fit inclinatus sub angulo 23. grad. & 28. circiter minut. prim. fit, ut dies noctibus non ubique, nec semper sint æquales, atque ita solitæ tempestatum vicissitudines accidant. Declaratur in Fig. 87. Tab. IX. Sit in ea axis terræ *o p* inclinatus ad axem Eclipticæ sub angulo 23. grad. 28. min. Dum Terra existit in *m* in signo Libræ, Sol apparebit in signo Arietis, radii autem Solis illustrabunt hemisphærium Terræ ab uno polo ad alterum: unde dum Terra circa polos suos gyrat, semper totum hemisphærium ab uno polo ad alterum illuminabitur, proin erit Æquinoctium vernum. Ex eodem capite erit Æquinoctium autumnale, quando Terra versabitur in *n* in signo Arietis, Sol autem in signo Libræ. Progrediatur Terra secundum seriem signorum in *i* in signum Capricorni suum, ut antea, servans parallelismum, Sol apparebit in signo, Cancri, & radii hemisphærium Terræ illustrantes se se extendent ultra polum *p*, non vero usque ad polum *o*, prout exigit angulus inclinationis axis Terræ ad axem Eclipticæ, unde, dum Terra gyrat, circa axem suum, borealibus erit dies longissima ac Solstitium Æstivum, australibus vero dies brevissima cum Solstitio hyberno, quibus dein ob eandem rationem erit Solstitium æstivum, ac dies longissima, quando Terra motu hoc suo pervenerit in *v*.

658. Quarto. Eadem facilitate ex solo Telluris motu annuo explicatur, cur Planetæ nunc sint directi, nunc retrogradi, alias stationarii. Exemplum primum fit in Planeta aliquo superiore, Jove v. g. in Fig. 88. Tab. IX. Sol existat in centro Universi *S*, Terra sua in orbita sit in *h*, Jupiter sua pariter in orbita sit in *e*, circulus postremus referat cælum fixarum. Hoc posito Planeta hic apparebit in *k*. Dum Terra progreditur in *g*, Jupiter perveniat in *v*; nunc apparebit existere in *p*: igitur secundum seriem signorum, motuque directo incessit hætenus. Ex *g* Terra perget in *f*, dum interim Jupiter pervenerit in *t*; & hic iterum apparebit esse in *p*, adeoque judicabitur fuisse stationarius. Terra ulterius progrediente in *c*
Jupi-

Jupiter delatus erit in *o*, ex *c* aspicientibus videbitur esse in *x*, acsi fuisset retrogradus, & contra seriem signorum ex *p* recessisset in *x*, licet is sua in orbita motu semper directo progressus sit. Terra dein delata in *b*, Jupiter erit in *n*, & denuo apparebit in priori loco *x*, tanquam stationarius. Denique dum Terra descendit in *a*, Jupiter defertur ad *m*, & hic iterum motu directo secundum seriem signorum progressus esse judicabitur. Dum Terra existit in *d*, Jove consistente in *r*, erit hic perigeus, & in oppositione cum Sole; dum vero Terra est in *i*, Jupiter erit apogeus, & in conjunctione cum Sole.

Exemplum alterum sit in Planeta inferiore Mercurio v. g. in Fig. 89. Tab. X. In centro Universi *S* existat Sol; orbita Mercurii sit *i m h r*, hanc ambiat orbita Terræ. Terra existat in *a*, Mercurius in *n*; apparebit hic esse in *k*; Terra progrediatur in *b*, Mercurius vero in *m*; hic existens videbitur in *p*, proin motu directo secundum seriem signorum progressus esse judicabitur ex *k* in *p*. Dum Terra defertur in *c*; Mercurius pervenit in *n*; hinc visus iterum apparebit in *p*, adeoque censebitur fuisse stationarius. Ex *c* Terra moveatur in *e*, Mercurius in *t*; hoc casu videbitur esse in *x*, acsi motu retrogrado, & contra seriem signorum incessisset. Terra progrediente in *f* Mercurius defertur ad *r*, & hinc quoque visus judicabitur esse in *x*, proin iterum stationarius; dum vero Terra pervenit ad *g*, Mercurius erit in *i*, & judicabitur motu directo ab *x* progressus esse in *l*. Quando Terra existente in *d* Mercurius est in *h*, erit hic perigeus, apogeus vero, dum est in *o*.

659. Ex utraque figura hic citata patet etiam, cur Planetæ non appareant stationarii, aut retrogradi, nisi circa tempus oppositionis, aut conjunctionis cum Sole. Præterea intelligi haud difficulter potest, cur arcus, per quem regredi Planetæ videntur, non sit respectu omnium æqualis, sed major respectu Martis, quam Jovis, major item respectu hujus, quam Saturni; cum ex legibus Optices manifestum sit, angulum opticum, quem radii visionis, ad initium & finem hujus regressus ducti, efficiunt, eo semper fieri minorem, quo longius ab oculo removeatur objectum, in quo radii isti decussantur. Denique & illud difficultate caret, quod Sol & Luna nec regredi nec stare, sed semper in directum moveri videantur: cum enim Sol ideo tantum sub Zodiaco moveri videatur, quia Tellus secundum seriem signorum in orbita sua identidem progreditur,

ditur, sequitur, quod, sicut Tellus nec regreditur, nec unquam stat, ita neque Sol aut regredi, aut stare nobis videri possit. Luna autem etsi cum Terra circa Solem moveatur, ejus tamen motus in Zodiaco semper directus apparet, eoquod circa Tellurem ipsam tanquam centrum suum moveatur.

660. Denique ut apparentem Fixarum motum explicent Copernicani, volunt, motum illum Terræ, quo axis illius semper conservet parallelismum cum axe universi, non ita esse intelligendum, acsi Telluris axis situm hunc suum non saltem aliquantulum mutet. Ajunt nempe, axem Terræ, qui ad planum Eclipticæ angulum 23. graduum, ac 28. circiter minutorum forinat, motu lentissimo revolvi contra seriem signorum ab Orru in Occasum, hocque modo extremis axeos istius punctis circa polos Eclipticæ describi circulum, cujus radius sit 23. gr. 28. min. Quod dum fit, necesse est, ut puncta illa, in quibus Ecliptica ab Æquatore interfecatur, seu puncta æquinoctialia, simili motu contra seriem signorum moveri videantur, quem motum idcirco vocant processionem æquinoctiorum. Hinc dein inferunt, fieri debere, ut stellæ fixæ appareant moveri secundum seriem signorum, sive in consequentia; cum perinde sit, stellas fixas moveri in consequentia, ac puncta æquinoctialia moveri in antecedentia.

Atque hinc apparet, in Systemate Copernicano diversissima motuum sidereorum phænomena methodo admodum plana & simplici ex solis motus ac Opticæ legibus declarari ita, ut P. Ricciolius noster asserere non dubitavit, fore, ut nunquam satis admirentur posteri Copernicæ mentis celsitudinem, & pectoris Ipsius profunditatem, ingeniique acrimoniam, qua unius globuli, quantula est Tellus respectu cœli totius, motu, eoque triplici præstitit, quod non sine insanis sphaerarum machinis maxima ante illum Astronomorum pars vix adumbrare potuit. Almag. nov. L. 9. Sect. 4. c. 4. Videamus nunc aliqua, quæ Systemati Copernicano opponi a non nullis solent.

661. Primo objiciebant olim aliqua ex lapsu, & motu locali corporum deprompta. I. Globus, aut sagitta perpendiculariter sursum excussa non posset amplius relabi in eundem locum, e quo excussa est; hic namque locus per motum diurnum Terræ versus Orientem jam longius esset abreptus. II. Si tormentum bellicum Bo-

ream

ream versus dirigeretur in metam aliquanto magis remotam, globus semper deberet aberrare a scopo, utpote Ortum versus e priore linea directionis jam promoti. III. Si Tellus moveretur motu diurno, idem globus eadem vi ad eandem distantiam impulsus in scopum nunc orientalem, dein in occidentalem, validius percuteret orientalem, quam occidentalem: globus enim versus Ortum projectus non retardaretur a motu diurno, quin potius ab eo juvaretur, dum globus in Occidentem emissus a motu isto contrario Terræ retardaretur; vel IV. globus idem versus Occidentem excussus ad majorem distantiam propelleretur, quam excussus versus Orientem; eoquod Tellus ab Occasu in Ortum revoluta globo occidentali velut occurreret, ab orientali autem recederet.

Verum ad ista ex motuum legibus haud difficulter respondent Copernicani, atque ipsi etiam Tychonici fatentur modo, ea momenti esse admodum exigui. Ad primum negatur major: nam ipsi etiam globo & sagittæ communis est motus Terræ, sicut motus navis æquabiliter decurrentis iisdem communicaretur, si ex hac ejicerentur. Globus proin sursum projectus utrique motui se accommodans lineam quoad sensum quidem rectam, re ipsa tamen curvam parabolicam describens in eundem, ex quo verticaliter excussus est, locum recidet. Videatur Phys. Gener. Diff. IV. Art. VII. §. 3. N. 321. Ad secundum denuo negatur major ex eadem ratione; quia etiam hic globo communis est motus Terræ ac ipsius metæ. Ad tertium pariter negatur major; quia motus Terræ afficit eodem modo & globos, & scopum utrumque: quare cum unus e duobus quasi motibus, quibus globus afficitur, ipsi communis sit cum scopo, patet, percussione scopi solum effici ab eo motu, qui ipsi globo proprius est; ac proinde scopum percuti eadem vi, siue Terra moveatur, siue quiescat. Ex quo ipso patet responsio ad quartum.

Declarant isthæc exemplo navis. Sedeant duo in navi velociter mota, alter in puppi, in prora alter; ambo pilam aliquam æquali vi sibi mutuo objiciant. Qui pilam versus puppim projicit, non ad majus spatium illam ejiciet, quam qui pilam versus proram dirigit; quia quantum puppis versus locum proræ interim accedit, tantum pila per motum navis ipsi etiam communem in suo motu retardatur, & quantum prora recedit a pila, tanto hæc velocius illam insequitur, utpote tam suo, quam na-

vis motu ad eandem plagam impulsâ. Alia his similia ut expediant Copernicani, dicunt, cum Tellure homines, atmosphæram, & corpora universum omnia motu communi revolvi: hinc nullam metuendam esse vertiginem, nec adverti motum ullum debere, quemadmodum in navi celeriter mota, in qua constituta omnia una cum hominibus moventur, isti motum nullum advertunt. Ostendunt quoque, progressum versus Occidentem non debere difficiliorē accidere ob resistantiam aeris, versus ortum moti; eoquod resistantia aeris nulla sit, dum eadem velocitate etiam progrediens una cum aere versus Orientem rapitur.

662. Secundo objicitur. Si Terra motu annuo in orbita sua magna deferatur, necesse est, ut axis Terræ cylindri quamdam speciem efformet, qui in cælum stelliferum usque porrectus ibidem sua basi peripheriam circularem describat. Jam vero singula lineæ hujus circularis puncta ipsius mundi polum constituent pro quovis anni die, cui nimirum punctum peripheriæ respondet: proinde mundi polus ob annuam Telluris revolutionem perpetuo mutabitur, nec eadem semper erit poli altitudo, nec eadem stellæ verticales, quod observationibus certis repugnat. Respondent Copernicani, id omnino futurum, nisi cœli stelliferi amplitudo, ac distantia fixarum tanta foret, ut non solum globus ipse terraqueus, sed tota orbita Telluris, relata ad istam amplitudinem & distantiam, instar puncti se haberet; si vero tanta esse ponatur ipsius amplitudo, & fixarum distantia, accessus ille ad alias, atque alias fixas, aut recessus ab iis sensibilis esse non poterit. Ponunt autem Copernicani, tantam esse fixarum a nobis distantiam, ut tota illa, quantumvis magna, Telluris orbita puncti instar haberi possit, si cum amplitudine cœli stelliferi, & distantia fixarum conferatur.

Neque tantam harum distantiam gratis a se asseri existimant. Præterquam enim quod omnes admittant, fixas a Saturno, cujus tamen ipsius distantia jam ingens plane est, immensum veluti esse remotas, haud exiguum fundamentum longe maximam iis distantiam tribuendi ex eo habetur, quod telescopia, per quæ Saturni discus ducentis etiam vicibus major apparet, fixarum diametrum libero oculo apparentem non modo non amplificent, sed minuunt etiam, dempto videlicet lumine spurio sic, ut, quarum magnitudo apparens oculo inermi videtur esse plu-

plurium minutorum secundorum, earum, telescopio inspectarum, diameter vix aliquot secundorum mensuram adæquet, ut eapropter judicent multi, Sirium a Tellure ad minimum 43700. vicibus longius distare, quam ab eadem distet Sol. Denique addunt, talem tantamque distantiam imperceptibilem haud fore illi, qui capere possit celeritatem illam incomprehensibilem, qua stellæ fixæ intra 24. horas in Systemate Tyconico circa Terram revolvi deberent.

663. Tertio obijciunt textus quosdam Scripturæ, quibus Terræ quies, motusque Solis asseri videtur. I. Eccl. 1. „ Oritur Sol. & occidit, & ad locum suum revertitur, ibique renascens gyrat per Meridiem, & flectitur ad Aquilonem; lustrans universa in circuitu pergit spiritus, & in circulos suos revertitur, „. II. Josue cap. 10. Solem ita alloquitur: „ Sol contra Gabaon ne movearis, & Luna contra vallem Ajalon. Steteruntque Sol & Luna. --- Stetit itaque Sol in medio cæli, & non festinavit occumbere, „. III. Isajæ cap. 38. „ Reversus est Sol decem lineis per gradus, quos descenderat „. IV. Psal. 92. „ Firmavit orbem terræ, qui non commovebitur „. Et Psal. 103. „ Fundasti terram super stabilitatem suam „. Respondent Copernicani, verba Scripturæ accipienda non esse in sensu literali, physico, proprio & absoluto, sed in sensu populari, optico, improprio, & quoad apparentiam. Scriptura nempe non docet physicam rerum naturam, ut etiam S. Augustinus L. 1. contra Felicem Manich. c. 10. advertit his verbis: „ Non legitur in Evangelio, Dominum dixisse: mitto vobis Paraclitum, qui vos doceat de cursu Solis & Lunæ: Christianos enim facere volebat, non Mathematicos „. Præterea Scriptura, inquit, attemperat se ad captum vulgi, & sæpe secundum præjudicia ex sensibus hausta loquitur de rebus, quæ neque ad fidem, neque ad mores pertinent; Sic Lunam vocat Luminare magnum, etsi re ipsa minus sit cæteris.

§. III.

SYSTEMA TYCHONICUM.

664. **S**ystema hoc, quod exhibet Figura 85. Tab. IX. in centro Universi, aut saltem non procul ab eo, ponit Terram, circa quam velocitate maxima ab Ortu
F f 3 in

in Occafum tota reliqua mundi fphæra intra 24. horas rapiatur. Terram prima ambit orbita Lunæ, cujus centrum fit Terra. Orbitam Lunæ excipit orbita Solis *S m n*, cujus centrum pariter Terra fit. Centrum reliquorum planetarum non Terra, fed Sol eft, quem proxime ambit orbita Mercurii, dein Veneris ita, ut neutra orbita includat Terram. In diftantia majore Solem ambit orbita Martis *a b c*, hanc excipit orbita Jovis *d e f*, iftara denique orbita Saturni *r s t*. Trium horum Planetarum orbitæ, etfi pro centro Terram non habeant, iftam tamen ambitu fuo complectuntur. Demum poft orbitas Planetarum fequitur cælum Fixarum.

665. In ifto quoque Systemate memorata antea curfus fiderei phænomena convenientiffime explicantur. Et primo quidem circa diei noctisque, atque anni tempeftatum viciffitudines per fe manifeftrum eft, eas in hoc Systemate neceffario evenire: dum enim Sol circa Terram immobilem motu diurno intra 24. horas per circulos Æquatori ferme parallelos femel circumagitur, eo tempore, quo Sol fupra Horizontem moratur, dies erit, nox vero, quamdiu Sol infra illum exiftit. Et quoniam Sol motu fuo annuo feu periodico in ipfa Ecliptica continuo ab Occafu in Ortum progreditur, dum exiftit in puncto Arietis, in quo Ecliptica Æquatorem interfecat, radios fuos directe emittit in Æquatorem Terræ, proinde dies noctibus erunt æquales, feu æquinoctium vernum. Hinc Sole in Ecliptica fenfim afcendente ad Tropicum Canceri dies nobis identidem crefcunt, donec Sol in ipfo Tropico Cancræ exiftens, radiosque fuos in Tropicum cognominem Terræ directe emittens diem efficiat longiffimum, quo tempore etiam erit Solstitium æftivum. Sole a Tropico hoc iterum verfus Æquatorem defcendente dies decrefcunt, & in figno Libræ exiftens Sol dabit alterum æquinoctium autumnale. A Libra ulterius defcendens verfus Tropicum Capricorni dies identidem faciet breviores, & in ipfo hoc Tropico diem breviffimum, ubi fimul erit Solstitium hybernium. Inde demum iterum ad Æquatorem afcendens prolongabit diem, donec in ipfo Æquatore dies iterum evadant noctibus æquales. Hæc omnia manifefta funt ftructuram fphæræ armillaræ non ignorantibus.

Illud quoque, quod Sol in fignis borealibus moratur diutius, quam in australibus, planum erit, fi, quem-

admo-

admodum Copernicani docent de orbita Terræ, ita hic de orbita Solis dicatur, eam esse excentricam respectu Terræ, ita, ut Terra propior sit Soli existenti in signis australibus, quam in borealibus; vel quod Sol moveatur in ellipsi, in cuius foco australi immota consistat Tellus, ut proin major ellipsis portio respondeat signis borealibus. Vid. N. 656.

666. Major videri difficultas posset circa motus & phænomena Planetarum, dum modo sunt directi, modo retrogradi, nunc stationarii. Verum hæc quoque cum Systemate hoc satis belle conveniunt. Sit primo exemplum de Planeta quodam inferiore Mercurio v. g. in Fig. 90. Tab. X. Tellus immota stet in centro Universi T. Orbita Solis sit S B C. Orbita Mercurii *a m t*. Si jam Mercurius existat in *t*, & tam in orbita sua progrediaturs versus *a*, quam una cum Sole, centro nimirum orbitæ suæ, moveatur, motus ipsius erit directus, idque tamdiu, donec Mercurius pervenerit in orbitæ suæ punctum *m*. Tunc Planeta per aliquod tempus respectu Terræ videbitur esse stationarius in linea T I, vel alia ad sensum parallela. Et quamvis Mercurius multo velocius moveatur, quam Sol, & nunc a puncto *m* versus *n* contra seriem signorum respectu Terræ regredi incipiat, tamen quia sub eadem celeritate videtur percurrere arcum *m n*, sub qua Sol interea percurrit arcum breviorē, æqualem arcui *e d*, juxta leges Optices stare videbitur. Inde ab *n* usque in *r* Mercurius erit retrogradus; hic vero ob datam mox rationem denuo videbitur esse stationarius, usque dum pervenerit ad orbitæ suæ punctum *t*, ubi denuo motu directo progredi incipiet. Dum Mercurius est in *a*, erit apogeus, perigeus vero, dum existit in *o*.

667. Exemplum alterum sit in Planeta aliquo superiore v. g. Jove. Ut hujus motum explicant Tychonici, alia supposita non assumunt, nisi quæ ab ipsis etiam Copernicanis assumi tanquam certa debent. Supponunt nimirum, ipsam orbitam Jovis cum Sole, tanquam centro suo, moveri eo modo, quo movetur Sol ipse, & simul Jovem hac sua in orbita semper progredi; seu quod idem est, Jovem gravitare versus Solem tanquam centrum suum, & simul moveri ea vi, qua secundum tangentem orbitæ suæ primo impulsus est. Hoc supposito ea omnia, quæ motum Jovis directum, retrogradum, ac

stationes ejus concernunt, evenire debere, patebit in Figura 91. Tab. X.

Sit in ea centrum Universi T, ibique existat Tellus. Orbita Solis sit S B L. Circa Solem existentem in S concipiatur esse orbita Jovis, qui nunc existat in A. Sol motum suum periodicum intra 12. Menses, in orbita designatos, absolvat. Incipiat jam motum hunc suum in S, & primo mense perveniat in s; quodsi Jupiter vi solius gravitatis tenderet versus Solem, & vi hujus motum Solis sequeretur, is primo mense perveniret in o. At quia simul secundum directionem tangentis impulsus ab orbita sua recedere nititur, sub finem mensis primi erit in b. Sole ex s progrediente in t Jupiter, abstrahendo ab impulsu juxta directionem tangentis, ex o pervenisset in p. At quia ab initio datus est impulsus iste, nunc ex b descendit in c; atque ita mense tertio vitum gravitatis versus Solem, tum impulsus juxta tangentem, dum Sol est in v, Jupiter erit in d; sub finem mensis quarti in e, & sic continuo pergens intra 12. Menses, quibus Sol orbitam suam absolvit, ipse conficiet spiram A b c d e f &c.

In hac jam spira apparent singula motus Planetarum superiorum phænomena. I. Dum Jupiter ex A pergit versus e, motus ipsius est directus secundum seriem signorum. II. Dum ex e descendit in g, apparet stationarius. III. Ex g in i contra seriem signorum respectu Terræ progrediens est retrogradus. IV. Quamdiu ex i ascendit versus l, denuo videtur esse stationarius. Inde versus m n incipit iterum esse directus. V. In h est perigeus, in A apogeus. VI. Dum Sol est circa x, Jupiter vero circa h, erit oppositio; Sole in S, Jove in A existente erit conjunctio.

Dixi supra, nihil hic supponi a Tyconicis, quod non etiam Copernicanis debeat esse incertum: quod enim hic dicitur, ipsam veluti Jovis orbitam unam cum Sole, tanquam centro suo, moveri, Jovem tamen simul in hac orbita sua progredi, id ipsum Copernicani quoque dicunt de Luna, de Satellitibus Jovis, ac Saturni. Nam dum Terra movetur circa Solem, Luna motum Terræ semper sequitur, & tamen simul movetur etiam in orbita sua, cujus centrum Terra est. Idem est de Satellitibus Jovis, & Saturni, qui semper sequuntur Planetæ sui motum, & suis in orbitis simul moventur.

Ex

Ex quo sequitur, quod de motu Jovis per spiras dictum hic est, ipsis pariter dicendum: Luna enim respectu Solis easdem omnino spiras describit, quas in systemate Tychonico respectu Terræ describunt Planetæ alii. Præterea Satellites Jovis & Saturni innumeras identidem spiras motu suo conficere, etiam in Systemate Copernicano certum omnibus est, ut adeo quoad isthæc phænomena Systema utrumque par esse videri omnino queat. Videamus modo, quæ Systemati Tychonico opponi solent.

668. Primo. Convenientius dicitur, moveri locatum, quam ipsum locum: cum igitur Terra sit locatum, locus autem sit cælum, dicendum, Terram potius moveri, quam cælum. Respondent Tychonici: quam nulla sit argumenti hujus vis, ex eo patet, quod utique etiam Sol sit in suo loco, proin respectu cæli reliquū locatum; & tamen respectu Solis juxta Copernicanos totum cælum Planetarium movetur quiescente locato. Attendendum nempe est ad finem, propter quem condita sunt & locus & locatum, & ex illo desumendum, culnam potius tribuendus sit motus. Sidera reliqua condita esse propter Terram, & homines in ea habitantes, nec Copernicani negant. Finem hunc suum assequuntur, seu Terra moveatur, seu Sidera reliqua; hinc ex fine neutrum inferri infallibiliter potest. Imo si quis diceret, magis congruum esse, ut media moveantur ad finem, quam finis ad media, sequeretur, moveri Solem & Sidera reliqua, non ipsam Terram. DEo certe majore non stetit impendio vel ista movere, vel hanc.

669. Secundo. Systema Copernicanum est multo simplicius Tychonico, in quo, ut Planetarum motus explicentur, ad lineas spirales, aliasque ambages est confugiendum; hoc autem videtur esse contra consuetam naturæ agendi methodum, quæ in operibus suis brevissima utitur via, & ubique studet compendio. Respondent, etiam hoc argumentum convincens non esse. Omissio namque, Systema Copernicanum esse simplicius, propterea non illico etiam veritati est conformius. Ista certe principia, natura agit via brevissima, utitur compendio, & ejusmodi alia utique sumenda non sunt absolute, & in sensu arithmetico, acsi DEus & natura ubique sectaretur unitatem, ac simplicitatem. Poterat natura paucioribus fibris, venis, nervis, membranis, pilis, foliis, radiculis &c.

plantas & animalia instruere. Poterat paucioribus stellis, angustioribus marium, aut terrarum tractibus, minori numero reptilium, insectorum, piscium, & ejusmodi mundum hunc implere; sed non eum, nec eo modo consecuta tunc finem esset, quem, & quo modo eum nunc consequitur: cur autem id noluerit DEus, nostrum non est dijudicare. Undenam ergo evincant Copernicani, quod DEus, cui arduum nihil, solius compendii causa meram motuum coelestium apparentiam, non ipsos motus voluerit, maxime, cum in tanta tot. motuum varietate nunquam variata amplius eluceat mira Summi Artificis Sapientia?

Quærant etiam Tychonici, quanta demum sit Systematis Copernicani præ Tychonico simplicitas? Circa motus namque Planetarum nihil assumitur a Tychonicis, quod non etiam suo in Systemate doceant Copernicani. Spiras quoque describi debere a Luna, & Planetarum Satellitibus, Systema Copernicanum inspicienti manifestum est. Si spirales lineæ describi possunt ab his absque ambagibus, aut sine detrimento simplicitatis, cur non eodem modo describi ab aliis possint? Quæ simplicitas in motu Telluris annuo, diurno, motu parallelismi, & simul juncta circumvolutione axis Telluris circa polos Eclipticæ? Compendium vero quantum est in immensa illa cœli stelliferi amplitudine, cum illa, quæ inter Saturnum & sphaeram fixarum est, intercapedo referente P. Ricciolo juxta Copernicum sit 48988580. semidiametrorum Terræ, juxta Keplerum adhuc major?

670. Tertio. Fieri non potest, ut idem corpus simul feratur motibus contrariis: hoc deberet fieri in Systemate Tychonico: Sol enim, aliique Planetæ, imo & stellæ fixæ agerentur motu diurno in Occasum, & simul motu periodico seu annuo ab Occasu in Ortum. Respondent. Cum hoc ipsum argumentum solvendum etiam Copernicanis sit, fatebuntur, non esse momenti adeo magni; quod autem solvi ab ipsis debeat, patet in Luna, & Satellitibus Jovis ac Saturni: isti enim Satellites una cum Planeta suo semper moventur secundum seriem signorum; & tamen, quando sunt infra Planetam, simul moventur contra seriem signorum: an ergo motibus contrariis? Sic etiam Luna cum Tellure identidem progreditur in consequentia, & tamen quando accedit ad conjunctionem cum Sole, movetur respectu Solis contra seriem

seriem signorum. Negant ipsi, motus hos re ipsa esse contrarios, cum motus ille, quo feruntur secundum seriem signorum, sit ipsis cum Planeta, tanquam centro suo, communis ita, ut una cum Planeta ipsa quodammodo orbita Lunæ & Satellitum moveatur; motus vero alter, qui quandoque est contra seriem signorum, sit proprius Lunæ, & Satellitibus ita, ut hunc sua quisque in orbita conficiat. Sed sic etiam Tyconici negant minorem argumenti propositi; cum motus ille diurnus, quem etiam *raptus* vocant, ab Ortum in Occasum sit universo Systemati fidereo communis ita, ut Planetæ solares omnes una cum Sole in Occasum ferantur; motus vero ille ab Occasu in Ortum sit singulis Planetis sua cuilibet in orbita proprius, isque non circa axem Universi, ut ille prior, sed circa axem Eclipticæ. Quod autem motus hoc sensu oppositi impossibiles non sint, declarant etiam in navi, in qua velocissime versus Occasum mota potest quis simul motu proprio moveri in Ortum.

671. Quarto. Si astra intra 24. horas circa Terram volvi dicuntur, debet admitti celeritas motus tanta, quantum intellectus humanus capere vix unquam poterit. Posito namque, quod orbitæ solaris diameter sit 22000. diametrorum Terræ, ductis rite calculis invenietur, Solem ex moveri celeritate, qua intra horam 825000. leucas gallicas, intra minutum secundum vero leucas ejusmodi ferme 2300. absolvat. Si dem diameter orbitæ, quam stellæ fixæ percurrunt, tantummodo esset 100000. diametrorum Terræ, quamquam incomparabiliter major sit, nihilominus celeritas fixarum tanta foret, ut stella in Æquatore posita intra 24. horas percurrere deberet spatium saltem 314159. diametrorum Terræ; intra unam horam 13089; intra minutum primum saltem 218. diametros terrestres. Tantam autem celeritatem quis capiat in corporibus molis vastissimæ? In Systemate Copernicano alia opus celeritate non est, quam qua pars Terræ Æquatori subjecta intra unam horam percurrat 225. milliaria germanica.

Respondent. Si Copernicanis nimia esse videtur hæc motus celeritas, aliis nimia videbitur esse immensa illa fixarum distantia, & cœli stelliferi amplitudo, quam ipsi debent adstruere, eoquod fixæ semper sub eadem magnitudine appareant, & nulla in iis observetur paralla-

xis: proin tota orbita magna Telluris, cujus diameter mediocris juxta plerosque faltem 22000. major est, quam fit diameter globi terraquei, erit instar puncti relate ad amplitudinem cœli stelliferi. Quare, etsi fixarum celeritas sit maxima, & humani intellectus captum transcendat, ea tamen, nisi repugnare ostendatur, dampnanda illico ut impossibilis non est, nisi quis eosdem Divinæ Omnipotentia, quos humano intellectui, positos esse limites credat. Quodsi Copernicanis ex immensa propemodum cœli stelliferi amplitudine commendari videtur Omnipotentia DEi, eadem cum Infinita Sapientia juxta Ty-chonicos commendabitur ex velocissimo, simulque ordinatissimo cœli siderei motu.

672. Quinto. Regula a Keplero tradita, & observationibus exactissimis comprobata est, quod quadrata temporum, quibus periodicæ singulorum Planetarum revolutiones peraguntur, sint directè inter se, uti sunt cubi distantiarum eorundem Planetarum a centro sui motus; vel, ut alii eandem regulam ponunt, distantia Planetarum a Sole sunt inter se ut radices cubicæ quadratorum revolutionis Planetarum. Declaratur. Tempus periodicum Terræ est 1. Jovis 12. Saturni 30. annorum; Quadrata temporum istorum sunt 1. 144. 900. Si hæc quadrata spectentur ut cubi, radix cubica primi erit 1. secundi 5. & aliquanto plus, tertii 10. & aliquanto minus: proin distantia Terræ, Jovis, & Saturni a Sole erunt inter se ut 1. 5. 10. Quodsi jam super has radices, adjecto, quod in 5. deficit, & subtracto, quod redundat in 10. construuntur cubi, erunt cubi isti distantiarum omnino ut quadrata temporum periodicorum his Planetis competentium.

Supposita veritate regulæ dicunt Copernicani: Regula hæc Systemati Tychonico non congruit: ergo ipsum Systema ruit. Prob. Ant. Si regula hæc in Systemate Tychonico subsisteret, sequeretur, quod Sol & Luna, qui ambo circa eandem Terram moventur, longe aliam, quam re ipsa habent, a se invicem distantiam obtinerent, & Sol non nisi quinquies a Terra esset remotior, quam sit Luna, quod certo falsum est. Sequela patet ex eo, quod Luna orbitam suam absolvat intra unum ferme mensem, Sol suam intra menses duodecim: proin quadrata temporum periodicorum hic essent ut 1. & 144. radices cubicæ quadratorum circiter ut 1. & 5. adeoque
Sol

Sol non nisi quintuplo foret remotior a Terra, quam sit Luna.

— Respondent. Dist. Ant. Regula hæc Systemati Ty-
chonico non congruit in iis, in quibus non probatur,
eam debere congruere, Conc. Ant. in aliis, Neg. Ant.
Regula isthæc motui & distantie Mercurii, Veneris,
Martis, Jovis & Saturni etiam in Systemate Tychonico
optime congruit, proin congruit illis Planetis, qui cir-
ca Solem tanquam centrum suum moventur; quod autem
easdem motus leges servare debeat etiam Luna, quæ
libere circa Terram revolvitur, ac Sol, qui una cum
reliquo Systemate planetario circa eandem Terram mo-
vetur, nulla sufficiente ratione probatur: cum DEUS
illis astris, quibus diem, noctemque in hominum com-
moda distingui voluit, alias motus leges figere potuerit,
quam statuerit illis sideribus, quæ circa centrum aliud,
Solem nimirum, gyrari volebat.

673. Sexto. Obiciebant olim, dari annuam fixarum
parallaxin, proin terram in orbita sua magna moveri
circa Solem debere. Antecedens ostenderunt observatio-
nibus Cl. Flamsteedi, qui in stella polari parallaxin ali-
quam deprehendisse se docuit: hinc prodiit opus Cl. Wi-
lstonii, quo Copernici systema demonstratum esse asserit;
cum vero Cl. Cassini junior demonstrasset, observationes
Flamsteedii ab annuæ parallaxeos lege omnino abhorre-
re, nec cum Terræ motu congruere, idem antecedens
ostendere conati sunt ex observationibus Cl. Horrebovii,
qui parallaxin aliquam in Sirio & Lucida Lyre obser-
vasse se crediderat, atque ideo opusculum ediderat sub
titulo: Copernicus triumphans. Verum Cl. Manfredius
ostendit, Horrebovii observationes a parallaxeos lege
prorsus esse alienas, quod ipsum ex observationibus In-
golstadianis P. Georgii Kraz, quas exhibet Philosophia
R. P. Hauser Tom. VIII. §. 118. intelligi uberius po-
terit. Unde Ill. Wolfius jure dixit: „ quoniam variatio-
nes annuæ fixarum, hætenus observatæ, cum lege pa-
rallaxeos annua non prorsus consentiunt, etsi quædam
earum ab eadem non abhorreant, a vero aberrarunt, qui
exinde parallaxin fixarum annuam inferre ausi sunt. . . .
Unde porro patet, falli etiam eos, qui Terræ motum
annuum per parallaxin fixarum demonstratum esse con-
tendunt „.

674. Verum, etsi nulla sit fixarum parallaxis, tamen
certa

certa quædam luminis aberratio in iisdem observatur, qualem in Systemate Tychonico vix explicari posse existimant. Aberratio ista luminis in eo consistit, quod fixæ non quolibet anni tempore appareant in eodem loco, sed illæ, quæ circa Eclipticam sunt, aliquam patiantur mutationem quoad longitudinem, illæ autem, quæ ab Ecliptica versus polos absunt, mutationem quamdam subeant & in longitudine, & in latitudine ita, ut, quemadmodum Cl. Bradleyus conatur ostendere, fixæ nunquam appareat in loco suo proprio, sed circa hunc motu apparente ellipsin aliquam versus polum Eclipticæ semper latiore describat, donec tandem in ipso ejusdem polo describat circellum. Hujus autem, si terra in centro Universi inmotæ staret, nulla dari ratio verisimilis poterit; cum hoc supposito fixæ quælibet in suo semper apparere loco deberet; si vero Terra, & cum hac oculus observantis in orbita sua magna circa Solem moveatur, simulque dicatur, propagationem luminis esse sensibilibiter successivam, hæc luminis aberratio explicari haud difficiliter potest, ut pluribus declarat Cl. De La Caille in Lect. Astronom. Cap. II. Art. III. §. 583. Ad isthæc, quæ momenti aliquanto plus quam cætera hucusque relata addere Systemati Copernicano possunt, respondent Tychonici, etsi in Systemate Terræ quiescentis inventa necdum hypothesis aliqua sit, qua aberratio ista luminis rite declaretur, tamen ex ea convincentem pro Systemate Copernicano rationem peti non posse, tum quod ipsa illa hypothesis, quam pro hoc phænomeno explicando assumunt, teste Manfredio non plene in omnibus satisfaciat, tum & præcipue, quia fundamentum, cui eorum explicatio innititur, nondum est demonstratum, videlicet, quod propagatio luminis ita sensibilibiter successiva sit, prout eam esse phænomeni istius explicatio posceret. Hinc, quamvis Systema Copernicanum sua se se simplicitate commendat, atque etiam phænomenis astronomicis optime congruat, proin defendi ut hypothesis possit; tamen, si verba Scripturæ in proprio ac literalis sensu sint accipienda, in thesi defendi non poterit, sed tenendum quoad substantiam erit Systema Tychonicum.



DISSERTATIO II.

DE COELIS.

PRO varietate systematum, quæ Astronomorum quisque tenebat, varius etiam, ipsis erat Cælorum numerus. Communius iam tres eorum classes statuuntur, Cælum nempe *Aereum*, quod atmosphæram nostram, & meteora complectitur, de quibus supra; *Sidereum*, in quo Planetæ, & stellæ fixæ versantur; ac *Empyreum* felix illa Beatorum sedes, ac unicus desideriorum nostrorum scopus. Sidereum dividi solet in Planetarium, & Stelliferum; in illo Planetas, in hoc stellæ fixas cum Cometis considerabimus.

ARTICULUS I.

DE COELO STELLIFERO.

§. I.

DE STELLIS FIXIS.

675. **F**IXAS vocant eas stellæ, quæ eandem semper inter se distantiam servant, & velut gemmæ orbi maximo affixæ mortalium oculos fulgore suo perstringunt. Naturam illarum quod concernit, satis certa modo omnium sententia est, eas totidem quasi Soles esse, proprio omnes donatas lumine: hoc enim ni foret, a Sole deberent lumen recipere: atqui ab hoc recipere nequeunt lumen adeo vividum, quo illas splendere videmus: cum enim multo longius abint a Sole, quam Jupiter, hujus vero satellites, licet eorum diameter per telescopia apparens major sit quam fixarum, lumen adeo debile a Sole mutuatum habeant, ut libero oculo ne quidem conspiciui sint, lumen fixarum absque omni comparatione debilius adhuc esse deberet, siquidem a Sole illuminandæ forent, id quod vel oculorum testimonio refragatur, quo habemus, stellæ fixas longe esse splendidiore, quam sint Jupiter & Mars, licet duo hi Planetæ Soli sint viciniore, quam sit Saturnus.

676. Stellæ fixæ semper scintillantes apparent, cujus ratio-

rationem aliqui ex ipsa earum natura ignea repetunt, eoquod partes minimæ in his focis ardentibus continuo agitatae velut ebulliant. Alii censent, scintillationem istam potissimum oriri ex vaporibus atmosphærae agitatae, tremantibus, & radios varie detorquentibus, eoquod etiam Venus & Mercurius prope Horizontem plurimum scintillent, etsi natura eorum ignea non sit, nec propria luce resplendeant; fixæ autem, dum sunt in vertice, vix sensibilibus, prope Horizontem vero multo magis scintillent, quam in loco altiore. Illud vero capillitium lucidum, quo quasi cinctæ apparent fixæ, dum nudo oculo aspiciuntur, stellis ipsis non inest, sed ex eo oritur, quod radii a fixa ad nos delati in oculi humoribus non ita refringantur, ut in ipsa retina illorum conus in punctum definat, sed in pupillæ dilatatae latera, fors etiam in cilia incurrentes, & hinc inde in orbem reflexi majorem longe partem retinæ, quam a radiis directis occuparetur, afficiant. Si lumen hoc spurium telescopiis excludatur, fixæ omni diametro sensibili destitutæ veluti puncta lucentia apparent.

677. De numero fixarum nemo dubitat, eum esse innumerabilem: ut enim nihil dicamus de Via lactea, seu Galaxia, quæ aliud non est, quam congeries stellarum ita sibi vicinarum, ut unum quodammodo lumen continuum oculis nostris exhibeant, & candidæ instar fasciæ per cælum extensæ appareant, in solo Orione, in quo Keplerus inermi oculo non nisi 62. stellas observari posse asserit, ope longioris telescopii bis mille, & amplius deteguntur; imo P. Ricciolus suspicatur in Orione stellas esse ultra 265000. De iis autem, quæ per totum cæli stelliferi ambitum libero oculo conspicuæ sunt, antiquiores numerabant 1022, hodie numerantur saltem 1400. Flamsteedius omnino 2604. vidisse se affirmat.

678. Ut stellæ facilius inter se discerni possent, plures earum sub certa quadam imagine comprehendere solent, quæ imagines vocantur *Constellationes*, seu *Asterismi*. Noti olim, erant Asterismi 48. his versibus ab Ausonio conclusi.

Ad Boreæ partes ter septem sidera fulgent.

Arctophylax, Arcti, Draco, Sertum, atque Herculis
astrum;

Anguitenens, Anguis, Lyra, Cepheus, Cassiopea,
Pegasus, Andromeda, Perseus, Auriga & Equellus,
Del-

Delphinus, Telum, Jovis ales, Olorque, Trigonum;
Signifer inde subest, bis sex quem sidera complent:
Nempe Aries, Taurus, Gemini, Cancer, Leo, Virgo,
Libraque, Scorpius, Arcitenens, Caper, Amphora,
Pisces.

Tum ter quinque tibi signa hæc vertuntur ad Austrum.
Cetus, & Eridanus, Lepus, & nimbosus Orion,
Sirius, & Procyon, Argoratis, Hydraque, Crater,
Cervus, Centaurus, Lupus, Ara, Coronaque, Piscis.

His constellationibus, postquam a navigantibus in Austrum stellæ huic polo propiores sunt observatæ, novæ quædam sunt additæ ita, ut numerus earum nunc ultra 60. ascendat, quemadmodum in globis cœlestibus videre est.

679. De distantia fixarum a Terra certi nihil definiri potest, tum, quod tuto iis attribui non possit parallaxis aliqua, tum, quod vera illarum diameter optimis etiam telescopiis observari haud queat. Copernicani, ut dictum, debent distantiam hanc velut immensam ponere. Tychonici, ii etiam, qui fixarum distantiam, quam possunt, minimam ponunt, in eo conveniunt, distantiam fixarum a Terra saltem duplam esse distantiae Saturni ab eadem Terra: hinc si distantia Solis a Terra ponatur esse 22000. semidiametrorum Terræ, distantia Saturni, utpote vix non decuplo major, erit 220000. ; fixarum vero, hac Saturni duplo major, foret 440000. Cum autem de distantia certa haberi cognitio non possit, earum etiam magnitudo determinari non poterit. Ratione magnitudinis apparentis communiter in sex classes dividuntur ita, ut eæ dicantur primæ magnitudinis, quæ omnium maxime splendent, majorisque molis apparent. His quoad apparentiam proximæ dicuntur secundæ magnitudinis, atque ita deinceps. Fors eæ, quæ nobis apparent minores, majores sunt cæteris, cum possint esse remotiores. Motus fixarum, periodicus juxta Tychonicos verus, juxta Copernicanos solummodo apparens, est secundum seriem signorum non quidem parallelus Æquatori, sed Eclipticæ: inde est, quod mutant suam declinationem, non vero latitudinem. & aliquæ fiant boreales, quæ prius erant australes. Motus hic intra 25920. circiter annos absolvendus dici solet *magnus annus Platonius*.

§. II.

DE STELLIS NOVIS.

680. **C**ertis observationibus habetur, non solum apparentem fixarum magnitudinem notabiles subire mutationes, sed stellas interdum apparere antea non visas, easque subin iterum disparere. Stellas has vocant *Novas*, atque etiam *Temporarias*. Ex his aliquæ sunt observatæ, quæ certas apparitionis periodos observant; aliæ postquam semel disparuerunt, rediisse amplius visæ non sunt. Priorum in classe præcipua est stella, quæ in collo Ceti observatur, *mirabilis* ab Hevelio dicta. Hæc singulis annis apparet, suumque splendorem ita auget, ut stellam secundæ magnitudinis æquare videatur. Tempus apparitionis stellæ hujus in sua revolutione est admodum inæquale; brevissimum est trium mensium cum aliquot diebus; longissimum sex mensium cum semisse. Altera ejusmodi stella est in pectore Cygni, anno 1601. a Keplero primum observata instar fixæ tertię magnitudinis. Anno 1626. disparuit; dein anno 1657. denuo observata est ab Hevelio eadem magnitudine, & eodem loco. Anno 1660. decrescere visa, & tandem oculis subducta est usque ad annum 1666., quo tempore priore quidem loco, at non nisi instar fixæ sextæ magnitudinis denuo comparuit. Celebris quoque illa est, quam anno 1572. Tycho observavit in Sella Cassiopeæ. Hæc Venerem perigeam splendore imitabatur, fixasque omnes superabat; deinde tamen imminuto sensim splendore mense Martio 1574. disparuit, ad hoc usque tempus non amplius conspicua. Plures alias ejusmodi stellas aliorum etiam Astronomorum vigil industria detexit, & in posterum quoque deteget.

681. Cujus naturæ, aut unde stellæ istæ novæ sint, si quærat, diversæ sunt Auctorum sententiæ, eæque incertæ omnes. Et quidem eas non esse instar meteorum alicujus, in atmosphæra nostra subito exorti, evidens ex eo est, quod nulla in iis unquam notata fuerit parallaxis. Sat certum pariter est, eas non oriri congestis, accensisque aliarum fixarum exhalationibus: tanta enim exhalationum copia, tantis, tamque splendidis corporibus suffectura, nunc destruenda, nunc post de-

ter-

terminatum temporis lapsum in eodem loco de novo eruptura, contra omnem rationem adstruitur.

682. Itaque stellæ novæ absque dubio sunt sidera mundo cœva, quæ nunc apparent, nunc denuo occultantur. Qua autem id ratione? Cartesius docuit, stellas istas nobis reddi invisibiles, dum tanta macularum erumpentium crusta obducuntur, ut per hanc vix aliquid luminis ad nos usque propagari queat; conspicuas vero iterum fieri, dum densa crustarum congeries vi interioris ignis disjicitur. At verosimilis isthæc opinio non est; cur enim Sol, ejusdem, ut vult Cartesius, cum stellis his naturæ, tam densa macularum crusta nunquam obducitur? Certe dum plures etiam maculæ discum Solis occupant, nihil ille de splendore suo amisisse videtur. Dein cur stella in collo Ceti per plures etiam annos tam exacte servavit Incrustationis suæ periodum? cur crusta, quæ illam in Cassiopea obduxit, tam densa fuit, ut per tot annos nulla ignis actione fuerit diffracta?

683. Alii autumant, stellas has figura discea esse, easque, dum faciem latiore nobis obvertunt, esse conspicuas; disparere autem, dum partem minus latam exhibent. Sed nec istud placet omnibus; eoquod lentis istis, & sæpe irregularibus conversionum periodis phænomena superius allata non satis respondeant, præsertim in stella Cassiopeæ, cujus revolutio vel adeo tarda esse dicenda erit, ut inde ab anno 1574. ad nostra usque tempora nondum fuerit absoluta, vel limites partis lucidæ tam angustos evasisse ponendum, ut licet, partem hanc nobis obvertisset, conspici tamen nequirit.

684. Hinc Ill. Wolfius existimat, stellas has esse Planetas, qui circa fixas, tanquam Soles suos, ita revolvantur, ut jam nobis sint propiores, jam longissime a nobis distent; tunc autem corpora hæc, in se opaca, nobis fore conspicua, quando ad eam orbitæ suæ partem pervenissent, ex qua faciem illuminatam nobis obverterent, disparitura iterum, dum latus non illuminatum nobis præsentant. At si lumine alieno splenderent, quomodo stellam etiam secundæ magnitudinis fulgore suo æquabunt, imo etiam Sirium, ut illa in Cassiopea? Neque etiam explicatur, cur stellæ istæ, quamdiu sunt conspicuæ, eidem loco velut affixæ teneantur.

685. Nonnulli cum P. Dechales putabant, nova sidera apparere, dum plures stellæ minutiores, quæ seorsum

sim non erant conspicuæ, inter se quasi conjunguntur; disparere autem, dum iterum dissociantur. Sic prima Arietis stella observata est subin velut in duas divisa; Imo aliquæ in Plejadibus, & media in ense Orionis jam triplices, jam quadruplices videbantur. Verum hæc tam frequens, & ferme periodica, præsertim in stella Ceti, in aliis autem tam rara, & irregularis stellarum conjunctio plane gratis videtur assumi. Quod autem quandoque stellæ plures instar unius appareant, putant non pauci provenire ex eo, quod lux stellæ utriusque sibi admodum propinquæ subin sit copiosior, & majus spatium in telescopio ac retina occupet, adeoque stellas binas instar unius exhibeat; luce autem imminuta stellæ singulæ se se seorsim ac distinctas monstrant.

686. Denique existimant aliqui, stellas novas esse corpora partim opaca, partim ignea & lucentia, quæ circa axem proprium certa quadam periodo convertantur, ac fortasse limites partis lucidæ mutabiles habeant. Hoc positò explicant, cur successive appareant, & dispareant stellæ: dum enim partem lucentem nobis obvertere incipiunt, sensim effulgere, & oriri, dum vero partem obscuriorem offerunt, evanescere conspiciuntur. Et quia præter certam revolutionem etiam ponitur, partem lucidam vel ampliorem, vel angustiorem esse parte obscura, habetur ratio, cur aliquæ longiori tempore sint conspicuæ, aliæ per tempus longius occultatæ. Dein fieri potest, ut pars ignea irregulari motu agatur occupando in stellæ superficie jam amplius, jam minus spatium; unde simul exponitur mutatio magnitudinis, & durationis, quam apparitiones ejusmodi stellarum habent. Quodsi termini lucidi sint nimis angusti, etsi stella circa axem suum volvatur, videri tamen in ea revolutione non poterit. Nec dissona veritati, inquit, est hæc in stellis vicissitudo, quando Cassinus & Maraldus adverterunt, insignes in stellis mutationes fieri, quarum quædam non mediocriter sæpe augentur, sæpe minuuntur ita, ut visus aciem subinde effugiant. Quin Maraldus affirmat, vix ullam in cælo esse constellationem, in qua aliqua mutatio ab ineunte superiore sæculo ad finem illius non acciderit. Num hæc opinio plane satisfaciât, aliorum judicium esto.

§. III.

DE COMETIS.

687 **I**nter stellas temporarias numerari etiam solent Cometæ, æquod non nisi certis temporibus apparere soleant, postea vero per tempus longius denuo oculis nostris erepti quodammodo delitescant. Differunt tamen a stellis, quas novas dicimus, in eo præcipue, quod non eodem, ut istæ, loco velut affixæ constanter hæreant, sed præter motum ab Ortum in Occasum, qui illis etiam cum reliquo siderum agmine communis est, motu gaudeant ab una stella fixa ad aliam; & in hoc conveniunt cum Planetis. Sed & ab his denuo differunt tum motus velocitate, tum ipso, quod conficere solent, itinere; velocitate quidem, dum aliqui quovis die 10. 12. ac plures etiam gradus conficiunt; itinere vero, quod in orbitis suis longe magis ab Ecliptica desleant versus polos, quam Planetæ ita, ut Cassinus ex complurium Cometarum observationibus Zonam in cælo determinaverit, sub qua Cometæ perinde, ac Planetæ sub Zodiacum, motus suos conficiant, Zodiacum Cometarum propterea dictam. Constellationes, quibus Zona isthæ comprehenditur, his versibus significavit.

Antinous, Pegasusque, Andromeda, Taurus, Orion,
Procyon, atque Hydrias, Centaurus, Scorpius, Arcus.

688. Dum autem in signis hisce orbitas suas percurrunt, non semper, ne armatis quidem oculis, conspicui sunt. Apparens eorum duratio varia est. Nullum fuisse, ajunt, qui non septem saltem dies manserit conspicuus. Sat diu durasse censentur, si per duos, tresve menses oculis se se indulerint. Erat tamen teste Seneca, qui Neronis tempore per sex omnino menses videri poterat. Magnitudo quoque eorum varia est. Anno ante Æram Christianam 146. Cometa fulsisse scribitur non minor Sole. Referente P. Dechaies anno 1200. apparuit Cometa, qui Lunam dichotomam æquabat. Notabilis quoque erat magnitudo illius, qui anno hujus sæculi 44. apparuit. Alii porro ex apparente figura dicuntur *Criniti*, seu *Comati*, alii *Barbati*, alii *Caudati*. Qui radios instar capillitii in orbem spargunt, sunt criniti, quod fit, dum Cometa Soli directe opponitur. ; si capillitium ad-

Huc non nihil brevius in partem aliquam promineat, dicitur barbatus; caudatus denique nuncupatur, si tractum lucidum, seu syrma jam aliquanto longius Cometa emittat. Alii barbatus dicunt, si radii, aut tractus lucidus in partem aliquam prominens Cometam antecedit; caudatum vero, dum syrma Cometam sequitur. Longitudo caudæ diversa est; non nunquam ad 60., aut 90. gradus extensa. Caput sive corpus Cometæ in medio densius est, quam ad oram; pars ejus media vocatur *nucleus* Cometæ. Denique diversus etiam est Cometæ color, dum alii ignei, alii flavi, argentei, fusci aut subnigri apparent.

689. De Natura Cometarum credebant antiqui cum Aristotele, Cometam aliud non esse, quam meteoron in atmosphæra nostra apparens, dum nimirum exhalationes terrestres sursum elevatæ, atque in aere sublimi postmodum accensæ tamdiu lucerent, donec omnis exhalationum congeries esset absumpta. At enim opinionis hujus falsitas vel ex eo patet, quod Cometa idem ex diversis, ac plurimum diffitis regionibus eodem tempore, eodem loco observetur, proinde sæpe nullam omnino habeat parallaxin, semper vero minorem, quam habet Luna, plerumque etiam minorem, quam habeat Sol. Sunt igitur Cometæ supra Lunam, ac supra Solem, quo tanta exhalationum terrestrium copia assurgere nequit. Ut nihil dicatur de motu eorum regulari, de reditu ejusdem Cometæ &c.

690. Hevelius docuit, Cometas consilari ex halitibus, qui a Sole, cæterisque Planetis expirantur, atque in ætherea regione in unam collecti molem illustrantur a Sole, usquedum & ipsi calore Solis denuo dissoluti evanescant. Contra hanc opinionem est I. Exhalationes astrorum utique non excedunt eorum atmosphæram, sicut exhalationes Terræ ultra hujus atmosphæram non assurgunt; imo sicut hæc ad globum suum recidunt, ita illæ ad suum astrum redibunt. Hoc vero si est, qua ratione ex his tale, tantumque corpus consilari poterit? II. Si Cometæ essent merum coagulum ex fortuito halituum concursu enatum, durare non possent, nisi exiguo tempore, & certe disjicerentur penitus, dum, quemadmodum ille, qui anno 1680. apparuit, per viciniam Solis transeunt. Est enim, ut Newtonus ostendit, calor Solis ut radiorum densitas, hæc vero reciproce ut quadratum di-

distantiæ locorum a Sole: proin; cum distantia Cometæ a centro Solis, ubi in perihelio versabatur, tunc fuerit ad distantiam Terræ ab eodem centro Solis ut 6. ad 1000., calor Solis eo tempore prope Cometam erat ad calorem Solis æstivi apud nos ut 1000000. ad 36. sive ut 28000. ad 1. Quo posito ulterius deducit, calorem Solis in Cometam bis mille vicibus fuisse intensiorem calore ferri candentis, quo utique exhalationes istæ omnes debuissent dissipari. III. Motus Cometarum est ordinatus, regularis, uti Planetarum; sæpe etiam sunt retrogradi, quem motum corpori ex fortuito halituum concursu temere enato nemo facile tribuet.

691. Alii cum Anaxagora putabant, Cometam oriiri ex fortuita congerie, & concursu stellarum, se se mutuo illustrantium, quæ opinio ex eo falsitatis convincitur, tum, quod stellulas istas telescopiis præstantioribus deberemus posse discernere, quemadmodum illas in via lactea, atque in aliis quibusdam perennibus cæli nubeculis lucidis, quæ ex plurium stellarum congerie sunt conflatæ; tum & præcipue, quod fortuita illa stellarum unio tanto tempore durare non posset, atque ita ut eundem omnes cursum constanti unione simul conficiant. Accedit, quod supra dictum est de Cometis illis prægrandibus, atque instar Lunæ fulgentibus.

692. Sat certum proin est, Cometæ perinde, ac Planetas, esse sidera mundo cœva, quæ certa, constan-
tigue lege peculiare sibi orbitas describant, conspicienda tunc, quando suis in orbitis extra Solis radios propius ad Terram accedunt. Nam I. motus Cometarum adeo regularis est, ut calculis non secus, ac ille Planetarum, definiri possit, quemadmodum ostendunt observationes Halleji, ac Cassini. Ille juxta theoriam Newtoni complurium Cometarum, rite observatorum, calculum confecit, & observationes calculo tam exacte respondere cognovit, ut differentia raro admodum ad tria minuta prima excurreret. Cassinus anno 1664. postquam apparentem tunc Cometam duabus non nisi noctibus observaverat, Christianæ Sueciæ Reginæ in globo cœlesti viam designavit, quam secuturis sex diebus esset peragraturus, quando ad terram proxime accessurus, ubi stationarius, ubi retrogradus futurus, ubi tandem dispariturus, idque eventu adeo felici, ut in nullo aberraverit (Acta Acad. Reg. 1702.) Altero mox anno

idem Cassinus Cometam alium 8. vel 10. diebus contemplatus tabulam edidit, in qua per singulos dies Cometæ motus descriptus erat haud aliter, acsi de Saturno, aut Jove notis jam Planetis calculum instituisset.

II. Dubitari vix potest, quin iidem Cometæ post longius tempus iterum redeant: ergo sunt sidera mundo cœva instar aliorum Planetarum. Consequentia patet ex eo, quod nunquam duo Planetæ in his tribus consentiant, videlicet in iisdem nodis Eclipticæ, eadem inclinatione ad Eclipticam, & iisdem gradibus celeritatis apparentis. Antecedens vero variis ex observationibus habetur. Sic Cassinus de Cometa, quem anno 1680. observaverat, eundem fuisse asserit, quem anno 1577. observavit Tycho: nam uterque sub initium singulis diebus per 4. grad. & 16. min. movebatur; motus in utroque æqualiter defecit, primus, cum dispareret, solum per 16. min. movebatur, alter vero in suo abitu 18. minuta confecit; uterque Eclipticam in eodem puncto, nimirum in 21. gradu Sagittarii, & sub eodem angulo, atque etiam Æquatorem sub eodem angulo 33. graduum, & in eodem gradu 300. ab initio Arietis computando secuit. Sic etiam Cometæ, quorum alter anno 1665., alter 1672. apparuit, eundem ferme tenuerunt cursum, quod ipsum de aliis quoque ostendunt Cl. Fontenelle, & D. Petit in Dissertatione de natura Cometarum.

Plus ausus est Cl. Hallejus, dum ductis rite calculis de Cometa, qui anno prioris sæculi octogesimo fuerat observatus, prædicere non dubitavit, quo tempore is denuo esset reversurus. Nec erroneum hoc vaticinium astronomicum fuisse, pro certo jam tenent omnes; cum anno 1759. eo ipso, quem Hallejus assignaverat, loco iterum comparuerit, ita quidem, ut diebus singulis eundem omnino in cœlo locum obtinuerit, quem pro diebus istis Hallejus prædixerat. Quodsi igitur de Planetis cæteris dicimus, eos certa quadam periodo moveri in orbes, atque ideo inter sidera ipsi mundo cœva recenseri debere, eoquod eadem loca statim temporibus pertranseant, quæ pertranfierant alias, atque sub eadem inclinatione, eadem, suis in orbitis velocitate incedant, utrumque etiam de Cometis dicendum erit, eos videlicet esse sidera mundo cœva, ac certa periodo, constantique lege in orbitis sibi peculiaribus moveri.

693. Quales porro sint Cometarum orbitæ, defectu diutur-

diuturnioris observationis determinari de pluribus saltem certo nondum potuit. Communissime censent, illas esse ellipses plurimum excentricas, & admodum prolongatas, adeo ut focorum distantia ferme adæquet longitudinem majoris diametri, & orbitæ portiones nobis conspicuæ pro parabolicis absque errore sensibili haberi possint. Congruit certe hoc cum observationibus, quas de Cometis habere hucusque potuimus, sicque redditur ratio, I. Cur Cometa non raro in linea recta videatur ascendere, aut descendere, nec a nobis videri queat, nisi in inferiore orbitæ suæ parte versetur. Sit enim in Figura 92. Tab. X. Terra in centro Universi T ; orbita Solis Smn ; orbita Cometæ $adfe$ sit ellipsis valde prolongata, in cujus foco S existat Sol. Dum Cometa versatur in orbitæ suæ portione gfh , videri non poterit tum ob nimiam a Tellure distantiam, tum, quod radii a Cometa Terram versus emissi commisceantur radiis solaribus, atque ab his absorbeantur. Videri autem (præscindendo a motu Solis, aut Terræ) poterit, dum propius sensim ad Terram accedit, & quidem quamdiu ex d movetur in b , recta quasi descendere, dum vero, peragrata inferiori orbitæ suæ portione, ex c movetur in e recta ascendere in hoc situ orbitæ videbitur.

II. Quomodo ipsius magnitudo apparens augeri, quomodo minui possit. Nimirum, dum ex d descendit in b , identidem magis appropinquat Terræ; hinc crescet ipsius magnitudo apparens. Dum ex c iterum ascendit in e , sensim magis a Terræ recedentis magnitudo apparens decrescet.

III. Cur, & quando Cometa visui nostro eripiat. Ideo nimirum, quia vel nimia sit ipsius a Terra distantia, vel quia radiis solaribus absorbetur. Primum fit, dum a Sole recedens versus superiorem ellipsis suæ portionem movetur, eoque jam pervenit, ex quo lumen ad nos reflexum sensibilibiter afficere retinam nequit. Alterum bis contingit, dum nimirum eam orbitæ suæ portionem percurrit, quæ inter Solem & Terram est intercepta, uti hic est pars ral , vel dum in illa parte movetur, quæ supra Solem existit ita, ut inter eam & Tellurem medius sit Sol, quemadmodum hic foret pars gfh . Dum unam istarum partium absolvit, Cometa e radiis denuo emergens reddetur conspicuus, & a rerum imperitis fors alius a priore Cometa esse credetur.

694. Ob. I. Ex eo, quod Cometæ moveantur motu admodum regulari, quodque iidem sæpius redeant, non potest inferri, quod sint sidera mundo coæva, & non potius corpora ex fortuito vel exhalationum, vel stellarum concursu nata: ergo. Prob. Ant. Etiam maculæ solares moventur motu satis regulari, & earum aliquæ peragrato Solis disco a nobis averso iterum redeunt, & tamen non sunt corpora permanentia, Soli quodammodo coæva, sed mera congeries exhalationum e solari corpore erumpentium: ergo a pari. R. N. A. Ad prob. Tr. A. N. C. Disparitas Cometæ inter & Solis maculas est multiplex. Et primo quidem ratione motus; cum maculæ solares alium motum non habeant, nisi, qui est communis toti sphaeræ, in qua existunt, nimirum Soli, ipsiusque atmosphaeræ: hinc dum Sol motu vertiginis circa axem proprium volvitur, eodem motu etiam gyratur atmosphaera, & maculæ in ea existentes. Motus autem Cometis præter communem cum Sole tanquam centro suo alius insuper est proprius, quo per diversa cœli signa excurrunt, quandoque a Sole longissime recedunt, alias eidem denuo appropinquant.

Dein maculæ Solis sæpe in medio ipsius disco oriuntur, aliæ ibidem dissipantur, & intereunt, variasque figuras intra unum alterumve diem non raro induunt, quæ omnia ostendunt, maculas istas corpora esse ut fortuito nata, ita casu iterum dissipanda, non vero stabilia ac semper permanentia. Quodsi tamen aliqua earum aut sit crassior, aut materia magis tenaci constet, poterit unam, duas, aut etiam tres motus sui periodos absolvere, ut dicetur inferius, quin ex eo inferri queat, eas esse corpora permanentia, cum tota earum duratio, quæ in illis maxima est, 80. aut 90. dies non excedat. At si Cometa idem denuo redeat, quemadmodum illos redire ostensum superius est, liquet, Cometam eundem 20. 50. 100. ac pluribus annis iam perstitisse incorruptum, quod de coagulo exhalationum forte confluentium, maxime in tanta, quam in cursu suo obtinent, Solis vicinitate, nemo suspicabitur.

695. Dices I. Dum aliquando tres Cometæ simul in cœlo apparuerunt, nulla in Sole visa est macula: ergo censendum exhalationes Solis tunc abiisse in Cometæ. R. N. Cons. Casui id omne tribuendum, cum constet, Solem alias sæpe abundare maculis, etiam dum
Come-

Cometæ splendent, alias vero nullam per tempus longius esse maculam, etsi nullus tunc in cælo Cometa luceat.

Dices 2. Ipse nucleus Cometæ varias interdum mutationes subit adeo, ut Cometæ aliqui sub tempus, quo disparent, quodammodo lacerati, in tres aut quatuor globos divisi appareant: ergo Cometa est coagulum vel ex halitibus, vel stellulis conflatum. R. N. A. quod vera hic data sit Cometæ laceratio aut divisio; erat illa duntaxat apparens, quæ, quemadmodum alia etiam limbi figura irregularis, refundi debet in ampliorem, ac mutabilem Cometæ atmosphæram. Aliqui Cometæ teste Cassino apparent rotundi instar Jovis, aliorum etiam nucleus potest esse figuræ irregularis.

696. Ob. II. Si Cometæ essent sidera mundo cœva, atque in orbitis sibi peculiaribus moverentur, deberent ab initio semper esse minores, minusque fulgidi; hoc autem experientiæ contrarium esse, testatur Seneca, dum ait, Cometæ, quo primo die apparuerint, maximi sunt. R. Pro diversitate motus aut viæ, quam in orbitis suis Cometæ tenent, il vel minores ab initio, vel majores apparent, quemadmodum ipse etiam Seneca eodem Libro 7. Quæst. Nat. c. 7. advertit, scribens: Cometæ minuunt, augentque lumen suum, quemadmodum alia sidera, quæ clariora sunt, dum descendunt, majoraque ex loco propinquiore visuntur. Varii autem possunt esse casus. Primo si Cometa (Fig. 92. Tab. X.) motu suo in orbita versus Solem & Terram descendat, existens in *d* apparebit minor, quam existens in *b*, tum quod hic Terræ factus sit propior, tum quod in majore Solis vicinia intensius illuminetur. Secundo. Si Cometa post conjunctionem periheliam in *a* ex radiis solaribus emergens existat in *c*, inde motum suum prosecuturus in *e*, ab initio ex datis antea rationibus apparebit major, & successive evanescet. Et hæc quidem pro casu, quo orbita Cometæ eum tenet situm, ut axis illius directe Terram respiciat.

Cum jam orbitæ Cometarum respectu Terræ variam omnino possint habere inclinationem, diversi iterum esse casus possunt de apparente illorum magnitudine. Sic in eadem Figura 92. ponatur orbita Cometæ *k p t q* esse inclinata ad Terram, si Cometa ab *s* versus Terram accedat, major denuo apparebit in *q*, quam circa *s*. Existens

ſtens ſupra Solem , hujus radiis abſorptus videri non poterit. Dum pervenerit ad conjunctionem ſuam periheliam in k , ſi a Sole ſat remotus ſit , apparebit admodum magnus, quemadmodum etiam, dum e radiis Solis egreſſus pervenerit in i ; hinc pergens verſus p ſucceſſive decreſcet.

697. Dices. Si hic dicta ſubſiſterent , Cometæ ſuo tempore deberent apparere etiam dichotomi , aut corniculati , quemadmodum Luna , aut Venus ; cum eundem reſpectu Solis obtinere ſitum ſuis temporibus deberent , quem ſtatis vicibus obtinent hi Planetæ : atqui nunquam apparent dichotomi , aut corniculati. R. Diſt. M. Niſi quid interveniat , quod iſtas Cometarum phaſes viſui noſtro eripiat , C. M. Si quid interveniat , N. M. Certum eſt , quod Corpus Cometæ exiſtentis in b v. gr. per ſe deberet appare gibboſum , corniculatum vero , ſi exiſtat in r , cum eodem plane modo a Sole reſpiciatur , quo in ſimili ſitu a Sole reſpiciuntur Luna , aut Venus. Cur autem id non fiat , duplex potiſſimum ratio eſt. 1. Quod caput Cometæ ſit omnino exiguum reſpectu totius atmophæræ illud ambientis. 2. Quod atmophæra Cometæ non tantum ſit ampla & copioſa , ſed etiam prope ipſum Cometam admodum denſa ; hinc radii in ea plurimum refracti illas etiam Cometæ , ſeu corporis ſolidi partes illuminatas nobis exhibent , quæ a radiis Solis directe nullum lumen recipiunt.

698. Ob. III. Si Cometæ inſtar Planetarum certas periodos ſuis in orbitis abſolverent , apparitiones eorum eodem modo præſciri , ac prædici poſſent , quo motus reliquorum Planetarum ; hoc autem fieri non poſſe oſtendit minus felix eventus ejusmodi prædictionum. Sio Bernoullius Cometam prædixit ad annum 1719. menſe Majo appariturum in Libra ; alii Cometam anno 1723. obſervatum aſſerebant rediturum anno 1739. at neutere eorum rediit. R. 1. Utrum Cometæ hac ratione prædicti redierint , nec ne , certum eſſe non poteſt : ex eo enim , quod viſi non ſunt , inferri minime poteſt , eos in orbita ſua non rediſſe , idque varias ob cauſas.

I. Si Cometa illo tempore , quo eam a nobis diſtantiam ſua in orbita obtinuit , ex qua videri poſſet , Soli habito reſpectu ad Terram , ſit propior , proin ab hujus radiis abſorbeat , Cometa curſum ſuum peregit ordinatiſſime , quin tamen obſervari a nobis potuerit. Sic etiam Mercurius

curius statas sibi periodos circa Solem quandoque sæpius absolvit, quin vel semel nobis fiat conspicuus, si nimirum in distantia nobis proportionata tegatur adhuc lumine Solis. Hinc est, quod teste Seneca Sole aliquando eclipsin passio apparuerit in vicinia ipsius Cometa, radiis solaribus antea absorptus. Simile quid tempore eclipses solaris observavit Hevelius.

II. Cometæ in perigeo sæpe 10. aut 12. non raro plures gradus uno die conficiunt: quare cum ob maximam orbitæ excentricitatem quandoque a Sole non multum recedant, contingere potest, ut non nisi paucos dies extra Solis radios existant, præcipue si relate ad terram immutata interim fuerit inclinatio orbitæ. Quodsi jam cœlum sit pluvium, atmosphæra nubilus oppleta, aut Luna fulgens haud procul a Cometa existat, Cometa etiam stato tempore redux observari non poterit.

III. Quod non adeo frequenter redeant, ratio in multis esse etiam hæc poterit, quod habeant orbitas ingentes, etiam ultra Saturnum protensas, quas non nisi post centum & amplius annos absolvant. Denique Cometa, quem prædixit Hallejus, destinato anno, præfixo item in loco redux cursum etiam designatum exacte tenuit.

R. 2. Dist. M. Si Cometæ & toties redirent, & tanto tempore manerent conspicui, quoties redeunt, & quamdiu manent conspicui Planetæ cæteri, C. M. Si hoc non sit, N. M. Nullius Astri apparitio certo prædici potest, nisi & orbita illius, & orbitæ tum situs ad Solem, tum inclinatio ad Eclipticam, tum etiam amplitudo satis sint perspecta; quis autem isthæc omnia satis certo determinabit intra tempus adeo breve, quo Cometæ plerumque solent esse conspicui, præcipue, cum idem Cometa tam raro redeat, ut ab eodem Astronomo sæpius observari vix queat? Profecto, nisi Planetæ reliqui tam sæpe, tamque longo tempore nobis essent conspicui, ne de istis quidem satis certas nos habituros tabulas inde merito inferri potest, quod Mercurii, toties in orbita sua redeuntis, motus nondum ita sit definitus, ut non aliquæ circa istum dissensiones inter Astronomos adhucdum sint. Præterea, si Cometarum orbitæ inclinationes suas respectu terræ immutent, potuit Cometa aliquis mutata orbitæ inclinatione fieri perigeus de die, dum alio tempore perigeus fuerat noctu. Hoc posito, perspecta etiam orbitæ natura, reditus Cometæ respectu Terræ certo prædici non poterit,

poterit, quamdiu notum non erit, quomodo, & quanto tempore orbita isthæc dicto modo inclinationem suam mutet. Denique cum orbitæ Cometarum sint valde excentricæ, ellipses admodum compressæ ita, ut hujus curvitas a linea recta parum defleat, si etiam Cometa diutius aliquanto observari possit, non tamen illico excentricitas orbitæ, & natura ellipseos determinari certo poterit, eoquod error etiam minimus in unam alteramve observationem forte irrepens momenti omnino maximi sit.

Interim cum eo jam pervenerit Astronomorum solertia, ut Cometæ per duos, tresve dies observati viam omnino regularem ad complures sequentes dies calculo designare valeant, quin & tempus, & locum, quo stationarius, quo retrogradus sit futurus, quoque dispariturus, absque errore sensibili determinare, sperare licet, fore, ut negotium circa definiendos Cometarum cursus, nunc feliciter ceptum, optatum denique sortiatur eventum, quemadmodum id contigit circa Planetas cæteros, de quibus antiqui eam necdum habuere notitiam, quam ex multiplici observatione eorum posterius sibi compararunt.

699. Illud etiam ex dictis observandum, fieri posse, ut, dum cometa ipse Solis radiis jam est contactus, tamen barba ipsius vel cauda extra Solis radios protendatur, atque ita, siquidem situs illius partem cœli minus illuminatam respiciat, observari queat. Sic in citata Figura 92. Si Cometa sit in *i*, fors caput Cometæ solaribus radiis jam erit absorptum, cauda tamen ipsius, siquidem prolixior sit, oculos nondum effugiet. Unde habetur ratio, quomodo anno 1702. Teste Maraldo ingens tractus luminis 30. gradus longus, & unum latus in Ceto & Eridano apparere potuerit, cui simile quid anno 1668. observavit Cassinus; quin & Aristoteles tale phænomenon observasse scribitur. Ille etiam Cometa, qui anno hujus sæculi 44. est observatus, simili ferme modo ultimis, quibus videri poterat, diebus apparuit: Solem enim orientem antecedens caudam ad 30. gradus extensam die sensim illucescente supra Horizontem ita promisit, ut ea tunc temporis admodum fulgens conspici ab omnibus potuerit; etsi Cometa ipse, utpote Soli jam valde propinquus, adeo distincte videri amplius non potuerit.

700. Undenam porro oriatur barba, aut cauda Cometæ, haud satis convenit inter Auctores. Newtoni Affectarum quidam existimant, capillitium istud aliud non esse, quam

quam halitus tenuissimos, quos Cometa a Sole incalescens copiose emittat. Quemadmodum autem in aere nostro, inquit Newtonus, fumus corporis cujusvis igniti petit superiora, idque vel perpendiculariter, si corpus quiescat, vel oblique, si corpus moveatur in latus, ita in cælis, ubi corpora gravitant in Solem, fumi & vapores ascendere debent a Sole, & superiora vel recta petere, si corpus fumans quiescit, vel oblique, si corpus progrediendo loca semper deserit, a quibus superiores vaporis partes ascenderant; & obliquitas ista minor erit, ubi ascensus vaporis velocior est, nimirum in vicinia Solis, & juxta corpus fumans. Cæterum crescit Cometæ cauda, quo magis ad Solem ille accedit; quo magis inde recedit, cauda minuitur: in priori enim casu non solum rarior fit vaporosa illa substantia, sed etiam copiosior, & longius diffunditur; in casu posteriore contrarium evenit. Ita cum Newtono multi.

Quomodo autem vapores illi rarissimi ac tenuissimi, per quos etiam stellæ transparent, copiosum adeo lumen ad nos reflectere possint, explicant paritate cum fumo in nostra atmosphæra ascendente, qui, licet aere sit levior, aptior tamen est ad reflectendum lumen, quam aer solus. Præterea sicut fumus diversos pro diversitate halituum colores refert, sic etiam halitus Cometarum pro diversa ratione nunc magis nunc minus reflectunt radios, unde lux illorum jam rubescere, jam pallefcere videtur. Si quærat, undenam habeatur tanta halituum copia, quanta requiritur ad constituendam caudam ultra 60. quandoque gradus extensam, dicunt, notum omnibus esse, in quantam fumi molem exiguum corporis odoriferi frustillum calore extenuari possit. Unde etiam incredibile non erit, evaporationes Cometarum, præsertim in vicinia Solis, ab hujus calore plurimum posse rarefieri. Cur denique hæc materia vaporum in æthere rarissimo sursum, in partem nimirum a Sole aversam, tollatur, rationem dant, tum quia materia isthæc multo tenuissima levior est ambiente æthere, ut fumus levior est aere, tum & potissimum, quia a solaribus radiis assiduo impellitur. Addunt, licet cauda Cometæ semper a Sole avertatur, illam tamen non esse in ea linea recta, quæ a centro Solis per centrum Cometæ transeat, sed in eas partes aliquantum deviare, quas Cometa motu suo relinquit, ut adeo non nihil incurvetur,

Hu-

Hujus rationem repetunt a duplici motu, quem vapor a Cometa egrediens, ejusque caudam constituens participat, alterum nimirum, quo tendit in partes a Sole averfas, alterum, quo motum Cometæ in orbita sua progredientis fequitur: hic enim cum tardior fit motu ipfius Cometæ, neceffe eft, ut vapor in ejusmodi progrefſu aliquantum incurvetur. Ita iſti.

In hoc diſcurſu non omnibus placet 1. ingens illa vaporum de novo identidem egredientium, inque ſpatium adeo magnum diffuſorum copia: etſi enim iſthæc materia fit rariffima, debet tamen eſſe apta ad lumen ſatis copioſum inde a Cometa ad nos uſque reflectendum. Quod dictum eſt de corpore odorifero, non videtur eſſe convincens; cum iſtud debeat omnino diſſolvi in particulas minimas, ut copioſus ex eo fumus aſſurgat; ejusmodi autem reſolutio in Cometa non dabitur. 2. Modus & ratio, ob quam vapor ille tendat in partem a Sole averſam: dicere enim, quod vapor ille fit levior æthere, nullam habet veri ſpeciem, in quocunque demum gravitas conſtituatur. 3. In ipſa cauda notantur ſæpe ſtriæ, aut tractus aliqui cæteris obſcuriores, cujus ratio haud ita prompta erit hac in ſententia. 4. Quod dictum de curvitate caudæ, admodum incertum eſt; cum hæc curvitas potius in diverſam reſractionem, quam radii e ſyrmate egreſſi in noſtra primum atmophæra patiuntur, reſundenda eſſe videatur; major certe eſt curvitas hæc, quo propius ad horizontem accedit Cometa, & vix ulla videtur, dum Cometa eſt in vertice.

701. Hinc alii caudam Cometæ oriri cenſent ex radiis Solis in ipſius Cometæ atmophæra diverſimode reſractis, & ad oculos noſtros reflexis. Ponunt iſti, Cometam undique cingi atmophæra valde ampla, eaque tali, quæ verſus Cometæ caput identidem fiat denſior. Atmophæra hæc tota quidem illuminatur a Sole, quo nimirum pertingere poſſunt radii directi, non tamen tota apparet lucida inſtar ſphæræ; ſed a radiis directis illa tantum pars, quæ nucleum proxime ambit, & valde denſa eſt, ita illuminatur, ut ſufficiens lumen reflectere ad oculum poſſit; cauda vero debetur potiſſimum radiis reſractis: dum nimirum radii ſolares in Atmophæram Cometæ tanquam medium denſius incidunt, undique refringuntur ad perpendicularum, atque ita convergunt verſus lineam, quæ per centrum Solis & Co-

metæ

metæ transeat. Illa igitur pars atmosphæræ præsentabit caudam Cometæ, in quam præter radios directos etiam incident radii refracti, cum sic duplicato lumine illustrata pars isthæc cæteris splendidior necessario appareat.

Unde patet 1. cur cauda semper sit a Sole aversa; quia ex legibus Dioptrices in eam partem sit radorum Solis refraçtio. 2. Cur crescat cauda, dum Cometa propius ad Solem accedit; quia crescit intensio luminis, quo partes atmosphæræ etiam remotiores sufficienter illuminari radiis tum directis tum refractis possunt; adhæc, dum propior fit Soli, simul etiam propior fit Terræ, & cauda eum respectu Terræ situm obtinet, in quo tota ejus longitudo videri potest. 3. Cur cauda sit divergens, quo longius a nucleo recedit; tum quia radii refracti plurimi post corpus Cometæ decussantur, tum quia inæqualis est densitas atmosphæræ, quo fit, ut radii ex inferiore Solis limbo in superiorem atmosphæræ partem incidentes refringantur quidem versus axem Cometæ, ita tamen, ut ad situm cum isto parallelum non pertingant, sed ab eo divergant. Ex quo ipso patet, cur Cometæ cauda possit apparere bifida; quia cauda ex radiis per totum atmosphæræ ambitum refractis est instar coni intus cavi: hinc ex latere aspicientibus nobis radii rariores seu pauciores occurrunt circa axem coni huius, quam in ejus latere gemino. 4. Cur tractus aliqui possint videri obscuriores, si nimirum ob inæqualem atmosphæræ densitatem in illa dentur partes aliquæ ad transmittendum lumen minus aptæ, per quas proin pauciores radii ad aliquem caudæ tractum pertingere poterunt. 5. Denique curvitas sformatis potissimum ex refractione in nostra atmosphæra dependet, multoque certius ab hac repeti potest, quam a duplici illo motu, de quo Numero præcedente; cum de tali refractione constet certius, quam de motu hac ratione composito.

Unum est, quod huic opinioni singularem causare difficultatem posset, videlicet, atmosphæram, quæ Cometam ambiat, debere esse nimis amplam, & ad gradus non raro 60. aut etiam plures extensam. Verum cum atmosphæram Cometarum admittant omnes, eamque etiam valde amplam, difficultas hæc tanta haud esse videtur, ut opinioni huic verisimilitudinem adimat. Illud sub finem addendum, non esse, cur viso fors Cometa

aliquo plebs timida sibi, aliisve metuat. Innoxia sunt hæc sidera, & sæpe minitante Cometa etiam maxime terrifico dies vivebantur jucundissimi. Si fors casus aliquis tristior Cometæ præsentiam comitetur, quis inde deducat, prodromum casus hujus fuisse Cometam? Non raro etiam quod uni funestum, ac triste, aliis innumeris gratum, acceptumque est.

ARTICULUS II. DE COELO PLANETARIO.

Planetæ vocantur etiam stellæ errantes, quod tum a se ipsis, tum a stellis fixis varie distare soleant, & velut legibus soluti per cœlestes campos errare videantur, qui ipsi tamen errores stabili semper, ac certa lege reguntur. Septem numerari solent, videlicet Sol, Luna, Mercurius, Venus, Mars, Jupiter, Saturnus. Copernicani Solis loco Terram in Planetarum numero ponunt.

§. I.

DE SOLE.

702. **N**aturam Solis si spectemus, dubitari non potest, substantiam ejus potissimum igneam esse. Sol namque omnibus iis affectionibus pollet, quas in corpore igneo, aut ignito deprehendimus, atque etiam effectus igni proprios edit, dum corpora alia calefacit, expandit, illuminat, atque accendit, maxime dum radii solares vel speculo, vel vitro caustico colliguntur in focum. Cum igitur radii solares, quo longius a Sole recedunt, identidem magis divergant, proin vis eorum, uti aliorum, quæ in sphaeram agunt, in ratione quadrata distantiarum decrescat, iidem effectus forent intensissimi, si corpora Soli proximius essent admota. Interim & illud dubium haud est, substantiam Solis non eo sensu igneam esse, acsi merum esset coagulum ex sola materia ignea, seu subtili, proin purus ignis; ignea illa est, in quantum concipiendo & nutriendo igni est optissima; qualis autem hæc materia determinate sit, nemo

nemo facile divinaverit. Putant, eam esse talem, quæ igne vehementissimo liquecat, concreseat vero rursum igne vehementiore non nihil remittente. Primum inferunt ex nigricantibus maculis in Sole observandis; alterum ex analogia cum montibus ignivomis, qui materias diversissimas igne liquatas, & exultas eructant, recedentesque intra viscera sua denuo recipiunt, cum tempore iterum emittendas. Atque hoc modo fiet, ut Solis substantia nunquam dissipetur, sed ejusdem semper molis persistat, ea ferme ratione, qua terra, etsi continuo vapores emittat, quibus nubes & pluviae in aere formentur, iis tamen in terram iterum recidentibus semper eadem telluris moles perseverat.

703. Etsi autem ignea sit Solis substantia, & ignis, quo propior est, eo magis calorem intendere soleat, facile tamen capitur, cur Sol terram nostram magis calefaciat in æstate, quam hyeme, quamquam æstatis tempore Sol longius a terra distet, quam in hyeme. Ratio hujus ex duplici potissimum capite repetenda est. 1. Sol æstatis tempore propior est vertici nostro, ut adeo radii directione magis ad perpendicularem accedente in terram incendant; dum autem ita directi ineidunt, eo ipso in determinata aliqua telluris area plures radii simul concurrunt, quam si directione obliqua in eandem inciderent. Radii isti a terra iterum reflexi cum directis ferme coincidunt, proin calor & a directis & a reflexis radiis simul quasi junctis intenditur. Unde patet etiam, cur in superioribus aeris regionibus etiam æstatis tempore tantus calor ordinarie non sit, quantus est in inferioribus; quia ad superiores illas non pertingunt radii a terra reflexi, proin istæ a solis radiis directis calorem recipiunt; & quamvis sint caloris hujus fonti, Soli nimirum, propinquiore, hæc tamen propinquitas respectu modica, nec notabilis est. 2. Æstatis tempore Sol diutius moratur supra Horizontem nostrum, proin materiam subtilem in atmosphæra, & ipsa tellure contentam diutius ad debitum concitare motum potest, quæ motum semel conceptum intra breve noctium æstivarum intervallum omnem non deperdit, moxque a Sole revertente ad novum fortiolemque concitatur. Hinc est, quod calor intensissimus esse non soleat ipso Solstitii tempore, sed plerumque trigésimo, aut quadragesimo post illud die; quia nimirum materia calorifica in at-

H b 2

mosphæra

mosphæra exiftens non folum tunc, quando Sol in orbita fua ad verticem noſtrum accedit propius, fed etiam eo tempore, quo fenſim iterum ab eo recedit, novis identidem impulſibus exagitur, vehementioremque ad motum concitatur, donec demum, Sole diutius infra Horizontem commorante, ſe ſe iterum ad motum remiſſiorem iuxta leges æquilibrîi reducere valeat. Poſſunt nihilominus hic variæ intervenire cauſæ per accidens, quæ vel calorem augeant, vel ejus augmentum ad tempus impendant, quales cauſæ ſunt exhalationes terreſtres, vallium, montiumque reflexiones, venti frigidioreſ, ſubitæ tempeſtates grandinibus mixtæ & ſimilia.

704. Sicut diſtantia Solis a terra, ita etiam magnitudo illius certo definiri non poteſt. Caſſinus, & Flamſteedius pro diſtantia Solis aſſumunt diametros terræ 10000. aut etiam 11000. Hugenius vero 12000. Hinc Aſtronomi Pariſienſes diſtantiam Solis mediam ponunt eſſe 22000. ſemidiametrorum terræ; ſemidiametro autem terræ tribuunt communiter cum Schotto 860. milliaria germanica. Aſſumpta proin hac diſtantia media Solis a terra ex diametro Solis apparente concluditur, diametrum Solis continere ſaltem 100. diametros Terræ, adeoque globum ſolarem ad globum terreſtrem eſſe ut 1000000. ad 1. Diſtantia vero Solis a terra foret 18920000. mill. german.

705. Motus Solis in ſyſtemate Tychonico admitti neceſſario debet duplex, diurnus nimirum, & annuus, quibus ob maculas ſolares addendus eſt tertius, videlicet motus vertiginis. Motu diurno, ut dictum, Sol cum reliquis ſideribus circa axem Univerſi volvitur ab Ortu in Occaſum, atque hac revolutione diem 24. horarum efficit. Motu annuo Sol in Ecliptica pergit ſecundum ſeriem ſignorum ab Occaſu in Ortum ita, ut intra unum diem gradum ferme integrum motu medio conficiat, nimirum 59. minuta prima, & 8. minuta ſecunda. Totam igitur Eclipticam in 360. gradus diverſam percurrit Sol intra 365. dies, 5. horas, & 49. minuta prima; ex quo facile eruitur ratio, cur ſingulis quadrienniis annus biſſextilis conſtans 366. diebus redeat. Tertius denique eſt motus vertiginis, quo Sol circa axem ſuum proprium, 7. gradibus & 30. minutis ad axem Eclipticæ inclinatum, intra 27. & dimidium dies moveri videtur.

706. Figura Solis, saltem physice loquendo, sphaerica est. Quodsi tamen materia ipsius sit, aut fuerit aliquando fluida, ex motu vertiginis inferunt cum Newtono, eam sphaeroidicam fore circa polos magis compressam. Cur instar disci appareat, ex legibus Optices (N. 106.) sequitur; item cur in ortu aut occasu videatur esse elliptica, habetur ex legibus refractionum, eo quod radii limbi inferioris, & Horizonti propiores, magis in atmosphæra refringantur, quam radii limbi superioris, proin limbus inferior magis appareat elevatus. Atmosphæram Solis inferunt inprimis ex lumine Zodiacali, de quo superius N. 475. Quanam autem illa constet materia, incertum. Putant aliqui, eam esse Solis effervescentis materiam, in altum projectam, notavitque Cassinus, rariores in Sole maculas fuisse, dum lumen istud sub finem anni 1688. apparuit. Eadem atmosphæra inferitur ex maculis solaribus, quæ, ut mox dicetur, cum sint exhalationes solares, & in aliqua a Sole distantia suspensæ hæreant, indigebunt fluido aliquo, cui, quemadmodum nubes in atmosphæra nostra, quodammodo innatent.

§. II.

DE MACULIS SOLARIBUS.

707. **C**Redebatur olim splendor Solis esse purissimus; at hoc quoque fidus suis non raro infectum maculis esse, anno 1611. primus detexit P. Christophorus Scheinerus Matheos in Universitate Ingolstadiensi tunc Professor. Inventi gloriam, quam ipse adeo Wolfius, alique etiam a Religione nostra alieni Scheinero absque omni hæsitatione attribuunt, olim ad se trahere conatus est Galilæus, atque huic ipsi, neglecto Scheinero, eandem laudem octo abhinc annis in thesibus publicis quidam adjudicavit, palam eo facto demonstrans, non legisse se eximium illum Scheineri librum, quem *Rosam Ursinam* inscripsit, & in quo tum honorem ipse suum potenter æque ac religiose vindicat, tum macularum solarium phænomena tam dilucide explanat, ut Cartesius profectus candide sit, melius quid hac super re excogitari non posse.

H h 3

Possunt

Possunt autem maculæ istæ in Solis disco observari, si vel ope helioscopii Sol ipse aspiciatur, aut si per telescopium immissa Solis imago intra cubiculum obscuratum charta candida excipiat: apparebunt enim in disco aut imagine Solis partes quædam cæteris multo obscuriores, imo etiam nigricantes variis in locis, ac variæ magnitudinis. In imagine Solis in chartam projecta apparent maculæ istæ quandoque etiam coloratæ, qui tamen colores maculis ipsis non insunt (nam per helioscopia inspectæ apparent nigræ) sed a refractionibus in ipsius tubi lentibus oriuntur.

708. Ut jam de natura macularum solarium certum quid statui queat, earum phænomena prius sunt expendenda. I. Maculæ, ut dictum, sunt nigricantes ita, ut pars interior, quæ nucleus dicitur, magis nigricet; exterius vero ambiantur aliqua quasi atmosphæra, seu corona obscuriore quidem, quam sit discus Solis, multo tamen lucidiore, quam sit ipse maculæ nucleus. II. Figura illarum penitus irregularis est, & non raro intra unum alterumve diem sæpius mutatur. III. Varia quoque est earum magnitudo. Quarumdam magnitudo Lunam, illa, quæ anno 1719. apparuit, tellurem quadruplo excedere judicata est; imo referunt Academici Parisienses, ad annum 1714. visam fuisse maculam, quæ 125. vicibus major tellure fuerit. Hæc ipsa magnitudo ejusdem etiam maculæ variis mutationibus obnoxia est, & sæpe maculæ prægrandes sensim dissipantur, & in aliquam quasi nebulam valde spatiosam diffluunt.

IV. Oriuntur maculæ quandoque in medio Solis disco, aliæ prius jam visæ ibidem subito intereunt; quandoque plures antea disjunctæ coalescunt in unam. Quocunque autem loco aut nascantur, aut hæreant, nulla in iis unquam respectu disci solaris observari potest parallaxis, licet ex locis maxime diffitis eodem tempore observentur. Sic maculas, quas anno 1701. Peckini observaverat noster P. Jartonx, eodem tempore Montepessulano in Galliis observavit etiam Cassinus, & utrobique in eodem disci solaris loco omnes sunt visæ.

V. Dum natæ semel sunt maculæ, non semper in eodem loco hærent immotæ, sed a margine Solis orientali moventur versus occidentalem ita, ut partem disci solaris nobis obversam percurrant intra dies fere 12.; alterum vero hemisphærium Solis a nobis aversum intra dies

dies ferme 15. cum dimidia. Dum ita moventur maculæ, velocitas earum inæqualis esse videtur; major apparet, dum sunt circa medium disci solaris, quam dum sunt proximiores limbis. Sic etiam figura diverso hoc in situ inæqualis est, quæ in disci medio apparent majores, videntur quodammodo imminui, dum ad limbos accedunt propius; & quæ in medio videbantur esse separatæ, sibi tamen non nihil propinquæ, eæ circa limbum apparent conjunctæ.

VI. In motu hoc suo non describunt lineas Eclipticæ parallelas, sed ad hanc sub angulo 7. graduum, & 30. minutorum inclinatas; nec semper rectas, sed quandoque ad angulum 7. ferme graduum respectu semidiametri solaris in maximo a recta recessu incurvatas. Circa finem Maii quidem, & initium Junii, item circa finem Novembris, & initium Decembris via illorum recta est, aliis vero temporibus curva ita, ut linea post Junium usque ad Novembrem sit incurvata versus partem Solis inferiorem; post Decembrem vero usque ad Majum curvitas vergat in partem Solis superiorem; & quidem hæc curvitas per tres ferme menses crescit, per alios tres decrescit.

VII. Præter maculas observantur in Sole etiam nebulæ quædam, seu maculæ minus nigricantes, quam sint maculæ primariæ: hinc illæ vocari solent maculæ secundariæ, & sæpe ingens disci solaris tractus ejusmodi nebulis obtektus est, quemadmodum decem abhinc annis videlicet 1754. contigit, ubi tanta disci solaris portio, quæ quartam ferme totius disci partem æquaret, sat sensibili ejusmodi nebula per longius etiam tempus obducta fuit.

VIII. Denique etiam *Facula*, ut vocantur, in Sole quandoque apparent, seu partes quædam lucidiores; & maculæ ipsæ dum e medio versus limbos excurrunt, velut in faculas abire videntur; illæ autem faculæ, quæ maculis tenuibus junctæ ex altero limbo pergunt versus medium, hic in maculas transeunt; dumque limbo opposito appropinquant, denuo abire videntur in faculas.

709. Ex his phænomenis determinanda jam est natura, & origo istarum macularum. Primo volebant aliqui cum Mallapertio, Solem non minus, quam Jovem, & Saturnum suos habere satellites, qui circa ipsum, sicut isti circa Planetam suum, continuo gyrentur; satel-

lites istos esse stellulas, quæ, dum ab invicem distant, videri non possint; dum vero plures in aliqua disci solaris parte conveniunt, macularum instar appareant. Paritatem desumunt a Mercurio aut Venere, qui Planetæ, dum per Solem transeunt, nobis instar maculæ videntur. Verum maculas solares non esse congeriem ex minimis stellulis fortuito concurrentibus plura ostendunt.

710. Primum est. Numerus ejusmodi stellarum deberet esse ingens, dum non raro 50. & amplius maculæ, atque inter eas aliquæ grandes admodum simul in Sole comparent; si jam ad unicam etiam maculam plures concurrere stellulæ debent, quot esse debebunt, ut ad efficiendas tot, tantasque sufficiant? Dein si tot stellulæ Solem undique ambiant, cur ab anno 1653. usque ad annum 1670. ita semper a se dissociatæ manserunt, ut vix una aut altera macula toto illo tempore potuerit deprehendi?

711. Alterum est. Motus harum stellarum deberet esse prorsus heteroclitus: nam I. Dum maculæ aliquæ in medio Solis disco repente oriuntur, juxta hos Auctores ibi fortuito conveniunt plures stellulæ, atque ibidem conjunctæ manent, quamdiu durat macula. Quæritur jam, an stellulæ istæ omnes, antequam conveniunt, moveantur juxta unam eandemque directionem, vel juxta directiones diversas? Si hoc posterius, quomodo post conjunctionem omnes secundum unam eandemque directionem motu parallelo moveri possunt; idque sat longo tempore, dum maculæ quædam duas, tresve periodos absolvunt, proin ultra 80. dies deberent stellulæ fortuito concurrentes mutata priori directione unam jam eandemque tenere, donec iterum fortuito aliam motus sui directionem assumentes a se invicem recederent. Si dicatur eas omnes moveri etiam, antequam conveniant, secundum unam eandemque directionem, quæritur, an etiam æquali, an vero inæquali velocitate moveantur? Si inæquali, quomodo tanto tempore possunt esse conjunctæ? Si æquali semper deberent manere conjunctæ: corpora enim, quæ secundum eandem directionem, & æquali velocitate incedunt, eam, quam semel habent, a se distantiam servant semper.

II. Dum maculæ aliquæ in medio Solis disco subito disparent, quam diversas motus directiones stellulæ istæ deberent assumere, cum tamen antea omnes secundum

can-

eandem directionem per longius tempus circa Solem motæ fuissent; aut si priorem motus sui directionem servant; dissipatio earum deberet fieri ob solam differentiam celeritatis: proin maculæ omnes ante interitum suum deberent quodammodo distendi in longum, dum stellulæ celeriores anteverterent tardius motas.

III. Dum maculæ eædem sæpe mutant figuram ita; ut, quæ rotundæ apparebant, figuram nunc exhibeant penitus irregularem, ex irregulari iterum abeant in rotundas, omnis generis directiones denuo deberent concurrere, aut dicendum esset, stellulas istas in variis circelcellis, aut epicyclis nunc huc, nunc illuc vagari, prout figura, situs, ortus & interitus macularum exigit.

IV. Si regula illa Kepleriana de distantis, & periodicis revolutionibus eorum Planetarum, quorum centrum motus Sol est, his quoque stellulis applicanda sit, prout illam applicari debere ex eo sequitur, quod juxta Patronos suos se habeant instar Planetarum, aut instar Satellitum Jovis ac Saturni, qui eandem regulam exactè observant, si, inquam, regula hæc stellulis istis applicanda sit, spectata illarum a Sole distantia admodum exigua ad percurrendam superficiem solarem vix una, alterave hora indigerent; cum Mercurius multo longius a Sole distans, ut ex ipsius parallaxi demonstratur, discum illius intra 7. aut 8. horas totum percurrat. Imo ostendit Cl. Wistonius, quod stellulæ istæ supposita hac regula ad absolvendam integram periodum ne tribus quidem horis indigerent; cum tamen experientia ostendat, maculas ad absolvendam unam motus sui periodum indigere diebus 27. cum dimidia.

712. Alii, ut naturam macularum Solis declarent, cum Cl. de la Hire ponunt, Solem esse velut aurum liquatum in vase aliquo contentum, semperque ebulliens, & hac ebullitione nunc partes aliquas sursum trudens, nunc easdem iterum refovens, ferme sicuti pisa in cacabo ferventi aqua pleno agitari solent. Hinc dicunt, maculas solares esse corpora solida & obscura, quæ fluidæ Solis substantiæ quasi innatantia interdum ab ebulliente Solis materia extra illius superficiem sursum extrusa appareant instar maculæ, alias altius non nihil in Solem iterum demersa, appareant minora, demum infra Solis superficiem penitus detrusa omnino evanescant. Verum, si quid valet illa a pisce & cacabo petita paritas, apparet, ma-

culas, seu corpora isthæc solida, & obscura non posse tanto tempore in Solis superficie hærere, multo minus tam constanti, ac ordinato motu periodos suas absolvere: sicut enim pisa sursum ejecta aut illico iterum resorbentur, aut huc atque illuc in cacabo jactantur, ita etiam corpora illa ab ebulliente Solis materia sursum extrusa suum denuo in vas relaberentur, atque in omnem partem circumferrentur. Dein cur toto illo tempore, quo nulla ferme macula in Sole apparuit, ut dictum supra, corpora illa semper manserunt in fundo, aut infra superficiem Solis, ebullientis utique etiam tunc eo modo, quo alias? Demum undenam proveniet atmosphæra illa, quæ maculas solares semper, & undique ambit?

713. Igitur recepta nunc sententia est, maculas solares esse fuliginosos vapores, & exhalationes densiores, quæ ex ipso corpore solari erumpentes, & nubium instar in atmosphæra Solis suspensæ una cum Sole circa axem istius gyrentur. Ratio hujus sententiæ est, tum, quod negari haud posse videatur, fuligines atque exhalationes plurimas e massa Solis constanter ardente identidem debere assurgere; tum, quod fuligines istæ atque exhalationes copiosius collectæ necessario aliquas corporis solaris partes obtegant, atque ita interceptis radiis solaribus maculas efficiant; tum denique, quod per has solas omnia macularum phænomena dilucide explicentur. Et de primo quidem nemo facile dixerit, Solem constare materia prorsus homogenea, nec ulli penitus mutationi obnoxia; cumque in Sole detur motus perpetuus, isque vehementissimus, ut intensissimus ejus calor ostendit, & corpore solari haud secus, ac ex tellure nostra innumerum identidem halitus debebunt ascendere, quin tamen propterea deficere aliquid debeat de substantia Solis, quemadmodum nihil deficit de mole telluris, etsi vapores innumeri perpetuo in altum attollantur; quia sicut isti in terram, ita exhalationes illæ denuo in Solem recidunt, accedente alia dispositione iterum attollendæ. De altero dubium pariter esse non potest: si enim fuligines istæ & exhalationes alicubi copiosius collectæ & crassiores sint, luminis e Sole emissi radios hebetabunt, atque ita illam discei partem, quam obtegunt, cæteris obscuriorem reddent, quemadmodum nubes in atmosphæra nostra hærentes interceptis Solis radiis eam cœli partem obscurant, cui situs earum respondet.

714. Membrum tertium de phænomenis macularum, singillatim ea explicando, declaratur. I. Quod nucleus macularum appareat obscurior, quam earum limbus, ratio est, quia dum exhalationes a Sole assurgunt eo fere modo, quo fumus aut vapores terrestres, in varia contorquentur volumina, quæ in medio densiora nucleum dant obscuriorem, circa limbos rariora coronam minus obscuram ceu atmosphæram quamdam nucleo circumfusam exhibent, ut videre est in nube aliqua Soli directe obversa.

II. Si sunt fuligines atque exhalationes, adeoque massa fluida, eodem iterum modo, quo nubes nostræ, possunt esse figuræ irregularis, atque etiam mutabilis, si vel alicubi nova exhalationum copia succedat, vel alibi deficiat.

III. Quia varia est copia exhalationum, & diversa earum diffusio, hinc varia & mutabilis est macularum magnitudo, sicuti nubium. Quodsi, nulla amplius succedente materia nova, vel aliquæ partes decendant in Solem, vel calore Solis repetitis impulsibus agitentur, extenduntur in aliquam quasi nebulam, dum exhalationes hoc modo extenuatæ plus luminis transmittunt, uti de novo ostendit analogia cum nubibus.

IV. Fuligines e medio Solis disco nunc possunt copiosius assurgere, nunc ibidem vel dissipari, vel denuo recidere in Solem: hinc oriri, & interire maculæ possunt in medio disco. Si aliquæ maculæ sint sibi non nihil viciniore, vel agitatione atmosphære solaris, vel actione caloris varie impulsæ, vel ob ascendentem in spatio intermedio novam exhalationum materiam possunt illæ prius separatæ coalescere in unam, quemadmodum similia iterum contingunt in nubibus. Quod nulla in maculis detur parallaxis, ostendit, maculas modico intervallo, quale hic etiam foret plurium milliarium germanicorum, a Sole distare: Mercurius enim jam habet parallaxin sensibilem, etsi minus a Sole distet, quam cæteri Planetæ omnes. Quamvis autem Soli sint propinquæ, ipsi tamen Solis superficie non inhærent: secus enim non apparet, quomodo & unde oriri possit atmosphæra illa, quæ maculas constanter ambit; neque etiam, ut mox patebit, tanta posset esse differentia temporis, quo partem Solis nobis obversam percurrunt, ab illo, quod insumunt in percurrenda altera Solis parte a nobis averfa.

V.

V. Motus ipsis una cum Sole & hujus atmosphæra communis est. Nimirum sicut Sol motum suum vertiginis intra 27. circiter dies absolvit, ita etiam atmosphæra Solis, & ea, quæ in ipsa continentur, circa eundem axem & intra idem tempus revolvuntur, quemadmodum in systemate Copernicano tota atmosphæra nostra, nubesque in ea contentæ circa eundem axem cum terra gyran-
 tur. Assumptis dein legibus Opticæ redditur ratio, cur maculæ videantur diutius morari in hemisphærio Solis opposito, quam in eo, quod nobis conspicuum est: cum enim Sol sit corpus sphæricum, aut ad hoc proxime accedens, nunquam totum ipsius hemisphærium a nobis conspici potest (N. 99. & seqq.) ut patet in Figura 93. Tab. X. In hac sit Sol divisus in duo hemisphæria, superius agb , & inferius afb . Dum sphæra hæc solaris ex terra T aspicitur, radii visuales Tm , & Tn sphæram tangunt in punctis m & n : proin in his terminatur visio nostra, & sphæræ solaris portio minor mfn nobis est conspicua, portio vero major $mg n$ visui nostro eripitur: igitur etiam maculæ solares tamdiu tantum in parte nobis conspicua morari videntur, quamdiu versantur in portione minore mfn ; tamdiu vero in hemisphærio opposito, quamdiu sunt in portione majore $mg n$. Et quia differentia inter utrumque hoc tempus major est, quam vi legum opticarum esse deberet, siquidem maculæ in ipsa Solis superficie hærent, inde eruitur, eas in loco ab hac superficie non nihil remoto, nimirum in atmosphæra solari existere.

Ex iisdem Opticæ legibus fluunt, quæ motus hujus velocitatem concernunt; nimirum, quod maculæ circa limbos Solis videantur moveri tardius, quam circa medium disci solaris, ratio est, quod ob figuram Solis rotundam obtutus in maculas feratur oblique: hinc dum macula primo apparens in n una cum Sole movetur per arcum nt , eo tempore in disco solari videtur motu recto percurrere spatium no ; dum vero eadem macula circa medium jam existens una cum Sole movetur per arcum ef priori nt æqualem, hoc tempore motu recto percurrere videtur spatium ih : cum ergo spatia eodem tempore percurra videantur inæqualia, & illud quidem majus, quod est circa medium, quam alterum, quod circa limbum est, etiam celeritates apparent inæquales, major circa medium, minor prope limbos.

Hinc

Hinc quoque sequitur, cur macula in medio major, prope limbos appareat minor, aut potius angustior, diametro secundum longitudinem manente eadem: si enim ponatur macula in medio adæquans totum spatium *f e*, seu huic respondens *h i*, dum macula accedit ad limbos, eundem quidem arcum sphaeræ solaris occupabit æqualem *t n*, ob aspectum tamen obliquum non nisi spatium *o n* occupare videbitur. Unde etiam illud facile eruitur, quod nimirum maculae circa medium separatae, sibi tamen propinquæ, prope limbos videantur coalescere in unam, & vicissim: si enim ponantur duæ maculae, una in *f*, altera in *e*, modico intervallo a se invicem sejunctæ, dum limbo appropinquant, semper crescit obliquitas visionis, & maculae prius visæ velut in *h* & *i*, jam apparebunt in *o* & *n* spatio longe angustiore, ut adeo modicum, quo se junguntur, intervallum non amplius discerni queat, maxime si moles macularum sit aliquanto major.

VI. Quod motus macularum non semper sit, & appareat esse rectus, sed statis temporibus per curvas, provenit ex eo, quod axis Solis cum axe Eclipticæ parallelus non sit, sed ad angulum 7. circiter graduum ab eo defleat: inde fit, ut Sol in Ecliptica incedens annis singulis bis e regione terræ ita constituatur, ut maculae linea recta ferri videantur; reliquis vero temporibus situm respectu terræ talem obtineat, ut maculae vel sursum, vel deorsum per curvam declinare videantur; cumque Sol situm hunc successive immutet, curva nunc crescere, nunc decrescere videtur.

VII. Quod attinet nebulas in Sole non raro conspicuas, eadem illarum origo est, quæ macularum, nimirum exhalationes Solis minus densæ, nec ita collectæ, uti sunt in maculis.

715. De ultimo demum phænomeno, Faculis nimirum, quorundam olim opinio erat, eas unice, & ubique que haberi per majorem atmosphaeræ solaris aperturam, ex qua lumen copiosius transparens aliquam quasi faculam, seu partem cæteris splendidiorem exhibeat, forme ut per aliquem nubium hiatus tralucens Sol tractum quemdam cæteris lucidiorem causat. Verum hoc de faculis universum omnibus dici non posse, pluribus ostendit Scheinerus Rosæ Urfinæ L. IV. P. I. c. 52. ex eo potissimum capite, quod, ut plane demonstrat, nulla unquam

quam circa limbos Solis apparere facula poffet, cum tamen faculæ vel unice, vel plerumque apparere circa limbos soleant.

Hinc alii cenfent, faculas inde oriri, quod materia maculas conftituens nondum bene excocta concepto tandem Solis igne conflagret, & novis flammis splendorem Solis augeat; ferme ficut nubes atmofphæræ noſtræ ſubito quali accenſæ valde illuſtrem in fulgure flammam exhibent. Quodſi fors, inquiunt, ignis extingueretur, priusquam tota macularum materia conflagraſſet, facula iterum abiret in maculam. Si quærat, quomodo facularum lux alias Solis partes ſplendore ſuo ſuperare poſſit, reſpondent, quod Sol ut plurimum obtegatur nubeculis, faculæ autem ſupra has nubeculas emergant, atque ideo corpus ſolare apparere poſſit minus lucidum, quam ejusmodi facula. Huic opinioni fors opponi poſſet, non videri verofiſmile, quod lumen materiæ maculis deſtinatæ, etſi illa actu conflagret, poſſit eſſe intenſius, quam lumen Solis ipſius; exemplum certe de fulgure magni adeo momenti haud eſſe videtur, cum faculæ diutius perfeverent, fulguris vero lux ſit quali momentanea, atque etiam fulgura ſplendente Solis jubare fors ne viderentur quidem.

716. Quare cum faculæ vel unice, vel plerumque apparere ſoleant circa limbos Solis, iſtæ aliud haud eſſe videntur, quam maculæ obliquo hoc in ſitu a Sole illuminatæ, & lumen hoc ſuum copioſiſſime verſus oculum noſtrum reflectentes, ferme ſicut nubes, quæ antea Solis jubar omne videbantur abſcondere, a Sole infra Horizontem jam depreſſo radiis valde obliquis illuminatæ ſplendorem ac lumen vivaciſſimum ad oculos noſtros ſub vesp̄erum reflectunt. Hoc certe aſſumpto phænomena facularum optime explicantur. I. Si macula aliqua (Fig. 93. Tab. X.) exiſtat in *n* vel *d*, illa a proximo ſibi Sole illuſtrata copioſum verſus terram lumen reflectet; cumque in *n* aut *d* hac ratione concurrant & radii aliqui directi, & reflexi, pars illa videri debet cæteris ſibi contiguis aliquanto ſplendidior. II. Cum maculæ tunc tantum reflectere hoc lumen poſſint, quando reſpectu noſtri ſitum habent obliquum; ſitum autem obliquum non habeant, niſi quando ſunt circa limbos Solis, apparet, eorū faculæ tantum oriantur circa limbos. III. Dum maculæ a limbis ſenſim progrediuntur verſus medium diſci

solaris ; ita autem progredientes semper magis amittant situm respectu nostri obliquum , patet, cur faculæ successive videantur mutari in maculas. IV. Dum maculæ e medio disci solaris iterum pergunt versus alterum Solis limbum, successive denuo acquirunt situm obliquum, ut adeo macula videatur mutari in faculam, saltem, si materia maculam constituens, antequam hæc limbis fiat propior, nondum fuerit dissipata, aut ita attenuata, ut luminī copiosius reflectendo par amplius non sit.

Equidem dicit Scheinerus L. IV. P. I. c. 51. esse etiam faculas, sed rariores, & difficiliores animadversu, quæ in medio Sole velut in scenam prodeant, & ante se propriant, quam horizontem Solis occiduum assequantur ; alii tamen asserunt, faculam proprie talem in medio Sole nunquam observari. Quod si pars aliqua non nihil lucidior in medio Sole appareat, a radiis solum reflexis illa lux provenire non poterit, sed fors inde erit, quod Sol densiore atmosphæra undique cinctus ibi per partem atmosphæræ non nihil rariorem copiosius lumen ad nos emittere possit, atque ita aliquam faculæ speciem exhibere.

718. Ob. I. Si maculæ essent meræ exhalationes, intensissimo Solis calore deberent illico consumi, aut dissipari, proin maculæ tanto tempore durare non possent, quanto illas durare experientia docet. Antecedens patet ex eo, quod juxta superius dicta Cometæ, si essent merum coagulum exhalationum in perihelio illico deberent dissipari. R. N. A. Utique si exhalationes, & fuligines Solis essent talis naturæ, cujus sunt eæ, quæ ex tellure nostra ascendunt, vehementissimo Solis calore dissipari illico deberent ; at illas esse indolis alterius, ex eo jure inferitur, quod ipsum etiam corpus, ex quo ascendunt, aliud longe sit, quam terra nostra. Et quamvis certo constare nobis non possit, quæ denique sit materia corpus solare constituens, illud tamen nemo revocare in dubium ausit, materiam istam ejus naturæ & indolis esse, quæ calorem longe intensissimum pati queat, quin illico dissipetur, aut absumatur. Talis autem indolis si est materia Solem ipsum constituens, haud absimilis etiam erit illa, quæ per exhalationes & fuligines a Sole eructatur. Illæ vero exhalationes, ex quibus Cometæ juxta istos Auctores deberent esse conflati, potissimum provenirent ex Planetis aliis, qui cum sint corpo-

corpora telluri haud multum abfimilia, eorum etiam exhalationes caloris non ita patientes erunt ac illæ Solis.

719. Dices. Vel exhalationes istæ sunt densiores, quam sit materia Solis ipsius, vel sunt rariores? non densiores, alioquin non apparet, quomodo possint elevari sursum, & in atmosphæra Solis hæerere suspensæ; nec rariores: si enim essent rariores, non possent obscurare Solem; cum per illas lumen sat copiosum posset propagari. Respondeo, exhalationes sursum elatas esse utique rariores, quam sit materia constituens Solem ipsum, eoquod hic non possit verosimiliter dici esse merus ignis. Poterunt nihilominus obscurare Solem, sicut exhalationes terrestres, fumus, & fuligines in nostra atmosphæra ascendentes Solis jubar nobis eripere, ac volumen admodum nigrescens exhibere possunt, quamvis sint massa valde rara, multo certe rarior, quam sit materia Solis. Et ratio est, quia ob innumeras, easque inordinatissimas refractiones, & reflexiones maxima luminis copia absorbetur, præcipue si in massa ista fuliginosa etiam sint particulæ cinerum instar penitus exustæ, atque ita ad transmittendum lumen ineptæ.

720. Ob. II. Si maculæ nil essent, quam exhalationes Solis, semper deberent illæ in Sole dari; eoquod Sol ob continuum & intensissimum calorem semper exhalationes emittat: atqui non semper dantur. R. D. M. Deberent semper in Sole dari maculæ primariæ, ut dicuntur, atque ita crassæ, ut lumen Solis in ea parte, in qua hærent, penitus suffocent, N. M. Semper deberent dari maculæ secundariæ, seu nebulæ quædam rariores, C. M. Equidem fieri vix posse videtur, ut non continuæ e corpore solari expirent fuligines, atque etiam constans experientia, teste Scheinero, docet, Solem a maculis secundariis immunem haud unquam esse. Attamen exhalationes istas non semper esse æquales, neque etiam in volumina densiora semper colligi, tum ex eo potest intelligi, quod neque in atmosphæra nostra vapores semper in nubes densiores coagulentur, & quandoque per tempus etiam longius vix sensibilis atmosphæram nebula occupet; tum etiam ex eo, quod, cum materia in fuligines semel expulsa, atque iterum in corpus solare recidens aliquantum alteretur, non eadem semper adsit copia materiæ, ad similes exhalationes jam præparatæ,

ratæ, ferme ut in montibus ignivomis, atque etiam in atmosphæra terrestri contingere solet.

721. Dices. Saltem non potest his suppositis explicari motus macularum, isque satis ordinatus: undenam enim exhalationes istæ fortuito natae ad hunc motum determinari queant? R. Cum de Planetis cæteris jam nemo dubitet, eos moveri motu vertiginis circa axem proprium, id ipsum etiam de Sole, & ipsius atmosphæra jure supponitur. Si vero Sol, ipsiusque atmosphæra circa axem movetur, etiam maculæ, quæ re ipsa sunt partes sphæræ solaris, atque in ipsius atmosphæra existunt, communem istis motum habebunt, five dein partes illæ, quæ in exhalationes elatæ maculas efficiunt, adhuc in ipso Sole hæreant, five in istius atmosphæra jam sint suspensæ, ubi ad motum hunc jam determinatæ cum atmosphæra in eodem perseverabunt, donec vel dissipentur, vel illico in Solem denuo recidant. Sic etiam globus, tormento excussus in navi mota, eundem, quo tunc navis ferebatur, motum deinceps conservat, ut alibi ostensum.

722. Ob. III. Si dicta de faculis subsisterent, explicari haud possent ea, quæ ex Scheineri observationibus pluribus, præsertim L. IV. P. I. c. 52. habentur. I. Multæ faculæ maculis contiguæ vel versus septentrionem, vel versus austrum horizonti ortivo simul insident; dein sibi ita contiguæ per aliquot dies progrediuntur, donec alterutra absumatur. Idem contingit, dum maculæ pergunt versus horizontem occiduum. II. Multi macularum nuclei quodammodo fissi sunt, & illo exiguo intervallo luculentam faculam ostendunt. III. Multæ maculæ in horizonte facularum splendoribus ita obruuntur, ut discerni vix queant.

R. N. M. quin ex his magis stabiliri videtur nostra de faculis solaribus opinio. Et quidem de primo habetur denuo analogia in nubibus a Sole occidente vivacius illuminatis; dum enim nubes aliqua non nihil crassior a Sole admodum oblique respicitur, potest nubis hujus extremitas aliqua splendide illustrata copiosum ad nos lumen reflectere, reliqua vero nubis pars transmittendo lumini ob densitatem, reflectendo autem ob situm suum inepta apparere potest penitus obscura. Sic etiam macula aliqua, horizonti solari propinqua, ex parte copiosissime illustrata videri potest instar faculæ, pars altera ejusdem maculæ, transmittendo aut reflectendo lumini non idonea, appar-

rebit obscura, sicque contiguæ, quia in eodem exhalationum volumine, erunt maculæ faculis, atque ita sibi contiguæ per aliquot dies progredientur, usque dum ob diversitatem situs, quem respectu oculi in terra consistentis acquirunt, vel dispareat facula, si nimirum motus sit versus medium disci solaris, vel macula copioso nimis lumine reflexo obruatur, dum motus a medio est versus horizontem occiduum, ut ex Num. 716. intelligi potest.

Ratio secundi ex primum dictis facile eruitur. Si nimirum duæ maculæ sint sibi admodum contiguæ, ut instar unius quodammodo appareant, una tamen sit altera non nihil altior, poterit a superiore copiosissimum reflecti lumen, & ita intra utriusque intervallum apparere facula, sicut denuo inter duas nubes cœtera obscuras tralucere potest splendor admodum vividus, dum situ obliquo ita respiciuntur a Sole, ut a superiore lumen reflexum pertinere ad oculum possit, nondum vero a nube inferiore.

Tertium denique his in principiis omnino necessarium est: si enim in ipso ferme horizonte seu limbo jam existit macula, situs illius adeo obliquus est, ut tota maculæ moles debeat apparere admodum exigua, atque aliqua ipsius pars jam sit extra limbum Solis ipsius: hinc pars intra limbum adhuc existens tota a Sole illustrata lumen suum ferme omne ad oculum reflectet; atque ita meram quasi faculam exhibebit. Illud denique notandum adhuc, faculas ordinarie diutius durare, quam maculas, quia, postquam macula aliqua e media disci solaris parte versus limbos progressa jam aliquantum est, illico situm respectu terræ non nihil obliquum, proin reflectendo luminis opportunum acquirit, atque situm hunc retinet, quin etiam auget, usque dum ad ipsos limbi margines perlata videri definat; redux vero ad limbum alterum eundem situm obliquum mox ab initio habet, eumque servat, donec mediæ disci parti jam sensim appropinquet.

§. III.

DE LUNA.

723. **L** Una corpus est opacum, & quidquid luminis præfert, a Sole recipit. Superficies ipsius admodum aspera, & inæquabilis est, atque e partibus reflectendo luminis non ubique æqualiter aptis compacta. Primum membrum de opacitate Lunæ satis ostendunt ipsius eclipses, dum

dum nimirum ob terram, e regione Solis interpositam, lumen suum Luna omne amittit: si enim proprio fulgeret lumine, in umbra terræ existens multo illud luculentius deberet exerere; cum constet, ea, quæ lucida sunt, plus splendere in tenebris, quam dum sunt in præsentia lucis amplioris. Membrum alterum de aspera & inæquali Lunæ superficie demonstrent observationes certæ. Nam, dum Luna falcata, seu corniculata est, & ope telescopiæ aspicitur, in partibus vivo lumine perfusis termini lucis & umbræ penitus inæquales, & velut dentati sunt. Non nunquam etiam partes quædam lucidæ ab hemisphærio illuminato separatæ, & in parte Lunæ adhuc obscura circa phæos extremitatem videntur. Quomodo autem fieri posset, ut termini alicujus sphæræ illuminatæ sint inæquales, nisi etiam superficies sphæræ istius inæqualis & aspera foret? Dein cum constet a lumine, per lineas rectas propagato, apices nostrorum montium ac turrium antea illustrari, quam inferiorum montium loca, aut domorum tecta, certum est, partes illas lucidas, quæ a parte hemisphærii lunaris illuminata videntur separatæ, esse partes admodum altas, ac supra reliquam Lunæ superficiem eminentes. Tertium denique membrum ostendunt maculæ lunares, dum partes aliæ aliis sunt splendidiores, proin etiam ad lumen Solis reflectendum aptiores.

724. Undenam autem ista diversa aptitudo proveniat, aut quid demum maculæ istæ sint, haud satis certum. Multi in ea sunt opinione, maculas Lunæ seu partes minus illustres esse maria, lacus, stagna aut etiam flumina, idque duplici potissimum ex capite inferunt. I. Experientia docet, quod in Luna crescente & decrescente confinia lucis & umbræ, quæ alibi aspera sunt, & denticulata, in magnis illis maculis minus lucidis, quas maria appellant, linea æquali definiantur: igitur superficies isthicest æquabilis, & ad libellam exacta, eaque talis, quæ multum luminis absorbeat: sed ad æquabilitatem se componere, & lumen absorbere, sunt proprietates fluidorum. II. Si maculæ dicantur esse maria &c. haud difficulter reddi ratio potest, cur aliquæ maculæ sint perennes, aliæ variantes, aut temporariæ. Perennes sunt tractus ingentes aquarum, lumen semper absorbentium; posteriores vero, quarum nigredo sensim deficit, quæque mutabiles sunt, aliud esse non possunt, quam quædam inter montes interceptæ valles, quæ magis sensim, magisque a So-

le illuminantur, quo magis directum respectu Solis situm Luna in orbita sua obtinet, ut adeo sensim dispareant umbræ a Lunæ montibus in eas valles projectæ.

725. Hinc porro ulterius deducunt, etiam Lunæ suam esse atmosphæram; eoquod ex partibus Lunæ fluidis vapores non minus ascendere debeant, quam ii affurgant in tellure nostra. Addunt 1. Figura fixarum, & Planetarum, dum jamjam a Luna occultari incipiunt, prope limbum ejus ex circulari in ovalem mutatur, ut observavit Cl. de Lisle junior; hoc autem arguit, prope Lunam medium esse diversum, in quo radii luminosi a stellis aut Planetis emissi refractionem subeant, atque ita a suo tramite desleant. 2. Lumen annuli illius, qui in Eclipsibus solaribus, etiam dum diameter Lunæ apparens major est apparente diametro Solis, circa Lunam observari solet, paralleli ad peripheriam Lunæ intensius est prope Lunam, remissius versus peripheriam suam; hic vero annulus, a pluribus jam observatus, aliunde provenire non potest, nisi a luce solari, per materiam quamdam fluidam, prope Lunæ corpus densiorem, refracta.

Verum aliis hæc atmosphæra Lunæ non probatur. Argumenta certe, quibus eam evincere conantur, tanti non sunt, ut sensibilis aliqua atmosphæra fideri huic tribuenda esse videatur. Et primo quidem incertum penitus est, num partes illæ, quæ maculas exhibent, sint maria, lacus, aut stagna; cum certum omnino sit, varias corporum, etiam solidorum species esse, quæ lumen magis, minusve ad nos reflectant, nihilque obstet, quo minus tractus etiam ingentes ejusmodi partium solidarum in Luna possint esse omnino æquabiles, quemadmodum etiam in tellure planities quandoque sunt admodum spatiosæ, ut adeo neutra ratio Num. præced. indicata partium fluidarum in Luna existentiam demonstret. Quod dicunt de terminis lucis & umbræ in magnis istis maculis, eos videlicet linea æquali definiri, Auctores alii præstantissimis instructi telescopiis non deprehenderunt, dum eos quoque terminos asperos & inæquales invenere. Et si essent maria, ea omnino deberent apparere nigra, nec nisi punctum aliquanto latius posset lumen ad nos reflectere, ut in omni alia superficie convexa accidit. Imo si iisdem omnino partibus constare Luna dicatur, quibus constat globus hic terraqueus, cur non frequen-

frequenter etiam nubes, æque subin crassissimæ in Luna observantur, quæ totum macularum systema per tempus etiam longius deberet immutari?

Sed neque reliquæ duæ rationes sat efficaces sunt: quod enim attinet figuram fixarum & Planetarum prope limbos Lunæ mutatam, satis certum est, eam fuisse deceptionem opticam. Eandem namque eclipsin Veneris anno 1715. observarunt Cassini, Maraldi, aliique, & quamvis in id potissimum intenderent, nullam tamen nec figuræ, nec luminis mutationem deprehenderunt. Cumque eodem adhuc anno iterum observarent occultationem Jovis, ejusque satellitum, nullam denuo mutationem notare poterant. Totam itaque mutationem illam provenisse ex eo, quod Venus non in centro vitri ocularis fuerit constituta, jure existimat Cl. de la Hire, opinionem hanc suam proprio confirmans experimento: cum enim occultationem Jovis ipse quoque cum Cassino aliisque observaret, eosdem colores, ac figuræ mutationem notaverat in Jove, quam Cl. de Lisle in Venere deprehenderat, etsi Jupiter tanto adhuc intervallo a Luna distaret, ut colores utri, figuræque mutatio ab illius atmosphæra provenire non potuerint. Causam hujus dum inquirat, advertit, vitrum tubi situm habuisse obliquum, adeoque radios a Jove in vitrum oblique incidentes in colores fuisse divisos. Denique si talis atmosphæra refringens Lunam ambiret, deberent sidera, præcipue stellæ fixæ ob duplicem in tali atmosphæra convexa refractionem jam penitus disparere, antequam ad ipsum limbum Lunæ pertingerent, id quod a nullo hucusque observatum fuisse legimus.

Neque circulus ille lucidus, Lunam in eclipsi solari, dum hæc totalis est, ambiens, quidquam pro Lunæ atmosphæra evincit. Provenit ille circulus ab atmosphæra ipsius Solis, quæ circa Solem densior tantum luminis ad nos reflectere potest, quantum in absentia lucis vivacioris sufficit ad ejusmodi circulum lucidum efformandum. Quamprimum pars aliqua disci solaris e disco Lunæ emerferit, circulus iste illico disparet, utpote majore jam lucis copia absorptus.

726. Illud hic inferi posse videtur, esse ex Neotericis non paucos, qui doceant, & Lunam, & alios Planetas non agris solum, sylvis, & oppidis plenos esse, sed etiam animalibus atque hominibus habitatos. Planetæ enim in-

quiunt, sunt corpora terræ similia, & similiter, juxta Copernicanos, circa Solem mota, atque a Sole illuminata; Jupiter & Saturnus habent suas quasi lunas, seu satellites, uti terra; Luna ipsa suos montes pro fluviis, mineralibus &c. cur igitur ibi non etiam sint incolæ, sicut in terra? Id verisimillimum esse arbitratur in suis chartis Uranographicis Astronomus Norimbergenfis, & multis evincere conatur Hugenius adeo, ut inter ipsos vix amplius disputetur de supposito, sed de sequelis circa incolarum staturam, proprietates &c. Sic Wolffius dicit: dubio fere penes me caret, Jovicolas esse terricolis multo majores; ex genere nempe gigantum. Alii fuse describunt temporum, tempestatumque his in locis vicissitudines. Imo sunt, qui etiam Soli suos dent populos, veluti Salamandras in igne viventes. Id ausus non est Suidenius Anglus; ne tamen hunc Planetam omnino privaret incolis, statuit ibidem damnatorum sedem.

727. At enim quis non videt, meras hic afferri conjecturas, easque fundamentis haud adeo firmis nitaxas? Sint, quod tamen non sunt, Planetæ corpora telluri nostræ quoad omnia plane similia, potuit tunc DEUS in iis etiam collocare homines, prout istos collocavit in terra; imo potuisset DEUS, si Planetæ etiam non essent corpora terræ similia, iis suos dare incolas. An autem, quod potuit, etiam voluit DEUS? Censendus est voluisse, inquit Ill. Wolffius: DEUS enim omnia condidit ad manifestandas perfectiones suas: ne igitur sine hoc suo excidat, censendus est in his quoque corporibus adeo vastis posuisse creaturas rationis capaces, quæ ex cognitione istorum corporum in agnitionem divinarum perfectionum assurgerent. At hæc ratio probaret sane, non in Planetis solum, sed in fixis omnibus, imo ubique opus esse hominibus; cum non sit in cœlis, nec in terris plaga, in qua non multa supersint ad manifestandam DEi gloriam cognoscenda. Fors etiam cum quibusdam Alchymistis homines nigellos admittent in mineris, qui subterranea mirentur, ac moderentur. Melius ex hoc argumento infertur existentia Angelorum, quam hominum ubique præsentium, qui ne ea quidem perfecte cognoscunt, quæ usurpant oculis, & palpant manibus.

728. Sed præter cognitionem, ex qua in DEi laudem assurgimus, alium finem immediatum fors requirunt, propter quem creata sint tot corpora cœlestia. Finem hunc

hunc non obscure colligent ex Genesis cap. I. ubi istæ hæc omnia propter hominem in terra degentem facta esse legimus. Solem enim, Lunam & Stellæ posuit DEUS in firmamento cœli, ut essent in signa, & tempora, ut dividerent diem, ac noctem, ut lucerent super terram. Quid utilitatis inde profluat, norunt Astronomi, Geographi, Chronologi, Nautæ &c. Sentiunt Plantæ, & Animalia, & universa sublunaris natura, quamvis magnam partem nos mortales ignoremus. Terram in principio creavit DEUS, ac postmodum Planetas ac Stellæ propter terram, quam condendo a Se homini præparabat. Verum, inquit, propter unum terræ punctum hæc omnia fecerit DEUS? Quid istud miremur? Si DEUS Unigenitum suum terris dedit, cur non concesserit reliqua infinitis sane modis inferiora? An apparatus iste pro Homine-DEO in terris nobiscum conversaturo nimis Conditori DEO videri potuit?

Neque dicant, gloriosius saltem DEO fore, si Planetæ suos haberent incolas, qui laudarent DEUM. Quid enim, si hanc gloriam non quærat DEUS, sicut eam non quæsit ex aliis Planetis innumeris, uti etiam mundis possibilibus, quos condere poterat Omnipotens Dominus? Potuit DEUS ab omni retro æternitate vivere beatissimus absque ulla creatura, cur id non poterit cum determinato, quem sibi liberrime præfixit, creaturarum numero? Sicut habuit DEUS fines sapientissimos, cur non plures mundos, pluresque in quovis homines produxerit, sic etiam habuit, cur in sola terra, non item in Planetis cæteris eosdem esse homines voluerit. Fines istos scrutari, nostrum haud est.

§. IV.

DE MOTU, ET PHASIBUS LUNÆ.

729. **M**otum Lunæ quod concernit, is admodum intricatus est. Tres potissimum diversi motus in ea attendi solent. Primus est, quo, dum Luna ab Oriente in Occidentem cum reliquis sideribus abripitur, aut in systemate Copernicano abripi videtur, ipsa ab Occasu in Ortum secundum seriem signorum progrediens totum Zodiacum percurrit intra 27. dies, 7. horas, 43. minuta prima,

& 5. circiter minuta secunda; atque hæc Lunæ revolutio dicitur mensis periodicus. Quoniam autem ipse etiam Sol intra mensem periodicum 26. circiter gradibus in Ortum motu suo annuo progressus est, Luna Solem intra spatium mensis sui periodici non omnino assequitur, sed duo præterea dies, cum aliquot minutis addendi sunt, ut habeatur mensis synodicus, seu illud temporis intervallum, quod ab uno Novilunio ad alterum intercipitur, ut adeo mensis synodicus sit 29. dierum, 12. hor. 44. min. 3. circiter sec. Hinc est, quod mensibus Lunæ synodicis alternatim 29. & 30. dies civili in usu assignentur.

Hic ipse motus menstruus Lunæ est in ellipsi respectu terræ excentrica, adeoque Luna suum habet apogæum, & perigæum; ex quo sequitur, diametrum Lunæ apparentem variam esse debere. In apogæo est 29. min. & 39. sec. in perigæo continet diameter hæc 33. min. 47. sec. Neque eadem semper est motus hujus velocitas; in apogæo est tardior, in perigæo velocior. Eadem ellipsis orbitæ lunaris non congruit cum Ecliptica, sed ad hanc est inclinata sub angulo 5. gr. 1. min. 30. sec. proin Eclipticam geminis in punctis interfecat, quæ puncta dicuntur *Nodi*, alter quidem Nodus *ascendens*, seu *caput Draconis*, alter vero Nodus *descendens*, seu *cauda Draconis*. Ab illo discedens Luna ultra Eclipticæ planum ad Boream excurrit; ab hoc ad Austrum declinat. Nodi isti non sunt immobiles, sed ab ortu in occasum spatio 18. annorum, & 7. circiter mensium circuitum suum absolvunt ita, ut post hoc temporis intervallum Nodi gemini eandem fere in Ecliptica positionem obtineant.

730. Alter Lunæ motus est circa axem proprium, seu motus *vertiginis*. Luna namque semper idem hemisphærium telluri obvertit, quod fieri non posset, nisi Luna identidem circa proprium axem volveretur, idque lege tam stabili, ut motus vertiginis cum motu revolutionis periodicæ exacte congruat, quemadmodum apparet in homine, peripheriam alicujus circuli majoris ita percurren- te, ut faciem semper obvertat centro circuli: hic enim finito cursu suo eodem prorsus modo se circa seipsum convertit, ac si consistens in centro semet gyrasset, id quod alius extra circulum consistens facile advertet, cum modo faciem, modo latera, demum etiam tergum hominis ita per circuli peripheriam incedentis sit conspecturus.

731. Tertius Lunæ motus dicitur motus *Librationis*,

aut, ut alii loquuntur, *Trepidationis*, quo fit, ut, quamvis Luna eandem ferme disci sui partem oculis nostris obvertat, id tamen non omnino exacte eveniat. Motum hunc Galileus, Langrenus, Hevelius, alique collegerunt ex maculis novis, quæ quandoque in limbo lunari apparent: istæ enim, postquam duodecimam ferme diametri lunaris partem in disco emensæ sunt, iterum recedunt, illarumque loco aliæ ad idem spatium versus locum priori oppositum disco immerguntur. Rationem hujus petunt ex eo, quod motus vertiginis æquabiliter omnino continuetur, motus vero periodicus Lunæ per orbitam suam pluribus anomalis sit obnoxius, ac modo tardior, modo velocior: unde fieri necesse sit, ut pro diversa hac motus periodici velocitate plus, minusve de altera disci parte nobis obvertatur.

732. Distantiam Lunæ a Terra quod concernit, Cassinus eam, dum maxima est, vult esse 61. semidiametrorum terræ: proin si semidiametro terræ demus 860. miliaria Germanica, Luna, dum a nobis longissime abest, non distabit ultra 52460. mill. germ. Cl. de la Caille distantiam Lunæ a Terra maximam ait esse 64. $\frac{2}{3}$. semidiametrorum Terræ; cumque juxta Eundem diameter vera Lunæ ad diametrum Terræ sit ut 3. ad 11. $\frac{1}{7}$. erit volumen Lunæ ad volumen Terræ ut 27. ad 1384. seu ut 1. ad 51. $\frac{1}{4}$. adeoque Luna erit plus quam quinquagesies minor Tellure.

733. Ad *Phases* Lunæ quod attinet, per istas intelliguntur diversæ ejus disci figuræ, quas decursu lunationis integræ, seu mensis synodici nobis exhibet, dum modo tota quasi lumine perfusa, nunc non nisi dimidiam, alias modicissimam duntaxat sui partem illuminata nobis apparet: quamvis enim integrum semper Lunæ hemisphærium a Sole illustretur, tamen, quia non eodem semper loco consistit, sed in orbita sua circa terram volvitur, situm suum respectu Solis & oculi in Terra existentis identidem mutat, ex qua situs mutatione evenire necesse est, ut varia nobis identidem ejus appareat facies.

Sic in Figura 94. Tab. X. dum Luna existens in *a* ita cum Sole conjungitur, ut inter Solem *S* ac Terram *T* sit media, totum equidem hemisphærium superius a Sole illuminatur; at, ut ex legibus Optices patet, nihil hujus luminis ad oculum in *T* pertingit, proin huic non nisi he-

hemifphærium Lunæ inferius omni luce vacuum obvertetur. Atque hoc in fitu dum Luna verfatur, dicitur *Novæ*, ac *Novilunium*, aut *Neomenia*. Quando autem verfatur in orbitæ fuæ puncto *e* Soli directe oppofito ita, ut Solem inter, & Lunam media fit Terra, cum in hoc fitu hemifphærium illuftratum directe respiciat Terram, etiam oculus in *T* exiftens illud plene illuminatum cernet, ficque dabitur *Plenilunium*, feu Luna *Plena*. In fitu priore dicitur Luna efle in conjunctione, in fitu posteriore autem in oppofitione cum Sole. Quando hemifphærium Lunæ a Sole velut lateri illius adftante, illuftratum potiore partem oculum in *T* respicit, fimul tamen aliquam partem lucidam abfcondit, uti in *d*, & *f*, Luna dicitur *Gibbosa*, id quod quatuor ante & post Plenilunium diebus accidit, eo tamen cum discrimine, quod ante Plenilunium gibbus parte finiftra, post vero parte dextra emineat. Dum hemifphærii illuminati mediam duntaxat partem nobis exhibet, Luna *Dichotoma*, feu *Biffecta*, ac diuidiata appellatur. Si post Novilunium hoc contingat, dicitur efle *prima Quadratura*; fi post Plenilunium, *Quadratura ultima*. Denique dum Luna a Sole ita refpiciatur, ut maiorem faciei radiantis partem ab oculis noftris avertat, ut fit, dum Luna ex *a* movetur verfus *b*, vel ex *b* verfus *a*, *Falcata*, feu *Cornuta* dicitur: tunc enim falcis infiar apparet, ac veluti cornua geftare videtur.

§. V.

DE MERCURIO, ET VENERE.

734. PRÆ cæteris Planetis omnibus Soli viciniffimus eft Mercurius adeo, ut ultra 28. gradus ab eo nunquam recedat: unde fit, ut radiis folaribus ferme femper immerfus raro admodum oculis fe fe noftris indulgeat. Movetur, ut alii Planetæ, in ellipfi, eaque valde excentrica; cum juxta Cl. Caffini calculum in aphelio a Sole diftet 10274. femidiametris terræ, in perihelio autem non nifi 6754. Orbitam hanc fuam percurrit intra 87. dies, 23. horas, 15. $\frac{1}{2}$. minuta, ut vult Cl. de la Caille. Diftantiam Mercurii a Terra maximam ftatuit Cl. Caffinus efle 33000. Semidiam. terr. mediam 22000. minimam 11000. inde etiam diameter ipfius apparens admodum varia eft nunc 8. nunc 16. minutorum fecundorum; vera autem illius diameter ad diametrum Terræ fe habet ut 1187. ad 2865.

2365. Quoniam videri Mercurius non potest, nisi dum longius a Sole digreditur, hoc autem nunquam fit in ejus oppositione cum Sole, ideo per telescopia visus nunquam nobis apparet rotundus, sed vel gibbosus, vel dichotomus, vel etiam falcatus, ferme ut supra de Luna diximus; cumque semper, quando apparet, Horizonti, vaporibus plerumque obfito, sit valde propinquus, ægerrime distingui, ac determinari ipsius figura potest. In suo per Solem transitu visus quibusdam est figuræ ovalis, aliis figuræ sphaericæ, vel ab hac non multum recedentis. Denique, cum nullæ in ipsius disco notatæ hucusque maculæ sint, certo definiri haud potest, an, quantoque temporis intervallo circa axem suum gyretur; quamquam ex analogia cum Planetis cæteris motus iste vertiginis Mercurio quoque jure tribui posse videatur.

735. Post Mercurium a Sole proxime distat Venus, astrum splendidissimum. Distantiam ejus a Sole maximam statuit Cassinus 16016. Semid. terr. minimam 15796.; a Terra autem in apogeo illam distare vult 38000. semid. terr. in perigeo 6000. Orbita Veneris Solem & Mercurium, non item Terram includit; hanc juxta Caillium percurrit intra 224. dies, 16. horas, 48. min. 20. sec., intra quod tempus illa bis cum Sole conjungitur, semel, quando Sol Venerem inter, & Terram est medius, & hæc vocatur conjunctio superior; dein, quando Venus media est Solem inter, & Terram, quæ conjunctio inferior dicitur. In sua circa Solem revolutione 47. circiter gradibus a Sole digredi cernitur, & oculis telescopia armatis easdem omnino phases exhibet, quas Luna in revolutione sua circa Terram.

Nempe dum Venus post conjunctionem superiorem ex parte orientali e radiis solaribus sensim emergit, atque adeo post occasum Solis supra Horizontem aliquantum eminet, apparet proxime rotunda, & parva admodum; quia tunc supra Solem existens hemisphaerium illustratum sepe totum nobis obvertit. Quo magis dein a Sole recedit versus Orientem, crescit magnitudo ejus apparens (fit enim Terræ identidem vicinior) pars vero illuminata, quæ nobis videtur, decrescit, quemadmodum fit in Luna a Plenilunio usque ad Quadraturam ultimam. Lunæ dichotomæ similis est in maxima a Sole digressionem, ubi cum Sole relate ad Terram in situ hoc suo proxime angulum rectum efficit. Quando dein fit retrograda, & ad Solem accedit

accedit propius, sensim evadit corniculata, ac demum radiis solaribus iterum immersa pertingit ad conjunctionem cum Sole inferiorem. Omni porro hoc tempore, quo motu suo diurno Solem sequitur, atque adeo post illum nobis occidit, vocari solet *Hesperus*. Postea, dum iterum e Solis radiis emergens ante Solem nobis oritur, *Phosphorus*, aut *Lucifer* dici solet, atque ab hac conjunctione crescit denuo, & in maxima a Sole digressionem evadit dichotoma; demum ad Solem propius sensim accedens fit iterum plena, quorum ratio ex N. 733. facile eruitur.

736. Diametrum Veneris apparentem ex observationibus constat esse nunc 22. nunc 42. nunc etiam 73. minut. sec. veram ejus diametrum ad diametrum Terræ aliqui ajunt esse ut 4. ad 3. Recentiores alii Venerem volunt esse æqualem Terræ. Figuram ac superficiem Veneris asperam & inæqualem esse, quemadmodum illam Lunæ, inde deducunt, quod, dum falcata aut dichotoma telescopiis inspicitur, margines lucis & umbræ non sint æquales, sed ferræ instar dentati. Maculas quoque in illa observasse scribitur Cassinus; & quoniam maculæ istæ non eodem semper consistunt loco, jure arguit, ipsam quoque circa axem suum motu vertiginis rotari, quæ revolutio 24. circiter horarum spatio peragatur. Sunt quoque ex Recentioribus, qui Veneri satellitem aliquem attribuunt, inducti ad id observatione Cassini, qui casu aliquando observavit phænomenon aliquod prope Venerem, cujus phases eadem fuerint, quæ tum erant Veneris ipsius. Equidem per annos complures satelles hic a nullo postea Astronomorum observari unquam potuit, usque dum anno 1740. 3. Novembris eundem ope tubi Catadioptrici denuoprehenderit Cl. Schort Scotus. Quia tamen Astronomi alii omni licet adhibita industria hunc Veneris satellitem invenire interim non potuere, certi quid de eo statui necdum potest.

Unum hic addo. Cum noster in hujate Universitate Mathematicum Professor elapso sæculi hujus anno 61. Veneris per Solem transitum curatius observaret, is intra mediam, & horam quintam matutinam juxta Meridianum Ingolstadiensensem in medio circiter Veneris disco advertit emicans punctum aliquod plene lucidum, per aliquot non nisi momenta ibidem perdurans, tum vero toto observationis tempore haud amplius redux. Et licet duran-

te

te hoc phænomeno telescopium hinc inde moverit, ac proin discus Veneris ad alias semper tum vitri ocularis, tum & interpositi vitri fumigati partes fuerit delatus, punctum tamen istud eundem ad sensum locum semper in disco Veneris occupavit, ut adeo nulla hic illusio optica a vitris provenire potuerit, nec videatur esse ratio, cur ea illusio adscribenda foret ipsi oculo, eoquod phænomenon brevi duntaxat tempore durarit. Quodsi re etiam ipsa punctum ibi lucidum apparuerit, inferendum sane foret, veneris corpus esse perforatum, ut adeo per foramen istud promicare lumen Solis tamdiu debuerit, dum motu vertiginis eum Venus situm obtinuerit, in quo nulli jam per hiatum istum radii pervenire ad oculum potuerint. Noluit vir providus in observatione isthac sua, typis publicis mandata, hac de re mentionem facere, ne rem prorsus novam, ac incertam Orbi literato præmature venditare velle videretur. Certius quid hac super re statuet sagax Posteritas.

§. VI.

DE MARTE, JOVE, ET SATURNO.

737. **T**Res isti Planetæ dicuntur superiores, quia in Systemate Tychonico periade ac Copernicano semper supra Terram versantur, istamque orbitis suis complectuntur. Horum primus ac terræ proximus est Mars, cujus distantiam a Terra maximam statuunt 59000. semidiametrorum Terræ, minimam vero non nisi 8000. ut adeo Mars perigeus plus quam septies propinquior Terræ sit, quam dum est apogeus. Ejusdem distantiam a Sole maximam Cassinus vult 36630. semid. terr. minimam 30426. Motum suum periodicum Mars absolvit intra 686. dies, 23. horas. 30. min. Juxta eundem Cassinum diameter illius apparens, dum est in perigeo, complectitur 30. minuta secunda, in apogeo duntaxat IX. sec. juxta alios adhuc pauciora. Vera illius diameter quibusdam est $\frac{2}{3}$, aliis $\frac{3}{4}$. diametri terrestris; ipsumque Martem asserunt quinquies esse minorem Terra. Plures subin in hoc Planeta observantur maculæ, sed admodum inconstantes adeo, ut ferme singulis mensibus aliam figuram induant. Præ cæteris in ejus medio eminet macula coloris cuprei, quæ *Umbo Martis* dicitur; cumque

ma.

maculas istas ab ortu in occasum volvi observatum sit, inferunt, Martem motu vertiginis circa axem proprium revolvi spatio 24. hor. & 40. min.

738. Martem, dum a Terra longius recedimus, excipit Jupiter, Planeta post Venerem aspectu maximus, tamque nitido ac vivaci lumine fulgens, ut per istud vix a Venere discernatur. Apogeus juxta Cassinum a Terra abest 143000. semid. terrestr. perigeus vero 87000. A Sole juxta Eundem Cassinum in aphelio distat 119900. semid. terrestr. in perihelio 108900. semid. terrestr. Orbitam suam percurrit intra 4332. dies, 12. horas; seu intra 11. annos (si cuivis tribuantur 365. dies) & 317. dies, 12. horas. Diameter ipsius apparens modo est 31. modo 50. sec. Vera autem illius diameter ad diametrum Terræ se habet quamproxime ut 27. ad 1. adeoque corpus Jovis erit ad Terram proxime ut 729. Alii volunt Jovem plus quam millies esse majorem Terra, alii omnino censent Terram ad Jovem esse ut 1. ad 10397. In ipsius disco variz subin deprehenduntur macule, sæpe etiam plures quasi fasciæ aut zonæ obscuriores, inter se fere parallelæ secundum directionem viæ, quam describit motu periodico. Numerus istarum non semper est idem; nunc una, nunc duæ, ordinarie tres distinguuntur; ea autem, quæ semper fuit notata, latior est reliquis, sita in parte disci boreali haud procul a centro. Ex observationibus, quas per annos complures uterque Cassinus instituit, habetur, Jovem motu vertiginis circa axem suum revolvi intra 9. horas, 56. minuta.

739. Jovem comitantur satellites quatuor, qui & ipsi lumen suum a Sole recipiunt, ut vel ex eo patet, quod, dum Jovem inter & Solem transeunt, umbram, seu maculam quamdam nigram in discum Jovis projiciant, atque ab ipsius etiam Jovis umbra absorbeantur. Ille, qui Jovi proximus est, 3. circiter Jovis diametros distans, revolutionem suam periodicam absolvit intra 1. diem, 18. horas, 28. minuta prima, & 36. sec. Alter $4\frac{1}{2}$ diametris distans eandem absolvit intra 3. dies, 13. horas, 18. min. 52. sec. Tertius 7. diam. a Jove remotus infumit 7. dies, 3. horas, 59. min. 40. sec. Quartus denique $12\frac{1}{3}$ diam. distans cursum suum absolvit spatio 16. dierum, 18. hor. 5. min. 6. sec. Habetur porro ex observationibus, quod dum satellites isti infra Jovem

per

per hujus discum transeunt, majorem in hunc umbram projiciant, quam spectata eorum magnitudine apparente esse hæc umbra deberet; plerumque etiam in eo loco, in quo satelles ita transiens existit, notatur parva aliqua & obscura macula minor, quam sit ipsius umbra in Jovem projecta; ex quibus inferunt, satellites hos constare partibus ad lumen reflectendum non ubique æqualiter aptis, proin etiam in ipsis dari maculas seu partes cæteris obscuriores, id quod ex eo confirmant amplius, quod satelles quartus, alias omnium minimus, subin maximi speciem præferat, tertius vero, qui cæteris major esse censetur, quandoque minor omnibus appareat. Horum ratio haud dubie erit, quod isti quoque Satellites motu vertiginis circa axem suum gyrentur, atque ita nunc partes lumini reflectendo magis, nunc minus aptas nobis obvertant.

740. Planetarum omnium a Sole, ac Terra remotissimus est Saturnus a Terra distans in apogeo 244000. semid. terr. in perigeo 176000. Distantia ipsius a Sole maxima juxta Cassinum est 221870. minima 197802. Motum periodicum juxta Caillium absolvit intra 10759. dies, & 8. horas; juxta Cassinum intra 29. annos, 174. dies, 4. horas, & 27. min. finimirum hic quoque anno cuivis tribuantur 365. dies. Diameter Saturni apparet quandoque est 17. min. sec alias etiam 24. Vera illius diameter ad diametrum Terræ juxta aliquos se habet ut 20. ad 1. juxta alios ut 25. ad 1. Hinc neque in definienda Saturni magnitudine conveniunt Astronomi, dum aliqui volunt, eum 980. alii 3378. vicibus esse majorem Terra. Figura ipsius ferme globosa est; sed globum hunc circumdat annulus, seu corpus aliquod circulare planum, & omni ex parte a Saturni corpore separatum. Annulus hic pro diverso, quem respectu Solis & oculi habet, situ juxta leges Opticæ ipse quoque diversus apparet; dum Solem & oculum oblique respicit, Saturnum veluti in ellipsi conclusum, aut lucidis utrinque ansis instructum cernimus; dum ita Solem respicit, ut planum ejus radiis e Terra versus idem ductis sit proxime parallelum, cum respective ad tantam distantiam non habeat sensibilem crassitiem, omnino disparet. Quid annulus iste sit, Astronomorum nullus definire ausus hucusque est. Cassinus junior arbitratur, eum aliud non esse, quam congeriem satellitum, qui omnes in eodem plano

plano existentes circa Saturnum revolvantur, molis autem tam exiguae sint, ut seorsim videri nequeant, simul tamen adeo sibi invicem vicini, ut in situ obliquo aspecti instar unius corporis continui omnes appareant.

741. Nullae in Saturno deprehenduntur maculae; quandoque tamen una, vel duae fasciae pallidae in linea recta secundum directionem diametri majoris annuli dispositae apparent. Sub finem Martii 1719. tempore, quo annulus Saturni omnino disparuit, deprehendit Cassinus in disco Planetæ hujus tres fascias inter se fere parallelas, & in linea recta dispositas. Media illarum, quæ erat reliquis debilior, provenit ab umbra annuli in Saturnum tunc projecta; reliquas duas, priore magis sensibiles, suspicatur Cassinus aliud non fuisse, quam nubes in atmosphæra Saturni, ipsum etiam annulum involvente, suspensas.

742. Satellites Saturnus numerat quinque, quorum unum primus detexit Hugenius, reliquos Cassinus. Moventur isti motu ipsi Saturno communi; circa hunc vero revolutiones suas absolvent temporibus inæqualibus, quemadmodum inæqualis est eorum a Saturno distantia. Qui proximus Saturno est, & vix integra diametro annuli a Saturni centro distat, revolutionem suam absolvit intra 1. diem, 21. horas, 18. min. 27. sec. Secundus $1. \frac{1}{4}$. ejusdem diametri distans cursum suum peragit intra 2. dies, 17. horas, 41. min. 22. sec. Tertius $1. \frac{3}{4}$. distans insumit 4. dies, 12. horas, 25. min. 12. sec. Quartus distans 4. diametros annuli orbitam suam absolvit intra 15. dies, 22. horas, 41. min. 14. sec. Quintus denique 12. diam. distans intra 79. dies, 7. horas, 48. min.

§. VII.

DE ECLIPSIBUS PLANETARUM.

743. **E**Cliplin, si sensu magis proprio loqui velimus, dicimus defectionem lucis in corpore antea illuminato; in genere Eclipsin vocant disparitionem fidei, aut defectionem lucis in sidere, ortam ex corporis ejusdam inter ipsum & Solem vel Terram interpositione. Cum jam Luna corpus sit opacum, ac proprio destitutum lumine, fieri potest, ut vel ipsa mutuato, quod a Sole accipit, lumine suo privetur, atque ita Eclipsin patiatur, vel

vel ut Solem inter & Terram posita lumen Solis Telluri ad tempus eripiat, sicque Eclipsin causet. Si fiat illud prius, dabitur Eclipsis *lunaris*, si alterum, dicitur Eclipsis *solaris*. Quæ Lunæ est, vera Eclipsis est; cum ipsa lumine, quod habuit, vere privetur; Solis autem est tantum apparens; cum Sol lucem suam omnem retinens nostris duntaxat oculis subtrahatur, ut adeo Terræ potius, quam Solis Eclipsis appellari mereatur.

744. Cum, ut dictum, Eclipsis Lunæ sit vera privatio luminis, ea dari non potest, nisi Lunam inter & Solem interponatur corpus opacum, in cujus umbram dum Luna incurrit, ipsa suo lumine privetur. Corpus istud opacum, quod Lunæ Eclipses efficit, Terra est. Hæc in eodem, in quo Sol est, Eclipticæ plano semper existens, necessario, ac semper umbram mole suæ proportionatam in partes a Sole averfas projicit ita, ut umbræ hujus axis pariter in eodem semper Eclipticæ plano, in quo sunt Sol & Terra, existens ipsam Eclipticam secet in puncto 180. gradibus distito ab eo Eclipticæ puncto, in quo tunc moratur centrum Solis. Et quoniam Sol & Terra corpora sunt ad sensum sphaerica, Sol autem mole sua multum superat molem Terræ, umbra Terræ figuram induet ad sensum conicam. Conus iste umbrosus eo erit longior, quo major erit Solis a Terra distantia; quo minor autem hæc fuerit, eo brevior erit conus umbræ terrestris, ut ex datis N. 101. & seqq. Opticæ principiis patet.

745. Ex his jam facile eruuntur, quæ seu tempus, seu quantitatem Eclipsis lunaris concernunt. Et primo quidem nulla unquam in Luna Eclipsis dabitur, nisi circa tempus Plenilunii, quo Luna a Sole 180. gradibus distat: cum enim axis conii umbrosi, in quo Luna suo privanda lumine est, æquali intervallo a Solis centro distet, Luna conum hunc umbrosus non ingreditur, nisi dum & ipsa eodem circiter intervallo a Sole distare incipit, quod Plenilunii duntaxat tempore contingit.

Secundo. Non tamen in omni Plenilunio dari potest Eclipsis lunaris. Nempe sicut Sol, ita etiam axis conii umbrosi semper versatur in Ecliptica; orbita vero Lunæ, ut dictum N. 729. non plene coincidit cum plano Eclipticæ, sed ad istud inclinata est sub angulo 5. circiter graduum, nec nisi in duobus punctis, quæ *Nodi* dicuntur, planum istud intersecat. Unde fieri non potest, ut Luna in conum hunc

hunc umbrofum incurrat, atque inde Eclipfin patiatur, nifi in iis Pleniluniis, in quibus Luna vel in alterutro ex his Nodis, proin in aliquo Eclipticæ puncto exiftit, vel faltem tam modico intervallo ab Ecliptica abeft, ut ejus latitudo minor fit, quam fumma femidiametrorum umbræ, ac Lunæ. Cum igitur pro cafu, quo Luna eft perigea, Sol autem apogeus, femidiameter umbræ in loco tranfitus Lunæ fit 49. min. 40. fec. femidiameter vero Lunæ apparens tunc fit 16. min. 22. fec. nulla hoc cafu erit Eclipsiſ, fi latitudo Lunæ tempore Plenilunii non fuerit minor quam 66. min. 2. fec. quæ eft fumma utriusque femidiametri. Pro cafu autem, quo Luna eft apogea, Sol perigeus, cum femidiameter umbræ fit 43. min. 50. fec. femidiameter Lunæ 15. min. Eclipsiſ non erit, nifi Lunæ latitudo minor fuerit 58. min. 50. fec.

746. Quantitatem Eclipſeos ſi ſpectemus, aliæ ſunt *partiales*, aliæ *totales*, æque vel *cum*, vel *ſine mora*. Si Plenilunium contingat tunc, quando Luna exiftit in ipſo Nodo, adeoque centrum Lunæ congruit cum axe conii umbroſi, erit Eclipsiſ *centralis*, & hoc ipſo totalis cum mora; quia diameter conii umbroſi in loco, in quo Luna tranſit, ſemper major eſt, quam fit diameter apparens Lunæ. Quodſi Luna tempore Plenilunii haud equidem verſetur in ipſo Nodo, tam modico tamen intervallo ab Ecliptica diſtet, ut latitudo ejus una cum femidiametro Lunæ fit minor femidiametro umbræ terreſtris, dabitur Eclipsiſ *totalis cum mora*; eoquod tunc Luna per aliquod temporis ſpatium in umbra Terræ fit permansura. Si vero tempore Plenilunii tantum ab Ecliptica abſit Luna, ut ejus latitudo una cum femidiametro Lunæ adæquet femidiametrum umbræ, erit quidem Eclipsiſ adhuc *totalis*, ſed *ſine mora*. Si denique latitudo Lunæ minor quidem fuerit, quam fumma femidiametrorum Lunæ, ac umbræ, aggregatum tamen ex hac latitudine & femidiametro Lunæ majus, quam femidiameter umbræ, erit Eclipsiſ non niſi *partialis*, cujus quantitatem ut in certa aliqua menſura determinare poſſint Aſtronomi, diſcum lunarem dividunt in 12. partes æquales, quas *digitos* appellant, ac durante Eclipsi notant, quot digitis Luna in ſumma obſcuratione umbræ Terræ fuerit immerſa. Et quoniam conus umbroſus longior eſt, dum Sol eſt apogeus, Luna autem in hunc ipſum conum profundius, ſive per diametrum illius majorem immergitur, quando eſt perigea, patet, cæteris paribus

Ecli-

Eclipses lunares majoris durationis fore tunc, quando Luna est in perigeo, & Sol in apogeo. Maxima porro Eclipsis lunaris duratio est 4. circiter horarum.

747. Interim ex dictis sequitur, initium Eclipsis lunaris semper incidere in partem Lunæ orientalem, finem vero in occidentalem: cum enim Luna motu proprio velocius feratur in Orientem, quam Sol, motus autem umbræ terrestris motui Solis se se accommodet, Luna passu velociori incedens umbram hanc denique assequitur, & in eam parte sui orientali incurrens obscuratur a principio quidem admodum tenuiter, donec nimirum e penumbra ipsam denique umbram ingreditur. Hanc semel ingressa vario subin colore imbuta libero saltem oculo apparet, nunc rubea, aut sanguinea, nunc cæsia, aut pallida, aut etiam punicea, qui colores adscribendi haud dubie sunt radiis solaribus ab atmosphæra terrestri in umbram varie refractis. Vid. Num. 482. Præterea ex dictis patet, Eclipsin lunarem esse universalem ita, ut ubique locorum, quibus tunc temporis Luna videndam se præbet, æqualis Lunæ portio, & æquali temporis intervallo obscurata appareat, cujus ratio est, quod Luna, dum Eclipsin patitur, lumine suo re ipsa privetur, & tantum quidem, quantum ipsa Terræ umbram ingreditur: cum igitur hanc respectu cujusvis loci æqualiter subeat, idque uno eodemque momento, Eclipsis respectu omnium erit æqualis, eodemque momento omnibus incipiet, ac finietur, licet non easdem populi isti omnes nuimeraturi sint horas, sed pro differentia Meridianorum diversas.

748. Inde est, quod ex observationibus Eclipsium lunarium erui facile possint Longitudines Geographicæ locorum, in quibus institutæ observationes sunt. Modum ita ferme proponit Cl. de la Caille Lect. Elem. Astron. N. 824. Edit. Vienn. Cum phases Eclipsium Lunæ universales sint, manifestum est, quod, si duo observatores, in diversis locis positi, eandem phasin eodem temporis momento habeant, uterque locus sit in eodem Meridiano terrestri, adeoque cognita longitudine loci unius, certum fiat, alterius eandem omnino esse longitudinem. At si uterque observator eandem phasin diverso spectet tempore, evidens est, eos sub diversis Meridianis esse constitutos, quorum differentia sit differentia temporis observati in gradus conversa, horæ uni tribuendo 15. gradus. Patet denique locum in quo phasis tardius est observata, esse orient-

taliorem altero, quippe qui prior ad Meridianum venerit, ac altero citius habuerit Meridiem. In exemplo. Sit in loco A immerfio Lunæ in umbram obfervata hora 12. 19. min. 13. fec. emerfio autem hora 13. 59. min. In loco B. obfervata fit immerfio hora 8. 11. min. emerfio hora 9. 51. min. Differentiæ funt 4. hor. 8. min. 13. fec. & 4. h. 8. min. 0. fec. Si accipiat medium, videlicet 4. h. 8. min. 6. fec. & convertatur in gradus, liquet, locum B, ubi minus temporis numeratum fuit, eſſe loco A occidentaliorem 62. gr. 1. min. 30. fec. Et hinc poſita longitudine loci A 19. grad. 53. min. 30. fec. ab Infula Ferri, erit longitudo loci B. 317. gr. 52. min.

Quamvis autem, ut in ſuis Ephemeridibus Aſtronomiſis pro anno hoc 1764. editis loquitur R. P. Maximilianus Hell Cæſareo-Regius Univerſitatis Vienneniſis Aſtronomus, Eclipſes Lunæ ad determinandam Meridianorum differentiam hoc quidem ævo vix adhibendas cenſeant plerique Aſtronomorum, idque duabus maxime de cauſis, tum ob difficultatem maximam diſcernendi limites umbræ a penumbra, qua fit, ut macularum obſcurationes, aut phaſes, a diverſis obſervatoribus diverſo etiam tempore & modo definiantur, prout nempe conſinia umbræ & penumbæ æſtimatione quadam ſtatuuntur; tum ob permagnam tuborum, quibus obſervatores diverſi utuntur, diverſitatem, qua fit, ut umbra magis minusve denſa exhibeatur: putat tamen Clariffimus Ephemeridum iſtarum Auctor, poſſe ex Eclipſibus lunaribus Meridianorum differentiam exacte admodum definiri, modo certæ quædam in obſervatione Eclipſeos ſerventur conditiones, quas una cum duplici methodo ſervatis iis conditionibus deducendæ Meridianorum differentiam in memorato opere ſuo recenset pag. 302. & ſeqq.

749. Eclipſin Solis non eſſe veram defectionem lucis in Sole, patet ex eo, quod, quando Sol in uno Terræ loco etiam totus deficit, in locis aliis inde remotioribus totus pro more appareat lucidus. Eclipſis itaque Solis inde provenit, quod corpus quoddam opacum Solem inter & nos interpoſitum benefici hujus ſideris radios ad tempus nobis eripiat. Corpora ejusmodi opaca, quæ hunc ad finem apta eſſe poſſent, ſunt aut Planetæ, aut Cometæ, ut qui omnes alieno, Solis nimirum, refulgent lumine. Martem porro, Jovem, & Saturnum Eclipſin Solis cauſare non poſſe, inde evidens eſt, quod illorum orbitæ

in

in omni systemate Terram simul ac Solem complectantur; proin Terram inter & Solem interponi haud unquam valeant.

750. Mercurius, & Venus, quorum orbitæ Solem, non item Terram complectuntur, interponi quidem Solem inter & Terram possunt, Eclipsin tamen Solis, de qua hic, efficere nequeunt, ut patebit, si eorum diametri apparentes cum diametro apparente Solis conferantur: diameter namque Solis apparens est circiter 32. minutorum prim. Veneris in conjunctione diameter est proxime 1. minuti; diameter Mercurii est proxime $\frac{1}{5}$ min. proin diameter Solis ad illam Veneris est ut 32. ad 1. ad diametrum Mercurii ut 160. ad 1. cum igitur disci apparentes sint ut quadrata diametrorum apparentium, erit discus apparens Solis ad discum Veneris ut 1024. ad 1. ad discum Mercurii vero ut 25600. ad 1. atque hinc Venus, dum per Solem transit, minus quam millesimam disci solaris partem obteget, Mercurius vero ne quidem vigesies millesimam partem: ut proin illæ, de quibus hic agimus, Eclipses Solis ab istis Planetis causari non possint.

Quia tamen Venus & Mercurius corpora sunt opaca, quando per Solem transeunt, sive, quando Solem inter & Terram recta interponuntur, nigricantis instar maculæ in disco solari apparent. Fit hic Planetarum istorum per Solem transitus in illis eorum cum Sole conjunctionibus, in quibus Planetæ hi sunt vel in ipsis Nodis suis, vel istis saltem quamproximi: ab his enim si aliquanto magis remoti sint, recta per ipsos e Terris ducta respondebit cœli puncto ab Ecliptica, in qua Sol est, pariter magis remoto; proin Solem ipsum non attinget. Mercurii per Solem transitus, præmonente Keplero, & Gassendo prima vice observatus est Parisiis anno 1631. 7. Septembris, postmodum ab aliis quoque aliis annis, & juxta calculum Halleji observari denuo poterit hujus sæculi annis 69. 76. 82. 86. 89. 99. Veneris per Solem transitus rarior est, quam ille Mercurii eo etiam ex capite, quod Venus in conjunctione sua cum Sole propior sit terræ, quam in sua cum Sole conjunctione sit Mercurius, proin etiam minor ab Ecliptica aut Nodis suis distantia jam sufficiat, ut linea visualis e Terra per Venerem ducta evitet discum Solis. Prima vice hic Veneris per Solem transitus anno 1639. 24. Nov. juxta Calendarium vetus, juxta Calendarium Romanum 4. Decembris observatus est ab Horockio; a pluribus dein

anno hujus sæculi 61. 26. Maji. Idemque transitus recurret iterum anno 1769. 23. Maji; Europæ tamen vix erit conspicuus, nisi forte quoad initium iis, qui litori Maris Atlantici viciniore sunt.

751. Cometæ etsi sint corpora opaca, & ipsi suas cum Sole conjunctiones inferiores habeant, atque etiam fieri fors denique posset, ut ejusmodi conjunctio eveniat tunc, quando Cometa ab alterutro e suis Nodis haud procul abest, tamen Eclipses Solis, de quibus hic sermo, ab istis non proveniunt. Præterquam enim, quod Eclipses Solis sint satis frequentes, Cometæ autem ad ingentia intervalla suis in orbitis a Sole recedant, nec nisi multorum plerumque annorum intervallo periodos suas absolvant, ac proin raro admodum ad Solem revertantur, fors nullus adhuc suam cum Sole conjunctionem celebravit, quando sat propinquus fuerat Nodis suis; eorum certe, quorum orbitæ cognitæ jam magis sunt, conjunctio procul a Nodo semper accidit. Quodsi tamen etiam istud fieret, cum Cometæ habeant atmosphæras amplissimas, easque refringendo & reflectendo lumini maxime idoneas, licet Solem inter & Terram interpositus foret Cometa aliquis diametri apparentis satis magnæ, Solem tamen nigro quasi velo obtegere haud posset, eoquod radii solares innumeri in atmosphæra undique refracti ad oculum deberent pertingere.

752. Patet igitur, Lunam esse, cujus Solem inter & Terram interpositioni adscribendæ sint Eclipses Solis, quando nimirum Luna nos inter & Solem posita hujus radios opacitate sua nobis intercipit. Cum autem Luna non nisi in sua cum Sole conjunctione, seu tempore Novilunii, Solem inter & Terram versetur, nulla esse unquam Eclipsis solaris poterit, nisi tempore Novilunii, quo nimirum eadem est Longitudo Solis ac Lunæ. Attamen non in omni Novilunio, sed in iis duntaxat, in quibus Luna vel est in ipsis Nodis suis, vel saltem haud procul ab iis distat, haberi poterit Eclipsis Solis, quemadmodum ex dictis Num. 745. facile eruitur.

753. Quantitas Eclipsis solaris dependet tum a magnitudine diametrorum apparentium Solis ac Lunæ, tum a Latitudine apparente, quam habet Luna respectu illius loci Terræ, e quo spectatur. Si Latitudo hæc aut nulla sit, aut admodum exigua, sique Luna tunc fuerit perigea,

gea, Sol apogæus erit *Eclipsis totalis* cum aliqua etiam mora: cum enim diameter apparens Lunæ perigææ sit 33. circiter minutorum prim. diameter vero apparens Solis apogæi circiter 31. $\frac{1}{2}$. min. si Luna tempore conjunctionis nullam habeat latitudinem apparentem, adeoque centrum Lunæ congruat cum centro Solis, Sol totus a disco Lunæ obtegetur idque etiam per aliquam temporis moram, quæ tamen ultra 6. aut 9. circiter minuta prima durare non potest. Quodsi Luna habeat quidem aliquam latitudinem, eam tamen, tam exiguam, ut discus apparens Lunæ par sit tegendo integro disco Solis, *Eclipsis* erit quidem totalis sed absque mora. Si Luna sit apogæa, licet tempore conjunctionis nullam habeat latitudinem apparentem, quia tamen diameter ejus apparens tunc non nisi 29. circiter minutorum est, non afferret *Eclipsin* totalem, sed sub medium *Eclipseos* Sol undique circa corpus lunare lucidi instar annuli promicabit, dabiturque tunc *Eclipsis annularis*, qualis hoc anno 1764. respectu Londini erat illa, quam prima Aprilis observavimus. Si denique Luna talem habeat latitudinem apparentem, ut habita ratione diametrorum apparentium discus lunaris non nisi partem disci solaris possit obtegere, erit *Eclipsis partialis* mensuranda per digitos eo ferme modo, quo supra Num. 746. mensurari diximus *Eclipsin* lunarem.

754. Illud porro hic quoque ex dictis intelligi haud difficulter potest, initium *Eclipsis* solaris incidere in disci solaris partem occidentalem; quia nimirum Luna velocius mota ex ea parte discum solem ubi, nisi Luna aliquanto majorem ab *Ecliptica* latitudinem habeat: tunc enim discum solem ex parte orientali poterit attingere, & modicam saltem *Eclipsin* efficere. Sed & illud satis liquet, *Eclipsin* solem, etsi alicubi totalis illa sit, nunquam esse universalem, seu toti, cui Sol imminet, hemisphærio conspicuam. Cum enim Sol lumine suo re ipsa non privetur, Luna autem sit corpus tum Terra, tum multo magis adhuc Sole minus, ac insuper incomparabiliter major sit Solis, quam Lunæ a Terra distantia. patet, fieri non posse, ut simul ab omnibus hemisphærii terrestris, cui Sol tunc imminet, incolis corpus Lunæ etiam aliqua tantum parte disco solari immersum conspiciatur. Proin *Eclipsis*, quæ uni Terræ tractui totalis est, iis, qui aliam a priore aliquanto magis differentem

habent latitudinem, non niſi partialis erit; aliis plus adhuc in latitudine differentibus Eclipſis erit nulla. Denique & iſtud patet, fieri haud poſſe, ut Eclipſis ſolaris eodem omnibus, quibus conſpicua illa erit, tempore incipiat aut definat: cum enim Luna ab Occaſu in Ortum mota diſcum Solis ingrediatur, ob eam, quam habet, parallaxin citius diſcum hunc ſubire videbitur iis, qui Occidentem, ſerius vero illis, qui Orienti ſunt propiores. Maxima porro Eclipſeos ſolaris duratio nunquam excedet 3. horas, 8. minuta prima.

755. Methodi Eclipſin ſolarem obſervandi communiores ſunt ſequentes. Si aſſumatur vitrum coloratum, aut fumo ita illitum, ut fuligo non nimium tenuis par ſit retundendis radiis ſolaribus, poterit per illud diſcus Solis impune aſpici, atque ita Lunæ per Solem tranſitus obſervari. Si idem vitrum telescopia ante vitrum oculare applicetur, & telescopia inſtructum ſit aliquo Micrometro, obſervari ſimul poterit, quanta diſci ſolaris portio quovis tempore a diſco lunari obtegatur. Alia methodus hæc eſt. Per tubum aſtronomicum, aut etiam terreſtrem, pridie Eclipſeos immittitur Sol in cubiculum obſcuratum, & imago Solis charta candida ita excipitur, ut planum, cui affixa hæc charta eſt, radio centrali Solis perpendiculariter illuminetur. In charta ſic illuſtrata notatur amplitudo diſci ſolaris, iſque ductis ex centro ſex circulis concentricis, æquali intervallo a ſe diſtantibus, dividitur in duodecim digitos. Appropinquante dein tempore Eclipſeos tubus ita obvertitur Soli, ut imago diſci ſolaris in chartam projecta exacte ſemper reſpondeat circulo maximo in charta deſcripto, atque ope fidelis horologii, antea jam ad Lineam meridianam examinati, notatur tempus, quo incipit, quoque finitur Eclipſis, item, quo digitorum quivis a diſco lunari fuerit obſcuratus &c. Machinam porro helioſcopicam in memorata hic obſervatione adhibendam fuſius deſcribit, ac in figura exhibet P. Scheinerus *Rosa Urſine* L. II. cap. 8.

756. Cæterum ridendæ merito ſunt, quas cæca gentilitas de Eclipſibus commenta eſt fabulas. Teſte Plinio quibusdam populis error infederat, Lunam ex eo deficere, quod magicis ſagarum incantationibus cogatur in terras descendere, ut aptum ad patranda veneficia rorem in herbas deſpumaret, Luna vero contra luſtaretur, certo ta-

tamen vincenda carminibus, nisi æris tinnitu, & ingeminato undique strepitu ad feralia carmina obsurdesceret. Alii putabant, Lunam a Dracone quodam devorandam, ni is inconditis clamoribus in fugam ageretur, quo pertinet illud Juvenalis Satyra VI. vers. 439. de muliere garrula.

Verborum tanta cadit vis,

Tot pariter pelves, & tintinnabula dicas

Pulsari. Jam nemo tubas, atque æra fatiget:

Una laboranti poterit succurrere Lunæ.

Quodsi vero Solem interdum obscurari contigisset, perantiqua, & communis erat persuasio, eum mortalium scelera, vel aliud quoddam immane facinus aut jam patratum, aut brevi patrandum averfis alio oculis exhorrescere. Ista quidem ad fabulas pertinent; ast illud certum, miraculis plenam fuisse eam Solis Eclipsin, quamagnus ille mundi oculus Cæli, Terræque Domino in cruce emorienti parentavit: contigit enim illa tempore Plenilunii, quo Luna integro semicirculo a Sole abest; Luna partem orientalem disci solaris ingressa emerfit e parte ejus occidentali, postquam integris tribus horis Solem penitus obscurasset, etsi, ut ductis rite calculis deprehenditur, diameter apparens Lunæ minor tunc fuerit diametro Solis &c. ut adeo Magnus Areopagita Dionysius visa hac Eclipsi jure exclamare potuerit: *Aut DEUS natura patitur, aut mundi machina dissolvetur.*

§. VIII.

DE VI MOTRICE ASTRORUM.

757. **F**UERE inter Veteres aliqui, qui sidera omnia animata esse docerent, proin animam eorum illud esse principium, causamque, qua moverentur. Hos inter Platonem ac Tullium, quin & Origenem fuisse non pauci existimant, mentemque eorum expressit Virgilius, dum Æneid. L. VI. vers. 724. cecinit:

Lucentemque globum Lunæ, Titaniaque astra

Spiritus intus alit, totamque infusa per artus

Mens agitat molem.

Stoici motum astrorum ab ipso DEo immediate repelebant, qui, ut illa produxerit, ita continuo etiam moveat. Doctor Angelicus, & cum Ipso Antiquiores plerique afferebant, sidera moveri ab Angelis, quos Intelligentias appellabant. At quamvis astrorum motum a

DEo tanquam Causa prima proficisci nemo dubitet, quamvis item Angelos majoribus id genus corporibus, quemadmodum Regnis, ac Provinciis aliis, præsidet ac custodes datos a DEo fuisse, credi merito possit, velle tamen, DEum esse immediatam motuum cœlestium causam. rationi haud omnino consentaneum est: videtur enim Conditor Sapientissimus æque ac Potentissimus, sicuti effectibus cæteris, ita etiam motui astrorum non interrupto de immediata ac determinata causa providere debuisse; Angelos autem quasi Navarchos constituere, qui astra in æthereo mari gubernent, ac continuo impellant, alienum est ab eorum sensu, qui persuasum sibi habent, Philosophi esse, effectus naturales per causas physicas in ipsis effectibus fundatas explicare.

758. Recentiores plerique ad explicandos astrorum motus assumunt modo hypothesin Cl. Newtoni, etsi dein iterum ab eo, aut ejus saltem affectis quibusdam differant circa principia gravitatis ac virium motricium, quod ad substantiam hypothesi istius parum admodum refert; eoquod & vis centripeta, & centrifuga perinde detur, siue gravitas dicatur esse intrinseca, exercenda per vim attractivam, siue ea haberi dicatur a principio extrinseco; item siue motus semel inchoati continuatio habeatur per vim inertię positivam, ut volunt aliqui, siue per solam impotentiam ac indifferentiam Corporum, de quibus in Physica Generali.

Vult autem hypothesi Newtoni, motum astrorum repetendum esse a viribus centralibus (Phys. Gen. Diss. IV. Art. VII. §. II.) sic, ut motu composito ex vi gravitatis universalis, atque ex vi projectili secundum lineas rectas primum impressa circa certa centra moveantur. Nimirum vi centripeta, seu actione gravitatis Planetæ omnes versus sua centra nituntur, aut urgentur, Primarii nimirum versus Solem; secundarii autem, seu satellites primariorum, versus Planetam suum primarium, ac simul cum hoc versus Solem; vi autem projectili, siue illo motu, ad quem secundum rectam a DEo primum sunt impulsus, ab iisdem centris suis continuo nituntur recedere secundum tangentem orbitæ, in qua gyranter. Per utramque igitur hanc vim, centripetam nimirum ab actione gravitatis, & centrifugam a primo impulsu, id est, per vires centrales in orbita sua retinentur: dum enim motu

motu vi projectili respondente, in quo perseverabunt uniformiter, nisi alia vis determinans accedat, a centro semper conantur recedere, ne autem ab eo recedant, actione gravitatis versus centrum urgentur, necesse est, ut curvas & vi projectili, & actioni gravitatis accommodatas circa centrum suum jugiter describant.

759. Prout jam diversa est proportio vis projectilis ad actionem gravitatis, sic etiam curva illa, quam describent astra, diversa erit. Si vis centrifuga ex vi projectili proveniens semper sit æqualis vi centripetæ, quæ respondet actioni gravitatis, Planeta percurreret curvam circularem: stante enim ista virium æqualitate Planeta eadem vi a Sole, tanquam centro suo, removetur, motu projectionis impulsus, qua vi per actionem gravitatis versus eundem Solem urgetur, proin in eadem semper distantia a Sole tanquam centro motus sui perseverabit, atque ita peripheriam circuli emetietur. At, si vis centrifuga, & centripeta æquales non sint, circulum non describet Planeta, sed aliam curvam vel parabolicam, vel hyperbolicam, vel ellipticam, prout fuerit relatio vis projectilis ad vim centripetam ita, ut variæ rursus inde oriri possint ellipses. Et quoniam motus circa axem proprium nullo modo adversatur motui in orbita curva peragendo, quemadmodum patet in globo ligneo, manu ita excusso, ut identidem in aere motus gyretur, præter motum projectionis DEus Planetas etiam determinavit ad gyrationem circa axem proprium, unde motus vertiginis.

§. IX.

DE ASTRORUM IN SUBLUNARIA INFLUXU.

760. **D**Ubi non erat antiquis, quin fidera ad productionem variorum in tellure effectuum concurrant, seu, ut loquebantur, in sublunaria influant. Et de Sole quidem ac Luna receptum id ab omnibus ferme erat, quod per effluvia communionem quamdam cum tellure habeant. Id ipsum aliqui de cæteris quoque astris promiscue asseriebant; nec contenti erant dixisse, fidera per calorem & lucem agere in sublunaria, sed diversos insuper influxus alios ab iis fieri credebant adeo, ut singulis ferme astris diversas proprietates specificas attri-

attribuerent, dum Lunam apprime humidam, Saturnum frigidum, Martem ficcum & calidum &c. hujusmodi affectionum etiam in terra noſtra cauſam eſſe docebant.

761. Verum præter actionem lucis, & quæ hanc plerumque comitatur, caloris nullum alium influxum aſtrorum in terras admitti poſſe, vix erit modo, qui neget. Qua enim ratione effluvia quædam ſubſtantialia ab aſtris iſtis ad nos uſque propagentur, cum ejusmodi effluvia ultra fideris ſui atmophæram, ſi quam habet, utique non attollantur, quemadmodum effluvia terreſtria atmophæram globi terraquei non tranſcendunt? & ſi intra fideris atmophæram effluvia iſta etiam expellerentur, quanam a cauſa determinantur, ut ad terram potius, quam ad aſtrum aliud, aut ſpatium intermedium quodcunque deferantur? Præterea effluvia iſthæc ſphærice emanarent, proin per lineas divaricantes; quomodo vero in tanta a nobis diſtantia tam copioſa poſſent ad terram devenire effluvia, quæ ad effectus, quos inde repetunt, poſſent ſufficere? Sufficit ad iſthæc omnia actio luminis, &, qui junctus illi eſt, caloris: poſito enim calore alio alii quoque ſequuntur effectus, dilatatio, expansio, motus partium minimarum &c. ceſſante calore dabuntur alii, quies partium, conſtrictio, frigus &c. unde varias in terra evenire mutationes neceſſe eſt.

762. Hinc apparet inprimis, quam inanis ſit Aſtologia, ut vocant, judiciaria, ſive ea, quæ ſortes hominum, fata familiarum, quin & actiones ab hominis libertate pendentes ex motu & concuſſu aſtrorum prædicere præſumit, pridem a ſapientiſſimis quibuſque ſemper deridiculo habita. Diviſio quoque illa Coeli in 12. domos, in qua diviſione fundatur Horoſcopus, ſive figura conſtitutionis cœleſtis, quæ in momento, quo quis natus eſt, extitit, commentum eſt: neque enim eadem fata eveniunt omnibus, qui eodem ſidere nati ſunt, ut vel exemplo geminorum Eſau & Jacob abunde commonſtratur; nec eodem gaudent Horoſcopo, qui ſimilia fata experiuntur, dum multi ſimul intereunt naufragio, peſte, prælio, cum tamen diverſiſſimis temporibus nati ſint.

763. Sed neque illa Aſtologia, quam Aereofcopiam vocant, quæque tempeſtates, atque alias aeris mutationes ex aſtris vaticinatur, aut ratione ulla, aut experientia firmatur: quam enim inſauſtæ ſint ejusmodi

modi prædictiones, ex innumeris patet exemplis. Sic annus 1524. ob frequentes Planetarum conjunctiones in Aquario prædicebantur certa diluvia, annus tamen vix ulli serenitate concessit. Ipsi quoque hi Astrologi suis in prædictionibus inter se mirum quantum discrepant; hinc fuisse scribitur, qui plura sibi coemerit calendaria inter se pugnantis, ut diebus singulis unum potuerit seligere cælo, ac tempestatum conforme. Inferuntur tamen etiam nunc ejusmodi vaticinia calendariis quibusdam, tum ut spatium forte vacuum impleatur, tum ut consuetudini serviatur non aliter, ac dum Medici Tabulæ phlebotomicæ se subin accommodant, cujus fundamentum aliud non est, quam ordo numericus dierum a Novilunio computatorum, qui nullam utique vim habet. Ob eandem prorsus inanem numerorum relationem etiam opiniones illæ de diebus criticis, aut annis climactericis ad fabulas relegandæ sunt.

764. Denique effectus varii sunt, qui actioni Lunæ nimia credulitate ac plane falso olim attribuebantur. Ita credebatur a non nullis, lapides vi quadam peculiari a Luna arrodi, animalium ossa crescente Luna plena esse medullæ, decresciente autem non nisi sanguine repleta; quin & clavos ferreos a Luna extrahi ex asseribus non nulli asserbant. At isthæc nullam veri speciem habere, nemo non videt. Saxa enim quod concernit, quæ subin sua quasi sponte in pulverem concidunt, varia istius esse ratio potest. Et Sol quidem plurimum annorum calore saxa hæc eo ferme modo excoquere, & sensim conficere potest, quo modo actione ignis breve intra tempus in fornace conficiuntur; accedente dein humore in pulverem abibunt instar calcis. Quod de animalium ossibus dictum est, falsum omnino, confictumque esse repetitis per 20. & amplius annos observationibus ostendit Cl. Rohaultius. Tertium nemo sapiens modo suspicabitur; senescente nimirum, ac sensim putrescente ligno, maxime, si frequentior accedat agitatio & succussio, poterit utique clavus aliquis sponte quasi sua excidere; si vero lignum necdum sit putridum, tamen, dum caput clavi superficiem ligni stringit, hoc fors humidum effectum, seque extendens clavum simul elevat, quem non amplius retrahit, dum exsiccatum ipsum denuo se contrahit. Morbos quoque periodicos, quorum non pauci phasibus Lunæ se se accommodant, Medicorum peritissimi, ut jam indicatum N. 527., non actioni Lunæ,

næ, sed humorum in corpore humano existentium dispositioni, ac crescenti subin copię adscribunt. Sed diutius his immorari nullum nec temporis, nec operæ pretium esse existimo. Id unum precari sub finem libet, ut, quemadmodum *Phyſices* nostræ particularis cursum a corpore humano auspicati in *Cœlis* demum absolvimus, ita vitæ in corpore hoc degendæ cursus omnis ad illius, Cujus Magnitudinem *Cœli Terræque* prædicant, laudem ac *Gloriam* unico dirigatur.

O. A. M. D. G.



* (o) *

I N D E X.

A.

- A** Berratio luminis , favens Systemati Copernicano.
pag. 462.
- Abſis ſumma , ima. 443.
- Acidulæ. 389.
- Aeris natura. 340. altitudo. 341.
- Æquator , & ejus uſus. 440.
- Ætus Maris. ejus periodi. 363. an proveniat ab actione
Lunæ ? 365. an a meatibus ſubterraneis ? 373. an a ſpi-
ritibus ſalis &c. ? 379.
- Albedo unde ? 166. 182.
- Angulus incidentiæ , reflexionis &c. 87. opticus. 55.
an ſit meſura magnitudinum apparentium ? 68. pa-
rallacticus. 443.
- Antheræ florum. 274.
- Antimonium. 413.
- Aphelium. 443.
- Apogæum. 443.
- Aqua. ejus natura. puræ indicia. &c. 360. diverſitas. 361.
marinæ affectiones. 362.
- Arbor Dianæ. 410.
- Argentum. 410.
- Arteria pulmonaria , magna. 6. aſpera 9. earum cum ve-
nis communicatio. 20.
- Asperitas corporis unde ? 257.
- Aſtra qua vi moveantur ? 521. num in ſublunaria influant ?
523.
- Aſtologia judiciaria. 524. aereofcopica. ibid.
- Atmoſphæra Terræ. 340. ejus altitudo. 341. Solis. 485.
492. Lunæ. 500.
- Auditus organum in qua parte Auris ? 28. auditio qui
fiat ? 35.
- Aura ſerotina. 395.
- Auriculæ cordis. 10.
- Auris ſtructura , partes. 26. 27. Auris Dionyſii. 49.
- Aurora. 359. auroræ Borealis phænomena. 335. locus.
336. materia. 337.
- Aurum metallum. 409. fulminans. ibid.
- Axis oculi. 54. opticus. 55. ſpeculi ſphærici. 87. mundi ,
aut terræ. 440.

B.

INDEX

B.

- Barometron phosphorizans. [105.](#)
 Bismutum. [413.](#)
 Bolis meteoron. [383.](#)
 Boreale lumen. V. *Aurora.*
 Brachii partes. [5.](#)
 Bullularum aquearum colores. [348.](#)

C.

- Calor in quo consistat? [221.](#) communicatio caloris. [228.](#)
 effectus varii. [229.](#) intensio in speculis. [90.](#) Villetiano. [304.](#)
 Camerae obscurae phaenomena. [55.](#) constructio. [57.](#)
 Capitis humani ossa. [4.](#)
 Capra saltans meteoron. [383.](#)
 Cathetus incidentiae, reflexionis &c. [87.](#)
 Catoptricae principia in speculis planis. [87.](#) in convexis,
 & concavis. [89.](#) cylindricis, & conicis. [92.](#) cistula
 catoptrica. [88.](#)
 Cerebrum. ejus partes. [8.](#) sedes sensus communis. [260.](#)
 Chylosis ubi peragatur? [13.](#)
 Circulatio sanguinis quid sit? [16.](#) quomodo peragatur?
[17.](#) [18.](#) &c.
 Coeli solidi non sunt. [446.](#)
 Color formalis, objectivus. [162.](#) formalis consistit in solo
 lumine diversimode modificato. [163.](#) causa modificans
 est textura corporis. [164.](#) colorum diversitas non ha-
 betur a diversa mixtura lucis & umbrae. [174.](#) [182.](#)
 sed a diversa vibratione materiae luminosae. [190.](#) co-
 lores Iridis quomodo generentur? [352.](#)
 Cometae differunt a stellis fixis, & Planetis. qui crinitis,
 barbati, caudati? [469.](#) non sunt coagulum exhalatio-
 num. [470.](#) sed sidera mundo coaeva. [471.](#) eorum orbi-
 tae. [473.](#) cauda unde oriatur? [478.](#)
 Congelatio fluidorum qui fiat? [233.](#)
 Constellatio quid? earum numerus. [464.](#)
 Copernicanum systema mundi. [446.](#) motuum siderum
 phaenomena magna facilitate explicat. [447.](#) [448.](#) &c.
 Cor. ejus diversi motus. [10.](#)
 Corporis humani structura. [4.](#) & seqq.
 Costae. quot in corpore humano? [5.](#)
 Crepusculum. [359.](#)
 Cubitus. ejus partes. [5.](#)
 Cuprum. [410.](#)

INDEX.

D.

- Diaphaneitas.** varia de eadem phænomena. [118.](#) [122.](#) diversæ de ea sententiæ. [119.](#) videtur repetenda a serie pororum physice rectilinea. [139.](#)
Dies civilis. [440.](#) eorum inæqualitas unde? [442.](#) [448.](#) [454.](#)
Diffraçtio luminis. [209.](#)
Dioptrica. [92.](#) ejus principia in vitris convexis, & concavis. [94.](#) &c.
Ductilitas corporum unde? [257.](#)
Durities quid? [256.](#)

E.

- Echo** quid? [46.](#) ad eam requisita. quotuplex? [47.](#) quomodo determinanda ejus directio? *ibid.*
Eclipses Planetarum. [512.](#) Lunæ. hujus ratio. [513.](#) non datur, nisi in plenilunio. *ibid.* quantitas. [514.](#) usus ad determinandam differentiam Meridianorum. [515.](#) Solis unde? [516.](#) &c. nunquam nisi tempore novilunii. [518.](#) quantitas. *ibid.* modi aliqui eam observandi. [520.](#) miraculosa in morte Christi. [521.](#)
Ecliptica quid? [441.](#) ejus usus. [442.](#)
Electricitas quid? quomodo excitetur? [308.](#) quæ ejus phænomena? [309.](#) horum causa in genere. [310.](#) istius applicatio ad phænomena generalia. [313.](#) ad communicationem. [315.](#) attractionem & repulsionem. [317.](#) fucussionem. [328.](#) modus intendendi ejus vim. [329.](#)
Evolutionis systema in plantis. [277.](#) teneri non potest. [279.](#) &c.
Exhydria unde oriatur? [393.](#)

F.

- Fabri P. Honorati** systema de formatione seminis plantarum. [286.](#) De coloribus. [174.](#)
Faculæ solares. [487.](#) earum ortus. [494.](#)
Fames quid? [15.](#)
Ferrum. [411.](#)
Flamma quid? [302.](#) ejus pabulum. [303.](#) quid excitare flammam? [304.](#)
Fluiditas corporum unde? [249.](#)
Fœcundatio seminis plantarum. [292.](#)
Fontium origo an immediate a mari? [381.](#) an etiam ex pluviis? [382.](#) unde repetenda? [385.](#)
Frigus quid? in quo consistat? [231.](#)
Fulmen. ejus ortus. [331.](#) [332.](#) Recentiorum de isto sensu. [334.](#)

L

G.

INDEX.

G.

Glacies. V. *congelatio*.

Glandulæ in corpore humano quid? 7. pinealis, pituitaria. 8.

Grando unde oriatur? 394.

Gustus organum. 210.

H.

Hæmatosis ubi peragatur? 15.

Halo. ejus origo. 355. colores. 356.

Harmonia sonorum quid? 37. proportio harmonica tonorum. 38.

Horizon, verus & apparens. ejus usus. 440.

Horopecter. 55. quomodo in eo videatur objectum? 6r.

Humiditas. 254.

Hygrometrum. 254.

I.

Ichnographiæ perspectivæ principia. 75. &c.

Ideæ rerum quomodo acquirantur? 265.

Ignis natura. 30r. quid excitare ignem? 303. meteorum ignea. 33r.

Influxus astrorum an detur? 523.

Intellectus humanus. 265. ejus habitus? 266.

Iris. ejus divisio, phænomena. 346. ejus genesis. 347. &c.

Jupiter Planeta. ejus a Terra, & Sole distantia. Satellites. 510. 511.

K.

Kepleri regula de periodicis Planetarum revolutionibus &c. 460. non demonstrat systema Copernici. 461.

L.

Lævitas corporum unde? 257.

Lapidum natura. genesis. 402. divisio. 404. lapides figurati. ibid. lapis Bononiensis. 105.

Laterna magica. 99.

Lubricitas corporum unde? 257.

Lumen. non est qualitas absoluta. 99. nec consistit in effluvio particularum ignearum. 100. nec in solo nisu ambientis fluidi ad recedendum a centro lucidi. 10r. sed lux primitiva consistit in concitato ac celerrimo motu vibratorio partium minimarum corporis lucidi; lumen vero in celerrimo ac vibratorio motu materiæ æthereæ. 102.

lu-

INDEX.

luminis ortus. 103. propagatio. 105. directio. 108. intensio. 112. refractio qualis in diversis mediis? 117. quomodo ea explicanda? 147. quomodo explicanda reflexio? 155. diversa est radiorum luminis refrangibilitas. 176. unde ea repetenda? 189. Luminis diffractio unde? 209. aberratio. 462. Lumen boreale. 335. Zodiacale. 337.

Luna. 408. ejus maculae. 499. atmosphaera. 500. Motus periodicus. 503. Motus vertiginis, librationis. 504. Distantia a Terra. 505. Phases diversae. ibid.

M.

Maculae Solis. earum phaenomena varia. 486. non sunt stellulae. 488. sed exhalationes densiores e corpore solaris assurgentes. 490. earum motus. 492. Maculae Lunae. 499.

Magnes. ejus poli. vis diversa. 414. communicatio. 415. Suppositis effluviis magneticis explicatur Magnetis directio. 418. declinatio. 419. attractio. 420. communicatio. 422. Magnes artificialis. 424.

Manus. ejus partes. 5.

Mars Planeta. ejus a Terra & Sole distantia. motus periodicus. maculae. 509.

Memoria. quomodo explicanda? 262. 264.

Mercurius Planeta. ejus a Sole, & Terra distantia. motus periodicus. 506. figura. 507.

Meridianus. 441.

Metallum quid, quotuplex? 405. metallorum origo. 406. indicia. 408.

Meteora quid? 301. ignea. 331. &c. emphatica. 339. 346. aquea. 390.

Microscopium simplex, compositum. 97. auget magnitudinem visam. 98. solare. 99.

Montes plerique mundo coevi. 433. eorum altitudo. 434. ignivomi. unde istorum incendia? 435.

Motus astrorum a qua vi? 519.

Mundi systema quid? 439. Ptolemaicum. 445. Copernicanum. 446. Tychonicum. 453.

Myopes. 59.

N.

Nasus. ejus partes. 214.

Nebulae ortus. 391.

INDEX.

Nervus quid? eorum origo. 6. 8.
 Nigredo unde? 167.
 Nivis ortus. 393.
 Nubes, earum altitudo. 392. usus. 393.
 Nutritio animalis. 23. plantarum. 293.

O.

Oculus, ejus partes variae. 52. 53. vitia. 59. oculi artif-
 cialis constructio. 56.
 Odor, ejus propagatio. 215. diversitas. 216.
 Odoratus organum. 214.
 Optica quid? 62. ejus principia. 63. &c.
 Ossa, capitis, trunci, artuum. 4. 5.

P.

Parallaxis fideris. 443.
 Parelion meteoron. 356.
 Passiones. 268.
 Perigeum. Perihelium. 443.
 Perispectiva quid? 71. ejus principia de Ichnographia. 75.
 Scenographia. 80. Umbra. 86.
 Pes, ejus partes. 5.
 Petrefacta quo modo? 403.
 Phantasia, ejus leges. 260. 261.
 Phosphori naturales, artificiales. 104.
 Planetæ. 482. eorum conjunctio, oppositio. 443. statio,
 retrogradatio explicatur in systemate Copernicano. 448.
 in Tyconico. 455. Planeticolæ. 501.
 Planta, ejus partes, & structura. 273. 274. omnes nascun-
 tur ex semine proprio. 275. nulla iis inest anima. 284.
 Plantarum alimentum. 293. nutritio. 294. circulatio suo-
 ci alimentitii. 297. Plantarum morbi. 299.
 Pleura. Pleuritis. 2.
 Plumbum. 412.
 Pluviae ortus. 393.
 Poli quid? 440. altitudo poli. 441.
 Presbytae. 59.
 Prester. 393.
 Pruina. 395.
 Pulmones. 9.
 Pyrometrum. 223.

R.

INDEX.

R.

Refractio luminis. V. *Lumen*.
 Respiratio. quomodo peragatur? 24. ejus usus. 25.
 Retina oculi. 53. in ea fit visio. 59.
 Rigiditas corporum. 257.
 Ros quid, quotuplex? 394.

S.

Sal quid? 398. Salia alcalina, acida, neutra. 399.
 Sanguis. 15. ejus circulatio. 16. &c.
 Sapor. ejus diversitas. 211. 213.
 Satellites Jovis. 510. Saturni. 512. an etiam aliquis Veneris? 508.
 Saturnus Planeta. ejus a Terra & Sole distantia. motus periodicus. annulus. 511. Satellites. 512.
 Scenographiæ perspectivæ principia. 80. &c.
 Semen plantarum. 274. non omnia in ipsa mundi creatione sunt formata a Deo. 279. sed formantur ab ipsa planta. 286. idque fine anima vegetativa. 284. feminis plantarum foecundatio. 292.
 Semimetalla. 413.
 Sensatio quid? 26. ejus leges. 258.
 Sensus externi. 26. interni. 259. communis. 259.
 Sideris declinatio. 440. altitudo. 441. latitudo, longitudo. 442. parallaxis. 443.
 Signa Zodiaci. 442.
 Sol. ejus natura. 482. magnitudo, distantia a terra. 484.
 Motus. ib. Figura. 485. Maculae. 486. Faculae. 487.
 Soliditas corporum unde? 238. 239.
 Somnus. 270.
 Sonorum quid? 29. vis sonora. 30.
 Sonus primitivus, derivativus. 29. in quo consistat? 35.
 Soni propagatio. 32. diversitas, consonantia. 37. affectiones variae. 39. sonus reflexus. 46.
 Speculum. visio in isto qualis? 87. ratio per illud metiendi altitudines. 88.
 Sphaera armillaris. 439. parallela, recta, obliqua. 441.
 Spina dorsi. 5.
 Spiritus animales, vitales. 24.
 Stannum. 412.
 Stellae fixae. earum natura. 463. scintillatio, numerus. 464. distantia a Terra. 465. Stellae novae. 466. ~~stellae~~ cadentes meteoron. 383.

INDEX.

Succi minerales. [398.](#) eorum species variae. [401.](#)

T.

Tactus organum. [219.](#)

Telescopium. [95.](#) Batavicum, Astronomicum. [96.](#) Terre-
stre, Catadioptricum. [97.](#)

Temperamentorum diversitas. [271.](#)

Terra elementaris, fossilis. [396.](#) argillofæ. [397.](#) Alcalinæ.
[398.](#) globi terraquei figura quomodo determinata?
[426.](#) &c. est sphæroidica, ad polos compressa. [430.](#)
terræ magnitudo. [432.](#) Terræ motus, aut succussio-
nes. [435.](#) harum causa. [436.](#) motus vertiginis. [446.](#)

Thermæ. [389.](#)

Thermometrum. ejus usus. [236.](#) [237.](#)

Tonitru. [332.](#)

Tonorum diversitas quæ, & unde? [38.](#)

Tubæ phonicæ. [48.](#) unde earum vis intendendi sonum?
[49.](#)

Tychonicum systema. [453.](#)

V.

Vaporum in atmosphæra ascensus. [390.](#)

Vegetatio metallica. [410.](#)

Venæ quid? cava, pulmonaria, porta. [6.](#)

Venus Planeta. ejus a Sole & Terra distantia. phasæ
variae. [507.](#) magnitudo, maculæ, satelles. [508.](#) per
Solem transitus. [517.](#)

Vertebræ in corpore humano. [5.](#)

Vigilia. [270.](#)

Visio quomodo fiat? [55.](#) qua parte oculi? [59.](#)


Voluntas humana. [267.](#) ejus affectus. [268.](#) habitus. [269.](#)

Umbra. qualem corpora pro vario situ projiciant? recta,
versa. [65.](#) [66.](#) umbræ longitudinem investigandi ratio.
[66.](#) [67.](#) ratio ea mediante determinandi vel altitudi-
nem Solis supra horizontem, vel alterius corporis hori-
zonti verticaliter insistentis. [67.](#)


Z.

Zodiacus. ejus signa. [442.](#) Zodiacale lumen. [337.](#)





4211153385


























F. 48.




F. 53.




F. 49.




F. 54.




F. 50.



F. 56.





F. 55.




F. 51.



F. 57.









LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.

LIB. VII.


LIB. VII.

LIB. VII.

LIB. VII.


LIB. VII.

LIB. VII.




F.


76.



F. 77.




F. 78.



F. 81.




F. 82.




F. 80.


F. 79.









F. 83.




F. 84.




F. 85.



F. 86.



F. 87.



F. 88.



